

# **KA KOMENTARI**

**Shaphang ka Kitab Jingpynpaw**

**U IOANNIS**

**DA**

**U SOHBLEI SYLVANUS SNGI LYNGDOH, SDB.**


**KA THUP I**

**Vendrame Missiological Institute - Shillong**

**1992**

**Ka dor Rs 50/-**





**CHECKED**





# **KA KOMENTARI**


**SHAPHANG KA KITAB JINGPYNPAW**

**U IOANNIS**

**DA**

**T SOHBLEI SYLVANUS SNGI LYNGDOH, SDB.**

**KA THUP I**



**A SHON DA U BAH THER MARBANIANQ**

**Scorpio PRESS,**

**MAWKHAR - SHILLONG - 1,**

**1992'**

**Pro Manuscripto**

**Cumque Permissu Superiorum.**

# **Ka Jingainam**

**KHASI  
HA I MEIRAD  
AMALIA CARRARO GUIDOTTO  
IA IBA U BLEI U LA JIED  
BAN AI  
HA KA PYRTHEI BAD KI LUM U HYNÑIEWTREP  
IA LA U KHUN BADAP-SHYNRANG  
U SOHBLEI CAJETAN, SDB.,  
KUM U NONGPYNPHRIANG IA KA KHUBOR BABHA  
DA KA JINGSGEWHUROM BAD KA JINGSGEWHNGUH  
NGI AINAM  
IA KANE KA KOMENTARI  
SHAPHANG  
KA KITAB JINGPYNPAW U IOANNIS.**

## **ITALIAN**

**ALLA CARISSIMA NONNA  
SIGNORA AMALIA CARRARO GUIDOTTO  
LA DEGNA MADRE DEL DEGNO FIGLIO MISSIONARIO  
REV.MO SIG. DON GAETANO, S.D.B.,  
CHE CONTINUAMENTE PROCLAMA IL VANGELO  
COME SEGNO DI STIMA E DI RICONOSCENZA  
DEDICHIAMO  
QUESTO COMMENTARIO SULL'APOCALISSE  
DI GIOVANNI  
VOLUME I.**

# KA JINGKDEW

## LYNNONG

## SLA

KA 'TIENLAMPHRANG ..... i—iii

I. KA MAITPHANG (1 : 1 - 3) ..... 1—57

1. KA BYNTA I (1 : 1) : Ka Jingbatai kyntien-  
ka rukom thoh apoka-  
lyptik-u nongthoh. .... 1

2. KA BYNTA II (1:2) : Ka Jingbatai kyntien-  
ka por ka Kitab Jing-  
pynpaw-ka dawbah  
dawtyrnai-ka Hima·bah  
Roman·ki Patsha bad ka  
maneblei ia ki Kaisar. . . 30

3. KA BYNTA III(1:3) : Ka Jingbatai kyntien-ka  
Jingpule ia ka Jynthoh  
Bakhuid-ka Kitab Deute-  
rocanonical-ka jingphiah  
ia ka Kitab kumba ka  
long. .... 48

## II. KA SIENLEH I: KA

### BALANG HA KA

PYRTHEI (1 : 4 - 3 : 22) ..... 58—262

1. Ujuh u Nongthoh-ka Shithi ne ka Drama. . . 58—60

2. KA 'TIENPLIE (1 : 4- 6) : Ka rukom thoh  
shithi-Ka Jylla Asia Minor-  
ka Jingbatai kyntien. .... 61—88

3. Ka Sienpaw I : U Jisu u wan ha ka  
Burom ..... 88—94

4. Ka Sienpaw II : U IOANNIS HA  
PATMOS (1 : 2 : 11) ..... 94—104

5. Ka Sienpaw III : Ka Jingiohipaw u  
Ioannis (1:12-20). .... 104—121

6. Ka Sienpaw IV : Ki Shithi sha ki  
Balang (2 : 1 - 3 : 22). ....

Ka Shithi sha ka Balang Ephesus(2:1-7) . . . 121—144

” ” Smirna (2:8-11) . . . 144—160

” ” Pergamum(2:12-17). . . 160—183

” ” Thiatira (2:18-29). . . 183—205

” ” Sardis (3:1-6) . . . 205—219

” ” Philadelphia(3:7-13). . . 219—232

” ” Laodisea (3:14-22). . . 239—269

## KA 'TIENLAMPHRANG

Kaei kaei, kaba bha bad bad kaba don nongrim ha ka saiñdur u Blei Nongbuh Nongthaw, ka ktah ia ka longbriew manbriew jong ngi bad ngim lah lait na ka thik kumba ngim lah lait na ka lyer ba ngi ring mynsiem man ia ka khyllipmat. Bad kaei kaei kaba ktah ia ka longbriew manbriew jong ngi, ka pynsngew-tynuat bad ka khring ka tan ia ngi.

Ka Ktien u Blei, kumba ong ma-ngi ki Khristan mynta, ne ka Hukum, kumba ia ju nam ia ka da ki Longshuwa jong ngi, ka dei kawei na kine kiei kiei, kiba ktah ia ka longbriew manbriew jong ngi. Dei da ka Hukum ba u Blei u la thaw ia ngi bad dei da ka Hukum ba U la phah ia ngi sha kane ka sla pyrthei kum ki nongsynshar nongkhadar ia kiei kiei baroh. Na ka bynta jong ngi ki briew bad na ka bynta ka mariang baroh kawei, ka Hukum ka dei ka jingsdang bad ka jingpura. Ka iadei bad ngi bad ma-ngi ngi iadei bad Ka. Da ka Hukum, ngi kiew irat ha ka longbriew manbriew katkum ka saiñdur jong u Blei. Ha ka Hukum ngi long ngi man, ngi pura ngi janai; khlem ka Hukum ngi pulom bad ngi sep-ei

Te kane ka dei ka daw balei u khunbynriew um ju ngiah ia ka Ktien u Blei ne ka Hukum kumba ngi ia k dew.

Kawei na ki bynta jong ka Ktien u Blei ne ka Hukum ka dei ka Jynthoh Bakhuid, kaba kynthup 73 tylli ki Kitab, ha kaba ngi lah ban iohsngew ia ka sur ba-im jong u Blei, Uba iaikren ha ngi, Uba iai-sneng iaikraw ba ngin dup im ha ka Hok katkum ka Hukum.

Kawei na kine ki kitab, kiba khring bad tan ia ki briew, ka dei ka Kitab Jingpynpaw. Shuh-shuh, kane ka kitab, ym tang ba ka khring ia ki briew, hynrei ka da ktik ruh ia ki, khamtam eh ha kine ki Lum u Hynnjewtrep. Ym don kawei pat ka kitab jong Ka Jynthoh Bakhuid, ia kaba ki briew ki kham pula bad

Iatai nia ban ia ka Kitab Jingpynpaw, Khamtam eh ha ki nongrit nongkyndong. Ki brierw ki bang bha ban pule ia ka, wat lada ki shem jingeh khyndiat ban sngewthuh shai namarba ka rukom thoh bad ka rukom kren ka iapher 'bak-lybak na ka jong ngi. Ngi tip ba, katba ngi dang thoh ia kane ka 'Tienlamphrang, hangno re hangno, ha kine ki Lum u Hynniewtrep, ki don ki brierw kiba dang pule bad duriap ia kane ka Kitab Jingpynpaw.

Te ym don jingsngewlyngngoh eiei lada ki Khristan ki sngewtynn timer bad i msngi ban duriap ia ka, namarba ha ka ki iohi ia ka jingim jong ka Balang hyn-dai kaba la ngat ha ka shemlanot kaba shykhei hadien arphew ne laiphew snem na ka Sngi Pentekost, ka sngi kaba donburom bad kaba kmen. Bad kine kiei kiei ki iadei dur bad ka jingim bad ka jinglong jong ki Khristan ha kine ki snem kiban wan. Ngi la iohi ia ki sngi jong ka Pentekost mynba ngi la rakhe donburom ia ka Lyngkhuh-snem kaba shispah jong ka jingwan-kiew ka Khubor Babha sha kine ki Lum u Hynniewtrep. Hynrei kito ki sngi jong ka jingkmener bad ka burom ki lah lehse ban poi sha ka shemlanot ha kine ki sngi kiban wan. Bad ngim lah ban lait na ka Shemlanot ha kano re kano ka khep jong ka jingim jong ka Balang ha kine ki Lum u Hynniewtrep. Te kane ka Kitab Jingpynpaw ka long kaba deipor da shisha. Kan i arap ia ngi ban pynkreh ia lade na ka bynta kano kano ka khep ha kaba ngi dei ban shah shitom na ka bynta u Jisu Khrist bad ka Khubor Babha jong U.

Bad ngim artatien eiei ba ki Khristan baroh kin pule bad kin duriap ia kane ka jingbatai ia ka Kitab Jingpynpaw, bad ynda ki la pule bad puseh bha, kin phah ia la ki jingai jingmut sha ngi khnang ba ngim dup lah ban pynbha shuh-shuh ia ka jingbatai jong ngi ha ka sienmih kaba ar,

Te namarba, ha kane ka sienmih banyngkong jong kane ka jingbatai ia ka Kitab Jingpynpaw, ka long tang kum ka jingai lad ia ki patbah Khristan ban i arai jingmut lem, ngim pynmih ia kane ka jingbatai

tang kum kata kaba ki khot ha ka Latin ka "Pro Manuscripto", kaba mut ka kopi ba la thoh da ka kti bad kumta ym pat da donkam eh la ka jingkubur shynna jong ka Balang da kaba ai la kata kaba ki khot ka "Imprimatur", kaba mut "Lah ban shon ia ka namarba kam don jingbakla ha ka liang ka Jingngeit bad ka Akor Khristan". Na kane ka shai-kdar ba, da kaba buh "Pro Manuscripto", ngim mut satia ban iaid lait ne ban leh lyndet ia ka "Imprimatur" jong ka Balang. Ha ka jingshisha, naduh kane ka khep, ngi pynkhamti ia la ki jynghoh, kiba iadei bad ka Jynthoh Bakhuid, ha ka Balang, kaba long ka Kmie bad ka Nonghikai kabym lah ban bakla ha ka Jingngeit bad ka Akor Khristan, khnang ba kan peit bad kan bishar ma-ka nadong shadong ha ka liang bad tang ha ka liang ka Jingngeit bad ka Akor Khristan, bad ma-ngi, kum ki khun batipsugi bad kiba ngeit sneng jong ka Balang, ngin pdiang beit-beit, khlem uxor eiei, ia kano kano ka sneng ka kraw kaba iadei bad ka Jingngeit bad ka Akor Khristan, namarba kito kiba shahshkor ia ka Balang ha ka jingiadei bad ka Jingngeit bad ka Akor Khristan, ki shahshkor ia u Jisu Khrist hi.

Khatduh eh, ngi sngew ba ngi dei ban singuh ia u Blei Nongbuh Nongthaw, u Nongsam bynta, ba U la plie lad plie lynti ia ngi ban pyndep ia kane ka kam na ka bynta ka Burom jong U. Ngi sngewnguh ruh ia u Bah Ther Marbanjang, uba la kloï ban shon ia kane ka kot bad ban leh ruh ia kata kaba ki khot ka "Proof Reading" na ka bynta ka Kitab jingpynpaw baroh kawei bad ia ki nongtrei baroh ha. Scio Press.

**Khublei!**

**Sohblei Sylvanus Sngi Ly ngdoh, SDB,  
Sacred Heart College,  
Mawlai-Shillong-793008.**

# Sngewbha pynbeit kí jingbakla

Sla	Lain	Bakla	Pule
5	13	Joshna	Joshua
16	13	bad ka ha	bad ka paw ha
24	41	ngiet	ngeit
29	37	kyhtien	kyntien
30	24	Lëgon	Logon
34	12	Jëronimus	Jerönimus
34	14	ba une	da une
34	20	Kitad	Kitab
47	2	eiei a ka	eiei ia ka
48	17	Kitba	Kitab
55	2	lbak-ybak	bak-lybak
60	13	2 • 1 • 22	2 : 1 • 3 :22
65	25	kumba ong	kumban ong
102	29	ka dur ka dur	ka dur ka dar
110	36	kyntiew	kyntien
116	40	u hukum ia	u hukum ban thoh ia
118	41	ka on	ka mon
123	20	ia kam	ia ki kam
146	4	ka bym nym	kabym
148	26	ki la eh	ki la leh
160	35	phin shym	phim shym
173	17	lap op	laijop
183	24	iade	lade
188	22	diakania	diakonia
190	9	neh	leh
196	30	tanong	tangon
214	22	kin khmih	kim khmih
216	38	ki dkhot	ki khot
227	27	jong U	jong u Jisu
240	16	bam-ja	bam-jai
256	33	shongbam-ja	shongbam-jai



## KA MAITPHANG (JPW 1:1-3)

1 Ka Jingpynpaw u Jisu Khrist, ia kaba u Blei u la ai ha U khnang ba Un pyni ha ki shakri jong U la kiei kiei kiba dei ban jia hashen. U la kdew da ki dak ki shin ia *kine kiei kiei* da kaba phah ia la u angel sha u shakri jong U, u Ioannis, 2 uba la ai sakhi ia ka Ktien u Blei bad ia ka jingshisha ba la pynpaw da u Jisu Khrist. U la iathuhlut kat kaba u la iohi. 3 Suk u ta u briew uba pule paitbah bad kito kiba shahshkor ia ki ktien jong *kane* ka jing*iathuhlypa*, bad kito kiba pyndep ia kiei kiei kiba la thoh ha ka, namar ka ia ba la buh ka la jan !

Kine ki lai dkhot jong ka lynnong kaba nyngkong jong ka Kitab Jingpynpaw ki long ka Maitphang jong kane ka kot baroh kawei. Ha kine ki lai dkhot, u nongthoh u iathuh lyngkot ia ka subjek jong u. Kane ka Maitphang ka don lai dkhot bad ki long ki lai bynta jong ka ha ka juh ka por.

### KA BYNTA I (1:1)

Kane ka Kitab bakhatduh jong ka Jutang Bathymmai ka sdang da ka kyntien "Jingpynpaw". Ka dei ka kyntien, ia kaba la ring jingmut na ka ktien Grik "Apokalypsis"(1), kaba mut ka jingpynpaw shynna ia kiei kiei ba ki briew, da jade hi, kim lah ban tip ne ban sngewthuh bad ki donkam ia ka jingpyni kaba shai-kdar bad ia ka

---

1. Ia ka Jynthoh Bakhuid baroh kawei la thoh ha ki lai tylli ki Ktien : ka Hebru, ka Aramaik bad ka Grik. Hynrei ia ka Jutang Bathymmai la thoh tang ha ka Ktien Grik. Te ia kane ka Kitab Jingpynpaw ruh la thoh ha ka Grik, ia kaba la ju tip kum ka "Dialektos Kini", ka ktien Salonsar naduh ka por jong u Alexander, u Bakhraw. Kane ka dei ka ktien ba ki briew ki kren naduh India haduh Rom. Ka dei ka ktien paitbah.

Namarba ba la thoh ia ka Kitab Jingpynpaw ha ka ktien Grik, kano kano ka jingring jingmut sha kano kano ka ktien ka dei bad long na ka ktien tynrai, kata, na ka Grik hi. Ngi la pyrshang ban leh kumta bad ngi la pynshong nongrim ia la ka jingring jingmut ha ka "The Greek New Testament" ba la It bad sot bniab bha da u Kurt Aland, u Matthew Black, u Carlo M Martini, Bruce M. Metzger bad

jingbatai kaba shai, khamtam eh ha ki khep jong ki jingjia bashyrkhei ha ka jingim jong ki, ki jingjia kiba ktah ia ka jingim jong ki kum ki briew bad ki Khristan.

Kane ka kyntien Grik "Apokalypsis" ka kynthup ar tylli ki kyntien: "Apo" bad "Kalypsis". Ka kyntien "Apo" ka mut hangne "na, ingai na, weng-noh, pynkynriah noh, shim noh". Ka kyntien "Kalypsis" pat de ka mut "ka jingbuhrieh, ka jingtap". Te ka kyntien "Apokalypsis" ka mut ka jingweng noh ne ka jingshim noh ne ka jingpyn-duh noh ia ka jingbuhrieh ia kaei kaei kaba ia jia ne ka-

u Allen Wikgren. Ka dei kata kaba ki khot ha ka Phareng ka "Critical Text" kaba bha tam. Ha ka Khasi ngi lah ban ong ne khot ia ka "Ka Jynthoh sot-sani".

Ba ki nongpule kin kham sngewthuh, ngin batai khyndiat ia kane. Ka Jynthoh kaba ia mib beit na u khulom jong u Ioannis, u nongthoh jong kane ka Kitab Jingpynpaw, kam don shuh. Ngim lah shuh ban shem ne loh ia ka. Ki don mynta tang ki kopi bapher bapher jong kane ka Jynthoh tyurai (Original Text). Kine ki kopi ki bun bha, hynrei ki don katto katne kiba kham kongsan bad ia kine ki riwstad ki khot ki "Codices". Ia kine ki kopi bapher bapher ngi lah ban khot ha ka Khasi ki, "Jynthoh shu-bud". Hynrei namar ka tam ka duna ha ki briew kiba kopi, ki ia mib bun ki jinglapher hapdeng kine ki kopi bad teng teng ki jingbakla ruh. Ban lait na kine kiei kiei, ki riwstad ki shim ia kine ki kopi ne ki Jynthoh shu-bud, kiba kham kongsan kumba la kdew, bad kiwei kiwei kiba ki lah ban loh, ki lanujor hapdeng jong ki bad ki sot, ki jied katkum ki aifi ki rul bad ki pynmih ka "Critical Text", ia kaba ngi lah ban khot ha ka Khasi ka "Jynthoh sot-sani" kumba ngi ong haneng Mynta ngi don kine ki Jynthoh sot-sani bad dei tang na ki ba ngi ring jingmut ia ka Jynthoh Bakhuid sha kiwei pat ki ktien jong kane ka pyrtbei. Ha ki kot komentari jong ngi, ngin sa pyndonkam ia ka Jynthoh sot-sani jong u Kurt Aland, u Matthew Black, u Carlo M. Martini, u Bruce M. Metzger bad u Allen Wikgren. U Carolo M. Martini u dei Lyngdohsad jong ka Milan ha Itali, ia uba u John Paulus II u la pynlong Kardinal. Nalor kane ka Jynthoh sot-sani ha ka ktien Grik, ngi don ruh halor ka miej jong ngi, nyngkong eh, "Ka Jutang Bathymmai jong u Trai bad u Nongpynim jong ngi u Jisu Khrist" ba la pynkylla na ka Latin sha ka Khasi da u Sobblei Elias Khariong. SDB., bad ba la lanujor bad ka Grik da u Mgr. E. Bars, nangta ia "Ka Bajibel Khasi Bathymmai" da u Sobblei H. Fantin, SDB, "Ka Jutang Bathymmai u Jisu Khrist u Nongpynim" kaba ia mib ha ka 1-1-90, bad khatduh eh ia ka "Vulgata" u Jeronimus Bakhuid. Te ka jingring jingmut jong ngi sha ka Khasi kan lapher khyndiat namarba ka dei na ka bynta ka Komentari, hynrei ha ki jingmut te kam lapher eiei, Ngil lah pyrshang ban pynlong ia kane

ban jia. Bad haba ngi weng noh ne pynduh noh ia ka jingbuhrieh, kiei kiei ki paw tyngkreiñ kumba ki long. Namarkata, kane ka kyntien "Apokalypsis" ka mut ka jingpynpaw shai-kdar, ka jingpynshai bad ka jingbatai ia kaei kaei kaba rieh, ia kaba ki briew kim lah ban tip da lade ne, lada ki iohi ia kiei kiei kiba jia, kim lah ban sngewthuh ia ka jingmut bad ki donkam ia u nongpynshai bad ia u nongbatai.

Ngi shem ia kine ki jingmut ba ngi la kdew ha-neng ha ka Jynthoh Bakhuid. Nyngkong eh, ka mut ka jingpyni ne ka jingkdew ia ka lynti ka Hok bad ka Niam ha u khunbynriew lyngba u Trai jong ngi u Jisu Khrist na ka liang jong u Blei Nongbuh Nongthaw (Lk.2:32; Rom 16:25; Eph.3:3). Ka thew ruh ia ka jingpynpaw u Blei ia ka Khubor Babha da u Jisu Khrist hi, ym da ki briew (Kal.1:12), ia ka jingpynshai kdar ia ka mon u Blei bad ia kaba U kwah ba ngin leh (Kal.2:2). Ha kine ki dkhot, u Paulus Bakhuid u ong ba u la ioh pdiang ia ka Khubor Babha beit na u Jisu Khrist hi bad haba u la kiew sha Jerusalem, u la leit da ka jingpyni shai jong u Blei ia kiei kiei kiba Ma-u hi u la saiñdur. Nangta la pyndonkam ruh ia kane ka kyntien ban mut ia ka jingpynshai ia kano-kano ka mat ne ka bynta jong ka Niam ne ka Jingngeit Khristan, kata, kum ka jinghikai-niam da uno uno u riewngeit (I Kor. 14:6,26). Shuh-shuh, u Paulus Bakhuid u pyndonkam ia kane ka kyntien haba u bat-ai ia ki jingiohi-paw bakyrpang jong u na ka liang u Blei, ha kiba u la iohi ia kiei kiei ba ki briew kim ju pat iohi bad kim ju pat iohsngew (II Kor. 12:1, 7). Khatduh eh, la pyndonkam ruh ia kane ka kyntien ban thew ia ka Jingwanpat jong u Jisu Khrist ha ka burom-syiem jong

---

ka jingring jingmut jong ngi sha ka Khasi kum ka "Revised Standard Version" ha ka rukom pynkylla khnang ba kan neh na ka bynta ki pateng ban wan.

Ha ka jingring jingmut jong ngi na ka Grik sha ka Khasi, teng teng ngim banse ban buh ki kyntien kibym don ha ka Grik khnang ba ka jingmut kan shai. Ia kine ki kyntien ngi la shon da ki dak pyrshing, khnang ba ki nongpula kin tip.

Khatduh eh, ha ka jingpynkylla-dak (transliteration) bad ka jingkyntnoh ia ki sawa-hi bad ki diphthong (ai, ei, oi) ngi la bad ia ka rukom kyntnoh kumba ka long mynta ba Athens, ym kum ka rukom kyntnoh ba la ai da u Sohblei Erasmus na Rotterdam, Holland.

U ha ka sngi ba ka pyrtnei kan wai. Ha kato ka sngi, kan paw shai ba u Blei u don barabor ha ka Hok haba U rai eiei ne u leh u kam (Rom 2.5), ha kato ka sngi u Blei un sa pynpaw haduh katno U la ieidsbun ia ki briew, bad ki Khristan, kiba iaineh haduh kaba kut, kin sa ioh ia ka burom ka ijot bad kin sa ioh ka jingkmnen ba ym lah shuh ban batai (II Thes. 1:7; I Pt. 1:7,13;4:13)

Ban pynkut ia ka jingbatai ia ka jingmut jong kane ka kyntien "Apokalypsis" ha ka Grik bad "Jingpynpaw" ha ka ktien Khasi, na kine kiei kiei ba ngi la ong haneng, ym lah shuh ban artatien ba ka mut ka jingpynpaw shai-kdar, ka jingpyni shynna, ka jingpynshai bad ka jingbatai ia kiei kiei kiba rieh, ia kiba ki briew kim lah ban tip da lade hi, hynrei ki dei hi ban tip bad kim lah ban sah ha ka umdum namarba kine kiei kiei ki ktah ia ka jingim jong ki ha kane ka pyrtnei.

Mynta ngin sngewthuh shuh-shuh ia ka jingmut jong kane ka kyntien "Jingpynpaw" na ka jingbatai ia kiwei pat ki bynta jong kane ka dkhut kaba nyngkong kumne harum :-

(i) U JISU KHRIST : Ha ka Grik "Iisu Khristu".

Da kine ki kyntien, u nongthoh u mut ban ong ba kane ka Jingpynpaw ka wan na u Jisu Khrist bad ka dei ruh shaphang jong U hi. Kata ka mut ba u Jisu Khrist u dei "ka subjek bad ka objek" jong ka kane Jingpynpaw. Shuh-shuh, u nongthoh u nam ia u Nongpynim jong ngi da ki ar tylli ki kyrteng : U JISU bad U KHRIST. Ka kyrteng "U JISU" ka dei ka kyrteng da kaba la jer la thoh ia U ha ka Niam ka Rukom. Ka dei ka kyrteng jong U kum u briew, ia Uba la kha ha Bethlehem na ka longkmie, ka Maria Theisotti, ha ka por ba u Kaisar Augustus u la long u Patsha jong ka Hima-bah Roman, Uba la phet sha Ijip ban lait na ki kti jong u Syiem Herod, u Bakhraw, Uba la wan-phai na Ijip, Uba la im ha Nazareth kumba laiphew snem, Uba la faid kylleng kylleng ka ri Palestina ban hikai ia ki briew ia ka lynti ka Hok katkum ka Hukum, Uba la lap halor ka Diengphna bad Uba la mihpat na ka Jingiap. Kane ka kyrteng "U Jisu" ka thew ia u briew uba la im ha ka doh bad ka snam ; ha ka histori(1).

Te um dei u bried, ia uba la shu nam ha kaparom bad um don nongrim ha ka histori, hynrei u dei u bried, uba la im ka jingim-bried kumba ka long satlak ka pyrthei.

Nalor ba kane ka kyrteng "U Jisu" ka kdew ia u bried uba la im ba ka doh ka snam ha kane ka pyrthei, ka pyni ruh ia ka jinglong jong U. Ha ka rukom pyrkhat jong ki Ju, ka kyrteng ka thew ia u bried hi, u bried, uba leh uba kam. Te ka kyrteng ka kit jingmut barabor bad ka thew ia ka jingim, jinglong bad ka jingleh-jingkam jong u bried. Bad kane ka kyrteng ka dei ban kit ka jingmut ka-ba jylliew namarba ia jied bad la ai ia ka da u Blei hi lyngba u Angel (Lk. 1:20-21). Ka kyrteng "U JISU" ka wan na ka kyntien Hebru "Joshua ne Jehoshua" bad ka mut u "Yawe u pynim, u pyllait". Kane ka mut ba u Jisu u dei ka dak ka shin, kaba kdew ia ka jingdon jong u Blei, ia Uba ki Ju ki khot "Yawe", bad ia ka jingtrei-kam jong U ha kane ka pyrthei, kata, ha ka histori. Da u Jisu, u Blei u trei bad U pyllait-im ia u paid Israel bad ia u khunbynried. Kane ka dei ka jingthmu ne ka thong jong ka jingim u Jisu: ban pynim ia u khunbynried Ban "Pynim" ka mut ban leh eiei khnang ba ka longbried manbried jong u paid Israel bad u khunbynried kan pura bad kan janai. Ka mut ban pyllait ia u paid Israel bad ia u khunbynried na kiei kiei baroh, kiba khang lad ba ka saiindur u Blei kan urlong pura ha u khunbynried Kawei na kine kiei kiei, kiba pynwit shisha ia u khunbynried, ka dei ka Pap, kaba la rung ha kane ka pyrthei bad kaba pynsniew ia ka longbried manbried. U Jisu un weng noh ia kane ka Pap bad kumta u khunbynried un sa lait-im.

---

1 Kane ka kyntien "histori" ba ngi la pyndonkam kam mut tang ia kiei kiei kiba la thoh ha ki kot da ki nongthoh histori hynrei ngi mut ia ka mariang baroh kawei bad ia u khunbynried baroh ba ka jingjai-laid jong ki shaphrang ban poi sha ka thong ba u Blei Nongbuh Nongthaw u la buh bad u la mang na ka bynta jong ki. Te ka mariang baroh kawei, u khunbynried baroh bad ki jingjia kiba ngit ban pynpoi ia ki sha ka thong, ki pynlong ka histori. Bad ki jingjia histori ki dei kito ki jingjia kiba ktah ia u khunbynried kum ka kynhun bad ia ki bried shimet shimet ruh. Kano kano ka jingjia, kabym iehnoh ia ka mariang bad ia u khunbynried kumba ki long, hynrei kaba ngit ia ki sha ka thong ba la buh, ka dei ka jingjia histori. Hynrei ka jingjia kabym ktah eiei ia ka jinglaid shaphrang jong ka mariang bad u khunbynried, kam da dei eh ka jingjia histori.

Ka kyrteŋg “U KHRIST” ha ka Grik ka long “Khristos” bad ka mut Uta, ia Uba la pynsleh kum u Nongĭathuhlupa, u Syiem bad u Lyngdoh. Kane ka kyrteŋg ka dei ka jingring jingmut na ka Hebru “Mashiakh”, kaba mut “Uba la pynsleh”. Ha ka jingngeit jong ki Ju, u Messia u dei Uta, ia Uba u Blei un phah un pynsleh, bad pynkyntang kum u Nongĭathuhlupa, kum u Syiem bad u Lyngdoh, Uban pynlajtfluid ia u paid Israel na ki nongshun, kiba banbeiñ ia ki ha ki bun rukom, Uban pynkhie-im ia ka Hima-bah Israel jong u Syiem Dabid bad Uban pynlong ia ka jaitbynriew Israel ka Nongsynshar ka Nongkhadar ia ka pyrtthei baroh kawei, Uban pyndem ngon ia kiwei pat ki jaitbynriew hapoh ka jingsynshar jong u paid Israel, Uban pynĭeng rasong ia ka Niam ka Rukom, ia ka jingmane-blei kaba shisha, Uban pynskhem hi triang ia ka Hima u Blei. Te da kane ka kyrteŋg u nongthoh u mut ban ban tyngeh ba u Jisu u dei Uta, ia Uba ki paid Israel bad u khunbynriew ruh ki la khmih lynti. Ka long kum ka jingkhmih-lynti jong ki Longshuwa jong ngi ia Uta, u Balah u Bañai, u Syntai u Bulot, u Kynrem u Lyndan, u Simpah Simsong bad u Syiem Longdoh Longpun, Uban pynbit pynbiang ia ka Niam ka Rukom bad ka longbriew manbriew.

(ii) ĬA KABA U BLEI U LA AI HA U (ha ka Grik : hin edoken afto ho theos).

Ngi la ong haneng ba ka Jingpynpaw, kumba ngi la baitai, ka wan na u Jisu Khrist bad ka dei shaphang u Jisu Khrist hi. Hynrei kine ki kyntien “ia kaba u Blei u la ai ha U” ki pyni ba ka wan ruh na u Blei u Kpa, u Nongbuh Nongthaw; ki ban tyngeh, lah ban ong, ba u Blei u dei ka thymmei bad ka tyllong jong kane ka Jingpynpaw. Bad u Blei u dei ka thymmei bad ka tyllong jong ka jingpynpaw, namarba baroh kiei kiei ki wan tang na u Blei Nongbuh Nongthaw. Dei Ma-u Uba thaw ia kiei kiei baroh bad kumta ym don eiei kaba lah ban lait na U. Na u briew ym mih eiei ruh em. U briew u lah tang ban ithuh ia kiei kiei kiba u Blei u la thaw bad la buh. Ka shong tang ha u Blei ban pynpaw ha u briew ia kiei kiei kiba u la thaw.

---

1. Ka pynkylla-dak ia ki kyntien Hebru sha ka Khasi kam da biang eh namarba ngim don type-writer Hebru.

Hynrei u Blei u kwah ba ki briew kin tip bun kiel kiei kiba iadei bad ka saifdur jong U. Lyngba ka bor-pyrkhat ba ki briew ki la ioh na u Blei hi, ki lah ban tip bun kiei kiei, hynrei kim lah ban tip lut baroh khoit. Khnang ban tip shuh-shuh nalor kaba ki briew ki lah ban tip da ka bor-pyrkhat jong ki, ki donkam ka jingpynpaw na u Blei Uba ieidsbun ia ki bad u Blei u pynpaw da ka jingkmén khnang ba ki briew kin dup tip bad kin dup lah ban im ha ka Hok katkum ka Hukum.

Hynrei u Jisu Khrist ruh u dei u Blei bad U ialong kawei bad u Kpa, Uba thaw ia kiei kiei da u Jisu Khrist bad lyngba u Jisu Khrist (Io.1:3; Kol.1:16). U Jisu Khrist u ioh hynta lem ha kiei kiei baroh bad u Kpa jong U, u Blei Nongbuh Nongthaw. Bad u Kpa um leh eiei khlem u Khun, u Trai jong ngi, u Jisu Khrist. Namar-kata, kumba ngi la ong haneng, kane ka Jingpynpaw ka wan na u Jisu Khrist ruh. Hooïd, ka wan na u Blei Nongbuh Nongthaw lyngba u Jisu Khrist. U Jisu Khrist u la ioh beit na u Blei ia kiei kiei kiba U pynbna bad U hikai ha kane ka pyrthei. U Jisu hi u ong, "Shisha shisha Nga ong ha phi: u Khun um leh eiei da lade; U leh tang ia kaba U iohi ba u Kpa jong U u leh. Ia kata kaba u Kpa u leh, u Khun ruh u leh (Io. 5:19). Kata kaba Nga hikai kam long ka jong Nga, hynrei ka wan na u Blei Uba la phah ia Nga (Io 7:16). Ngam ju leh eiei da lade, hynrei Nga kren ia kiei kiei kumba u Kpa u la hikai ia Nga (Io 8:28). Ngam shym kren na lade, hynrei u Kpa, Uba la phah ia Nga, u la hukum ia Nga aïu Nga dei ban ong bad aïu Nga dei ban kren (Io. 12:49-50). ki ktien ba Nga kren ha phi, Ngam kren na lade hi (Io. 14:10).. Nga la ai ha ki ia ki ktien ba Phi la ai ha Nga (Io, 17:8)". Te ka paw shynna ba kane ka Jingpynpaw ka wan na u Blei lyngba u Jisu Khrist; ka dei da shisha ka Jingpynpaw jingblei.

(iii) KHNANG BA UN PYNI (Ha ka Grik "dikse" na ka berb "diknimi" =ban pyni shai-kdar).

Da kine ki kyntien, u nongthoh u mut ban ong ba u la thoh ia kane ka kitab ban pyni shai-kdar ia kiei kiei ba ki Khristan ha kata ka por ki dei ban tip bad ban bna.

**Te** ka jingthmu jong u kam dei ban pynsngewlyngngoh  
 ia ki brieve ne ban lynshop ia ki sha ka lybuh jong  
 ka umdum, hynrei ban pynkjew ia ki sha klier u lum  
 na uba ki lah ban iohi shai-kdar ia kiei kiei baroh kiba  
 ker tawiar ia ki ha ka jingim. U nongthoh u kwah  
 hir-hir ba ki nongpule jong u kin sngewthuh shai ia  
 kaba u la thoh khnang ba kin dup tip kumno ban im,  
 kumno ban ia id ban ieng bad kumno ban leh  
 ban kam ha kito ki khep bad ki por jong ka jingjynjar bad  
 jingshabbaubeiñ jong ki Khristan. Bad une u nongthoh,  
 khlempep, u la poi sha ka thong ba u la thmu: ban  
 pynsngewthuh shai-kdar ia ki nongpule jong u. Bad  
 namarba ki Khristan, ha kata ka por, ki la sngewthuh  
 shai-kdar ia kaba u la thoh, ki la ioh jingmyntoi bad  
 jingiarap shibun na kane ka kot kaba itynnai bad kaba  
 sngewtynnai jong ka Jutang Bathymmai.

(iv) **IA KIEI KIEI KIBA DEI BAN JIA** (Ha ka Grik  
 “Ha di ienesthe”).

Hangne u nongthoh u ong ba u thoh ia kiei kiei kiba  
 jia da shisha ha kane ka pyrthei, ym ki jingphohsniew ne  
 ki jingmut-dur jong u kibym don nongrim eiei. Da kane  
 u mut ban ong ba u kwah ban thoh “histori”, ym ia ka  
 parom ne ka puriskam ne ka fikshon ne ka novel, kum-  
 ba ki ong mynta. U kwah ban thoh shaphang ki jingjia  
 ba ki Khristan ki lah ban iohi da la ki khmat, ki lah ban  
 iohsngew da ki sbkor bad ki lah ban mad da lade ruh ha  
 ka jingim jong ki hi. Namarkata, ym don kawei pat ka  
 kot histori kaba kham long histori ban ia kane ka  
 Kitab Jingpynpaw, namarba kiei kiei, kiba la thoh  
 ha ka, ki dei kiba la jia, kiba dang jia bad kiban sa  
 jia ha ka histori jong u khumbynriew.

(v) **HASHEN** (Ha ka Grik “En takhi”).

Da kine ki kyntien u nongthoh u mut ban ong ba kine  
 ki jingjia kim dei kiba jngai na ki nongpule. Ki jan bha,  
 ki la poi ha khyrdop ne ha dwar. Ki dei ki jingjia ki-  
 ban urlong hashen ne kloj-lan. Namarkata, ki Khristan  
 ki dei ban long kiba la khreh ban sngewthuh ia  
 ki bad ban saindur ia la ka jingim katkum kine ki  
 jingjia. Kim dei ban shah tyllap ha kane ka umsaw  
 kaban wan tur khlempep bad kloj-lan artad.



(vi) HA KI SHAKRI JONG U (Ha ka Grik "Tis doulis aftu"):

Hangne ngi iohi ba ka Jingpynpaw, ia kaba u Blei u la phah lyngba u Jisu Khrist, ka dei na ka bynta kawei ka kynhun-briew kaba don ha kane ka sla-pyrthei. U nongthoh u nam ia ki dkhot jong kane ka kynhun kum ki "SHAKRI". Kiei kine ki shakri? Ban jubab kyllum, ha ka Jutang Bathymmai, ki dei ki Khristan baroh, kiba la pdiang bad bud ia u Jisu Khrist kum u Trai, u Kynrad bad u Nongpynim jong ki.

Hynrei kane ka kyntien "SHAKRI" ha ka ktien Khasi kam da kit eh ia ka jingmut jong ka Grik "DOULOS", kaba mut u "MRAW" (1). Bad ka kyntien Grik "DOULOS" ka dei ka jingring jingmut bapura bad bajanai jong ka kyntien Hebru "EBEDH", kaba mut u "MRAW" hi.

Baroh ngi tip ba u mraw um dei u shakri bad u shakri um dei u mraw. Ka don ka jingrapher kaba khraw ha ka rukom pyrkhath jong ki briew ha ka Hima-bah Roman (2) U mraw u long kum ka mar ka mata,

1. Ki khun u Hynñiewtrep salonsar ki shem jingeh ban sngewthuh shai ka mut aïu ban long mraw, namarba hapdeng jong ki ym ju don mraw, hynrei tang ki shakri. Ka daw ka long ba ki khun u Hynñiewtrep ki ngeit ba ka longbriew manbriew ka don ha kajuh ka kyrdan; kum ki briew hi, ym don baheh, ym don barit; baroh ki iaryngkat. Nangta, na ka liang u Blei Nongbuh Nongthaw ruh, ym ju bna ba U la ñiew ia ki briew kum ki mraw. Ym tang kata, U la phah ia ki sha ka pyrthei kum ki Nongsynshar ki Nongkbadar. Te ki khun u Hynñiewtrep kim ju niew ia lade ki mraw jong u Blei. Ka dei kane ka daw balei baroh kïto, kiba la ring jingmut ia ka Jynthoh Bakhuid sha ka Ktien Khasi, ki la pynkylla ia ka kyntien "doul'os", kaba mut u mraw, da ka kyntien "shakri", kabym da khor eh haduh katra katta.

2. Hapdeng jong ngi ki khun u Hynñiewtrep, ym don ba lah ban kylla mraw da lei-lei ruh. Wat ia ki Dkhar ruh kim ju pynlong mraw ha ki por hyndai. Ki pynlong ia ki tang ki shakri shakor. Ka jingpynlong mraw ia ki Dkhar, khamtam eh na ka liang ki Syiem, ka sdang na Jaintiapur, ynda u Syiem Sutnga u la jop ia ki Jainia Pargana ha ka them Surma, ha ki tbain Sylbet Bad ki kyntien "u mraw u dkhar" ki sdang na Jaintiapur bad ki poi sha Sohra. Ha ka Them Ribhoi ym ju khamong u mraw u dkhar, hynrei u Dkhar shakri shakor, lada u trei shakri bad u loh bainong.

ka jynri ka jyndup jong u trai jong u. U mraw u dei ka mar-kynti ne ka ri-kynti jong u kynrad jong u. U lah ban leh ia u katba u mon. U trai u don bor wat ban pyniāp ruh ia u. Ka jingim jong u mraw ka don nadong shadong ha ki kti jong u kynrad jong u. Um lah lait na u. Ka tnga jong u mraw bad ki khun jong u ki dei ki jong u trai jong u thik kum ki khun blang khun masi. U mraw um lah ban dawa eiei na u trai. Um lah ban dawa bainong-sngi na ka bynta ka jingtrei jong u. U dei ban trei baroh shi-sngi bad baroh shi-ryta na ka bynta u kynrad jong u bad ynda la dep trei da kaba syep kaba syar, um don hok ban dawa eiei.

Hynrei u shakri (ha ka Grik "Hipiretis") u iapher na u mraw. U shakri u trei na ka bynta u kynrad, hyurei u trei na ka bynta ka bainong bad u don hok ban dawa ia ka. Um trei baroh shi-ryta. U trai-iing um don bor halor ka jingim jong u shakri. U shakri u lah ban laitluid lada u mon. Ka shong ha u ban long shakri ne ban nym long. U shakri u im bad u trei katkum ka jingjakut da ka ktien ne da ka jynthoh.

Te balei u nongthoh u pyndonkam ia kane ka kyntien "mraw", kaba shisyn-sngew ka long ka 'tien-pohjait bad ka 'tienkhlem-akor. Haba peit na ka liang ka longbriew manbriew, ka long kumta da shisha. Hynrei na ka liang ka jingidei jong ngi bad u Blei, ka kyntien "mraw" kam da bakla haduh katta-katta, namarba ngi la ioh ia kiei kiei baroh na u Blei bad ngim lah lait na U lano lano ruh. U Blei u la thaw ia ngi na ka Suda. Ka jingim ka wan na U, ka met ka phad

---

Hynrei hapdeng ki Roman, ki Grik bad ki Ju uno uno u lah ban kylla long u mraw ha ki ar rukom. Nyngkong eh, ki briew ki kylla mraw haba ki shah jop thma ha kawei pat ka jaitbynriew U Pompeius, u Riewthma ki Roman, u la jop ia ki Ju bad u la ring mraw da ki hajar hajar ngut ki Ju. Nangta, ki lah ban kylla mraw na ka daw ka Ram, Kiba bun hi ki kylla mraw lyngba ka Ram ka shah. Haba u briew um lah siew ia ka ram, ka aifi salonsar ha kata ka por ka ong ba u dei ban die lut ia kiei kiei baroh, bad lada, ynda u la die lut ia kiei kiei baroh, ka pisa kam pat biang u dei ban die ia lade-ruh ne ia ka tnga bad ia ki khun bad ban siew ne ban shu' long mraw noh hi ha u nongai-ram. Shisien ba la long mraw, ym lah lait shub, lada ym don manu mano ba sijewspah la ki.

jong ngi la thaw hi Ma-u. Ka pyrtthei mariang ruh ka dei ka jong u suda. Ngi long da shisha ka ri-kynti jong u Blei. Ka jingim bad ka jingiap jong ngi ki don ha ki kti jong U. Lada ngi long eiei, lada ngi don eiei, ka dei ba u Blei u ieidsbun ia ngi, bad u ieidsbun khlem daw na ka liang jong ngi. Kane ka lah ban long kawei na ki daw balei u nongthoh u pyndonkam ia kane ka kyntien "mraw".

Hynrei, nador kine kiei kiei kiba ngi la ong haneng, ka don ruh sa kawei ka daw, bad, ha ka jing-pyrkhat jong ngi, ka dei ka daw tynrai. Ngi lap ha ka Jynthoh Bakhuid, naduh ka Jutang Barim haduh ka Jutang Bathymmai, ba la ai nam "mraw" ia ki katto katne ngut ki briew kiba la aiti lut ia lade ha u Blei bad ha ka kam jong U. Haba peit na ki liang baroh jong ka jingim jong ki, ki dei ki mraw jong u Blei. Ki la aiti lut nadong shadong ha u Blei: ka jingim, ka met ka phad, ka bor-pyrkhat, ka mon, ki atiar treikam, ka ioh ka kot, ka iing ka sem, ki khun ki kti, ka por ka samoi, ka miet ka sngi-shisyn-ong, kim im shuh na ka bynta ia lade, hynrei tang na ka bynta u Blei. Kane ka dei ka daw tynrai balei ka Jynthoh Bakhuid ka ai nam "mraw" ia kito ki radbah jong u Blei. Bad namarba kine ki radbah ki dei da shisha ki briew kiba dap shynrang ha ki liang baroh jong ka jingim, suki suki kane ka nam "mraw" ka la kylla long ka nam kaba khraw bad kaba donburom ha ka Jynthoh Bakhuid bad kumta ngi shem ba la khot "mraw" ia ki nongiathuhlypa, ia ki Syiem bad ki lyngdoh kiba la aiti lut ia lade ha u Blei. Ngin sot tang katto katne ki dkhoh na ka Jynthoh Bakhuid ban pynshisha ia kane kaba ngi la kdew haneng. Nyngkong eh ia kane ka nam la ai ha u Abraham (Jen. 26:24). U Blei hi u khot ieid ia u Abraham u mraw jong U (Abraham abdi). Ha ka Psalm 105:42 ngi pule, "U la kynmaw ia la ka Hok ka Shikyntien ha u Abraham u mraw jong U (Abraham abdo). Na ki radbah baroh jong ka Jutang Barim, dei u Moses uba la ioh kham bunsien ia kane ka nam "mraw", bud sa u Kaleb, u Joshua, ki Nongbishar, ki Syiem kum u Dabid khamtam eh bad ki Nongiathuhlypa (1).

1. Namarba ngi faishem shi shem ia kane ka kynnen "Nongiathuhlypa" ha kane ka Kitab bad ha kiwei pat ki kot jong

Kane ka rukom ai nam ia ki radbah jong u Blei ka paw ruh ha ka Jutang Bathymmai. Nyngkong eh, kiba la ioh ia kane ka nam ki dei ki Apostol bad u Paulus Bakhuid u sngewsarong ban nam ia lade u "mraw jong u Jisu Khrist", namarba u la aiti lut ia lade nadong shadong ha u Jisu bad ha Jingpynphriang ia ka Khubor Babha jong U. Hadien ki Apostol, ki wan ki Nongiatuhlypa jong ka Jutang Bathymmai, kiba la imsngi baroh shi-ryta ban ialap ia ka Khubor Babha na kawei ka jaka sha kawei pat. Khatduh en, kumba ngi la kdew haneng, ia kane ka nam la ai ha ki Khristan baroh kiba ngeit ha u Jisu Khrist bad kiba iaibteng ia ka kam jong U ha kane ka pyrtnei.

Te na kine kiei kiei baroh, ka paw shynna ba kane ka nam "mraw" jong u Jisu Khrist" ka dei ka nam ka kyrteng kaba donburom ha ka Balang ha ka

---

ka Jyntboh Bakhuid, kan iarap shibun lada ngi sngewthuh shai ia ka jingmut batynrai bad hashisha jong ka, la ka kyntien Khasi "Nongiatuhlypa" la pynkylla, khlempep, na ka ktien Phareng "Prophet", kaba wan na ka Grik "Prophitis", kaba mut u briew uba kren hakmat jong ki paitbah ban ai khubor ne jinghikai ne jingpyntip ha ki, bad kam da mut eh u briew uba iathuh ia kiei kiei ha shuwa ba kin jia. Te u "Prophitis" u dei u nongkren hakmat ki paitbah, khlempep da ka hor bad ka iktiar. Nangta ki 'riewstad ki ong ba ka kyntien Grik "Prophitis" ka dei ka jingpynkylla na ka Hebru Nabi, kaba mut u briew uba pyrtta jam, uba pyrtta kum u sangot namarba la khot bad la phah ia u da u Blei. Te na kine ki kyntien baroh, ngi lah ban ong ba u dei u briew ia uba u Blei u la khot ban kren na ka bynta jong U hakmat ki paitbah ban pynbna ia ka khubor ne ka sneng ka kraw na u Blei. Hynrei bunsien ruh ki briew kiba kum kine ki iathuh ruh ia kiei kiei kiban jia hadien (Is. 7:10-17). Ha ka Jutang Bathymmai, kine ki briew ki dei kito kiba la aiti lut ia lade ban pynphriang ia ka Khubor Babha na kawei ka jaka sha kawei pat da kaba kren hakmat ki paitbah bad ha ka kyrteng u Blei. Hynrei kine ruh bunsien ki iathuh ia kiei kiei kioan jia (Kam 21:10-11). Na kine kiei kiei ka paw shai ba ka kyntien Khasi "Nongiatuhlypa" ka duna khyndiat ha ka jingmut. Hynrei namarba ngi la pyndonkam ia ka mynta da ki spah snem, kam lei-lei lada ngi iai pyndonkam ia ka, hynrei ngi dei ban sngewthuh ia ka jingmut bapura: u briew uba ia khot da u Blei ban kren ha ki paitbah bad uba teng teng u lah ban iathuh ia kiei kiei kiban jia hadien,

por jong une u nongthoh jong ka Kitab Jingpynpaw. Ki Khristan khamtam eh ki dei da shisha ki mraw jong u Jisu Khrist namarba ki la ioh ia kiei kiei baroh na u Blei da bad lyngba u Jisu Khrist.

Khatduh, u nongthoh jong kane ka Kitab Jingpynpaw u ong ba kine kiei ki jia katkum ka saiñdur u Blei. Ym don kawei ruh ka jingjia kaba shu paw pyrthei ryngkhat. Ka kyntien Grik "DI" ka mut ba ym lah lait na ka bynta ki Khristan, kiban ngat hi ha kine ki jingjia, ym da kano kano ka bor matlah, ia kaba ki briew bunsien ki khot ka "NUSIP", hynrei katkum ka saiñdur baieidsbun jong u Blei. Uba don ka jingthmu bad ka thong ban poi, kumban shu ong noh, ka jingthmu bad ka thong na ka bynta ki Khristan. Da kaba ong kumne, u nongthoh um mut da lei-lei ruh ban hikai ba ki briew, kiba leh ia kine kiei kiei, ki leh da ka jingpynbor, ym ha ka jinglaitluid. Ki 'riewbymman ki leh ia ki kampap kamrunar jong ki da ka mon balaitluid, hynrei ka jvnjar ka lanot, ha kaba ki bahok ki ngat, ka long katkum ka saiñdur jong u Blei na ka bynta ka jingbha bad jingmyntoi jong ki. Namarkata ki 'riewstad ki hikai ba ym don eiei kaba jia ryngkhat ha kane ka pyrthei, hynrei katkum ka saiñdur u Blei Nongbuh Nongthaw.

(vii) U LA KDEW DA KI DAK KI SHIN (Ha ka Grik "Esimanen" na ka berb "simeno")

Kane ka Jingpynpaw, kumba ngi la kdew haneng, ka wan na u Blei lyngba u Jisu Khrist, hynrei ka la wan ha ka rukom kaba kham phylla bad kham kyrpang, bad kata ka dei lyngba ki dak ki shin bad ka jynthoh, ym dei tang da ka ktien. Kata ka mut ba ka rukom pynpaw ka dei da ki dak ki shin, ki dur-pharshi bad ki dak-pharshi. Bad kumta ka rukom thoh ia kane ka Jingpynpaw ka iapher na ka rukom thoh ia kiwei pat ki kot kum ki Kitab hapher jong ka Khubor Babha ne ki Shithi jong u Paulus Bakhuid. Ki jingjia ki dei ki jingjia histori, hynrei la pynpaw, la batai bad la pyn-shai ia ki da ki dur-pharshi, da ki dak-pharshi, ia kiba ki Khristan ha kata ka por ki sngewthuh bha. Te ka khubor ha ki hi ka shai bha bad kam shym umdum

eiei ruh em. Bad kane ka rukom thoh ka dei kata  
kaba ki 'rjewstad ki khot ka

## RUKOM THOH APOKALYPTIK.

Kane ka rukom thoh apokalyptik ka dei kawei na kito kiei kiei kiba pyniapher ia ki Ju na kiwei pat, namarba kane ka rukom thoh ka la mih na ka jingshem bad jingsngew jong u paid Israel ha ki kliep bapher bapher jong ka histori jong ki. Lah ban nïew ia kane ka rukom thoh apokalyptik kum iwei na ki khun trai jong ka pyrkhath pyrdain bad ka thoh ka pule ki Ju. Kane ka rukom thoh apokalyptik ka la paw pyrthei bad ka la khie rasong naduh ka snem 200 SK haduh snem 200 HK. Hynrei ngi lah ban lap ia ki thied bad ki tynrai jong ka naduh ki por jong ki Nongiathuhlypa.

Kum kiwei pat ki jaitbynriew, kiba im ha kane ka sla pyrthei, ki paid Israel ruh ki la ju ngat na ki khiep sha ki khiep ha ka jynjar ka lanot na ki bun ki daw bad khamtam eh na ka liang ki hima bah kiba donbor, kiba la hiar thma ia ki, kiba la ring mraw ia ki bad kiba la banbein ia ki har rukom. Kine ki jingjia bad ka shemlanot ki la pynkyndit thret ia ki kumba iuh tdong bsein, namarba ki la ngeit skhem ba ki dei ka jaitbynriew. Ia kaba u Blei u la jied kyrpang. Te kim banse ban kylli balei kine ki jingjynjar, ka jingsbah banbein bad ka shemlanot ki la wan hap halor jong ki. Lada u Blei u iaidon kyrpang lem bad ki, balei ka leit jia kumne? Kine kiei kiei ki la pynpyrkhat ia ki bad katto katne, kiba kham nep jingmut napdeng jong ki, ki la sdang ban wad ia ka daw bad ban batai ia kito ki jingjia basngewsih. Da kaba pyrkhath bad puson kumne, suki suki ki la poi sha kane ka rukom pynshai ia ki jingjia ha ka pyrthei: kane ka histori jong ngi ka don ar tylli ki juk bad ar tylli ki pyrthei: ka juk bad ka pyrthei jong ka Pap bad ka Jingsniew; bad ka juk bad ka pyrthei jong ka Hok bad ka Jingbha ha ki liang baroh. Ia ka juk bad ka pyrthei jong ka Pap bad ka Jingsniew ki khot ka juk bad ka pyrthei bamyn-ta; ia ka juk bad ka pyrthei jong ka Hok bad ka

Jingbha ki nam ka juk bad ka pyrthei kiban sa wan. Ki la poi sha kane ka rukom pyrkhath, kumba ngi la ong haneng, na ka daw ki jingjia histori kiba sngewsih bad kiba kthan; ha ka jingim jong ki kum ka jaitbynriew, ia kaba ki ngeit skhem hi triang ha u Blei u la jied bad mang na ka bynta ka jingthmu bakyrpang jong U. Ngin sot tang katto katne na kine ki jingjia histori basngewsih, kum ka jingpait jingpra jong ka Hima-bah u Dahid ha kum ka snem 931, ka jingshah-jop thiaw jong ka Hima Bashatei ha ki Assyrian hapoh ka jiniialam u Shalmaneser V bad u Sargon II bad ka jingpynlyko pom ia ka Samaria bad ka jingshah ring mraw ki shipnew kur bad jingjah-rngai jong ki na ka sla pyrthei, ha kum ka snem 721, ka jingshah-jop jong ka Hima Juda bad jingshah ring mraw jong ki khui ki hajar jong ka sha Babilon ha kum ka snem 586, ka jingshah synshar lahduh bad ka jingbanbein hapoh ki Grik, khamtam eh ha ka kti ki Syiem Seleusid jong ka Antioch bad khatduh eh ka jingshah jop bad jingshah synshar ha ki Roman. Shisyn-peit, i kumba ka jaitbynriew Israel ka la pulom bad ka jingjied bakyrpang u Blei ka la sep-ei. Hynrei ka mynsiem Isreal bashisha kam pyndem ha kine ki jingjia histori basngewsih, Katba kine ki jingeh ki nang jur. katta ka jingngeit jong ki ha u Blei ka nang skhem bad nang shirhem shuh-shuh bad kim lah ban artatien wat shikhyllipmat ruh ba u Blei un sa pvnjop ia ki ha kawei ka sngi bad kumta kin sa lait na ka juk bad ka pyrthei jong ka Pap bad ka Jingsniew, ia kaba u Blei lyngba u Messia jong U, un sa pynjot bad pynduh thiaw nadong shadong. Ki ngeit skhem ba ha kata ka sngi bakhatduh, ia kaba ki la ju khot ka "Sngi u Kynrad", u Blei un sa thang duh ia kane ka pyrthei kaba sniew da ka ding bad kumta kanjah-rngai noh hi nambarba ym lah leh eiei shuh ban pynbha ia ka laitnoh tang ban pynpulom ia ka da ka ding. Da ka bor jong u Blei bad u Messia jong U, ki paid Israel kin sa jop thiaw ia ki nongshun jong ki baroh. Kine ki nongshun kin sa wan ban dem ban nguh syiem ia u paid Israel, uban synshar ia ka pyrthei baroh ha kata ka juk bad ka pyrthei bathymmai, ia kaba u Blei hi

un sa sdang na ka bynta ka burom ka ijot jong u paid Israel jong U. Te kan wan ka juk tad ka pyrthei bathymmaj, ha kaba kan synshar ka Hok, ka Jingsuk bad ka Jingkmen bad ka burom syiem ia u paid Israel. Kane ka jingngeit bad ka jingkyrmen ka paw ha ki jynthoh jong ki Nongĩathuhlypa kum u Isaia (Is. 11:1,10), u Amos (Am. 9:11), u Jeremia (Jer 30.8-9) u Ezekhiel (Ez 34:20-24) bad khamtam eh u Mika u pyrta khlem artatien eiei, "Hynrei naphi, ko Bethlehem Ephratha, la phi long kaba rit eh na ki raid ka Juda, na phi un mih u nongsynshar halor ka Israel!" (Mik. 5:2). Bad kane ka ding jong ka jingngeit kaba la sdang naduh ki Nongĩathuhlypa, ka la nang iaiklang shuh-shuh bad ka ha kiwei pat ki nongthoh, khamtam eh. kumba ngi la kdew haneng, naduh ka snem 200 SK haduh ka snem 200 HK. Bad ka la paw ha kita ki jynthoh kiba ngi khot ki Kitab Apokalyptik, kum ka jong u Enok, ki jingkren-kunok jong ka Sibyl, ka Jingshimnoh jong u Moses, Ka Jutang jong ki Khat-ar ngut ki Patriak, ki ar tylli ki kot u Baruk, ka jong u Esdras, ki Psalm jong u Solomon bad ka Jingkiew u Isaia sha bneng, (1).

1. Ba ki nongpule kin kham ngewthub, ngin batai shi kyntien ar kyntien ia kine ki kot apokalyptik ba ngi la kdew haneng.

(i) Ka Kitab Apokalyptik u Enok: ki don lai tylli ha ka ktien Hebru, Etiopik bad Slavik. La ihoh ia ka ha ka spah snem 200-100 SK ha Palestina hi. Ha kane ka Kitab apokalyptik la batai ha ka dur ki dak ki shin bad ki jingiohi-paw ia ka histori jong ka pyrthei naduh u Adam haduh u Messia. Ki Ju ki la pyndonkam bha ia ka bad wat ki Khristan ruh ki la pule bad duriap ia ka. Don ki Kpa Balang kiba la niewkor bha ia ka bad u Judas u sot na ka katto katne kiei kiei (Jud 14).

(ii) Ki Tienkunok ka Sibyl ne Sibylla: ka dei ka poitri bad ka doa 40,00 laiñ bad 15 tylli ki phawar. La ong ba la khlei ia kine ki Tienkunok da ka Sibyl ka myllung jentil, ka Grik, ban iaroh bad pyndonburom ia ki Ju Hynrei ha ka jingshisha la thoh da uno re uno u Ju bad u la shu ai nam ha kane ka myllung jentil khang ba ki Ju kin loh nam shuh-shuh. Ka don ar bynta: kawei ka bynta ka kren shaphang ki Ju, bad kawei pat ka bynta ka kren shaphang u Jisu bad ki Khristan. Ha ka bynta kaba nyngkong. ka Sibyl ka parom ia ka histori naduh ka Jingshleium haduh u Messia ha ki dur-pharshi bad ki jingiohi-paw. Ka bynta kaba ar ka kren shaphang u Jisu Khrist bad ka Jingwanpat jong U ban bishar ia ka pyrthei. Ki Ju, ki Khristan bad wat ki Kpa Balang ruh ki la pule ia ka La thoh ia ka ha kum ki snem 140SK-70HK).



Nalor kine, kiba la kdew, ki dang don shuh ki kitab apokalyptik kum ka jong u Petrus, ka jong u Paulus bad ka jong ka Maria 'Theisotti. Kaba pawnam tam na kine ki kitab apokalyptik baroh, ka dei ka Kitab u Daniel. Lah ban ong ba kane ka kitab ka long ka nu-

(iii) Ka Jingshimnoh ia u Moses: Ka dei ka jingiakren jong u Moses bad u Jashua, shuwa ba ki paid Israel kin jam ia ka Wah Jordan. La thoh ha ka ktien Hebru ne Aramaik ha ka spah snem banyngkong HK.

(iv) Ka Jutang ki 12 ngut ki Patriak: Ka dei ka jingkren jong ki 12 ngut ki khun u Jakob ha la ki khun ki kti shuwa ba kuu khlad noh. La thoh ia ka da u Ju uba long u Khristan ha ka spah snem kaba ar HK.

(v) Ki 2 tylli ki kot u Baruk: Ha ka bynta kaba nyngkong, u nongthoh u parom ia ka histori jong ki Ju naduh ka snem 591 SK haduh ka por u Messia. La thoh ia ka imat ha kum ka snem 70 HK. Ha ka bynta kaba ar, u Baruk u ia id lyngba ki hynfiaw tylli ki bneng bad u la tohi-paw. Ia kane imat la thoh ha kum ka snem 200 HK.

(vi) Ka Kot u Esdras : Ka parom ha u Esdras u la toh ka jingtohi-paw na u Angel Uriel, uba la pynpaw ha u ba u Blei un sa pynbiar kput ia ka jingien lahduh bad jinglehbeñ jong ki Babilon bad u Nabucadnezzar. Ki don hynfiaw tylli ki jingtohi-paw. U batai ruh ia ka burom jong ka Jerusalem bathymmai. La thoh ia ka da u Ju ha kum ka spah snem banyngkong HK. Bun ki Kpa Balang ki la sot na kane ka kot

(vii) Ki Psalm u Solomon: ki don 18 tylli. Kim dei ki jong u Solomon, hynrei ia shu ai nam ha u da u Ju ha kum ka snem lehse 63 SK. U batai ba hadien ki jingsbah shitom, u Blei un sa jop thiaw ia ki nongshun. Un wan u Messia, u khun u Dabid, un sa pyndem ia ki nongshun, un pynkhuid bad pyndonburom ia ka Jerusalem.

(viii) Ka Jingkiew ne Jingiap-martir u Isaia: Ka don ar bynta. Ha ka bynta banyngkong, ia kaba la thoh lehse ha ka spah snem banyngkong, u nongthoh u parom shaphang ka jingsbah ot-kurat u Isaia da u Syiem Manasse. Ha ka bynta kaba ar, ia kaba la thoh lehse ha ka spah snem 100-200 HK, u nongthoh u iathuh ba u Isaia u la ia id lyngba ki hynfiaw tylli ki bneng bad u la tohi ia ka jingkha, jingsbah sahnarphna bad jingmihpat u Jisu Khrist.

(ix) Ka Kot Jubili: La thoh ia kane ka kot ha ka ktien Hebru ha kum ki snem 150-130 SK, ha Pelestina da uwei u Ju uba riawblei. La ju khot ruh ia ka "Ka Kot Jenesis barit" ne "Ka Jingpynpaw u Moses". La iathuh ba u Blei, lyngba u angel, u la pynpaw lut ha u Moses bad u la pyai ia ka bad ka thymmei jong ka Añ. Ki 'riewniam ha Qumren ki la pule bha ia ka bad ki la bud ia ka Kalender jong ha kaba rakhe ia ka Jingkhawai Paskha. Imat u Trai jong ngi u Jisu Khrist ruh u la bat ia kane ka Kalender haba u la pynlong ia ka Jingkhawai Bakhatduh.

ksa ïa kiwei pat ki kitab apokalyptik. Ka dei ka kitab apokalyptik kaba itynnat tam ha ka Jutang Barim, kumba ka kitab Jingpynpaw u ïoannis ka long kaba bha tam hapdeng kiwei pat ki kitab apokalyptik. ïa kiba la thoh ha ka juk jong ka Jutang Bathymmai (1).

Kine ki kitab apokalyptik ki ïasyriem kiwei ïa kiwei pat bad ki don katto katne kiei kiei, ïa kiba ngi lah ban shem jan haman kawei pa kawei na kine ki kot. Ngin kdew tang katto katne kiba kham kongsan ha ka por jong ka jingpynjot bad ha ka por jong ka jingtei-biang ïa kiei kiei baroh,

### HA KA POR KA JINGJOT

Nyngkong eh, kane ka pyrthei-jot kan ïaihiar sha ka 'liewlong jong ka jingsniew bad ka jingbymman. Kan sa poi ka por ha kaba ka Be-aiñ kan synshar nadong shadong bad ka Tipbriew Tipblei kan duh kan dam. Ki briew kin ïashun bad isih kiwei ïa kiwei, kin pynjynjar bad pynsohsat kiwei ïa kiwei. Kin ïalehbeiñ para-maki bad kin pynñap beiñ kiwei ïa ki.

1. Nalor kine ki Kitab Jingpynpaw bakyllum, kumban ong noh, ki don ruh shibun ki Kitab Jingpynpaw Khristan. Ngin kdew tang lai tylli kum ka nuksa.

(i) Ka Jingpynpaw u Petrus : La thoh ïa kane ka kot ha ka Grik ha ka spah snem kaba ar Ka batai shuh shuh ïa ka lynnong Mt. 24: 3-31. U nongthoh u kren shaphang u Enok, u Elija bad u Antikhris. U batai ïa ka dujok bad u pyni ïa u Jisu ha ka burom-bneng lem bad u Moses bad u Elija.

(ii) Ka Jingpynpaw u Paulus: Imat la thoh ïa kane ka kot ha ka spah snem 4-5 HK. Ka pynshai shuh-shuh ïa ka lynnong II Kor 12: 2-10. U Paulus u la leit jngoh ïa ka Maria bad ïa kiwei pat ki 'riewkhuid. U pynkynmaw ïa ka dujok bad ïa ki jingpynshitom jong ki bymman.

(iii) Ka Jingpynpaw ka Maria Theisotti: Imat la thoh ïa kane ka ka kot ha kum ka spah snem kaba khyndai HK. Nalor u Lum Olib ka Maria ka iohi ïa ka dujok, ka duwai ha Galgotha bad ka ïa-said na ka bynta ki bymman.

Hangne ka paw ba ki bun ki Kitab Jingpynpaw, bynrei ka Balang, lyngba ka sap ba ïa ai da u Blei ht, ka ithuh tang kane kawei ba ïa thoh da u ïoannis ïa kiwei pat wat haba ki sngewtynnat ruh ka Balang ka la kyntait. Ha kane ka liang, ka Balang kam lah ban bakla.

wei pat. Ka jingbishi ka jingpihuiñ, ka khwan la-lot bad ka thok ka thak kin jytlei. Bad kine ki jingsniew kin sdang na ki iing ki sem hi: Ki kpa ki kmie kin isih ia la ki khun, kin lehbeiñ ia ki bad kin pyniap ruh ia ki. Ki khun ruh kin ieng pyrshah ia la ki kpa ki kmie, kin ktah kti ia ki bad kin nym tieng wat ban pyniap beiñ ia ki. Shihym-men-shipara ruh kin iashun, kin iabishi bad kin ia-leh makynti Ym don jingsuk shuh, tang ka huri-hura bad ka kulmar hi thlim. Nangta sa ki raid, ki hima kin ia-ieng ia-leh thma kiwei ia kiwei pat. U khunbynriew un ngat ha ka kynrum-kynram bad ha ka jyrwit-jyrwat suda. Te ym don jingkyrmen shuh ia kane ka pyrthei-jot.

Ka ba-ar, namar ka jingsniew jong ka, ka pyrthei-jot kan dawa ban shah pynshitom bad ban shah pynjot hi tniaw. U Blei un sa phah ia la u Messia ban bishar ia ka pyrthei-jot bad ban pynrem ia ka. Une u Messia u long kum u Blei hi namarba U ia don lypa shuwa ban thaw ia kane ka pyrthei mariang U don bad u Blei bad U ap hukum ban pyndep ia la ka deiti. Un pyndem bad jop thiaw ia ki nongshun kiba donbor bad ia ki 'riewbymman kiba sarong Un wan ha ka burom. ka bor bad ka iktiar bad ka pyrthei baroh kan kyih bad kan dem burom ia U. Un pynhiar khet ia ki syiem ka pyrthei bad Un kyntiew burom ia u paid u Blei. Ha kane ka khep, ka pyrthei-jot kan jynjar, kan lanot kum ka longkmie haba ka sukhun. Ka suiñbneng kan hap, ka sngi kan dum, ki khlur kin lip noh bad u bnai un kylla snam bad yn thang duh ia ka pyrthei bad ia ki bymman thik kumba u Blei u la leh ia ka Sodom bad ka Gomorra. Ym don eiei shuh, tang ka jingjot suda.

Ka balai, baroh u khunbynriew un ngat ha kane ka apot-sepsngi, hynrei ym baroh ha kajuha rukom. Kin don hi kiban plie ia la ki khmat bad kin kylla kaba mut, namarba u Messia, ia Uba la nam ruh "U Khun u briew", un long ka jingshai na u Blei lem bad u paid Israel. Te kin wan sha u Blei bad sha Jerusalem ban iohi ia ka burom jong U. Hynrei kiba bun hi kin iaum lang ban ia-leh pyrshah ia u Blei. Kin kerkut ia ka Nongbah Jerusalem da ka jingthmu ban pynjot ia ka. Hynrei kin

sa shah pynjot lut da ka ding bad ka waitlam u Blei. Ka jingjop kan sa long ka jong u Blei bad u paid jong U.

### b) HA KA POR BAN TEI PAT

Ha kine ki kitab apokalyptik ngi shem ba, ynda la pynjot thiaw ia kane ka pyrtnei bymman, kan sa sdang ka juk bad ka pyrtnei kaba thymmai, kibym don jingia dei shuh bad kaba rim, namarba ka barim ka la duh la dam. Ha kane ka juk bad ka pyrtnei bathymmai, kin jia tang kiei kiei kiba sngewtynnat. Ki khun Israel, kiba la shah pynryngkangpar bad kiba la saphret kylleng kylleng, kin sa wan phai biang sha Jerusalem na ki ri bapher bapher. U Blei hi uu soi lynti, Un pyndap ia ki them bad Un pynmadan ia ki lun khnang ba ki khan Israel kin suk ban laid. Bad lyngha ka lynti, ki dieng kin kah syrngiew ba kin nym mih syep mih syar. Bad ynda ki khun Israel ki la wanphai biang, kin ioh ka Hima kum ha ka por u Dabid. Ka hima Israel bad ka Hima Juda kin sa ialong biang kawei ha ka burom ka ijot. Bad ha kane ka khap jong ka burom, ka Jerusalem, ia kaba u Blei u la pynkhreh lypa ha bneng, ka Jerusalem bathymmai kan wan hiar na bneng bad kan sah shi-junom bad ki khun Israel. Kan sa long ka Nongbah kaba itynnat tam bad kan phyrnai da ki mawlynnai bad ki mawkordor. Nangta ban pyndap ia ka Nongbah bad ka hima, ki briew kiba la iap ruh kin sa mihpat. Ki Ju kiba la iap ha ki ri bajngai kin sa mih pat na ka jingiap bad kin leitphai sha Jerusalem. Wat ka Niamra (1) kan sa plie ia la ki khyrdop bad kan pyllait ia kiba la iap ban wanphai sha pyrtnei,

1. Shuwa ba kan mih ka Kitab ka Jingstad bad shuwa ba un wan u Trai jong ngi, u Jisu Khrist, ki Ju kim da lah bha kumno ban mutdur ia ka Shalyndet ynda ki la khlad na kane ka pyrtnei. Kum ka kynhun ki ngeit ba shapoh khyndew ka don kawei ka jaka kaba long kum ka krembah kremsan. Ka don ka lynti kaba islam na sla khyndew sha kane ka jaka bad kito baroh ki iap ki leit beit beit sha kane ka jaka ba ki khot ka "Sheol", kata ka mut ka Hima ki Nongiap. Ki Roman bad ki Grik ruh ki don malu mala kum kane ka jingngeit bad ia kane ka Hima ki Nongiap ki khot ka "Tartarus", sha kaba baroh ki briew, kiba bha bad kiba sniew ruh ki faleit lang. Kiba bha ki im kum ki ngai khlem da don shuh ka jingsngewthuh kaba shai; kiba sniew pat imat ki ioh jyn-jar na ka bynta ki kam runar jong ki. Ngik khun u Hynmiew-trep ruh ngi ngeit malu mala kum ki Ju hyndai, hyndei ngim ong ba kane ka Niamra ka don shapoh khyndew,

khamtam eh ki 'riewhok hapteng ki Israel Kan don ka imlang sahang kaba suk ba sañ. yn nym don shuh ki thma bad ki jingpyniap-briew. Ki waitlam bad ki sum kin kylla long ki tiar rep tiar riang. Ka jingsuk kan synshar hapteng ki jaitbynriew baroh bad wat hapteng ki mrad ki mreng bad u khunbynriew ruh. Wat para mrad ruh kin nym iadait iatar shuh kiwei ia kiwei pat, hynrei kin sa ia-im ha ka suk ka sañ khlem leh sniew kiwei ia kiwei pat. Na ka liang ka Mei Ram-ew ruh kan sa don ka jingkylla; kan seisoh haduh bym lah batai shuh. Ki ri kynjah bad ki ri shyiap ruh kin sa kylla long kum ki 'persoh 'perpai. Kan pahoh ka bam ka sa bad ka thngan kan nym don shuh. Bad khatduh, ka Hok kan synshar. Yn nym don shuh ka Pap ka Sang, ka ryngkang ka palat. Baroh kin tipbriew tipblei. Yn nym don shuh ka pang ka shitom, ka jynjar ka lanot, ka thait ka jrem. Ka jingiap ruh kan duh noh. Yn nym iohsnrew shuh ia ka jingiam-briew. Tang ka rkhe ka kmen kylleng kylleng Ki longkmie kin nym sukhun shuh ha ka jingshitom, hynrei kin sa kha suk kumba kha pylleng ka syiar. Ha ka liang ka trei ka ktah bad ka rep ka riang, ki briew kin nym shem jingeh eiei Ha kiei kiei baroh tang ka suk suda, namarba u Messia un synshar ha ka Hok katkum ka Hukum bad ka hima jong U kan sa long kabym ju kut.

Hynrei napdeng kine kiei kiei kiba ngi shem ba kine ki kitab apokalyptik, kawei te ka da paw tyngkreiñ da shisha: ka rukom thoh ha ki dak ki shin bad ki dur-pharshi bad ka jingiohi-paw. Hynrei kine ki dak ki shin bad ki dur-pharshi kim dei tang ka jingmut-dur jong ki nongthoh khlem nongrim. Jan barabor, kine ki dak ki shin bad ki dur pharshi ki thew ia ki jingjia histori kiba jia ha kato ka por hi bad khamtam eh ia ki 'riewbymman bad ki nongbanbeiñ. Bunsien ia kine ki dak ki shin bad ki dur-pharshi la sot napdeng ki 'riewhyndai kiba la im da ki spah ne ki hajar snem ruh, bad kine ki 'riewhyndai ki thew ia ki nongbanbeiñ bymman bad ia kito kiba shah lehbeiñ ruh. Ki 'riewhyndai, ki bymman, ki siatpharshi ia ki nongbanbeiñ barunar bad badakaid; ki 'riewhyndai kiba bha pat ki thew ia ki khun Isreal ne ia ki Khristan. Ki nongthoh apokalyptik ki leh kumne namarba ka long kaba ma shibun ban nam pylleiñ pylleiñ ia ki-

ne ki nongbanbein bymman, namarba ki dei ki briew kiba satar bad kiba eh ka dohnud bad kumta ki lah ban pynhiar kput ha ka rukom kaba shyrkhei. Te ki nongthoh apokalyptik kim kwah ba kin sngewthuh ba kito kidak ki shin bad ki dur-pharshi ki thew ia ki, ia ka jingim iong ki bad ia ki jingleh jingkam jong ki. Na ka bynta kine ki nongbanbein bymman ka kitab apokalyptik ka long tang kum ka parom-kai ne ka puriskam ba la shu mutdur da u briew khlem nongrin ha ki jingjia bashisha ha kane ka pyrtthei. Khamtam lei-lei haba kine ki dak ki shin bad ki dur-pharshi ki shim ia ka dur ki mrad ki mreng, ki lum ki wah, ki nombor bad kumta ter-ter, ki nongbanbein bymman kim sngewthuh eiei bad ki sah ha ka umdum haba ki pule.

Hynrei ki nongthoh ki thoh ba ki briew kin pule bad kin sngewthuh. Hoojd, ka dei. Ki nongthoh apokalyptik ki kwah ba ki briew kin sngewthuh ia ka kot jong ki, hynrei tang kito kiba shah banbein, kum ki khun Israel bad ki Khristan. Te kine ki nongthoh ki ai hi ka lad ka lynti ba kine ki nongpule bakyrpang kin sngewthuh shai-kdar ia kaei kaei ba ki pule khnang ba kin nym duh jingkyrmen, hynrei kin shur bad kin heh mynsiem ha ka jingialeh bad ka jingshah-shitom. Ka kot apokalyptik ka don kane ka jingthmu: ban pynskhem ia ki briew ha ka jingngeit jong ki ha u Blei, ban ai jingkyrmen ia ki ba ha kawei ka sngi kin sa jop thiaw da ka bor jong u Blei. Namarkata, ki khun Israel bad ki Khristan ki sngewthuh bha ia ka jingmut jong ki kitab apokalyptik, ia kiba la thoh na ka bynta jong ki. Kim sah ha ka umdum ne ka lyngngoh, namarba ki nongthoh ki la batai lypa ha ki kumno ban sngewthuh ia kito ki dak ki shin bad ki dur-pharshi. (1) Tang ma-ngi, kiba

1. Ha kine ki sngi jong ngi ruli, ngi dang lap ia kum kane ka rukom thoh ne rukom kren, khamtam eh haba ki shipai ki ai khubor para-maki bad kim kwah ba ki nongshun kin sngewthuh. Te ki pyndonkam ia kata kaba ki khot ha ka Phareng "Ka Code". Ngì dang kymaw ba kiba ha ing jong u Sohblei Svirnelis, SDB., ki la pyndonkam ia kane ka rukom thoh namarba ki tieng ia ki Komunis. Ngì la ioh ia kawei ka shithi ba une u Sohblei u la ioh na ki hymmen ki para. Ki thoh kumne, "Ngi pyntip ia phi ba ki syntiew ki la phuh bad ki sim ki la wan sha kper." I kumba ka dei ka khubor kaba sngewtyinnat, hynrei ka dei pynban ka khubor kaba shyrkhei, namarba ki kyntien" ki syntiew

im mynta, ngi shem jingeh ban sngewthuh namarba ngim tip shuh ia ki jingjia bad ngim bna shuh ia kita ki lad ki lynti ba ki nongthoh apokalyptik ki la ai ha ki nongpule hyndai jong ki, ban sngewthuh shai-kdar ia ki jingmut barieh jong kito ki dak ki shin bad ki dur-pharshi. Lada ngi tip ia kito ki jingjia bad ia ka jingmut jong ki dak ki shin. ngin nym shem jingeh ban sngewthuh ia kano kano ka kot apokalyotik. Ngin sa pyrshang ban leh ia kane ha kane ka jingduriap jong ngi ia ka Kitab Jingpynpaw u Ioannis.

(viii) *DA KABA PHAH I LA U ANGEL* (Ha ka Grik Apostilas dia tu anggelu aftu) Ngi la iohi ba ia kane ka Jingpynpaw la ai da u Blei hi ha u Jisu Khrist khnang ba Ma-u pat un ai ia ka ha ki briew. Hynrei u nongthoh u ong ba u Jisu Khrist um ai da lade hi ia kane ka Jingpynpaw, hynrei lymba u Angel jong U.

Ka la ju don kane ka jingngeit hapdeng ki khun Israel, hynrei ym da baroh, ba u Blei u long u Blei Najrong, ym u Blei Natbian (1). U dei u Blei Najrong namarba U jngai na ngi bad Um da iadon lem bad ngi.

ki la puh" ki mut "ngi la ngat ha ka jingshitom" bad ki kyntien "ki sim ki la wan sha kper" ki mut ba ki shipai komunis ki la wan ban pahara ia ka jaka shong jaka sah jong ki. Te u Sohblei Svirnelis u la sngewthuh bha ia ka jingmut, hynrei ki Komunis ha Post Office, kiba pule ia ki shithi baroh, k m sngewthuh eiei bad kumta ki la phab ia kato ka shithi bad kumta u Sohblei Svirnelis u la ioh ka khuor shaphang ki hymmen ki para jong u. Ki nongthoh apokalyptik ruh ki leh kumne kumba leh kine kiba ha ting u Sohblei Svirnelis:

1. Haba peit na kane ka liang, ki khun u Hynfiwretrep ki la sngewthuh kham jylliew bad kham shai kdar ban ia ki Ju bad kiwei pat ki jairbynriew ha ka jingladei bad u Blei. Ia kaba ki Stadpyrkhat ki la lap hadien ki jingpuson da ki spah snem, ki khun u Hynfiwretrep ki la da tip lypa ba "U Blei u dei U Blei Najrong Natbian", u Blei Uba pyndap miar ia kiei kiei baroh. Ka kyntien Khasi "Najrong" ka mut ha ka Phareng "Trnascendent". Da shisha u Blei, kum u Nongthaw, u lait na ki jynthaw namarba kim lah lano lano ruh ban setkut ia U, ne ban ker la U, ne ban set op ia U. Ym don ba leh ban kynthup ia u Blei. Hynrei ha kajuha ka por U long ruh u Blei "Natbian", ka kyntien kaba mut ha ka Phareng "Immanent". Da shisha u Blei u don ba ki jynthaw baroh kumba ka ding ka don ha u nar, ia uba u kamar u phrang ha shlem. Ban shu kren kyllum, ki Ju ki ngeit ba u Blei u dei tang u Blei Najrong, ym u Blei Natbian.

Namarkata, ka long kaba eh ha u briew un ioh khubor beit beit na u Blei khlem u nongai khubor. Uwei na ki nongthoh hyndai jong ki khun Israel, uba la don kum kane ka jingngeit, imat u dei uto u nongthoh ia uba ki 'riewstad ki khot u "Elohist", namarba u nam ia u Blei barabor da kane ka kyntien "Elohim" (1). Katkum une u nongthoh, u Blei u pyndonkam ki jingphohsniew ne kiwei pat ki atjar ban pathai khubor sha ngi (Jen:28:12-17). Kane ka rukom pyrkhat ka la iaiphriang bad ha ka por jong u Trai jong ngi u Jisu Khrist, ka la jur bha ba wat u Paulus Bakhuid ruh um shym lah ban lait na kane ka rukom pyrkhat. U la kum ngeit ba u Blei um ju kren beit beit ha ki briew (Kal:3:19). Kumjuh ruh u Stephan Bakhuid u la ngat ha kane kajuha rukom pyrkhat (Kam. 7:53) (2). Te u nongthoh jong ka kitab Jingpynpaw, namarba u dei u Ju, kumba ngin sa iohi, u la pyrkhat kum kiwei pat ki para Ju, kiba ngeit ba u Blei u ai khubor khamtam eh lyngba ki Angel, kiba long ki shakri bad ki nonglam-khubor jong U.

Ka kyntien Ang'l ka wan na ka Grik "Angelos" bad kane ka dei ka jingpynkylla na ka Hebru "Mal'ak". Te "Mal'ak Yawe" ka mut "U Angel u Trai". Ha kaba nyngkong, ka jingmut tynrai jong kine ki kyntien ka long "U Blei bad u Trai Kynrad hi", Uba paw ha ki briew ha kane ka dur ban hikaj bad ban bin lynti ia u briew (Jen-16:7). Hynrei suki suki ki khun Israel ki la sdang pyrkhat

1 Kane ka kyntien "Elohim" ka dei ka plural bad ka mut "Ki Blei", hynrei ka jingmut bashisha pat ka thew tang ia Uwei u Blei, ka mut "U Blei" bad la pyndonkam ia ka barb ha ka singular, namarba ki Ju ki ngeit ba don tang uwei u Blei. Ki khun u Hynfiewtrep ruh ki pyndonkam ia kane ka rukom kren, "Ki Blei" ne "U Blei", bad ki mut tang uwei u Blei, namarba kim ju ngeit ba ki don shibun ki blei. Ki pyndonkam ia ka plural kum ka dak ka shin ka burom ka surom bad ka akor hakhmat u Blei.

2 U Paulus Bakhuid bad u Stephan Bakhuid ki la kren ha kane ka rukom, ym namarba kim tip ba u Blei u la ai beit beit ia ka Aifi ha u Moses khlem da don uno uno u ksiang, hynrei namarba ki jatai nia bad ki Ju, ki la pyndonkam ia ka rukom pyrkhat jong ki Ju hi ban pynangewthuh ia ka jingmut jong ki. Ha ki Ju, u Paulus u kren kum u Ju, ha ki Grik kum u Grik, ha ki Roman kum u Roman. Te namarba ki Ju ki ngiet bha ia ka jinglong ksiang ki angel, u Paulus bad u Stephan ki pyndonkam ia ka rukom kren jong ki.



ba ki "Angel" ki iapher na u Blei bad ki dei ki jynthaw jong U. Ki imlang sahleng bad u Blei bad ki pyndep ia ka Hukum jong u ban lam khubor ne ban leh eiei ha ka jingfidei bad ki briew. La ju nam ia ki da ki kyrteng bapher bapher, kum "ki khun u Blei (Jb 1:6;2:1), "ki Bakhuid (Jb.5:1), ' ki paibah bneng (I Sy. 22:19). Kine ki Angel ki iarah ia ki briew bad ki long kum ki ksiang hapdeng ki briew bad u Blei (Tb. 5:4). Ha ka Jutang Bathymmai, ka paw shai ba ki iapher na u Blei bad ki don ki deiti bakyrpang ban pyndep (Mt. 1:20,24;2:13,19; Lk 1:11; 2:9; Jn 5:4; Kam. 5:19;8:26; 12:7,23). Ka jingmut batynrai jong u "Mal' ak" bad u "Anggelos" ka long "u nonglam khubor, u nongpynbna, u sangot." Khatduh eh, ha kane ka dkhot, u angel u lah ruh ban long ka dak ka shin bad ka dur-pharshi jong u Jisu Khrist hi (Jpw 1: 13). Ngim dei ban klet ba ngi don ha ka jylli jong ka rukom thoh apokalyptik.

Ban pynkut, kane ka jingphah ia u Angel ka dei kaei kaei kaba la saiñdur da u Blei hi bad da u Jisu Khrist. Ka dei ka jingphah da ka bor bad ka iktiar. Ka kyntien "Apostilas" ka wan na ka berb "apostello" bad ka mut ban phah da ka Hukum ban pyndep ia ka deiti bakyrpang. Dei na kane ka berb ba ngi loh ia ka kyntien "Apostol", u briew, ia uba u Blei u da jied khnang khnang na ka bynta ka kam bad ka deiti bakyrpang da shisha (Mt. 10:2; Mk. 6:30; Lk 9:10; Jn. 13:16; Kam. 1:2, 26). Te ia ka Kitab Jingpynpaw la saiñdur bad la mang da u Blei Nongbuh Nongthaw na ka bynta ka jingmyntoi jong ki Khristan, ki nongbud jong u Jisu Khrist.

(ix) SHA U SHAKRI JONG U, U IOANNIS (Ha ka Grik "To dulo af u Ioanni"). Hangne ngi lohi ia u briew, ha ka doh bad ka snam, sha uba u Blei bad u Jisu Khrist, da u Angel, ki la phah ia kane ka Jingpynpaw bad ka khubor. U dei u Ioannis. Ng donbok ba u nongthoh jong ka Jingpynpaw u pynpaw pyrthei ia lade bad kumta ngi tip ba u dei u briew, uba la mad da lade hi ia kito kiei kiei ba u la thoh.

Kane ka kyrteng "Ioannis" ka wan na ka ktien Hebru "Yehohanan", kaba mut 'U Blei u ieidsbun, u Blei u lehsbun". Ka kyrteng, ha ka jingpyrkhat jong ki Israel, ka thew ia ka jingim, ka jinglong bad ki jynleh jynkam

jong u briew. Kane ka mut ba u Blei u paw ha ka jingim jong u kum ha ka it-khmih, u Blei u phalang ha ka jinglong babha jong u bad u Blei u trei-kam lyngba jong u. U Ioannis u pynpaw bad u pynmynta ia kiei kiei kiba u Blei u la leh da ka jingieidsbun jong U, ia kiei kiei kiba U dang leh bad ia kiei kiei kiba un sa leh. Bad kane baroh ka paw ha kane ka Kitab Jingpynpaw, da kaba u Ioannis, kum u radbah jong u Blei, u pynkhlaiñ bad u pynskhem ia ki Khristan ha ka lingngeit jong ki, u sneng u kraw, u kyntu kynpham, u pynshlur bad u pyntngen ia ki ha kato ka shemlanot ba ki la ngat na ka daw ki 'riewbymman bad ki nonghanbeiñ ia ki Khristan. Da shisha u dawa ia kane ka kyrteng Ioannis, kaba mut "U Blei u ieidsbun, u Blei u lehsbun".

Nangta, ha ka jingshida mynsiem, u pynkup ia lade da ka nam kaba donburon bad kaba khraw kyrdan ha ka Balang hyndai : U SHAKRI JONG U JISU KHRIST", ka nam kaba mut "U MRAW JONG U JISU KHRIST". Da kane ka nam, u Ioannis u mut ban pynbna pyrthei ba u dei u jong u Jisu Khrist nadong shadong, bad met bad mynsiem, ba u la aiti lut ia lade ha u Jisu Khrist : ka hor pyrkhath, ka mon bad ki atiar trei-kam baroh kiba u don. U dei u jong u Jisu Khrist bad u Jisu Khrist u lah ban leh ia u katba U mon bad u sngewbit ha ka saiñdur ieidsbun jong u Blei. Nalor kane ka jingmut, imat ka don ruh sa kawei pat kaba kham jylliew kumba ngin sa iohi harum.

Mynta ki nongpule jong ngi kin kylli khlempep, "Uei une u Ioannis ? Hato u dei u Apostol, uba la thoh ia ka Kitab basaw jong ka Khubor Babha u Trai jong ngi u Jisu Khrist ? Kane ka jingkylli ka don nongrim bad ki nongkylli ki donhok ban ioh ka jubab.

Ki don artylli ki khanapateng shaphang une u Ioannis jong ka Kitab Jingpynpaw. Ka khanapateng kaba nyingkong ka ong ba une u Ioannis u dei u Apostol, uto uba la thoh ia ka Kitab basaw jong ka Khubor Babha, bad ngi shem ia kane ka khanapateng ha ki jynthoh jong ki Kpa Balang, kum u Justin Bakhuid, u Irenaeus, u Klemen na Alexandria, u Tertullian bad kata kaba ki 'riewstad ki khot ka "Kanon Muratori" (1) Ka khanapateng kaba ar

1. Ha ka snem 1740 u Lodovico Antonio Muratori, u nongtrei ha ka dulan-kot Ambrosiana ha Milan, u la lap kawei ka jynthoh ne ka list

kam ngeit ba u Ioannis jong ka Kitab Jingpynpaw u dei u Apostol Ioannis, u nongthoh jong ka Kitab basaw jong ka Khubor Babha, bad ngi lap ia kane ba ki jynthoh jong kiwei pat ki Kpa Balang, kum u Dionysius na Alexandria, u Cyril na Jerusalem, u Gregory Nazianzen, u Chrysostom bad u Theodoret. Nangta ka khanatang jong ka Balang hyndai ka ong ba ki Jylla-niam bad ki Shnat-niam ha Syria, ha Kappadoshia bad ha Palestina kim shym pdiang ba u Ioannis jong ka Kitab Jingpynpaw u dei u Apostol Ioannis bad kumta ia ka Kitab Jingpynpaw ruh kim shym pdiang kum kawei na ki kot jong ka Jynthoh Bakhuid. Shuh-shuh, uwei u Lyngdoh-sohblei bastad ha Rom, ha ka spah snem kaba lai, uba kirteng u Caius, u ong shai ba ia kane ka Kitab Jingpynpaw la thoh da u Cerinthus, uba la hikai bakla lut ia kiei kiei shaphang u Jisu Khrist bad ka Balang Namarba u Sohblei Caius u la long uba stad, ki briew ki la burom ia ka jingsngew jong u.

Haba ngi peit kyllum ia kiei kiei baroh kiba ngi shem ha kane ka Kitab Jingpynpaw, ngi sngew ba ka khanapateng kaba ar ka kham don nongrim bad ka nongrim kaba nyngkong eh ka dei ka Ktien Grik bad ka rukom thoh Grik ha ka Kitab Jingpynpaw, kaba iapher bak-lybak na ka Kitab basaw jong ka Khubor Babha bad na kiwei pat ki jynthoh jong u Apostol Ioannis. U Apostol Ioannis u thoh ka Grik kaba jem bad kaba bha, hynrei ha ka Kitab Jingpynpaw ngi shem ba ka Grik ka eh tad ka dap da ki jingbakla ha ka liang ka Grammar bad ka jingpynbeit ia ki kyntien. Lab ban ong ba ka Grik jong ka Kitab Jingpynpaw ka dei kaba sniew tam ha ka Jutang Bathymmai. Kane ka dei ka jingsngew jong uwei u nongthoh bad u nonghikai uba stad bha ha ka Nongbah Alexandria, ha Ijip, ha kum ka snem 250 HK, u Dionysius. Ki 'riewstad ki ong shuh-shuh ba katto katne ki phang, kiba kongsan bha ha ki jynthoh u Apos-

---

jong ki kot hyndai bad kita ki dei ki kot jong ka Jynthoh Bakhuid. La ong ba imat la thoh ia kane ka list ha kum ka snem 180 HK. To ka dei kawei na ki list kiba rim tam bad ha kane ka list la kdew ba ia ka Jingpynpaw u Ioannis la pdiang da ka Balang baroh kawei bad dei ban pule patbah la ungmane. Bad ki 'riewstad ki ong ba la thoh ia ka ha ka Nongbah Rom. Namarba ia ka list jong ki Kitab ka Jynthoh Bakhuid la ju nam "Kanon", kaba mut ka aji, ka ruk, la kane ka list ruh la ai nam ka "Kanon Muratori".

tol Iōannis, kim da don eh ha ka Kitab Jingpynpaw kum “ka Jingim, ka Jingshai, ka Jingshisha bad ka Lamler, ka Jingtingkhun na ka liang u Blei, ka Jingaiei, u Mynsiem Bakhuid bad khamtam eh ka don ka jingrapher kaba khraw ha ka jingladei bad ka Jingwan-pat jong u Jisu Khrist. Shub-shuh, ki ’riewstad ki ong ba u Apostol Iōannis um ju nam ia lade ha ki jynthoh jong u. Hynrei u nongthoh jong ka Kitab Jingpynpaw u nam pylleĩn pylleĩn ia lade kum u Iōannis bad u leh ia kane da ka jingshida mynsiem bad ka jingsngewrit. Hynrei ka nia kaba khelaiĩn tam ba um dei u Apostol ka dei ka jingiaroh pyndonburom jong u ia ki Apostol kumba ngi shem ha kane ka Kitab Jingpynpaw hi. Ma-u hi u thoh, “Bad ka kynroh jong ka nongbah ka don khat-ar tylli ki maw-nongrim, ha kiba ia thoh ia ki kyrteng jong ki Khat-ar ngut ki Apostol jong u Khunlangbrot (Jpw 21:14). Baroh ki ong ba, lada u dei u Apostol, un nym thoh ha kane ka rukom ban pyndonburom ia lade. Hangne ka paw ba u nongthoh jong ka Kitab Jingpynpaw um niew ia lade kum uwei na ki Apostol. Kane ka nia ka long kaba dei bad ka shai-kdar. U Iōannis jong ka Kitab Jingpynpaw um dei u Apostol, hynrei u dei uwei na ki para-bangeit ha kata ka por bad u para-bangeit uba kham kyrpang.

Nyngkong eh, ki ’riewstad ki ong ba u Iōannis jong ka Kitab Jingpynpaw u dei u Khristan, uba la im bad trei ha kito ki thaiĩn Ephesus. Ia kane, ki ban tynggeh ki ’riewstad, ym lah ban artatien. U niew ia lade kum uwei na ki para-bangeit, uba shahshitom lem bad ki na ka bynta u Jisu Khrist bad ka Khubor Babha jong U (Jpw 1:9). U dei uwei na ki Khristan kiba im bad kiba trei ha kito ki Jylla-niam bapher bapher. Nangta u ong ba u la thoh ia kito kiei kiei kiba ma-u hi u la iohi (Jpw 1:1-2). Te u thoh ia kane ka Jingpynpaw sha kito kiba ithuh bha ia u bad ia kiba ma-u ruh u ieid bad u burom. Bad u ong ba u thoh shaphapng kiei kiei kiba jia ha u bad ha ki, ha kito ki thaiĩn jong ka Asia Minor.

Kaba ar, ki ’riewstad ki ong ba u niew ia lade kum u Nongĩathuhlypa (Jpw 10:11). Ngĩ tip ba kita kiba ngi khot ki Nongĩathuhlypa ha ka Jutang Bathymmai ki dei ki Nongpynbna ia ka Khubor Babha, ki Nongpynbna ne ki Nongĩalap kiba kham kyrpang, kiba don ka sap na ka

bynta kane ka kam bad kumta ka paw ba u Blei hi u la jied ia ki. U Apostol Paulus bad ka Balang hyndai ki burom bad ñiewkor bha ia kine ki Nongia-thuhlypa (I Thes. 5:20). Ia ka kyrdan bad ka deiti jong ki la ithuh da baroh (Kam 13:1;21:9). Kine ki Nongia-thuhlypa ne ki Nongialap ki dei ki 'riewkheifnduh, kiba la aiti lut ia lade ha ka deiti ban pynphriang ia ka Khubor Babha. Ki ñaid kylleng kylleng, na kawei ka shnong sha kawei pat bad ki briew ki pdiang burom ia ki. Wat lada kim dei ki Lyngdohsad ne ki Lyngdoh-sohblei, hynrei ki don ka bor bad ka iktiar ba ki la ioh na u Blei bad ia kaba ka Balang ka ithuh Namarba ki la ioh ka bor bad ka iktiar na u Blei hi, ki donhok ban sneng ban kraw wat ia ki Lyngdohsad ruh(Jpw 1:4-3;22). Te une u Ioannis um dei u Apostol, um dei u Lyngdohsad ne u Lyngdoh-sohblei, hynrei u Nongiathuhlypa, ia uba ba. roh ka Balang ha ka thaid Ephesus ka ithuh bad ka burom, wat lada u dei tang uwei na ki paitbah jong u Blei-

Khatduh eh, u Ioannis jong ka Kitab Jingpynpaw um dei u Grik, hynrei u Ju, uba la poi dang shen sha Asia Minor Lehse u dei na Jerusalem, ha kaba u la trei kum u Nongiathuhlypa, kumba ngi la batai haneng, bad, namarba u dei u Nongiathuhlypa, u donhok ban leit kylleng kylleng bad ialap ia ka Khubor Babha, bad kumta u la poi sha Asia Minor. Bad namarba khlempep u la bna nam kum u Nongiathuhlypa, ka Balang ha Asia Minor ka la ithuh ia u bad ka la pdiang ia u bad u la trei shi-tom ban ialap ia ka Khubor Batha

Ngi la ong ba u dei u Ju, uba dang wan shen, bad um dei u Grik, namarba um da nang bha ia ka Ktien Grik. U pyrkhat ha ka Hebru ne Aramaik bad u thoh ha ka Grik Te na ka liang ka Grammar bad ka Syntax (1), ka ktien Grik jong u ka long kum ka jong u samla-pule klas VI bad teng teng ka hiar haduh katta ba wat u

---

1. Ka rukom pynbeit ia ki kyntien bad ki syntens ki tapher na kawei ka ktien sha kawei pat Ia kane ka rukom pynbeit ne buh beit ia ki syntens bad ki kyhtien, ki khot ka Syntax ha ka Pbareng Kan bha lada ma-ngi ruh ngi pyndonkam ia kane kajuh ka kyntien "Syntax." Kito kiba nang Grik bad Hebru, ki ong ba ka syntax jong u nong-thch jong ka Kitab Jingpynpaw ka dei bunsien ka Syntax jong ka Hebru, ym ka jong ka Grik. namarba u pyrkhat ha ka Hebru bad u thoh da ki kyntien bad syntens Grik.

khynnah klas III ha Athens un nym thoh kum u Ioannis jong ka Kitab Jingpynpaw. Imat u la poi sha Asia Minor ynda u la kham tymmen bad kumta um shym loh por shuh ban duria ia ka Ktien Grik.

Hynrei, wat lada um shym nang bha ia ka Ktien Grik, u Ioannis jong ka Kitab Jingpynpaw u long u briew uba stad bha ha ka Jynthoh Bakhuid, khamtam eh ha ka Jutang Barim. Lah ban ong ba u la pule bad tip lut ia ka Jutang Barim baroh kawei, na kaba u la sot ki lynnong bad ki dkhot da ki spah tylli. Naneta, nalor ki kot jong ka Jutang Bathymmai, u pyni ba u la bna lut shaphang ki kitab apokalyptik kiba la thoh ha kum ka snem 200 SK haduh ka snem 200 HK. Kane ka paw shai na ka rukom thoh jong u ia ka Kitab Jingpynpaw, kaba ka saindur jong ka ka long ka jong kiwei pat ki kot apokalyptik.

## KA BANTA II (1:2)

Ha kane ka bynta kaba ar jong ka Maitphang, ngin johsngew shuh-shuh sa katto katne kiei kiei shaphang u Ioannis, u nongthoh jong kane ka Kitab Jingpynpaw. Na kine kiei kiei, ngin sa leh tan tip ia ka por ha kaba u la thoh ia kane ka Kitab Jingpynpaw. Kane ka bynta ka don lai mat lai jura :—

(i) UBA LA AI SAKHI IA KA KTIEN U BLEI (Ha-ka Grik "Hes emartirisen TON LEGON TU THE-U").

Hangne ngi iohi shisyndon ia u Ioannis ha kawei na ki jynleh jynkam jong u, ka jynleh jynkam kaba kongsan tam: BAN AI SAKHI IA KA KTIEN U BLEI. Kane ka dei ka kambah-kamsan ba u la leh kum u Nongfa-thublypa. Ka kyntien Grik "emartirisen" ka wan na ka berb "martireo", kaba mut "nga long u sakhi, nga ai sakhi, nga ieng sakhi". Ka dei ka kyntien kaba kit jingmut bha ha ka per jong ka Ba'ang hyndai, bad ka don ka jingmut kaba kyrpang ha ka jingladei bad u Blei, u Jisu Khrist bad ka khubor Babba jong U. Te ban "long sakhi" ban "ai sakhi" bad ban "ieng sakhi" kam mut tang ban kren da ka ktien ha kano kano ka rukom, hynrei ka mut ban kren shur bad shynna khlem riej, ban im katkum kaba la kren bad ban leh ban kam ha kata ka rukom ba u briew u dei ruh ban kloi ban

shah pynshitom, ban phlei snam bad ban iap ruh namar kato kaei kaei kaba u sakhi bad u im. (Is 43:10,12; Lk. 24:48; Kam. 1:8,22; 5:32; I Pt. 5:1). Kum u Nongia-thuhlypa bad u Nongialap, u Ioannis u la leh lut ia kine kiei kiei. Bad u la leh ia kine kiei kiei baroh khnang ba ka KTIEN U BLEI (Ha ka Grik "HO LOGOS TU THE-U) kan paw pyrthei bad kan trei-kam. Kine ki kyntien ki wan na ki kyntien Hebru "Dabar Yawe" bad ki mut u Blei hi, Uba leh ba kam bad shim bynta ha ki jingjia histori jong u khunbynriew bad jong u paid Israel khamtam eh; u Blei hi da lade, Uba leh Uba kam na ka bynta ka jingbha ka longbriew manbriew jong ngi. Ha ka Jutang Bathymmai, kane ka "Dabar Yawe" ha ka Hebru, ka "Ho Logos" ha ka Grik bad "Ka Ktien u Blei" ha ka Khasi, ka thew ia u Blei hi, Uba paw ha ka doh ka snam jong ngi, ha U Jisu Khrist Te u Ioannis u sakhi, u pynbna bad u ialap ia u Jisu Khrist da ka ktien, ka jingim, ki kam bad ka jingshah-shitom jong u.

(ii) BAD KA JINGSHISHA BA LA PYNPAW DA U JISU KHRIST (Ha ka Grik "In martirian 'Isu Khristu'")

U Ioannis um pat sngewhun tang ban shu ong ba u la sakhi, u la pyn bna paitbah ia u Jisu Khrist bad u la shahshitom na ka bynta jong U U kwah ban batai shuh-shuh khnang ba ngin sngewthuh shai-kdar ia ka jingmut jong u. Hangne ka paw shai ba kane ka Jingpynpaw ka wan na u Blei lyngba u Jisu Khrist, hynrei u Blei u la rai ba u briew ruh u dei ban iadon kti lem ha kane ka kambah kamsan jong U. U Blei u lah ban leh ia kiei kiei baroh da lade. Um donkam ia ngi da lei-lei ruh. Hynrei ha ka sajidur bamaian jong U, U da kwah, U da thrang hir-hir ba ma-ngi ki briew ruh ngin ia ioh bynta lem bad U. Da kane, u Ioannis u kwah ban kdew katno u Blei u niewkor ia u, haduh ba U la pynlong ia u "KA ATIAR" bakyrpang ha kane ka pyrtbei.

Kum ka berb "martireo" ha ka Grik, kane ka kyntien "Martiria" ruh ka kit jingmut haduh katta katta. Dei na kine ki kyntien keif ba ngi ioh ia ki kyntien "Martir" bad "Ban iap martir". Bad ban "Iap martir" ka mut ban aiti ia la ka jingim ban pynshisha bad ban pynskhem ia kaei kaei ba u briew u ngeit skhem, u ialap

bad u pynphriang. Te ka "Jinglong-martir" ka mut ka jingim bad ki kam jong u briew uba ati lut ia lade haduh ka jingiap rub. Bad u briew u leh kumne ban pyni shynna ia kaei kaei kaba u da ngeit ba ka long kaba shisha bad kaba dei. Kane ka dei kata ka "SAKHI" ne ka "JINGAI SAKHI", kaba ngi shem ha ki Jynthoh jong ka Jutang Bathymmai bad ka Balang hyndai. Ka dei ka kam kaba kbraw tam bad kaba donburom tam ha ka jingim jong u briew.

Mynta na ki radtah baroh jong u Blei, dei u Jisu Khrist Uba la ai shynna ia kane ka "SAKHI" kaba iadei bad u Blei bad ka saiñdur jong U na ka bynta u khunbynriew. Bad U la leh ia kane da ka jingim jong U, da ka ktien bad ka jinghikai jong U, da ki kam bapher bapher jong U, da ka jingshah-shitom bad jingiap jong U halor ka Diengphna bad da ka jingmih-pat jong U na ka jingiap. Da kaba leh kumne U la pynmynta bad U la pynpaw ha u khunbynriew ia u Blei Nongbuh Nongthaw, u Blei Najrong Natba i, Uba trei-kam ha kane ka histori jong ngi ban pynim ia ki briew ba U la thaw ha ka dur ka dar lajong. Kane keiñ ka dei kata ka "MARTIRIA", ka "SAKHI NE JINGAI SAKHI" jong u Jisu Khrist, u Nongpynim jong ngi. Bad u Ioannis jong ka Kitab Jingpynpaw, ha ka pali jong u katkum ka saiñdur jong u Blei, u la sakhi, u la pynbna bad u la pynpaw shynna ia kane ka SAKHI jong u Jisu Khrist da ka jingim, ka ktien, ki kam bad ki jingshah-shitom jong u lem bad kiwei pat ki para Khristau ha kata ka por. Kata ka mut, u la durap bad imsngi ban pynbna bad pynphriang ia ka Khubor Babha, kaba kynthup ia kiei kiei baroh ba u Blei u la leh bad U la pynpaw ha ka Hok katkum ka Hukum, kumba ong ki Longshuwa jong ngi, kaba long ka Jingshisha jingblei, ha kaba ym don ei ei kabym thikna ne kaba artatien. Te ma-ngi ruh ngi la ring jingmut ia kane ka kyntien "Martiria" sha ka Khasi da kine ki kyntien "Ia ka jingshisha ba la pynpaw da u Jisu Khrist". Ka Jingshisha, namarkata ka thew ia ka saiñdur bapynim jong u Blei, kaba la urlong pura bad janai ha u Jisu Khrist.

(iii) U LA IATHUH LUT KAT KABA U LA IOHI  
(Ha ka Grik "Hosa iden")

Hangne u nongthoh jong ka Kitab Jingpynpaw u ong



ba u la khanatang lut ia kiei kiei baroh kiba u la iohi khlem buhrieh eiei ruh em. U la iathuh lut bad u la kren shai shaphang kiei kiei baroh kiba u la iohi bad u la mad da lade hi. Ki dei ki jingjia histori suda, kiba la urlong ha kane ka sla pyrtnei ha Asia Minor bad ha ka pyrtnei, wat la u la thoh ia kine kiei kiei ha ki dak ki shin, ha ki dur-pharshi jong ki 'riewhyndai, ki lum ki wah, ki mrad ki mreng, ki nombor, ki jingiohi-paw, ki angel bad kumta ter-ter.

Mynta ki mih ar tylli ki jingkylli: Hato kine ki jingiohi-paw ki dei baroh kiba la wan na u Blei ne ki lah ruh ban long tang ka jingmut-dur bad jingiohi-rngai jong u briew ha ka jingmut jingpyrkhat jong u? Bad kiei kita ki jingjia histori? Mynno ki la jia bad dano la pynur-long ia ki?

Ym lah ban artatien ba na kine ki jingiohi-paw, ki don khlempep kito kiba la wan na u Blei hi. U Blei u lah ban leh ia kane lada U mon. Ka shong baroh ha ka mon jong U. Hynrei lada jia ba don ki jingiohi-paw ia kiba la mutdur da u briew kum ki jingiohi-rngai, kam pyn-duna eiei ia ka jingkordor jong kane ka Kitab bad kam ktah eiei ia ka jingshisha ba u Ioannis u kwah ban pyn-paw, namarba kine ki jingiohi-paw ruh ki lah ban long ki dak ki shin bad ki dur-pharshi. Te ki don ki 'riewstad kiba ong ba ka Dewlynnong Patmos bad ka jingshah-pyn-ryngkangpar jong u Ioannis ki lah ban long ki dak ki shin bad ki dur-pharshi jong ka shemlanot ki Khristan bad ki lah ruh ban long ki jingjia histori. Ka daw ka long ba ma-ngi, kiba im mynta, ngi la jah ia u shabi, kumban shu ong noh, jong kane ka paki dulan, ba ngi khot ka Jingpynpaw, bad kumta ngim don lad shuh ban plie ia ka khyrdop heh ban rung bad ban iohi lut ia kiei kiei kiba don ha ka. Baroh ki 'riewstad ki ong ba ki para Khristan jong u Ioannis ki la ioh ia une u shabi na u hi bad kumta ki iohi lut, ki tip lut ia kiei kiei kiba don ha kane ka Kitab Jingpynpaw, katba ma-ngi pat ngi lah ban jngoh tang na ki katto katne ki jynkhang-it bad ki thlew ha ka kynroh jong kane ka paki dulan. La katta ruh, ngi dang lah hi ban pynpait ia kine ki jynkhang-it bad ban rung shapoh, khamtam eh lada ngi tip ia ka por, ha kaba kito kiei kiei, ia kiba la thoh ha ka Kitab Jingpyn-

paw, ki la jia ba ka histori, bad ngi lah ban tip ia kane na ka khanapateng, kaba don ar tylli ki tyllong: ka tyllong ki Nongthoh bad ki Kpa Balang bad ka tyllong jong ka Kitab Jingpynpaw hi.

Baroh ki 'riewstad ki kubur ba ka don ka khanapateng na ki Nongthoh bad ki Kpa Balang hyndai, ka khanapateng kaba ong ba ia u Ioannis la pynryngkangpar sha ka Dewlynnong Patmos (1) ba ka per jong u Patsha Domishian jong ka Hima-bah Roman, ba ha Patmos u la ioh ia kito ki jingiohi-paw bad ynda u la leitphai sha Ephesus u la thoh ia ki ha ka kot. Kumne ki iathuh ki Kpa Balang kum u Jeronimus Bakhuid, u Victorinus bad u Eusebius, u nongthoh histori. Baroh ki iaban tyngheh ba ia u Ioannis la pynryngkangpar ba une u Patsha bynman sha ki par-nar jong ka Dewlynnong Patmos ban pyn-trei jubor ia u kum u mraw. Tang ha kane kawei kim iampir : ym lah ban ong ia u Ioannis u la thoh ia kane ka Kitad Jingpynpaw ha Patmos hi ne ha ka shnong Ephesus hadien ne shuwa ka jingiap u Patsha Domishian. Te lah ban ring jingmut ba la thoh ia kane ka Kitab ha kum ka snem 95 HK, ha ki snem ba ka Balang ka la shah pynshitom jur na ka bynta ka Jingngeit ha u Jisu Khrist kum u Blei bad u Nongpynim.

Ka tyllong kaba ar jong kane ka khanapateng ka dei ka Kitab Jingpynpaw hi, kaba pyrshah haduh katta katta ia ka Hima-bah Roman bad ia ki Patsha jong ka, katba ki Kitab bapher bapher jong ka Khuhor Babba, ki Kam jong ki Apostol bad ki Shithi jong u Paulus bad u Petrus ki iarah bad burom ia ka Sorkar Roman, ia ki Patsha, ia ki Lat bad kiwei kiwei ki nongsynshar. U Jisu Khrist ruh um ju kren eiei pyrshah ka Hima-bah Roman bad U ithuh ia ki hok u Patsha da kaba ong, "Te to siew ha u Kaisar ia ka jong u Kaisar. (Mt. 22:21)". Haba peit

1. Ka Patmos ka dei ka dewlynnong maw ha ki thairi Sporades ha ka Duriaw Aegean. Kam da jngat thanch na ka rud duriaw sepngi jong ka Asia Minor bad ka teng marpyrshah ka Miletus hyndai. Kam da heh than eb, ka don tang 16 sq mer bad ki briew kiba shong imat kim da palat ia ka saw ne san hajar ngut Haduh mynta ka dang don kata ka Krem jong ka Jingpynpaw, ha kaba, katkum ka parom, u Ioannis u la ioh ia kito ki jingiohi-paw. Ka don ruh kawei ka iingriewniam, ka St John Monastery, ia kaba la tei imat ha ka spah snem kaba khatwei HK,

kyllum, ka Sorkar Roman bad ki Patsha kim shym ban-beiñ ia ki Ju, khamtam eh ha ka liang jong ka Niam. Ym tang kata, lah ban ong ba ka Balang hyndai ka la ioh lad ban imsuk bad ban phriang hapoh ka Hima-bah Roman. Ka jingwit ka la wan bunsien na ki Ju pynban bad kiwei pat ki nongshun, hynrei ym na ka Sorkar Roman. Katno sien shuh u Paulus Bakhuid u la ioh jingia-da na ki nongsynshar Roman. Dei na kane ka daw ba u Paulus u la sngewsarong haduh katta katta ban long u trai ri Roman (Kam 16:37) Nangta ban lait na ki Ju, u Paulus u apil sha u Kaisar (Kam 25:10-12). Ha Ephesus bad ha Jerusalem, dei ki ophisar Roman kiba la pyllait-im ia u Paulus (Kam 19:13 41; 22:30-40) Ha Korinth lei-lei u Paulus un jin da la shah pyniap lada um shym don u Lat Roman, u Gallio (Kam 18:1-7). Arsien u Paulus Bakhuid u iarah sngewsarong ia u Patsha Roman, ia ka Sorkar jong u bad imat u ngeit ruh ba dei ka bor-bah jong ka Hima Roman kaba khanglad ia u Bymman ban pynkulmar ia ka pyrtuei (Rom. 13:1-7; 11 Thes. 2:7). Te haba bishar kyllum, ka Hima-bah Roman, ki Patsha bad ki ophisar jong ka ki la iarah bad iada ia ka Balang bad ia ki nongtrei jong ka la kumno kumno haduh ka snem 60 HK. Bad ka Balang ruh ka la burom ia ka Hima-bah Roman, ia ki Patsha bad ki ophisar, namarba hapoh ka jingsynshar jong ki ka imlang sahleng ka la suk la saiñ, ka la shngaiñ ka leit ka wan namarba ki Roman ki la tei ki surok-bah bad ki la iada ia ki, ki nonglute-duriaw kim don shuh bad ka jingsuk ka la ai lad ia ki briew ban kiew irat ha ka longbriew manbriew, katkum ka por.

Hynrei ha ka Kitab Jingpynpaw ka Hima-bah Roman ka dei kaba sniew tam bad ka dawa ba ki briew kin isih ia ka. Ka Nongbah Rom lei-lei ka dei ka Babilon, kaba mane blei-thaw, kaba long ka kmie-bah ki nuti bad ki dakaid, kaba thrang ia ka snam jong ki Khristan bad kaba kwah ban pynduh jait ia ki. Bad ha kane ka kampap-kamsang, u Patsha bad ki ophisar baroh ki iadon kti lang. Te ym don jingkyrmen eiei shuh na ka bynta ka Nongbah Rom bad ka Hima-bah jong ka. Dei ban pyn-jot thiaiw ia ki. Kim dawa shuh ban sah ha kane ka pyrtuei

Ki 'riewstad mynta ki kylli, "Balei kane ka jingkylla

ha ka jingladel jong ka Balang bad ka Rom bad ka Hima-bah jong ka ?". Baroh ki jubab ba kane ka la mih na kawei ka jingsniew : Ka Jingmane-blei ia u Kaisar. Ki Khristan kim lah shah ia kane ka Pap, kaba khraw tam bad kaba sniew tam. Na ka daw jong ka jingmane-blei ia u Kaisar, ka Rom bad ka Hima-bah jong ka ki la kylla long kiba isih tam ha ka pyrthei. Te khnang ban sngew-thuh bha ia kane, ngim banse ban phai sha ka histori naduh ka por u Patsha Augustus, uba ha ka por synshar jong u la kha ia u Jisu Khrist ha Bethlehem na ka Maria 'Theisotti'.

U Patsha Augustus (31 SK-14 HK). Ki nongthoh histori ki ong ba la kha ia u Gaius Octavius ha kum ka snem 63 SK. U la long uwei na ki pyrsa u Julius Kaisar. U kpa jong u u la iap haba u dang don tang saw snem ka ryta. Dei ka kmierad jong u, ka Julia, kaba la pyn-heh pynsan bad kaba la pynnang pynstad ia u. U la long u khynnah uba nep jingmut bad uba don sap. U kni jong u u Julius Kaisar u la iohi ia kane bad u la ai lad shuh-shuh ia u ban kiew irat. Namarba u Julius Kaisar um don khun, u la tiengkhnun ia une u samla bad la nam ia u u Gaius Julius Kaisar Octavianus. Hadien ka jingshah pyniap jong u Julius Kaisar, u la synshar ia ka Hima-bah Roman lem bad u Lepidus bad u Anthony da kaba jop ia u Cassius bad u Brutus ha ka madan thma jong ka Philippi. Bad hadien ka jingjop jong u ia u Anthony bad ka Cleopatra ha Actium ha ka snem 31, u la long u kynrad jong ka Hima baroh kawei bad u la synshar hok bad ka Hima ka la lah ban imsuk imsaif.

Hooïd, ka Hima ka la lah ban imsuk imsaif namarba une u Gaius Julius Kaisar Octavianus u la long u briew uba stad bad uba shemphang. Ki briew ki la kmen haduh bym lah ong shuh, namarba shuwa ka jingwan jong u kum u nongsynshar, ki paitbah ka Hima Roman ki la jynjar sat, ki shah lehbeif, ki la shah tuh ha ki shipai, kiba la knieh ia ki khyndew ki shyiap jong ki bad dawa khajna na ki. Lah ban ong ba ka Hima Roman, kaba long ruh ha kata ka por kum ka pyrthei, ka la ngat ha ka shemlanot bad ki briew ki la khmih lynti ia ka jingpyllait im. Ki la ia-ong ba tang u Blei hi, Uba lah ban pyllait ia ki na ka shemlanot bad ka jynjar sat. Te kum ban shu

ong noh, ki la khmih lynti ba un wan u Blei Uban pyllait  
 ia ki Bad dei ha kane ka por bad ka ia ba u la wan mih  
 une u nongsynshar uba bha bad uba imsngei ia ka jingbha  
 jong u bahun u balang Dei ha kane ka khap ba ynda u  
 la leitphai sha Rom na Ijip hadien ba u la jop thiaw ia u  
 Anthony ha Actium, ka Senet (Senatus ha ka Latin), ka  
 kynhun jong ki tymmen ki san kiba synshar ia ka Nong-  
 bah Rom, ki la ai nam ia u "Augustus", kaba mut "U  
 Badonburom", ha ka snem 27 HK. U dawa da shisha ia  
 kane ka nam da ki kam jong u. Ki briew ka Hima ki la  
 suk; ym don shuh ki thma poh-ting, la kut ka kulmar, ka  
 tieng bad ka syier bad la khang ia ka Tempyl u blei  
 Janus, u blei ka thma, namarba ym shym donkam shuh ia  
 une u blei. U la pyrshang ban burom ia ki hok jong ki  
 briew. Na ka daw jong kane ka jingkmien, ka jingsuk  
 bad ka jingsngewtynnat, ki paitbah ki la nnewburom ia u  
 haduh ba ki la pyrkhath ba u dei u blei. Ar ngut na ki  
 myllung bapawnam ka pyrthei ki la nam "blei" ia u:  
 u Vergil bad u Horatius. Ha kawei na ki phawar jong u,  
 u Vergil ha ka dur-pharshi jong u Tityrus, u ruwai kumne  
 hadien ba u la ioh biaug ia la ki lyngkha ki risai ba u la  
 shah knieh bad kumta u la ioh ban im suk im saiñ;

"O Meliboeus, deus nobis haec otia fecit,  
 Namque erit ille mihi semper deus, illius aram  
 Saepe tener nostris ab ovilibus imbuet agnus."

Kata ka ka mut "O Meliboeus, dei u blei uba la ai kane  
 ka suk ka saiñ;

Hooi, un sa long barabor u blei jong  
 nga bad bunsien u 'langbrot ba dang  
 lung na ki sem langbrot jong ngi un  
 pjiar snam halor ka duwan jong u".  
 (Eclo. I, 6-8)

Na kine ki laiñ jong u Vergil ka shai-kdar ba u pait-  
 bah da lade hi khlem kano kano ka jingpynbor u la sdang  
 ban mane-blei ia u Patsha Augustus, kum ka jingsngew-  
 nguh ba u la wallam ka suk ka saiñ ha ka pyrthei. Hyn-  
 rei ha ka Nongbah Rom hi, um shym shah ba kin mane-  
 blei ia u bad um shym pjiang ia ka nam-blei. Hynrei  
 shabar jong ka Nongbah Rom bad khamtam eh ha ki Jyl-  
 la u la shah ba kin mane ia ka syngiew jong u (genius),

ia kaba ia mane lang bad ka blei Roma. Te wat iada ia u Patsha hi ym shym mane kum u blei, ia ka blei Roma, kata ka Nongbah Rom hi, ia mane blei da ki snem shuwa ka jinglong Patsha jong u Augustus. La mane blei ia ka Nongbah, namarba, haba peit kyllum, ka jingsynshar ki Roman ka kham bha ban ia ka rukom synshar jong kiwei pat ki syiem. Ki briew ha ki Jylla ki ia kham suk shibun. Bad ia kane ka suk ka saiñ ki briew la nam ha ki kot ki sla ka "Pax" Romana", kata, ka suk ka saiñ hapoh ka jingsynshar ki Roman. Ki 'riewstad ki ong ba ha ka shnong Smyrna, ha Asia Minor, la mane ia ka blei Roma naduh ka snem 190 ha kawei ka iingmane ba ki paitbah hi ki la tej. Bad kane suki ka la pynpyrkhat ia ki paitbah ba ka blei Roma ka paw ha ka doh ka snam ha u Patsha u-ba im bad uba synshar. Bad kumta kane ka rukom pyrkhat ka la ialam ia ki ban mane-blei pat ia u briew uba im : u Patsha hi.

Ha ka jingsbisha, kane ka mane-blei ia u Patsha ka la sdang, ym tang na u Augustus, hynrei na u kñi jong u hi, u Julius Kaisar. Hadien ba u Cassius, u Brutus bad ki paralok jong ki ki la pyniap ia u Julius Kaisar namar ki kam ba bha jong u Julius Kaisar hi, ki paitbah ki la sdang ban mane-blei ia u lem bad ka blei Roma. Kane ka la jia khamtam eh ha ki Jylla jong ka Hima Roman shabar jong ka Nongbah Rom Kum ha ka snem 29, u Augustus u la ai jingbit ia ki paitbah jong ka Asia Minor bad ka Bithynia ban tei iingmane bad ban mane-blei ia u Julius Kaisar bad ia ka blei Roma. Ki trai-ri Roman ki shongshit bha ban mane-blei ha kane ka rukom, kata ia u Julius Kaisar bad ia ka blei Roma. Hynrei ia ki trai-ri Roman hi u Augustus um shym shah ban mane-blei ia u. Ia kiwei pat kibym dei ki trai-ri Roman, u la shah mane ia ka syrngiew jong u lem bad ka blei Roma. Palat na kane, u Augustus um shym leh eiei ha kane ka liang. Um shym pynbor ia ki briew ban mane-blei ia u Hynrei haba ki paidbah hi ki kwah, um shym adong tynggeh, hynrei u la shah ba kin leh katba ki mon.

U Patsha Augustus u la khlad noh ha kum ka snem 14 HK hapdeng ka jingieid, jingburom bad jingsngewnguh na ka liang ki paitbah jong ka Hima. U la khlad

noh ha ka burom ka ijot da shisha. Bad hadien jong u la mih pli pat da u Tiberius (14-37 HK).

İa u Tiberius Claudius Nero la kha ha kum ka snem 42 SK. U Patsha Augustus u la tingkhun ia u bad kumta u la long Patsha hadien jong u ha ka sem 14 HK bad u la synshar haduh ka snem 37. Dei ha ka por jong u ba u Ioannis Baptist bad u Trai jong ngi u Jisu Khrist ki la sdang ban trei-kam paitbah (Lk. 3:1). Dei ha ka por jong u ruh ba u Pontius Pilatus u la synshar ia ka Palestina ; dei ha ka por jong u ba la sahnarphna ia u Trai jong ngi u Jisu Khrist.

Haba sdang, une u Patsha u la pyni ba u long uba bha bad ki paitbah ki la sngewtyunnat shibun. Hapoh ka jingsynshar jong u, ki ophisar bad kiwei pat ki nongsynshar kim shym ioh lad ban lehbeiñ ia ki paitbah. Tang shu tip ba ki leh kumta, um ju pep ban pynshitom jur ia ki. Haba peit na kane ka liang u la long u briew uba bha. Na ka liang ka mane blei ia u Patsha, ma-u um da mon eh haduh katta katta. Ha kajuh ka por um shym lah ban khang, namarba ki paitbah hi ki kwah bad kumta ngi shem ba ha ka tyngka jong u la thoh ia kine ki kyntien "Tiberius, Divi Augusti filius", kata ka mut "U Tiberius, u khun jong u blei Augustus" Ka dei kane ka tyngka ba ki Ju ki la ai ha u Jisu ban iathuh shui lada ka bit ne em ban siew khajna ha u Kaisar. Ym tang katta, um shym sngewtyunnat ba ki paitbah kin tei ki iingmane ha u kum u blei bad u la adong ruh ba ym bit ban thung ki lyngdoh-sohblei ban lehnam lehrukom ha u. Um shym kwah da lei-lei ruh ba ki briew kin nam blei ia u. Hynrei imat ki paitbah kim shym kohnguh. Na kane ngi lah ban ring jingmut ba, nalar ka mane-blei ia u Patsha bad ia ka blei Roma, ki paitbah, khamtam eh ha ki Jylla, ki la thung ia ki Lyngdoh-sohblei ban pyndep ia kane ka kam. Bad khnang ba kane ka mane-blei ia u Patsha bad ka blei Roma kan laid beit bha, ki la pynmih ki kynja Jylla-niam bad ki Shnat-niam bad ia ki Lyngdoh-sohblei, kiba trei ia kane ka kam, la burom bad niewkor da baroh. Bad, kumba ngin sa iohi, kine ki Lyngdoh-sohblei bad ki kynhun jong ki ki la shongshit bha ha kane ka mane-blei ia u Patsha bad ia ka blei Roma, namarba ki la ioh ka burom ka ijot bad ka lad ka lynti ban ioh ka bam ka sa, ka

kup ka sem bad bun kiwei pat kiei kiei. Ka la long ka kam kaba myntoi ia ki nadong shadong.

Hadien u Patsha Tiberius, la wan u Patsha Caligula, ia uba la kha ha kum ka snem 12 HK na u Germanicus bad ka Agrippina, ka khunmiaw u Patsha Augustus. U la kiew khet ha ka snem 37 hi tang shu khlad noh u Tiberius.

Wat lada u Caligula Caius Kaisar u la don ka mynsiem sngewheh bad sngew hangamei bad i kumba u king khlieh, hynrei ha kaba sdang u la leh bha bad ki paitbah kila sngewtynnat ia u. Imat shipor u la lah ban buhrieh ia la ka jinglong khyllah Hynrei um shym lah, ka la paw penryngkew. U la pyni ba u dei u mrad uba runar bad uba snar, ubym pyrwa eiei ban pynryngkangpar ia ki briew khlem daw ruh bad wat ban pyniap beifn ia ki. Um shym pyrwa ban tuh ban lute, ban pynheh ia ki kha-jna. U la long ruh uba awria. La ong ba um shym leh-raifn ban doh ia ki nuti ha lynti ha syngkien bad ka paki dulan jong u ka la dap smam da kine ki kynthei dakaid na surok.

Kane ka jinglong lamwir jong u Caligula ka nang paw shuh-shuh haba u la pynbna paitbah ba u dei u blei bad u la dawa ba ki briew kin mane-blei ia u bad ban pynkup ia u da ki nam bad ki kyrteng-blei. U la pynbor wat ia ki Ju ban mane-blei ia u. Ha ka jingshisha ki Ju ki la ju long barabor kiba laitluid ha ka ka liang ka niam. Hynrei u Caligula um shym kynmaw shuh ia kane bad u la kwah ba kin mane blei ia u ha ka Tempyl jong ki ha Jerusalem, da kaba hukum ban pynfeng ia u dur-mot jong u hapoh ka Tempyl hi. Ki Ju ki la pyrshah ia kane, hynrei u Caligula um patjaw. Donbok ba u Petronius, u Lat jong ka Syria, u la pynpulom ia kane ka jingthmu jong u, bad shen hadien u la shah pyniap ha u Cassius Chaerea ha ka 24 tarik u Kyllalyngkot 41. Kane ka dei ka sien kaba nyngkong ha kaba la hukum da u Patsha bad da ka Sorkar Roman ban mane-blei ia u Patsha, uba dang im ha ka doh bad ka snam, bad ia ka blei Roma.

Ia u Caligula la mih pli da u Tiberius Claudius Drusus, ia uba la kha ha Lugdunum (ka Lyons bamynta) ha kum ka snem 10 SK. U dei u pyrsa jong u Patsha Tiber-



ius. Na kane ka daw, la nam ruh ia u u Tiberius Claudius Drusu Nero. Hynrei ha ka histori la tip ia u kum u Patsha Claudius(41-54). U la synshar 13 snem ei ei. La ong ba u la long u briew uba pang, uba lam-dkoh, lamīapshiliang bad tiengbiej ruh. Hynrei kumno re kumno tang shu iap u Caligula, ki shipai ki la jied ia u kum u Patsha bad ka Senet ka la kubur namarba ym banse. Kum u nongsynshar um shym long u briew uba khlaiñ ka jingmut jingpyrkhat. U la shah ialam ha ki jingkwah-kai jong ki saw ngut ki kurim jong u, bad wat ki mraw, kiha la ioh jinglaitluid, ki la pynlong masi samkhmut ia u. Ka tnga balai jong u, ka Messalina, ka la long ka briew kaba dakaid bad kaba awria haduh katta katta ba ym hanse ban shu pynīap noh hi ia ka ha ka snem 48. Hynrei kum u nongsynshar u la imsngi ia ka jinglaid heit ka synshar ka khadar ha ki liang baroh. Da ka jingai jingbit jong ka Senet, u la iapoikha bad la ka pyrsa, ka Agrippina. Namarba um don khun shynrang, u la tingkhun ia u Lucius Domitius Ahenobarbus Nero, uba la iapoikha bad ka Octavia, ka khun jong u Patsha Claudius na ka Messalina. Ha kawei ka sngi ka Agrippina, ka pyrsa bad ka kurim jong u, ka la buh bih ha ka jyn-tah-tit. U Claudius u la bam bad u la iap. U la leh katto katne ki kam kiba la ktah bha ia ka histori ha ka Hima-bah Roman, kum ka jingtingkhun ia u Lucius Domitius Ahenobarbus Nero bad ka jingbeh beñ ia ki Khristan Ju na Rom na ka daw ka jingleh kulmar jong ki Ju pyrsah ki Khristan (Kam 18:1-2).

Lait noh na kane ka jingbehbeñ ia ki Khristan na Rom, kumba ngi la kdew haneng, u Patsha Claudius, na ka liang ka niam, um shym leh eiei kaba lah ban pynsngewsih ia ki rañot jong u. Ha ka jingshisha um shym kubur ia ki jynleh balamwir jong u Caligula bad u la pyrshang ban pynduh pyndan ia ki katba u lah ei. U iarah ia ki Ju ha Alexandria, kibym shym mon satia ban nam ia u Patsha kum u blei bad ban mane ia u. U la shah ia ki Ju ban mane-blei katkum ki riti ki dustur jong ki. Ym tang kata, u la pynrem ruh ia kito kiba kwah ban thung ia ki lyngdoh-sohblei ban lehniam lehrukom ia u kum u blei. Um kwah ba ki briew kin tei ki iingmane na ka bynta jong u bad um mon satia ba un don u Lyng-

dohsad ban pynāid ia ki kam. U la leh kumne namarba um shym kwah ban pynsniew ia la ki khun ki hajar bad ia ki raŋot ha ka Hima jong u. Hynrei kane ka kam-pap, shisien ba ka la sdang, kumba ngi la ŋohi kam sangeh shuh. Wat lada u Patsha Claudius um shym mon ia kane ka jingmane-blei ia ki Patsha, ki raŋot, ha ki Jylla, ki ŋalleh hi bad kumta ki Patsha, kiba bud, ki la lah ban shim ia kane ka kubu ksiar ban pynskhem ia la ka khet bad ban ŋoh jingmyntoi ruh.

Te tang shu lap u Claudius ha ka snem 37 HK, u la mih pli u Lucius Domitius Ahenobarbus Nero, u khun-ting jong u Claudius. Une u Nero u la shah ba ki briew kin khŋt blei ia u, wat lada ma-u hi um da ŋiewkor ch ia kane ka nam. Hynrei um shym pyrshah ia ka kumba la leh u Patsha Claudius. Bad sniewbok shuh shuh ba ki jingjia ha ka por jong u ki la kum ŋalam ia u ban pyndon-kam ia kane ka nam ban da rapjot ia kiwei pat ki kam-pap.

Namarba u Nero u dei u briew uba awria ruh, u la phet na ka Octavia, ka triga jong u bad u la ŋashong bad ka Acte, ka mraw kaba la ŋoh ia la ka jinglailuid bad nangta sniew bok shuh-shuh ba u la ŋashong ruh bad ka Poppaea Sabina, ka kynthei Ju, ka kurim-hok u Otho, u paralok jong u. U Nero u la pyni ba u dei u briew uba sniew jing-long da kaba pynlap bein ia la ka kmie, ka Agrippina ha kum ka snem 59. Kane ka jingsniew mynsiem jong u ka la nang jur nang jur haduh ba u la poi shaduh u pud ban thang ia ka Nongbah Rom bad katba ka Nongbah ka nang ing, u la ruwai bad u la tem jyntem halor tnum ŋing jong u. Ki paitbah ki la suba ba u la leh ia kane. U Nero u la wad lad ban da rapjot ia lade bad u la kynnoh ia ki Khristan bad imat da ka jingkyntu jong ka Poppaea, u la raŋ ban pynshitom-bein ia ki har-rukom. La tuid ka snam ki Khristan ha ka Nongbah Rom bad la kynnoh ba ki-dei ki nongshun jong ka Hima. Nangta kane ka jingjia basagewsih kthang ka la aŋ lad ia ki nongmane-blei ia u Patsha bad ia ka blei Roma ban shim kabu bad ban pynshitom ia ki Khristan kum ki haramnimok. Kane ka kabu ksiar ka la trei-kam da shisha na ki daw ba ngin kdew mynta hangne harum.

Ha kawei ka liang, u Patsha Nero, uba la synshar naduh ka snem 54 haduh 68 HK, u la phareb ba ki Khristan ki dei ki briew kjbym ieid-ri, ki nongshetkylia bad kumta ki la thang ia ka Nongbah Rom bad u la pynshitom ia ki haduh ba ki la satsyllang da shisha bad kim ju klet shuh ia u bad ki la nam ia u kum u nongbanhefi uba runar tam. Ka jingtieng-her ka la par ha ki thied snam jong ki Khristan, ki tang shu iohsngew ia ka kyrteng jong u. Ha ki Khristan hi u Nero u la long kum u suid-bal-suidsans ba, wat ynda u la iap ruh, ka la don ka jing-sngew ba imat un im biang bad un wan ban pynshitom ia ki ha ka dur uta ia uba ki khot u "Nero Redivivus", kata, u Nero uba im biang. Khnang ban tap eitmiaw shuh shuh ia ka jinglamler jong u, u Nero u la shim kabu ruh ha ka jingkyntait jong ki Khristan ban mane-blei ia u bad ia ka blei Roma, ban pynshitom shuh-shuh ia ki wat lada ma-u um shym ngeit haduh katta katta ba u dei u blei.

Na kawei pat ka liang, ki Buaid-mane-blei ia u Patsha bad ia ka blei Roma, khamtam eh ha ki Jylla shabar jong ka Nongbah Rom, ki la kynnoh ba ki Khristan ki pyrshah ia ka Hima, ba ki haramnimok, ba ki shetkylia ia ka ri namarba ki kyrgah barabor ban mane-blei ia u Patsha bad ia ka blei Roma. Kine ki bymman ki la poi sha kane ka rukom pyrkhat, namarba, ha kane ka por naduh u Augustus, u Caligula bad u Nero, ka dak ka shin ba u briew u dei u trai-ri babha ne u raiot bakohnguh ka dei kane ka jingmane-blei ia u Patsha Kaisar, kaba la long kum ka Niam salonsar jong ka Hima-bah baroh kawei. Te ban kyntait ia kane ka Niam ka la long kum ka jing-ialeh pyrshah ia ka Hima, kum ka jingkhihwin bad ka jingharamnimok. Bad ki briew kiba pyrshah ia ka Hima ki dawa ban shah pynshitom jur, wat ban shah pynjap ruh.

Kane ka rukom mane-blei ia u Patsha ka la long ha kane ka dur: Shisien shi-snem baroh ki khun ki hajar bad ki raiot ki dei ban hajir hakhamat u ophisar jong ka Hima, ban ieng hakhamat ka duwan ba la ter ha u Patsha bad ia blei Roma, ban shim khyndiat ka dhup, ban thang ia ka halor ka duwan bad ban pyrtajam, "U Kaisar u dei Trai Kynrad!" Tang katne ka mane-blei ia u Patsha ka la dep, ym dawa eiei shuh, namarba da kaba leh kumne

bad da kine ki kyntien, ki briew ki phla ba ki dei ki khun ki hajar ki babha ne ki raŋot kiba kohnguh Ynda dep kane ka mane-blei ia u Patsha ki briew ki lah ban leit noh bad ban mane ia kiwei ki blei jong ki katba ki mon. Kane ka mane-blei ia u Kaisar kam khang ban mane ia uno uno uwei pat u blei-thaw bad ban bud ia kiwei pat ki niam ki rukom.

Bad ki Patsha ki kwah tang ia kane, namarba, lada ki ki briew ki pdiang ia u Kaisar kum u blei bad u trai kynrad, ka mut ba ka Hima ka skhem bad ka iatylli kawei tawiar u Patsha. Te ka jingkwah jong ki Patsha ka long ban pyniatylli kawei ia ki jaitbynriew bapher bapher hapoh ka Hima-bah Roman lyngba kane ka Niam mane-blei ia u Kaisar bad ia ka blei Roma. Ki Patsha Roman ki la sngewthuh ba ka Hima jong ki ka iar bha bad ki jaitbynriew ki bun bad ki pher ha ki ktien ki thylliej, ha ki riti ki dustur bad ha ka niam ka rukom. Te kumno keiñ yn pyniatylli kawei ha ka rukom ka baskhem? Ym don kawei pat ka lad laitnoh kane ka Niam salonsar ha ka Hima: Ka mane-blei ia u Kaisar. Ki ngeit ba kane ka lah ban iateh song ia ki jaitbynriew baroh jong ka Hima-bah, kan pynskhem ia ka synshar ka khadar bad kan pyndonburom ia u Patsha. Te kane ka mane-blei ia u Kaisar kam da dei eh ka niam, hynrei ka kam Hima sima Uba pyrshah ia kane ka kam hima, u pyrshah ia ka Hima hi bad u la haramnimok bad kumta u dawa ban shah pynshitom bad wat ban shah pyniap ruh. Ka long malumala kum ka "Bujai Blang" ha ki hima u Hynñiewtrep. Da ka bujai blang ki khun ki hajar kim shim bynta eiei ha ka Niam ki Lyngdoh-synshar ne ki Syiem, hynrei ki pyni ba ki iadon kti lang ha ka synshar ka khadar bad ki dang long ki khun ki hajar ka hima. Haba kim bujai blang shuh, ka mut ba ki la mih na ka hima bad ki la haramnimok. Te ka la long kumjub ha ka jingladei jong ka mane-blei ia u Kaisar bad ki paitbah jong ka Hima-bah Roman. Kito kiba paw man ka snem hakhmat u ophisar, hakhmat ka duwan bad kiba thang khyndiat ka dhup bad kiba pyrta, U "Kaisar u dei u Trai Kynrad", ki dei ki khun ki hajar kiba bha bad ki raŋot kiba kohnguh. Kito pat kiba kyntait ban leh ia kane, ki pynpaw ba ki haramnimok, ki pyrshah ia u Kaisar bad ki kwah ban

mih na ka Hima; te kim dei shuh ki khun ki hajar, bad lada ki dei ki raŋot, ki la ieng ban ialeh pyrshah ia u Patsha bad ia ka Hima. Namarkata, dei ban pynshitom ia ki katkum ka aiñ jong ka Hima, kaba dawa ba ki khun ki hajar kin ieid ia ka bad ba ki raŋot kin kohnguh ia ka.

Ha kane ka khep, ki Khristan bapli ki la ngat ha ka apot-sepsngi. Ki kham ieid ma-ki ia ka Hima ban ia ki-wei pat, hynrei ban thang dhup bad ban pyrta, "U Kaisar u dei u Trai Kynrad!" kim lah ban leh da lei-lei ruh em. Na ka bynta jong ki tang u Jisu u dei "U TRAI KYNRAD". Bad ban ong ba u Kaisar u dei u Trai Kynrad ka long ka jingmane ia u blei-thaw bad ki Khristan kim lah ban mane ia u blei-thaw. Na kane ka daw, la ñew ia ki kum ki khun ki hajar kiba la haramnimok bad ki raŋot kiba ieng pyrshah ia ka Hima. Na kane ngi lah ban sngewthuh katno ki la shashitom! Bun bah ki la shah pynŋap, ki la shah thang-im, ki la shah bret ha ki sing, ki la shah khrai khlieh kum u Paulus Bakhuid. Ha kum kane ka khep, ki Khristan ki donkam ka jingpynshlur, ka jingŋarap, ka jingpyntngen, ka jingkynpham ban iaineh skhem ha la ka jingngeit da kaba kynwaw ba ha kawei ka sngi u Jisu Khrist un sa jop thaw ia kiei kiei baroh. Bad dei ha kane hi ka khep ba u Ioannis, u nongthoh jong ka Kitab Jingpynpaw, u la shim ia la u khulom bad u la thoh ban ŋarap, ban pyntngen bad ban pynskhem ia ki Khristan jong ka Asia Minor ha la ka jingngeit, namarba dei ha Asia Minor ba imat kane ka jingshah-pynshitom ka jur bha. Ha kane ka Kitab Jingpynpaw u Pat-sna Nero u paw ba ki katto katne ki dur-pharshi, khamtam eh ha u nombor 666, uba mut "U Kaisar Nero".

U Blei da shisha u la pynshitom ia u Kaisar Nero na ka bynta kine ki kampap jong u. Ha ka jingŋaleh thma jong u bad ki Parthian u la rem, wat lada u la leit sha ki-to ki jaka da lade hi. Nangta ki la mih ki jingkulmar lai-phew jait ha ka Hima bad ha ka Nongbah Rom; bad ka Senet ka la pynbna paitbah ba u Nero u dei u Nongshun jong ki Roman. Baroh ki la isih ia u. U Nero hi u la sngewthuh ia kane bad u la pynŋap ia lade ha kawei na ki iingshuti shabar jong ka Nongbah Rom ha ka snem  
68 HK.

Hadien ka jingiap u Nero, ki la mih lai ngut ki Patsha, kiba la synshar tang 18 bnai: u Galba. u Otho bad u Vitellius. Ha ka por ba synshar kine ki lai ngut ki Patsha (68-69), ka hima bad ka Nongbah Rom ki la dap da ki jingkulmar suda, da ki jingaleh makynti hapdeng uwei u nongialam bad uwei pat. Namar kine ki kynrum-kynram ha ka hima, kine ki Patsha kim shym ioh por ban pyrkhath ne imsugi ia kane ka kam maneblei ia ki Patsha. Ki la shu ieh kumba ka long bad kim shym pynshlur ne adong ia ka. Namarkata, ki paitbah ki la iaibteng hi da lade bad kane ka maneblei ia u Patsha kam shym duh khamtam eh ha ki Jylla shabar jong ka Nongbah Rom, bad kumta, wat ha kane ka por jong kine ki lai ngut ki Patsha, ki Khristan ki la shahshitom ha ki bun ki Jylla ha Asia. Bad kane ka jingshah shitom ki Khristan kam shym sangeh wat hapoh ka jingsynshar u Patsha Vespasianus bad u khun jong u u Titus, kiba la shimti ia ka synshar ka khadar hadien u Vitellius. Ki nongpule jong nei ki kynmaw ba dei u Vespasianus, uba la sdang ban kerlut ia ka Jerusalem. bad dei u Titus uba la pynjot thiaw ia ka ha ka snem 70 HK. Kine ki ar ngut ki Patsha, u Vespasianus (67-79) bad u Titus (79-81) ki la long ki nongsynshar kiba bba bad kim shym imsngi ne pynlut por ha ka jingadei bad kane ka maneblei ia ki Patsha. Hynrei kim shym ai hukum ban pynduh ia ka. Te wat hapoh ka jingsynshar jong ki ruh, kane ka maneblei ia ki Patsha ka la iaidd shaphrang, khamtam eh, kumba ngi la ong haneng, ha ki Jylla Asia. Hecoid, ki Khristan kim shym shahshitom kum ha ka por u Nero, hynrei kim shym lait na ka jingshemlanot na ka daw ba kim ju kubur bad kim ju mynjur ban ong "U Kaisar u dei u Trai Kynrad".

Bad kyndit kynsan kane ka kupar-jot ki Khristan ka la khie ir kumba khie ka dingbah dingsan ha ka por ba ki khun u Hynfiiewtrep ki thang ram ha ka por tlang! Tang shu iap u Patsha Titus, la mih pli ia u da u Titus Flavius Domitianus ha ka snem 81 HK, uba la synshar haduh ka snem 96. Une u Patsha ia uba la ju bna kum u Domitian, u la jop bad palat liam ia u Nero ha ka jingsnar mynsiem bad jingeh dohnud. Haba bishar na ki jynleh jynkam jong u, um iapher shuh na u ksuid u khrei ha ka

dur briew Um ju kheiñ snep iano iano. U suba ia baroh, u mut sniew ia baroh Um ñiewkor eiei a ka Setnet. Um ju sngew eiei ban pynphlei snam bad ban pyn-iaap briew. Kum u Caligula, u Domishian u la pynbna blei ia lade bad u la ngeit da shisha ba u long u blei bad da ka bor bad iktiar jong u kum u Patsha, u la hukum ia ki khun ki hajar bad ia ki rañot ban mane-blei ia u bad u la leh ia kane da ka jingtipbriew namarba um shym long uba lain king khlieh kum u Caligula. Te da ka jingtipbriew bad da ka mon shisha, u la pynlong aiñ. ia kane ka mane-blei ia u Patsha bad ia ka blei Roma bad ia kiwei pat ki blei-thaw barim jong ki Roman. U la pynbna patbah da ki jynthoh bad ki sangot. ba kito baroh, kibym mane blei ia u, ia ka blei Roma bad ia ki blei barim baroh, ki leh be-aiñ bad ki leh be-niam bad u la nam ia ki kum kiba khlem-blei. U la pynmih ia ka purwana, ka hukum bad ka aiñ ba ma-u u dei u blei. Te kawei na ki aiñ bad ki hukum ka Hima Roman ka dei ka jinglong-blei u Domishian Ki nongthoh histori ki ong ba u la hukum ia ki lat baroh jong ka Jylla bad ia ki ophisar ban sdang kumne ia kano kano ka purwana sor kar, "U Domishian, u Trai Kynrad bad u blei jong ngi, u hukum ia ki khun ki hajar bad ia ki rañot..." U la hukum ba, haba ki briew ki kynduh ia u ne ki wan jngoh ia u, ki dei ban aikhublei ia u kumne, "Ko Trai Kynrad bad ko blei!". Haba thoh eiei sha u, kine ki kyntien ki dei ban paw, lynda kumta la poi sha ka jynjar-sat. Shuhshuh ki nongthoh histori ki khanatang ba u la hukum ba, haba u rung ha ka lypung thiatar, ki patbah ki dei ban pyrtajam, "Ngi khublei ia u Trai Kynrad bad ia ka mahadei jong u!"

Baroh ki khun ki hajar bad ki rañot ki la kohnguh ia kane ka hukum bad ka mane-blei ia u Patsha ka la leng rasong bha. Hynrei ki Ju bad ki Khristan kim banse ban ñaleh pyrshah. Kim shym pdang ia u kum u, blei bad kim shym mane ia u. Kim ju pyrtajam, "U Domishian, u Kynrad bad u blei jong ngi!" Kim ju treh ban thang dhup ha ka duwan jong u. U Domishian u la tip ia kane bad kumta u la pynshitom-beiñ ia ki, khamtam eh ia ki Khristan bad ka dei kane ka jingshah pynshitom ba ngi shem ha kane ka Kitab Jingpynpaw bad dei ha kane ka

por ba la pynryngkangpar ia u Ioannis sha Patmos bad dei ha kane ka por, ha kum ka snem 95, ba la thoh pyn-dep ia ka Kitab Jingpynpaw, ia kaba la sdang, la kumno kumno, naduh ka por jong u Patsha Nero. La thoh pyn-dep pura ia ka Kitab Jingpynpaw ha kane ka por jong ka jingshab pynshitom bashyrkhei ha ki dak ki shin bad ha ki dur-pharshi, kumba ngi la batai haneng, khnang ba u Domishian bad ka Sorkar jong u kin nym sngewthuh. Hynrei ha ki Khristan u Ioannis u la pynshai bad u la ai u shabi da uba ki lah ban plie bad ban iohi ia kiei kiei ba-roh ha kane ka paki dulan jong ka Kitab Jingpynpaw, bad kumta ki la iohi jingpynting, ki la sblur bad ki la iaineh ha ka jingngeit haduh ka jingiap namarba ki la iohi shai-kdar ba khatduh-khatwai u Jisu Khrist un sa jop thiaw ia ki nongshun jong U bad ia ki bor baroh jong kane ka pyrthei. Haba peit na kane liang, kane ka dei kawei na ki "Kitba Deipor" jong ka Jutang Bathymmai. Khlem kane ka Kitab, lehse bun bah na ki Khristan kin jin da la kyllon ha kane ka jingialeh bashyrkhei. Hynrei ki la donbok ba lymba kane ka Kitab ki la tip kumno ban im, kumno ban iaid ban ieng, kumno ban kren ban khana bad ban leh ban kam ha kane ka khep bakordit da shisha.

Hynrei namarba ka Hok ka im bad ka Pap ka iap, u Domishian u la shah pynshitom. U la shah pyniap ha ka paki dulan la jong bad hadien ka jingiap jong u, ka Senet ka la hukum ba dei ban pynduh pyndam ia ki mat-ti jong u baroh bad ban klet noh ia u da kata kaba ki khot ha ka Latin ka "Damnatio Memoriae". Da kane ka Senet ka la kwah ban weng noh na ka jingmut bad jingpyrkhat jong ki briew ia u Domishian bad ia ki jyn-leh jynkam jong u. Hynrei sniewbok ba kane ka hukum jong ka Senet kam shym lah trei-kam ha ka jingladei bad kane ka mane-blei ia u Patsha, namarba ka la nang iai-bteng bad bun bah ki Khristan ki la shah pynshitom bad ki la shah pyniap namar kane ka mane-blei ia u Patsha Roman bad ia ka blei Roma.

### KA BYNTA III

Ha kane ka bynta kaba lai jong ka Maitphang, u Ioannis u kwah ban pynbna pyrthei ia ka jingmyntoi bad



ia ka jingkyrkhu kyrdoh u Blei na ka bynta kito kiba pule paitbah, kiba shahshkor kum ka kynhun bad kiba pynlong-kam ha ka jingim jong ki ia ka khubor ba ka Kitab, Jingpynpaw ka ai ha ki. Kane ka bynta ka don saw mat, saw jura kumne harum :-

(i) **SUK UTA U BRIEW UBA PULE PAITBAH (Ha ka Grik "Makarios ho anayinoskon").**

Ka jingmyntoi bad ka jingkyrkhu banvngkong ki leit sha u nongpule paitbah. Ka kyntien Grik "Makarios" ka dei ka jingpynkylla ia ka Hebru " 'Ashre ha'ish", kaba mut "Suk u briew ! Katno u briew u donbok bad u bha u miat!" Bad la pyndonkam ia kane ka kyntien ban kdew ia u briew uba bit uba biang ha ki liang baroh jong ka jingim, uba bha uba miat, uba roi uba man, uba koit uba khjah, uba dap ka bam ka sa, ka kup ka sem bad kumta ter-ter, uba parum pareh da ki khun ki kti kiba bha bad kiba tipsngi, uba ioh ka burom ka ijot ha ka imlang sahleng, shisyn-ong, uba ia ki jingangnud jong u baroh la pynhun hi jrut! Kane ka kyntien ka thew ia u briew uba donbok bad uba don ka hok na ka daw ki jynleh jynkam jong u. Kane ka jingmut ka paw ha ka Jutang Barim (Ps. 1:1-10; 112:1-9) bad ka nongrim jong ka ka dei ka jingtieng burom ia u Blei ne ka tipbriew tipblei kumba ju sneng ki Longshuwa jong ngi. Ha ka Jutang Bathymmai kane ka jingmut ka nangshai shuh-shuh bad ka nongrim jong ka ka dei ka jingpdiang ia u Jisu kum u Khun u Blei bad u Nongpynim, bad ia ka Khubor Babha ba U la wallam sha kane ka pyrtnei (Mt.5:3-10; LK 6:20-22; 10:23; 11:28;). Shuh-shuh, ha ka Jutang Bathymmai, kane ka jingdonbok, kane ka bha ka miat, kane ka ioh burom ka ioh ijot ka nang khraw bad ka nang shynna shuh-shuh baba ki briew, kiba tipbriew tipblei kumba la ong haneng, ki shahshitom na ka bynta ka kyrteng u Jisu Khrist bad ka Khubor Babha jong U (Jak.1:12). Ha kum kine ki briew ka saiñdur u Blei ka urlong janai bad ka longbriew manbriew jong ki ka pura nadong shadong. Ka dei da shisha ka jingbha-bok kaba khraw tam, namarha ka kynthup ia kiei kiei baroh kiba pyniphuh iphieng ia ka longbriew manbriew.

**Katkum u Ioannis, u nongthoh jong ka Kitab Jing-**

pynpaw, u brierw uba pule paitbah ia kane ka Kitab u Ioh ia kane ka jingbha-bok kaba khraw tam U dei ma- u uba Ioh jingmyntoi nyngkong eh bad halor jong u u Blei u theh lut ia ki jingkyrkhu kyrdoh baroh kiba u brierw u donkam ha kane ka pyrtnei ban poi sha ka thong jong ka longbrierw manbrierw.

“Ban pule paitbah” hangne kam mut ban pule hakmat kino kino ki brierw ha lynti ha syngkjen, ha Iew ha hat ne ha la Iing la sem Em; hynrei ka mut ka jingpule hakmat u paitbah ia uba la khot ne la Ialum lang da ka bor bad ka iktiar kum ka Dorbar shnong, ka Dorbar Raid, ka Dorbar Hima, ka Kñia-kur shisie shi-nem jong u Hynniewtrep, ka jingIalum lang ne jingIaseng jong ki dkhot ka Niam ban mane ia u Blei bad ban lehnjam lehrukom. Hangne ka thew ia kata ka “Qahal” jong u paid Israel ha ka Tempyl hyndai ne ha ka Sinagog hadien ka jingwanphai na Babilon. Ka “Qahal” jong ki Israel ka dei ka jingIalang paitbah ba la khot khnang ban pyndep ia ka deiti-niam. Ha kum kane ka jingIalang jong ki Israel, ka ju don barabor ka jingpule paitbah na ka Jynthoh Bakhuid da ki brierw kiba la jied kyrpang napdeng ki paitbah ne ki Lyngdoh La jied kyrpang ia kine ki nongpule namarba kadei ka kam-niam. Ki dei ban long kiba nang bad kiba tbit ha ka pule shynna bad shai kdar. Hapdeng jong ki Israel, uno uno uba nang bad uba tbit napdeng ki paitbah u don ka hok ban shah jied bad ban pule Ha ki jingIalang ne jingIaseng ha ki Sinagog, ki la ju don bunngut ki nongpule, kumba hynñiew ngut ei, kiba lah ban long ki Lyngdoh ne ki riewpaitbah. Hynrei ki dei ban nang ban pule namarba ka dei ka deiti kaba kyntang.

Ha ka jingpyrkhat jong ki Israel hyndai, ka dei ka kam kaba khraw bad kaba donburom ban pule ia ka Jynthoh Bakhuid. Ka dei ka hok kaba kordor. Te ki la ñiewkor bha ia kane ka jingpule ia ka Jynthoh Bakhuid ha ki jingIaseng jong ki ha ki Sinagog, namarba ka don ka nongrim ha ka Niam bad ka rukom duwai jong ki naduh hyndai hynthai. Ngì shem ba ki Israel hyndai kim ju duwai beit khlem ka nongrim bad kane ka nongrim ka dei ka jingleh jingkam jong u Blei ha ka histori jong ka jaitbynriew jong ki. Te ki ju pynmynta ia ki jingjia bad

ki jynleh jong u Blei bad nangta kin sa duwai. Ki longshuwa jong ngi ki khun u Hynñiewtrep ruh ki ju leh ia kane bad ki khot ia ka ka "Jingkyjoh-ktien sha ka Hukum". Nyngkong eh, haba ym pat don ka Jynthoh Bakhuid, ki Israel hyndai ki pynmynta hi da lade ia ki jingjia bapher ha ka histori jong ki bad ia ki jynleh jynkam jong u Blei (Deut. 26 : 1-11). Hynrei ynda ia mih ka Jutang Barim, ki Israel ki la pule na ka, namarba ka kynthup ia ki jingjia bakongsan bad ki jynleh jynkam jong u Blei ha ka histori jong ki. Bad kane ka jingpule na ka Jynthoh Bakhuid ka long kaba donkam tad kaba kongsan ha ka Niam ka Rukom jong ki Israel. Khlem kane ka jingpule na ka Jynthoh Bakhuid, ki sngew ba ka Niam ka Rukom kam biang. Namarkata, kim ju pynduh ia ka ha kano kano ka sngi ba ki ialang ban mane ia u Blei ha ki Sinagog jong ki.

Ha ka Jutang Bathymmai, ka Balang, kaba long ka Israel bathymmai, ka la bud ia kajuh ka rukom lehniam. Hynrei ka don khyndiat ka jingjapher. Nalor ka Jutang Barim, ka Balang, nyngkong, ka pynmynta ia ka jingim, ki jinghikai, ki jynleh jynkam, ka jingshah-shitom, ka jingiap bad ka jingmihpat u Jisu na ka jingiap, bad ynda ia thoh ia kine kiei kiei, ka Balang kam ju pynduh ia ka jingpule ia ki bynta ba la sot kyrpang ha ki jingialang jong ki Khristan ban duwai bad khamtam eh ha ka jingpynmynta ia ka Jingkñia Iukharist. Bad ka Balang kam ju a ban pule ha uno uno katba lap, hynrei ha ki brierw kiba la jied kyrpang bad kumta suki suki ka la mih ka kynhun ki Nongpule paitbah bad ka kam-pule paitbah ka la kylla long ka kam-balang kaba kyntang. Bad haba kdew ia kane ka kam, la pyndonkam ia kane ka berb "Anayinosko", kaba mut ban pule jam bad shynna hakhmat ki paitbah kiba la ialum lang ban mane ia u Blei ne ban pynmynta ia ka Jingkñia Iukharist. Kane ka kam ka la long kawei na ki kam kiba donburom ha ka Balang, ka kam kaba khraw bad ka kam paitbah. Namarkata, kine ki nongpule paitbah ki ju pynkhreh bha ialade, namarba ka dei ka kam kaba kyntang. Te u Ioannis u ong ba uto, uba pule paitbah ia kane ka Kitab Jingpynpaw ha ka rukom kaba dei, un ioh ka jingkyrkhu kyrdox na u Blei, un manbha manmiat, un longbrierw manbrierw, un

ioh ka nam ka burom hakhmat ka Balan? bad hakhmat u Blei. Un long da shisha uba bhabok. Haduh katne ka jingkordor jong ka jingpule paitbah ia kane ka Kitab Jingpynpaw.

(ii) SUK . . . KITO KIBA SHAHSHKOR IA KI KTIEN JONG . . . KA JINGIATHUHLIPA (Ha ka Grik "Makari-i ke hi akuontes tus logus tis prophiti-ias")

Hangne u Ioannis u ong ba ki briew kiba shahshkor ia kiei-kiei kiba ia thoh ha ka Kitab Jingpynpaw, kin ioh ka jingkyrkhu kyrdoh, ka burom ka ijot, ka bha ka miat, ka roi ka man, ka bit ka biang thik kum u nongpule paitbah. "Ki ktien" ki dei kito kiei kiei kiba u Ioannis u la thoh. Bad kine ki ktien kim dei ki ktien jingbriew. hynrei ki ktien jingblei kum ki ktien jong ki Nongiathuhlypa bad kumta u Ioannis u nam ruh ia ka Kitab Jingpynpaw kum ka "Jingiathuhlypa". Namarkata, ka dei ka deiti jong ki briew ban shahshkor ia ka; kim lah ban lait na ka namarba ka ktah ia ka jingim jong ki bad ka long kaba donkam haduh katta katta. Te ki briew ki dei ban shahshkor kumba ki shahshkor ia ka Jynthoh Bakhuid, kaba long ka Ktien u Blei. Bad kumta u Ioannis u pyndonkam ia ka berb Grik "Akue", kaba long ka jingring jingmut na ka Hebru "Shema", kaba mut ban shahshkor bha da ka jingriewblei bad ka raikut ban leh ia kaba ki briew ki iohsngew, namarba kato kaei kaei kaba ki iohsngew ka wan na u Blei bad ka ktah ia ka jingim jong ki. Ngi shem ia kane ha ka Kitab Deuteronomi 6:4, ka lynnong bad ka dkhoh ba ki Israel ki ju spel lyndet man la ka sngi. Ka ong kumne, "Shema' Yisrael" ha ka Hebru, Akue Israil" ha ka Grik bad "Hei, sngew! Hei, sngap, Israel" ha ka Khasi. Kane ka dei ka jingpyrta u sangot uba don ka bor bad ka iktiar bad kiba iohsngew ki don ka deiti ban pdiang bad ban bat kyndiang ia kaba la pynbna, namarba ki dei na ka kynhun, na ka hima u Blei ki Israel. U Ioannis u pyndonkam ia kane kajuh ka kyntien ha kane ka Kitab Jingpynpaw bad kumta kito kiba dei ban shahshkor kim dei ki briew ha lynti ha syngkien, ha khlaw ha btap, ha iew ha hat, hynrei ha ka iingsad-iingsunon, ha ka iingmane, bad, namarba ki dei ki Khristan, ha ka jingpynmynta ia ka Jingkfia Iukharist ruh. Te ka paw

shai ba, da kane, u Ioannis u kyntu ia ki Khristan, ba la  
 ialum lang, ban shahshkor ia ka jingpule ia ka Kitab  
 Jingpynpaw kumba ki shahshkor ia ka Jynthoh Bakhuid,  
 namarba, ha ka jingsngew bad jingngeit jong u, kane ka  
 Kitab Jingpynpaw kam iapher na ki kitab jong ki Nong-  
 iathuhlypa jong ka Jutang Barim, kum u Isaia, u Jeremia,  
 u Ezekhiel, u Amos bad kumta ter-ter. Bad dei na kane  
 ka daw ba um tieng eiei ban ai nam ia kane ka Kitab  
 Jingpynpaw kum ka "JINGIATHUHLIPA", ia kaba  
 u Blei hi u la ai ha u khunbynriew lyngba u Jisu Khrist.  
 Namarkata, kane ka Kitab Jingpynpaw ka dei ka bynta  
 jong ka Jynthoh Bakhuid hi. Na kine kiei kiei ka paw  
 shai ba ki Khristan ha ki thain Ephesus, ha kiba une u  
 Ioannis u la trei, ki la pdiang ia kane ka kitab kum ka  
 Kitab jingblei bad ki la pule ia ka, kumba ki pule ia ka  
 Jutang Barim, ha ki jinglehniam lehrukom jong ki, kum  
 ha ka jingpynmynta i ka JINGKIA IAKHARIST. Bad na ki-  
 ne ki thain Ephesus kane ka Kitab ka la phriang kylleng  
 kylleng, hynrei suki suki bad ka la shim por shibun bad  
 ka dei kawei na kito ki Kitab jong ka Jynthoh Bakhuid ia  
 kiba ka Balang ka la shim por bha ban pdiang salonsar ha  
 ka pyrthei baroh kawei bad kumta la khot ia ki "KI KI-  
 TAB DEUTEROCANONICAL", kata ka mut, ki kot  
 kiba la pdiang khatduh eh da ka Balang baroh kawei. Ha  
 ka jingshisha, wat ha kito ki thain bamarkhap ruh, kum  
 ha Kappadosia, ha Syria bad Palestina kumba ngi la  
 kdew haneng, ym shym pdiang ia ka Kitab Jingpynpaw  
 kum ka bynta jong ka Jynthoh Bakhuid tad haduh ka  
 spah snem kaba san HK. Wat ha ka Nongbah Rom ruh  
 ka la shim por shibun ban ithuh ia ka kum ka Jynthoh  
 Bakhuid na ka daw ba u Sohblei Caius u briew uba  
 stad, u la ong ba ka dei ka kot ba la thoh da u Ce-  
 riathus, uba la hap niam bad uba la hikai bakla ia ki  
 briew. Hynrei namarba ka dei da shisha ka Ktien  
 jong u Blei bad ka bynta jong ka Jynthoh Bakhuid,  
 suki suki ka Balang baroh kawei ka la ithuh ia ka  
 kum kaba la pyrsad da u Mynsiem Bakhuid. Namarba  
 um shym sngewthuh bun kiei kiei, u Sohblei Luther um  
 shym kwah ban ithuh ia kane ka Kitab Jingpynpaw kum-  
 ba u la kyntait ruh ia ka Shithi u Jakob. Hynrei mynta  
 baroh ki Khistan ki la pdiang ia ka.

Ngi la kdew haneng ba u Ioannis u la ñiew ña ka Kitab Jingpynpaw kum ka "Jingñathuhlypa", kata ka mut ka ñaryngkat kyrdan bad ki Jynthoh jong ki Nongñathuhlypa jong ka Jutang Barim, wat la, ha ka jingshishish, ka ñapher shibun na ki jynthoh jong ki Nongñathuhlypa. Ban shu kren lyngkot, u Nongñathuhlypa u ñohngew ña ka khubor na u Blei bad u pynbna ña ka da ka shyntur ha u paitbah. Ki nongñathuhlypa kim ju kham thoh ña la ki jingkren. Ki dei ki synran jong ki kiba la leh ña kane ynda ki Nongñathuhlypa ki la khlad noh. Kum ka nuksa : ngi lah ban shim ña u Irai jong ngi u Jisu Khrist hi. U-bym shym thoh eiei, hynrei u la shu kren ha ki paitbah. U nongthoh Kitab apokalyptik ne Jingpynpaw u ñohi ña ki jingñohi-paw bad u thoh ña ki ha ki dak ki shin bad ki dur-pharshi. Um ju kren namarba ki kot apokalyptik hunsien ki long kum ki ñynthoh haramnimok ña ki nong-synshar bymman, kum ki jynthoh kiba pynkhihwjn Ka long kaba ma ña u ban kren bad kumta u shu thoh ha ki dak ki shin bad ki dur-pharshi.

Hynrei na kawei pat ka liang, ngi lah ban ñiew ña kane ka Kitab Jingpynpaw kum ka "Jingñathuhlypa", bad ma-ngi hi ngim artatien eiei ba u Ioannis ruh khlempep u la mut kumta. Ki 'riewstad ki ong ba ki jingjia histori bashisha kim ju shah kerkut ha la ka jylli. Kawei pa kawei ka jingjia histori ka don ka Mynnor kum ka jingpynkhreh, ka Mynta kum ka jingurlong bad ka Lawei kum ka jingtreikam shuh-shuh. Ka daw ka long ba ym don jingjia histori kaba shu jia ryngkhat. Ka don ka jingpynkhreh ne ka tyllong bad ka thymmei. Nangne ka mih bad ka paw pyrthei bad nangta ka phriang bad ka trei-kam. Te kawei pa kawei ka jingjia histori ka long ruh ka "Jingñathuhlypa" ña ka Lawei. Baroh ki jingjia histori ki ap jingong bad ki peit kliaw shaphrang, sha ka Lawei. Te kane ka Kitab Jingpynpaw ka kren ña ka Mynta bad ka mir ruh sha ka Lawei, ha kaba ka jingap jingong jong ka kan sa urlong bad kan sa trei-kam.

Ban pynkut, ngi la ong haneng ba don ki 'riewstad kiba ngeit ba u Ioannis u la thoh ña kane ka Kitab Jingpynpaw ha Patmos bad ki don ruh kiba ong ba u la thoh ha Ephesus. Hynrei baroh ki kubur ba u la thoh ha ki thañ Ephesus, namarba ka rukom-thoh jong u ka ñasyriem

ia ka jong u Apostol İoannis, wat lada ka Grik jong ki ka iapher lbak-ybak. Lah ban ong ba u nongthoh jong ka Kitab Jingpynpaw u la poi sha ki thain Ephesus, ynda u la heh la san bha U dei u Ju na Palestina. Ha kane ka por, ha ki thain Ephesus, ki Khristan ki la bna bad pule bha ia ki jynthoh u Apostol İoannis Te ka lah ban long ba u nongthoh jong ka Jingpynpaw u la hikai Grik na kine ki jynthoh u Apostol İoannis bad kumta ka rukom pyrkhat bad ka rukom thoh ruh ka lah ban fasyriem.

(iii) **SUK . . KITO KIBA PYNDEP İA KIEI KIEI KIBA LA THOH HA KA** (Ha ka Grik "Makari-i ke tiruntes ta en afti yegrammena' )

Khatduh eh, u ong u İoannis, kito kiba bat, kiba leh bad kiba pyndep, da ki kam, ia kine kiei kiei kiba la thoh ha kane ka Kitab Jingpynpaw, kin ioh ka jingmyntoi, ka jingkyrkhu, ka bha ka miat, ka roi ka man bad ka bit ka biang ha ki liang baroh jong ka longbriew manbriew thik kum ki nongpule paitbah bad kito kiba shahshkor bad kiba pdiang hun ia kaba ki la iohsngew. U İoannis u hikai ba ia ka Jingpynpaw dei ban pule paitbah khnang ba ki Khristan kin dup iohsngew kyndiang bad kin dup leh, da ki kam, ia kiei kiei kiba ki la iohsngew. Te kam biang tang ban pule paitbah ne tang ban shahshkor, hynrei dei ban pyndep da ki kam. Ki kam ki dei ban bud ia ka jingpule paitbah bad ia ka jingshahshkor ha ka Niam ka Rukom. Ka Jingpynpaw ka dei ban trei-kam, ym tang ha ka jingialang ba ki lehniam lehrukom, hynrei khamtam eh ynda ki la iaitphai sha la ki iing ki sem, ha ki jynleh jynkam jong ki kiba man la ka sngi. Hooid, ka dei ka burom ban pule paitbah ia ka Jingpynpaw, ka dei ka jingbhabok ban ioh Lad ban iohsngew ia kiei kiei kiba la thoh ha ka Kitab Jingpynpaw, hynrei ka dei ka deiti ban pyndep ia kaba ki Khristan ki iohsngew. Ym lah lait na kane ka deiti. Khlem ka jingleh da ki kam, ka jingpule paitbah bad ka jingshahshkor kim larkam eiei (Mt. 7: 26-27). Ka dei kane ka jingmut jong ka berb Grik "Tireo" kaba dei ka jingpynkylla na ka berb Hebru "SA-MAR", kaba mut, ym tang ban pdiang, ban bat, ban rake, ban kynmaw, ban nym leh eiei kaba pyrshah, hynrei ban leh da ki kam kiba paw. U İoannis u hikai ba ki Khristan ki dei ban leh da ki kam. Ki ktien khlem kt

kam kim myntoi eiei. Ki kam babha ki pyni ia ka jingngeit ki Khristan bad ki pyndonburom ia u Blei bad ia ka Balang (Mt. 5:16).

(iv) NAMAR KA IĀ BA LA BUH KA LA JAN (Haka Grik "Ho gar keros enggis".)

Hangne u Ioannis u pynbna pyrthei ba ka por ban pynshitom ia ki bymman bad ka por jong ka jingjop ki Khristan ka la poi ha dwar, tangba kam pat kiew tyngkong. Bad kane ka jingpynrem ia ki bymman bad ka jingjop ki Khristan kin urlong ha ka Jingwanpat u Jisu Khrist na bneng kum u Nongjop bad u Nongbishar. Bad kane kan nym jia ryngkhat, hynrei ha ka por bad ka ia ba la buh bad la mang da u 'Blei hi. Ka kyntien Grik "Keros" ka thew ia kane ka saindur jong u Blei bad ia kane ka por bad ka ia la lah ban iohi najan (enggis); ka la poi ha dwar hi bad kan rung ha ka Jingwanpat u Jisu Khrist. U Jisu un nym slem, hynrei Un wan khlempep. Kane ka dei ka nongrim jong ka jingkyrmen bad ka jingshlur jong ki Khristan hyndai ban shahshitom na ka bynta ka Khubor Babha jong u Jisu Khrist.

Ban pynkut kyllum ia kane ka maitphang: uwei u Khristan Ju, u nongialap bashitrhem jong ka Khubor Babha, u la shah pynshitom lem bad kiwei pat ki Khristan ha ka kti jong ki Patsha Roman, khamtam eh u Nero bad u Domishian, namarba kim shym kohnguh ban mane-blei ia u Patsha bad ia ka blei Roma da kaba thang shi-symboh ka dhup halor ka duwan bad da kaba pyrta, "U KAISAR U DEI U TRAI KYNRAD". Ha kum kane ka khep, haba ki Khristan ki kynmaw ia kine ki kyntien u Jisu, "To long kiba shlur! Nga la jop ia ka pyrthei!" kim banse ban kylli, "Hato ki kyntien u Jisu ki la pulom?", Te ban pyntngen, ban pynshlur bad ban kyntu ia ki Khristan ban iaineh skhem ha la ka jingngeit, u Ioannis u la thoh ia kane ka Kitab Jingpynpaw, ha kaba ki Khristan ki lah ban pule bad ban shem ba ka jingkular u Jisu Khrist kam shym pulom, hynrei kan sa urlong kumba U la kular. Ka dei da shisha ka Kitab kaba sngewtynnat ban pule, hynrei ngi dei ban sngewthuh, katba ngi lah ei, ia ki dak ki shin bad ki dur-pharshi ba ngi shem ha kane ka kot. Mynta ba ngi la batai ia ka Maitphang, ngin



sdang shisyndon ban durīap īa ki phang bap̄her bap̄her jong kanē ka Kitab basngewtyñnat, ka Kitab kaban myn-toi bad tarap īa ngi ha kine ki Lum u Hynñiewtrep, namarba kito ki jingjia basngewsih kiba la wan hap ha ki Khristan hyndai, kim pat kut ha kine ki sngi bad kumta ma-ngi ruh ngi donkam ka jingpyntngen bad jingpynshlur jong kane ka Kitab Jingpynpaw.

Khnang ba ka jingduriap jong ngi īa kane ka Kitab Jingpynpaw kan kham suk, ngin kdew malum-mala īa ki phang bap̄her bap̄her ba ngi lah ban shiem ha ka. Ngim lah ban pharia īa ki phang jong ka kumba ngi leh īa ki kot ba ki briew ki thoh mynta. Ka daw ka long ba īa kane ka Kitab Jingpynpaw ym shym la thoh shilynter beit khlem sangeh da u Ioannis. Ka Kitab baroh kawei ka dei ka jong u. Ym lah len īa kane. Hynrei u la thoh katto kat-ne ki bynta ha kawei ka por, kum ha ka por u Patsha Nero, bad īa kiwei pat ki bynta ha kawei pat ka por kum ha ka por u Domishian bad hadien pat u la suhlang īa kine ne ka lah ban jia ba la tarap īa u ban suhlang īa ki da uwei pat u synran uba la iatrei lang bad u. Ki riwstad ki ong ba kane ka paw haba ngi durīap bha īa ka Kitab baroh kawei. Hynrei kane kam pynduna bad kam pyntam īa kaba u Ioannis u la thoh bad īa ka Khubor ba u kwah ban ai ha ngi.

Ngi lah ban pharia īa kane ka Kitab Jingpynpaw, malum mala, ha ki LAI PHANG kumne harum;-

Ka Phang I: 1:4-3:22

Ka Phang II :4:1-20:15

Ka Phang III: 21:1-22:15

Kine ki LAI PHANG ki long kum ki lai bynta jong ka Drama ne ki lai mat lai jura jong ka Shithi, kaba don ka jinggaikhublei bad ka jingpynkut.



## KA PHANG NE KA SIENLEH I KA BALANG HA KA PYRTHEI (1:4-3:22)

Haba ngi peit kyllum ia ka Kitab Jingpynpaw baroh kawei, naduh ka lynnong 1:4 ter-ter haduh ka 22:21, ngi lah ban n̄iew ia ka kum kawei ka shithi kaba jrong na u Ioannis sha ka Balang ha kane ka pyrthei, ka Balang kaba dang shahshitom, hynrei kaban jop thiaw ha kawei ka sngi. Ka dei ka shithi ba la thoh katkum ka dustur ha kata por: Ka don nyingkong eh ka Jingaikhublei (1:4-6), ka Metbah jong ka shithi (1:7-22:20) bad ka Jingaikhublei pynkut (22:21).

Lada ngi n̄iew ia kane ka Kitab Jingpynpaw kum ka shithi, ka metbah jong ka ka don saw bynta: U Jisu Khrist kum u Nongjop ha ka burom (1:7-8), ka Hukum na u Jisu Khrist ban thoh ia kane ka Kitab Jingpynpaw sha ka Balang (1:9-20) ki Shithi sha ki Balang ne Jylla niam bapher bapher (2:1-22) bad ka jingpynpaw ia kiei kiei kiba dang jia bad kiban jia ha ka Balang (4:1-22:2)).

Kumba ngi la kdew ha ka Maitphang, kane ka Shithi kaba jrong, haba ngi peit kyllum ia ka, ka dei ka jong u Ioannis naduh basdang haduh bakut, ka jong u Ioannis, uto u Ju bariewblei. uba la poi sha ki thar Ephesus ynda u la heh la san, uba la trei kum u Nongiatuhlypa, kata, kum u Nongialap ia ka Khubor Babha na kawei ka jaka sha kawei pat da ka bor bad ka iktiar ba u la ioh, na u Blei bad ia kaba ka Balang ruh ka la ithuh, uto u Ioannis uba la shahshitom lem bad ki parabangest na ka bynta u Jisu Khrist bad ka Khubor Babha jong u, uto u Ioannis uba la shah pynryngkangpar sha ka Dewlynnong Patmos, uba la iohi-paw bad uba la thoh ia kiei kiei kiba u la iohi bad iohsngew. Baroh ka Kitab ne ka Shithi ka dei ka jong u namarba ka long shi-sur. Hynrei ha kajuh ka por ngim lah ban ong ba u la thoh ia kane ka Kitab ne ka Shithi thik kumba u Sohblei Elias Khariong, SDB. u la thoh ia ka jingim u Paulus Bakhuid. Imat u la thoh ia ki bynta bapher bapher jong kane ka Shithi ha ki khep bapher bapher nangta suki hadien u la lum lang ia ki bad u la suhlang kum kawei ka kot. Ki 'riewstad, kiba la duriap bha ia kane ka kitab, ki ong ba ki don hangne

hangtai ki kynrum kynram kum ha ka lynnong 22:6-21 bad ha kiwei pat ki lynnong. Kine ki 'riewstad ki la shem ba ia kajuh ka subjek la thoh arsien. Kum ki nuksa : ia u mrad khlaw la batai arsien bad ha ki ar tylli ki dak ki shin (13:1,3,8 bad 17:3,8;18:2); kumjuh ruh ia u Iakjakor la pyni arsien, bad ha ki ar tylli ki dak ki shin (12:9,12; bad 20:2 ter ter). Bad wat ia ka Jerusalem Bathymmai ruh la padiah arsien kaba la khyndew bad kaba ha bneng (21:1-8; bad 21.9 22:5) Te kine kiei kiei ki pyni ba la don ka jingtasuhlang, ia kiei kiei kiba la don lypa. Ka lah ban long ba u Ioannis hi u la leh da lade ne ki la leh ki syuran jong u, hynrei hapoh ka jingpeit jingkhmih bad ka jingkuhur jong u. Kane kam ktah eiei ia ka jingpyrsad jong u Mynsiem Bakhuid, Uba long u Blei bad Uba don ka bor ban leh katba U mon.

Ma-ngi ngi pdiang ia kane ka rukom pyrkhat shaphang ka jingsuhlang ia kane ka Kitab Jingpynpaw ne ka Shitni u Ioannis. Ngi sngew ba ia ki shithi sha ki Balang la thoh ha ki khep bapher bapher bad kawei ka shithi hadien kawei pat. Bad ka lah ban long ba ia kine ki shithi la thoh ha ki khep kiba kham mynshuwa, tharai ha kum ka por u Patsha Nero, bad la suhlang ia kine ki shithi bad kiwei pat ki jynthoh kiba kham hadien. Hood, u Ioannis u la long u Nongiathuhlypa, uba don ka bor bad ka iktjar ha kito ki Jylla-niam bad kumta u lah ban kren sbai, wat ban kdew ia ki lait ki let jong ki da ki ktien ne ki jynthoh paitbah kumba leh ki Nongiathuhlypa hyndai bad u Trai jong ngi ruh (Mk 6:17-2) ; Lk 13:31-32).

Namarkata, ha ki jingbatai jong ngi, ngin sa kdew ia ka khep ruh ha kaba la thoh ia kine ki bynta bapher bapher jong ka Kitab Jingpynpaw, khnang ba ki nongpule jong ngi kin kham sngewthuh bad kham shai. Da kane ngim mut bun ong ba ka rukom peit bad rukom i jong ngi ka long kaba dei tam; em, ka long kawei na ki rukom ba ki nongbatai ia ka Jynthoh Bakhuid ki lah ban leh.

Ngi la kdew ruh ha ka Maitphang ba ngi lah ban niew ia kane ka Kitab Jingpynpaw kum ka Drama ha ki lai tylli ki Sienleh(Acts), namarba bun na ki jingjia ha kane ka Kitab ki dei ki jingiohi-paw.

Baroh ki nongpule jong ngi ki tip ba ha ka Drama

ka don ka "Tienplie" kaba long kata ka "Prologue" ha ka ktien Phareng. Ngi lah ban ñiew ia ka Jinggaikhublei banyngkong jong kane ka Shithi kum ka 'Tienplie bad ia ka Jinggaikhublei bakhatduh kum ka 'Tienpynwai ne ka Epilogue ha ka Phareng.

Te lada ngi shim ia kane ka Kitab Jingpynpaw kum ka Drama, ngin ñiew ia ka PHANG I kum ka SIENLEH (Act) I, ha kaba, hadien ka 'Tienplie, ki don saw tylli ki Sienpaw(Scenes) kumne harum :-

Ka Sienpaw I (1:7-8)

Ka Sienpaw, II (1.9-11)

Ka Sienpaw III (1:12-20)

Ka Sienpaw IV (2:1-22)

Shuwa ba ngin batai bniah, katba ngi lah ei, ia ka 'Tienplie bad kumta ter-ter, kan iarap shibun ia ki nong-pule jong ngi, lada ngi a lyngkot ia ka jingbatai kyllum ia kane ka Sienleh baroh kawei.

Kito kiba pule bha bad kiba durïap ia kane ka Sienleh I baroh kawei kin shem ba u Ioannis u pyni bad u batai ia ka jinglong, ka jingim bad ia ka jingtrei-kam jong ka Balang ha kito ki por jong ka jingshah-banbein ha ki nongshun. U nongthoh u kdew shynna ba ka Balang ka dei ka Met u Jisu Khrist. Bad ha kane ka Met, u Jisu Khrist u dei u Khlieh bad ki 'riewngeit ki dei ki dkhot. U Jisu Khrist u dei u Trai Kynrad, Uba la mihpat na ka jingïap; Um lah shuh ban shahshitom, Um lah shuh ban iap; U don ha ka Burom lem bad u Blei, U Kpa, u Nongbuh Nongthaw. Hynrei ki dkhot jong kane ka Met, kiba dang don ha kane ka pyrthei, ki lah ban ngat ha ka jingshahshitom, ki lah ban shah banbein, ban tam ban duna, ban pap ban sang, ban ieng ban kyllon bad kumta ter-ter. Te u pyni sha ia kine ki ar bynta jong ka Balang: u Jisu Khrist kum u Khlieh bad ki 'riewngeit kum ki dkhot jong U ha kane ka pyrthei. Namarba ki dang sah ha kane ka pyrthei, ki dkhot jong kane ka Met kim pat poi sha ka burom, hynrei ki dang don ha ka jingïaleh bad kumta kane ka pyrthei-jot bad ki 'riewbymman ki lah ban ktah kti ia ki. Bad ka jingïaleh kan long kaba shyrkhei. Hynrei jia katba jia, ka jingjop ka dei ka jong ki 'riewngeit.

## KA 'TIENPLIE (1:4-6)

4. "U Iōannis ha ki hynñiew halang ha Asia: ka jingaiei ha phi bad ka jingsuk na *Uta* Uba long bad Uba la long bad Uban sa wan, bad na ki Hynñiew Mynsiem kiba don hakmat ka khet jong U, 5 bad na u Jisu Khrist, *Uba long* u Sakhi ba lah ban shaniah, Uba nyingkong eh ban mih na ka jing:ap, Uba ha khlieh-duh halor ki syiem ka pyrthei. Ha U, Uba ñai-ieidsbun ña ngi bad Uba la pyl-lait ña ngi na ki pop jong ngi da ka snam jong U, 6 bad Uba la pynlong ña ngi *ki khun ki hajar jong* ka hima, ki Lyngdoh *ban shakri* ña u Blei bad u Kpa jong U, ha U ka burom bad ka bor-synshar junom la junom. Amen!"

Hangne ngi iohi ña ka rukom thoh shithi ki 'riewhyn-dai, khamtam eh hapdeng ki Grik bad ki Roman. Kim ju thoh "Bah baiei, ne Kong baiei" haba ki sdang ña ka shithi hynrei ki kitbok kitrwiang ba kito, sha kiba ki thoh, kin ioh ña kaei kaei kaba ki da ñiewkor ha kane ka jingim.

Te ki nongthoh shithi ki sdang da kaba nam ña lade hi, nangta ki sa pynbud ña ka kyrieng jong kito sha kiba ki thoh. U Iōannis ruh u la leh kumjuh: u la nam nyingkong eh ña lade katkum ka dustur ha kata ka por.

## (i) HA KI HYNÑIEW BALANG HA ASIA.

Da ka kyntien "BALANG" ngi mut ka kynhun ki Khristan ha kaba don u Lyngdohsad uba peit uba khmih bad uba pynñaid ña kato ka kynhun ha kiei kiei kiba ñadei bad ka Niam. Ka dei ka jingpynkylla na ka Grik "Ekklesia" kaba long ka jingring jingmut na ka Hebru "Qahal ne Qahal Yawe" kaba mut ka jingñalum-lang jong ki paid Is-rael kum ka kynhun jong u Blei. Ka kyntien Grik "Ekklesia" ruh ka mut ka jingñalum-lang, ka jingñakhot-lang jong ki briew kum ka kynhun ban pyndep ña ka kam kaba kyrpang. Kumta ka jingring jingmut sha ka Khiasi kum ka "Balang" ka long kaba dei bad kaba don nongrim.

Hynrei da kaba ong "KI HYNÑIEW BALANG", u Iōannis um mut ban ong ba ki don shibun ki Balang, kumba ngi ju sngewthuh mynta. Em; ka don tang kawei ka BALANG ba la seng da u Jisu Khrist. Hynrei la pyndonkam ruh ña kane kajuh ka kyntien ban mut, nying-

kong eh, ka Jylla-niam ne ka Shnat-niam. Ka Jylla-niam ka dei kato ka kynhun ki Khristan, kiba don hapoh ka jingpeit jingkhmih u Lyngdohsad(Bishop) bad ka Shnat-niam pat ka dei ka kynhun ki Khristan hapoh ka jingpyn-laid u Sohblei Rangbah. Hangne ka kyntien "Balang" ka mut ka Jylla-niam.

U Ioanris u ong ba kine ki Balang ne ki Jylla-niam ki don ha Asia. Da kane u nongthoh um mut ban ong ba ka dei ka Dewbah Asia baroh kawei, hynrei tang ka Jylla Asia Roman (The Roman Province). Ka dei ka bynta shaphang sepnei jong ka Asia Minor, harud ka Duriaw Mediterranean. Ka dei ka Jylla kaba heh, ia kaba ki Roman ki la niewkor shibun.

Shuwa ba kan kylla long ka Jylla Roman, ka la long kawei na ki hima ha Asia Minor bad u nongsynshar, uba nyngkong ban nam syiem ia lade, u dei u Attalus I, ia uba la kha ha kum ka snem 269 SK bad u la mihpli ia la u kpa, u Eumenes I ha kum ka snem 241 SK. Ha ka iing-ialeh pyrshah ia u Philip na Masedon, u kpa jong u Alexander Bakhraw, u Attalus I u la ieng ha ka liang ki Roman, kiba la iateh jutang bad u. U la long u briew uba stad, u nongthoh kot bad dei ma-u uba la tei ia ka dulan kot ha Pergamum, kaba long ka Nongbah jong ka hima. U khun jong u, u Attalus II, u la bteng ia ka kam jong u kpa bad u la long barabor u paralok jong ki Roman pyrshah kiwei pat ki syiem. U la shah aibih ha kum ka snem 137 SK bad u khun jong u Eumenes II, u Attalus III, u la long syiem. Ban pynskhem ia la ka khet, u la pyniap ia ki paralok jong u kni jong u, u Attalus II. Kane ka kampap ka la ktah ia ka dohnud bad mynsiem jong u bad u la lamwir khyndiat. U la set-op ia lade ha ka paki dulan bad u la pynlut ia la ka por ha ka thoh ka pule. U la don ka jingburom, ka jingniewkor bad ka jingieid kaba khraw ia ki Roman bad kumta khyndiat por shuwa ban iap, u la thoh ka Pynkam, da kaba u la aiti noh ia la ka hima ha ki Roman kum ka nongpateng jong ki ha kum ka snem 132 SK. Naduh kane ka por kane ka Hima ki Syiem Attalid ka la kylla long ka Jylla Roman, kiba la synshar ia ka katkum ki ajit bad ki riti jong ki ha ka Hok katkum ka Hukum, ngi lah ban ong. Hoodid, ki Roman ki la synshar hok bad kim shym

pynwit ia ka Balang ban roi ha kato ka Jylla tad haduh ka por jong u Patsha Nero Hynrei naduh ka por jong u Patsha Nero bad naduh ba la suang ha Asia Minor ban mane-blei ia u Patsha Roman bad ia ka blei Roma, ka Balang ka la sdang ban ngat ha ki jyrwit jyrwat bad ka la shah leh beiñ khamtam eh ha ka por jong u Patsha Domishian kumba ngi la kdew ha ka Maitphang.

Namarba, haba sdang, ki Roman ki la synshar hok bad kim shym pynwit ia ki nongialap, ka Balang ka la roi bha ha kane ka Jylla Roman bad bun ki shnong ki la ioh-sngew ia ka Khubor Babha bad ki la pdiang ia ka, kum ha Pergamum, ka Nongbah, Ephesus, Smyrna, Thifatira, Sardis, Philadelphia, Laodisea, bad ha ki shnong bamarjan bad bamarkhap kum ka Iroas, ka Kolosse, ka Hierapolis, ka Tralles, ka Magnesia bad ka Miletus. Ka Khubor Babha ka la seiso shibun ha kine ki shnong bad ha ka por jong ka Kitab Jingpynpaw, ki Khristan ki la roi bad ki la bun.

Na kine kiei kiei, ka paw ba ki Balang ne ki Jylla-niam ki la bun bad ki la palat ia ka hynñiew. Te ka mih ka jingkylli, "Balei u Ioannis u la nam tang hynñiew tylli ki Balang ne ki Jylla-niam?" Ki don ki daw khlem pep.

Ka daw kaba nyngkong imat ka long ba u Ioannis lehse u la kham trei shitom bad kham imsngi ia kine ki hynñiew tylli ki shnong ban ia kiwei pat. Dei ha kine ki shnong ba u la ialap kum u Nongiatuhlypa da ka bor bad ka iktiar ba la ioh na u Blei bad ba la ithuh da ka Balang. Dei ha kine ki shnong ba u la ioh lehse bun bah ki mynsiem bad kumta u Ioannis u la ñiew ia ki kum ki shnong lajong, ki shnong kiba kyrpang na ka daw ki Khristan kiba la pdiang ia ka Khubor Babha lyngba jong u. Te ka la don ka jingidei kaba kham kyrpang.

Ka don sa kawei ka daw, ba kine ki shnong ki long kiba kham kongsan ha kato ka Jylla Roman, ki shnong ha kiba kiwei pat ki shong ki sdien kumban shu ong noh. Ki jynthoh ne ki khubor, kiba poi sha kine ki hynñiew tylli ki shnong, ki poi beit sha kiwei pat ki shnong ruh na ka daw ka jingidei jong ki bad kine ki shnong.

Khatduh eh, ka don sa kawei ka daw balei u Ioannis u la nam tang hynñiew tylli ki Jylla-niam. Kum ma-ngi ki khun u Hynñiewtrep, kiba ñiewkor bad sngewtynnat

ia ki nombor 30, 7 bad 9, kumta ruh ki Israel hyndai ki n̄iewkor bad sngewtynnat ia ki katto katne ki nombor: u nombor 7, uba kdew ia ka jingpura, ka jingdap, ka jingbiang; u nombor 6 uba thew ia ka jingbymbiang, ia ka jingduna bad ka jingbypura; u nombor 4, uba kdew ia ka pyrthei kaba don saw bynta, ka bneng, ka n̄iamra, ka ryngkew bad ka duriaw ne ka um, u nombor 1000 uba mut ka jingīar bym lah batai shuh, ka jingheh, ka jingjlan kaba ym lah ban mutdur. Kumta ki 'riewstad bad ma-ngi, ruh lem bad ki, ngi lambyrneit ia kane ka daw balei u Ioannis u la nam tang hyn̄iew tylli ki Jylla-niam. U dei u nombor ia uba u da ieid eh bad u la pyndonkam ia u kumba 54 sien ha kane ka Kitab Jingpyrpaw, kumba ngin sa iohi. U dei u nombor uba pyni ia ka jingpura, ia ka jingjanai, ia ka jingdap jingbiang ha kiei kiei baroh. Ha une u nombor ym don ka tam, ym don ka duna. Te u Ioannis u la pyndonkam ia une u nombor ban kdew ia ka Balang kum kaei kaei kaba la biang nadong shadong katkum ka saiñdur jong u Blei. Da une u nombor u Ioannis u thew ia ka Balang baroh kawei ha ka Jylla Roman, ha Asia Minor, ha ka Dewbah Asia, ha ka Dewbah Iurop bad ha ki Dewbah baroh ha satlak ka pyrthei bad ka khubor, ka sneng ka kraw jong u ki dei na ka bynta ka Balang baroh kawei ha kane ka sla pyrthei. Ha kaba pynkut ia ki shithi sha ki Jylla-niam, u thoh jin hyn̄iew sien kumne, "Jar uba don shkor, to un sngew un sngap ia kaba u Mynsiem u kren ha ki Balang! (JPW 2:7; 11, 17,29; 3:6,13,22)". Um ong shuh ha ki hyn̄iew Balang, hynrei ha ki Balang, kata, ha ki Jylla-niam baroh jong ka pyrthei. Khatduh eh, ngi la kdew ia ka Kanon Muratori ha ka Maitphang, kaba long ka list kaba rim tam ha kaba ngi shem ia ki Kitab bapher bapher jong ka Jynthoh Bakhuid. U nongthoh jong kane ka list u ong ba u Ioannis u la thoh ia ka Kitab Jingpyrpaw jong u, ym tang ha ki hyn̄iew Balang ha Asia Minor, hynrei sha ka Balang baroh kawei ha ka sla pyrthei.

(ii) KA JINGAIEI HA PHI BAD KA JINGSUK  
(Ha ka Grik "Kharis hymn ke irim").

Ngì la ong haneng ba ki Grik bad ki Roman 'kim ju sdang ia ki shithi jong ki kumba leh ma-ngi da kaba thoh



"Bah, baieid" ne "Kong baieid", hynrei ki kitbok kitrwiang ba kito, sha kiba ki thoñ, kin ioh ia kaei kaei kaba ki da ñiewkor shisha ha kane ka jingim. Ki Grik ki ñiewkor bha ia ka jingitynnat, ia ka jingwandur bad ia ka jingbbabrew jong ka met ka phad, ka jingiphuh iphieng ka ryn-ieng ryniot bad ka jingilub ka longbriew manbriew, kiba khring ia ki briew bad kiba pynsngewtynnat ia ki. Ki pynpaw ia kane ka kitbok kitrwiang da kaba pyndonkam ia kane ka kyntien "Kharis" (1), kaba thew ia kine kiei kiei kiba ngi la kdew. Ka berb jong kane ka kyntien "Khero" ka don kiuh ki jingmut. Te haba u Grik u ong ha u paralok "Khere!", u mut ban kitbok kitrwiang ba un bha un-miat, un uynnat, un iphuh iphieng, un bhabriew bad un wandur jwaiñ ha ka met ka phad, un ilub ha ka khmut ka khnat, un sngewtynnat sngewthiang ha ka sut kren sur khana bad kumta ki briew kin sngewtynnat ia u, kin shah khring sha u bad kin iapmat ia u kumban shu ong noh. Te na kine kiei kiei ka paw ba kane ka kyntien "Kharis" ka kit ar tylli ki jingmut tynrait (a) ka jingitynnat, ka jingiphuh iphieng, ka jingwandur, ka jingbbabrew, ka jingilub ka met ka phad, ka jingsngewtynnat ka kieh ka thylliej bad ka akor jong u briew ha la de hi; (b) ka jingitynnat jong kiwei pat ia u, ka jingsngewtynnat bad jingsngewhun ia u, ka jingilub jong ki ia u haduh ba kin da iapmat ia u kumba ong noh.

Kane ka kyntien "Kharis" ka paw bha ha ka Jynthoh Bakhuid bad ka dei kawei na ki kyntien kiba kongsan haduh katta katta, khamtam oh ha ka Jutang Bathymmai Nyngkong eh, kane ka kyntien ka don kijuh ki jingmut kum hapdeng ki Grik hyndai (Lk 4:22; Kol. 4:6) ha ka jingiadei bad u briew ba ki kitbok kitrwiang. Na ka liang kiwei ruh, ngi shem ia kijuh ki jingmut (Lk 1:28,

1 Kane ka rukom aikhublei da kaba kitbok kitrwiang ba ki briew kin ioh ia kaba ki ñiewkor ka paw ruh ha kiwei pat ki jaitbyriew. Ki Roman hyndai ki ñiewkor bha id ka jingkoit jingkhiah bad ki aikhublei da kaba ong "Salve", kaba mut "To shait to koit ha ka met ka phad. Ma ngi ki khun u Hynhiewtrep ngi kheikor bha ia ka jingkyrkhu u Blei Najrong Natbian. Te ngi aikhublei da kaba ong, "Khoblei", kaba mut "To u Blei un kyrkhu kyrdoh ia phi ba phi bha phi miat". Ki Dkhar ki ñiewkor bha ia ka burom surom ba ki ioh na ki briew, Te ki aikhublei da kaba ong, "Namas-te", kaba mut imat ka burom ha phi".

30; 2:52). Kane ka kyntien ka mut ruh "Ka jingsngew-nghuh" kaba mih na ka jingsngewtynnat bad jingsngew-kmen ba la ioh eiei (I Kor. 10 30).

Mynta, nalog ki jingmut ba la kdew haneng, kane ka kyntien "Kharis" ka don sa kawei pat ka jingmut kaba kham jylliew ha ka jingladei bad u Blei katkum ka Jynthoh Bakhuid. Ka thew ia ka jinglong tynrai, ka saiñdur bad ka jingtrei-kam jong u Blei ha ka jingladei bad ngi u khunbynriew. Ka thew, nyingkong eh. ia ka jinglong jong u Blei Uba ieidsbun ia baroh haduh katta katta khlem ka daw, khlem nongrim bad khlem jingdawa na ka liang kito kiba U ieidsbun, lait noh tang kane ka daw ba ki long ki jynthaw jong U bad ki la mih na ki kti jong U. Namarba u Blei u ieidsbun khlem daw, khlem nongrim bad khlem jingdawa na ka liang kito kiba U ieidsbun, U saiñdur ba kin bha kin miat, kin roi kin man, kin iphuh iphieng, kin janai, kin pura ha ka longbriew manbriew bad kin kiew irat haduh ba kin da ioh ia ka jingini-blei kum ka ri-kynti (1) ia kaba ki lah ban kam,

1. Na ka bynta jong ngi ki khun u Hynñiewtreo, kane kam dei kaba eh ban sngewthuh namarba u Blei hi u la hukum ia ki Longshuwa jong ngi ban "Kamai ia ka Hok". Haba iih jylliew bha, ka Hok ka dei u Blei hi ia Uba ngim lah ban iohi, hynrei Uba trei-kam khlem sangeb khlempud. Te ngi ong, "Ka Hok ka im ! Ka Hok ka bud-dien ! Ka Hok kan bishar !". Kumta ka Hok ka mut ka jinglong-blei. Hynrei u Blei u pynpaw ruh ia lade lymba ka mariang bad kiei kiei ba U la thaw. Ia u Blei Uba ngi ithuh ha kane ka rukom, ki Longshuwa jong ngi ki nam "Ka Hukum". Ka Hukum ka dei u Blei hi Uba pynpaw ia lade ha ki jynthaw, ha ka jingitynnat bad jingtaid ryntih ka mariang. i kumba ka don ki riti ki aiñ. Haba kren kyllum shaphang kine kiei kiei kiba ia id ryntih ha ka mariang, ia Uta Uba pyniaid ki Longshuwa ki nam "Ka Hukum". Shuh-shuh, haba peit kyllum ia kane ka mariang, ngi iohi ba ka don ka bor na sha lyndet. Te ki Longshuwa ki ju sneng da kaba ong, "To leh ia kiei kiei ba ka Hok katkum ka Hukum da ka Bor". Te ngi iohi ia ka Hok, ia ka Hukum bad ia ka Bor. Ha ka jingpyrkhat ki Longshuwa ka Hok ka Hukum bad ka Bor ki long kawei. Hynrei kaba tynrai eh na kine ka dei ka Hok. Na kine kiei kiei ka paw ba ka Hok ka dei ka jingim blei hi, ka jinglong-blei hi ia kaba ngim lah ban iohi. Te da kaba ong ba ngi wan sha ka pyrthei ban kamai ia ka Hok, ki Longshuwa ki la sngewthuh ba ha kano re kano ka rukom ka jinglong-blei hi ka lah ban long ka jong ngi, ka markynti jong ngi kum ka kynbun bad shimet shimet. Kane ka rukom pyrkhat ka ladei dur bad kata kaba ngi khot mynta ka "Jingajei".

bad kumta ki kylla long ki khun-blei, ki khun binong bishon, ki khun bakhraw batri bad ki khun lyngdoh khun syiem. Ba kane ka saifndur baphylla tam jong u Blei kan ur-long, U trej-kam ha ka histori jong ngi, U ai lut ia ki lad ki lynti ba ngi donkam ban poi sha kane ka thong ba la buh bad mang hi Ma-u. Tang kawei u khunbynriew u donkam ban leh bad kata ka long "ban pdiang ia kaba u Blei u tyrwa sbun, ban aiti bad ban bynshet ia lade nadong shadong ha U." Ia kine kiei kiei baroh la kynthup lang ha ka kyntien "Kharis", kaba long ka jingring jing mut na ki artylli ki kyntien Hebru "Hen(Jen.6:8; Ps 84:12)" kaba mut ka jingitynnat, ka iingsngewtynnatt na ka liang u Blei bad kiwei pat, bad "Hesed (Jen.19:19;24:12; Deut. 5 10)", kaba thew ia ka jingieidsbun u Blei khlem jingdawa eiei na ka liang u briew. U Blei u ieidsbun wat lada ngi ki briew ngim don eiei da kaba ngi lah ban dawa ia kane ka jingieidsbun.

Mynta ia kane ka kyntien Grik "Kharis" bad ia ki kyntien Hebru "Hen" bad "Hesed" ngi la ring jingmut sha ka Khasi da ka kyntien "Jingaei", namarba, ha ka jingshisha, ngi la ioh ei ia kiei kiei baroh na u Blei. Namarba u Blei u ieidsbun bad u kwah ban ieidsbun shuhshuh, U la thaw ei ia ngi, U la ai ha ngi ia kiei kiei ba ngi donkam ban pura bad ban janai ha ka longbriew manbriew, U la phah ei ia la u Khun ban pynim ia ngi wat lada ngim dawa eiei na ka daw ki pap ki sang jong ngi, U la pynhok ei ia ngi da ka jingngait ha u Jisu Khrist, U la pynlong ei ia ngi ki khun-blei, ki khun binong bishon, ki khun bakhraw batri bad ki khun lyngdoh khun syiem. Kine kiei kiei baroh ki long da shisha ka "JINGAEI" jong u Blei. Shi-junom ngi la ioh ei bad ngin lai-iah ei na u Blei bad u Blei u kloi eh ban ai lada ma-ngi ngi kloi ban pdiang bad ban bynshet lut ia lade ha U.

Ki dei kine kiei kiei baroh ba u Ioannis u kitbok kitrwiang ia ki Khristan sha kiba u thoh ia kane ka Kitab Jingpynpaw. Ka dei da shisha ka jingkitbok kitrwiang kaba bha tam, namarba ym don eiei kaba kham bha bad kaba kham myntoi ia ngi ki briew ban ia kane ka Jingaei jong u Blei, kumba ngi la batai haneng. Ngim lah

ban thrang ne ban kwah eiei kaba kham khraw, kaba kham donburom ban ia kane ka Jingarei, kaba kynthup khamtam eh ia ka Jingim-blei ba u Blei u aiei ha ngi ha ka Jingkha-arsien da ka Um bad u Mvnsiem Bakhuid. Sbisyn-ong, u Ioannis u kitbok kitrwiang ba ki Khristan kin ioh ia u Blei hi bad da ka kaba ioh ia u Ble, ki ioh lut ia kiei kiei baroh ba ki lah ban mutdur.

Mynta, lada u Ioannis u dei u Grik, ka jingkhublei kitbor kitrwiang jong u ka la biang tang da kaba pyndonkam ia kane ka kyntien "Kharis". Hyntrei kumba ngi la kdeg ha ka Majitphang, u Ioannis u dei u Ju. Bad ki Ju ki aikhublei kitbok kitrwiang ia ki paralok, haba ki thoh shithi ne ki kynduh ia ki, da kaba ong "Ka Jingsuk ha phi!", namarba, na kiei kiei baroh ha kane ka pyrthei, ki Ju ki ngeit ba ka Jingsuk ka long, kaba kongsan tam. Uba ioh ia ka Jingsuk, u ioh lut ia kiei kiei baroh. Te u Ioannis, namarba u dei u Ju, kum u Apostol Paulus, u pynbud ruh ia kane ka kyntien "IRINI" kaba long ka jingring jingmut na ka Hebru "SHALOM", bad ha ka Khasi ngi ong ka "JINGSUK".

Ka jingmut tynrai jong kane ka kyntien Grik "IRINI" ka long ka jingpynsangeh, ka jingpynduh bad ka jingweng-noh ia ka jingiashun hapdeng ki briew kiba ia leh pyrshah kiwei ia kiwei pat kum ki hima ne ki shnong ki thaw. Ka thew, nyngkong eh, ia ka Politiksh hapdeng ki hima ne ki shnong. Lada ki hima bad ki shnong kim ialeh thma, ki don ha kata ka "IRINI", ka jingiasuk ka jingiasaiu ha ka jingiadei para-hima ne hapdeng ki shnong bapher bapher. Ki Grik ki ju pyndonkam ia kane ka kyntien ha ka jingiadei parabriew, kim ju kham pyndonkam ha ka jingiadei bad ki blei-thaw jong ki. Hyntrei hangne, ha kane ka Kitab Jingpypaw, kane ka kyntien ka don ka jingiadei kaba kyrpang bad u Blei, namarba ka dei ka jingring jingmut na ka Hebru "Shalom", kaba, ha ka jingpyrkhat jong ki Ju, ka don ka jingiadei kaba kyrpang bad u Blei.

Ki riwstad ki ong ba imat kane ka kyntien ka wan na ka ktien Akkadian "SALAMU" kaba mut ka jingbiang, ka jingpura ha ka Akor, ka burom ka ijot, ha ka koit ka ka khiah, ha ka ioh ka kot bad ha ka longbriew manbriew.

Namarkata, u briew, uba shait uha koit bha, uba tipbriew tipblei, uba hok basot nadong shadong, uba biang ka bam ka sa, shisyn-ong, uba biang ha kiei kiei baroh, uta u briew u don ka "SALAMU". Na kane ka kyntien, ki riewstad ki ngeit, ka wan ka Hebru "SHALOM", kaba don kijuh hi ki jingmut. Ki Ju ki ngeit ba ka "SHALOM" ka dei ka thupbah jong ki jingbha baroh kum ka jingim, ka jingkoit jingkhah, ka ioh ka kot, ki khun ki kti baparuh bapareh, ki jynri jyndup, ki lyngkha risai, ka burom ka ijot ha ka imlang sahlang bad kumta ter-ter! Ka dei ka jingbit jingbiang, ka jingpura bad ka jingjanai nadong shadong Hynrei ki Ju hyndai ki ngeit ba kine kiei kiei ki wan na u Blei bad ki dei ka dak ka shin ba u briew u don ka jingladei bad u Blei. Ka mut ba ym don jinglapher jingmut, ym don jinglashun eiei hapteng u briew bad u Blei; tang ka jingladei jingmut suda. Te wat lada teng teng kane ka kyntien ka thew ia ka jinglabha iamiat, ka jinglasuk lasain hapteng ki briew (I Sam. 25: 6; II Sam. 18,29; I Sy. 4:24), ka mut khamtam eh ia ka jingladei jingmut bad ka jinglasuk bad u Blei, kaba wala lam ki jingbha baroh ha u briew bad ha ka pyrthei. Ka Jingsuk ka wan na kane ka jingsngewhun hi jrut, ha ka liang ka met bad ka mynsiem. Bad ka dei kane kaba u Ioannis u kitbok kitrwiang ia ki Khristan.

Mynta haba peit na kine ki liang baroh, la ring jingmut bha sha ka Khasi da kane ka kyntien "JINGSUK", kaba long ka thupbah thupsan jong ki jingbha baroh kiba ngi lah ban ioh na u Blei bad na ki briew. Haba don ka jingsuk, ngi ioh lut ia kiei-kiei baroh. Ka dei da shisha ka jingkitbok kitrwiang kaba bha tam bad ka dei kane kaba u Ioannis u kwah ba ngin ioh da kaba pule ia kane ka Kitab Jingpynpaw.

(iii) NA UTA UBA LONG BAD UBA LA LONG BAD UBAN SA WAN (Ha ka Grik "Apo ho on ke ho in ke ho erkhomenos").

U Ioannis u la kitbok kitrwiang ba ki Khristan ki ioh Jingaiei bad Jingsuk, kumba ngi la batai haneng. Bad mynta u kwah bar k dew ia ka tyllong na kaba ka wan kane ka Jingaiei bad ka Jingsuk: na u Blei Nongbuh Nongthaw u Nongpytlong-pynman, u Nongbuhbynta u Nong-

sambynta ia kiei kiei baroh. U Blei Nongbuh Nongthaw u dei ka tyllong batynrai tam jong ka Jingaiei bad ka Jingsuk.

Hangne u Ioannis u pyni ba u dei u Ju bad u kren bad u thoh kum u Ju, ym kum u Grik. U kren bad u thoh kum u Ju ubym pat nang bha ia ka ktien Grik. Ha ka jingshisha, kane ka dei kawei na ki sentens Grik kiba bakla ha ka Kitab Jinepynpaw na ka liang ka Grammar. Wat u khynnah skul klas III ha Athens un nym thoh kumne. Hynrei u Ioannis, haba peit na kawei pat ka liang, um banse ban leh pyrshah ia ka Grammar Grik khnang ban pynshai kdar ia kaba u mut ban thoh bad ia kaba ki Khristan ki dei ban sngewthuh bha. Kane ka sentens ka dei ka sentens Hebru ha ki kyntien Grik.

Ki Ju hyndai ki ju pyndonkam bun ki kyrteng ban kdew ia u Blei Nongbuh Nongthaw. Kawei na ki kyrteng ka dei kato kaba ngi shem na ka Kitab Exodus 3:14, ha kaba u Blei u ong "EHIE 'ASHER" 'EHIE kaba mut "Nga long Uba long". Shuh-shuh, u Blei u ong, "EHIE SHELAHANI", kaba mut. "NGA-LONG U LA PHAH IA NGA". Ka berb "EHIE(NGA LONG)" ka kylla noun bad ka subjek jong kawei pat ka berb "SHELAHANI( U LA PHAH IA NGA)". Ar tylli ki berb ha kawei ka sentens: ka berb banyngkong ka long ka subjek. Kum kane kaei kaei ym ju lap hangno hangno ne ha kano kano ka ktien. Ym ju shem ba ha kawei ka syntens kin don ar tylli ki berb bad tang kine artylli hi. Hynrei u nongthoh jong ka Jynthoh Bakhuid um banse ban leh kumne khnang ban pynneh shai-kdar ia ka jingmut. Bad dei nangne ba ka mih ka kyrteng bakyntang u Blei "Yawe", ia kaba ki Ju kim ju kynnoh ba ki kheiñ sang ban "Khoh Pyrtuit" kumba ong ki Bhoi bad ki Pnar. Ki kynnoh pynban "Adoni" kaba mut u "Kynrad jong nga".

Kane ka jingkheiñ-sang ban "Khoh Pyrtuit" ia u Blei, ka la pynlong ia ki Ju ban nym kwah ban pynkylla ha kano kano ka rukom ia ka kyrteng bakyntang jong U. Ki da tieng-burom haduh katta katta. Te imat dei na kane ka daw ba u Ioannis, wat haba u thoh ha ka Grik ruh, u la rai ban jehnoh ia ka kyrteng kumba ka long, kumba hikai ki para 'riewstad Ju jong u kiba ong ba "EHIE 'ASHER 'EHIE", kata, "NGA LONG UBA NGA,

LONG" ka mut "NGA LA LONG, NGA DANG LONG BAD NGAN LONG". Te haba kylla kyntien pa kyntien na ka Grik u Ioannis sha ka Khasi, ngim banse ban ong "NA NGA LONG, NA NGA-LA-LONG, BAD NA NGAN-SA WAN" lada ngi thoh ha ka "person balai singular", NA U DANG-LONG, NA U LA-LONG BAD NA U YN-LONG"(1) Khatduh eh, u Ioannis u pyndonkam ia ka berb Grik "IMI", kaba mut "Nga long" na ka bynta ka Mynta bad ka Mynnor jong u Blei; hynrei na ka bynta ka Lawei, u pyndonkam ia ka berb "ERKHOME", kaba mut "NGA WAN". Khlempep ki don ki daw U la leh kumne, lehse, na ka daw ba ka berb IMI" kam don ka partisipyl ban kdew ia ka lawei; ne u la leh khnang kumne ban siat jingmut ba u Blei, ym tang ba Un iailong, hynrei Un wan ruh ha ka burom lem bad u Khun jong u u Jisu Khrist ha ka Sngi Bakhatduh. Te ka partisipyl "erkhomenos" ka lah ban mut ba u Blei un iailong bad Un wan ruh ha ka Jingwanpat jong u Jisu Khrist.

Ban pynkut: ki kyntien "Na Uta Uba long bad Uba la long bad Uban sa wan" ki thew ia u Blei u Kpa, u Nongbuh Nongthaw kum ka tyllong batynrai tam jong ka Jingaiei bad ka Jingkyrkhu

(iv) BAD NA KI HYNÑIEW MYNSIEM KIBA DON HAKHMAI KA KHET JONG U (Ha ka Grik "Ke apo ton hepta Pnematton ha enopion tu thronu aftu").

Hangne ngi iohi ba, na ka bynta u Ioannis, najor u Blei Nongbuh Nongthaw, ka dang don sa kawei ka tyllong jong ka Jingaiei bad ka Jingsuk bad ki dei "KI HYNÑIEW MYNSIEM". Kiei kine ki Hynñiew Mynsiem? Khlempep kim lah ban long ki jynthaw jong u Blei(2). Kim lah ban long ka tyllong jong ka Jingaiei bad ka Jingsuk.

1. Lada ngi pynkylla kyntien pa kyntien sha ka Phareng, kine ki kyntien kin mut kumne, "THE BEING, THE WAS AND THE WOULD COME". Ha ka ktien Khasi pat, "U DANG-LONG, U LA-LONG BAD U BAN-SA-WAN". Ban nym dub ia kane ka jingmut tynrai, u Ioannis u klet noh ia ka Grammar Grik, kumba baroh ki bna bad ki tip

2. Shem te ngi shem hi ha ki jynthoh jong ki Ju ia ki khanaparom shaphang kita ki Hynñiew Angel ne ki Hynñiew Mynsiem, kiba long kr jynthaw u Blei bad kiba shakri ia U kum ha ka kot u Enokh bad wat ha ka Kitab u Tobit ruh Ia kine ki angel la ju nam kum-u

kumba ngi la batai haneng. Te khlempep hangne u Ioannis, u mut ia U MYNSIEM BAKHUID HI, u Person u Balai jong ka Trinitit Bakhuid, "namarba dei tang na u Blei ba kito kiei kiei kiba ngi la batai ki lah ban wan. Te balei u Ioannis um thoh, beit "U Mynsiem Bakhuid", hynrei u thoh pynban "Ki Hynñiew Mynsiem?"

U Ioannis u dei u Ju, uba tip bha ia ka Jutang Barim bad u thoh katkum ki jingmut jong ka Jutang Barim. Ha kane ka khep, khlempep, u la kynmaw ia u Isaia, uba la thoh kumne harum :-

"Halor jong U, u Mynsiem u Trai un shongsah;

U Mynsiem ka jingstad bad ka jingshemphang,

U Mynsiem ka jingsaiñdur bad ka bór,

U Mynsiem ka jingtip bad ka jingtieng-burom ia u Trai" (Is. 11:2). Shuh-shuh, u Ioannis u dei u Ju bad bun-na ki Ju, kiba nang kiba stad, ki pule ia ka Jynthoh Bakhuid, ym tang ha ka Hebru, hynrei ha ka Grik ruh, ia kaba ki 'riewstad ki khot ka jingring jingmut 'Septuaginta (LXX). Ha kane ka Septuaginta, ha ka jaka jong ka bynta bakhatduh jong ka dkhot u Isaia, ngi pule kumne, "U Mynsiem ka jingtipblei bad ka jingriewblei. Bad u Mynsiem ka jingtieng burom ia u Trai kan pyndap miaf ia U." Khlempep u Ioannis u la bññ ia kane bad kumta u la ngeit, kum kiwei pat ki Ju, ba ki don hynñiew tylli ki rukom trei-kam jong u Mynsiem u Blei, ba ki don hynñiew tylli ki sap ki phong ba u Mynsiem jong u Trai u ai ha ki Khristan bapher bapher. Namarkata, da kine ki kyptien "Ki Hynñiew Mynsiem", u Ioannis u, mut ba kdew ia u Mynsiem u Blei. Uba trei-kam ha ki hynñiew tylli ki rukom ha ka Balang baroh kawei katkum ki jingdonkam jong ka. Ym lah ban artatien, namarkata, ba u thew ia u Mynsiem Bakhuid kumba ngi tip mynta, wat lada u la pyndonkam ia ki kyntien jong ka Jutang Barim "Ruakh Yawé", kaba mut u "Mynsiem u Trai". Bad ha

---

Uriel, u Raphael u Raguel, u Michael u Gabriel u Sajaquael bad u Jeremiel. La ngeit ha kine ki angel ki peit ki khmib ia ka mariang, kum ka ding, ka lyer bad ka um. Shuh shuh la ong ba kine ki angel ki dei ki nongda nongker jong ki jaitbynriew bapher bapher. La, at ha ki ia kan ka kam, namarba ki long ki shakri bahok jong u Blei, bad kumta ki iajao bha bad u Blei. Hangne ka paw shai ba kum ki jynthaw kim lah ban long ka tyllong bad ka tynrai jong ka, Jingaiei bad ka Jingsuk, ;



ka Jutang Barim, ki kyntien "Ruakh Yawe" ki mut ia u Blei Nongbuh Nongthaw hi, Uba trej-kam ha kane ka pyrthei kum ka tyllong jong ka jingim, ka jingkhie jingsan, ka jingroi jingman, ka jingkieu irat bad ka jingpura jong kiei kiei baroh ha kane ka pyrthei. Te "Ruakh Yawe" u dei u Blei hi bad ha ka Jutang Bathymmai, u dei u Mynsiem Bakhuid, Uba long, ryngkat bad u Blei u Kpa, ka tyllong batynrai jong ka Jingaiei bad ka Jingsuk na ka bynta ki Khristan.

Da kaba ong ba u Mynsiem Bakhuid u trej-kam ha ki hynñiew rukom, u Ioannis um mut da lei-lei ruh ban ong ba u Mynsiem Bakhuid u trej-kam tang ha kine ki hynñiew rukom. Em, um lah ban mut kumta, namarba u tip ba u Mynsiem Bakhuid u dei u Blei bad ki rukom trej kam jong U ym lah ban ñiewtang. Ngim dei ban klet ba u nombor 7, ha ka pyrkhat pyrdaiñ ki Ju bad jong ngi ki khun u Hynñiewtrep, u dei u nombor uba kdew ia ka jingpura, jingjanai bad ka jingdap miar ha kiei kiei baroh. Te ki "Hynñiew Mynsiem" ki mut ki jynleh jynkam jong u Mynsiem Bakhuid ia kiba ngim lah ban mutdur namarba ki palat liam ia ka bor pyrkhat jong ngi.

Khatduh eh, da ki kyntien "KIBA DON HAKHMAT KA KHET JONG U", u mut ban hikai bad ban pynbna pyrthei ba u Blei Nongbuh Nongthaw u dei u Syiem bad u Patsha bashisha, Uba ha khlieh tam bad Uba halor tam, ym u Kaisar Julius ne u Kaisar Augustus, ia kiba ki paitbah jong ka Hima Roman ki la pynlong blei. Dei u Blei Nongbuh Nongthaw Uba shong khet halor ka mariang baroh kawei, bad halor u khunbynriew satlak ka pyrthei. Nangta u Ioannis u kwah ban ong ba u Blei Nongbuh Nongthaw bad u Mynsiem Bakhuid ki latrei-kam kum kawei. U Mynsiem Bakhuid u don bakhmat u Blei, kata, bad u Blei, ban pynurlong ia ka saiñdur ieidsbun jong u Blei na ka bynta u khunbynriew, da kaba ai ha ki briew ia ka Jingaiei bad ka Jingsuk.

#### (v) BAD NA U JISU KHRIST

Ryngkat bad u Blei Nongbuh Nongthaw bad u Mynsiem Bakhuid, u Jisu Khrist ruh u long ka tyllong batynrai jong ka Jingaiei bad ka Jingsuk, namarba Ma-u ruh u

dei u Blei, Uba la wan long briew. Kumba u Jisu Khrist u dei ka thymmei jong kane ka Jingsuk ryngkat bad u Blei Nongbuh Nongthaw, kumta ruh U long ka tyllong jong ka Jingaiei bad ka Jingsuk ryngkat bad u Blei u Kpa bad u Mynsiem Bakhuid. Hangne ka paw shai ba u Ioannis u mut ban ong ba ka Jingaiei bad ka Jingsuk ki wan na u Blei Nongbuh Nongthaw lyngba u Jisu Khrist ha u Mynsiem Bakhuid (1). Namarkata, kano kano ka jingjia histori kam lah lait na u Blei Nongbuh Nongthaw, na u Jisu Khrist bad na u Mynsiem Bakhuid bad ka jingloh jong ki Khristan ia ka Jingaiei bad ia ka Jingsuk ka dei ka jingjia histori kaba khraw tam bad kaba kordor tam.

(vi) **UBA LONG U SAKHI BA LAH BAN SHANIAH, UBA NYNGKONG EH BAN MIH NA KA JINGIAP, UBA HA KHLIEH-DUH HALOR KI SYIEM KA PYRTHEI.**

U Ioannis um hun tang ban ong ba u Jisu Khrist, ryngkat bad u Blei Nongbuh Nongthaw bad u Mynsiem Bakhuid, u dei ka tyllong batynrai jong ka Jingaiei bad ka Jingsuk, hynrei u dang kwah shuh-shuh ban ai nam ia U. Hadien ba u la pyrkhat sani bha, u Ioannis u ai ha u Jisu Khrist sa lai tylli ki Nam:(a) U Sakhi ba lah ban shaniah, (b) Uba nyngkong eh ban mih na ka jingiap bad (c) u Patsha halor kiwei pat ki Syiem bad ki Patsha jong ka pyrtnei baroh kawel. U Ioannis u leh khnang ia kane ban pynsgewthuh shai-kdar ia ki Khristan ba ki don ka jingladei kaba kyrpang eh bad u Jisu Khrist kum u Nongpynim bad u Nongjop bad kumta kin sa kham peiphang ia kiei kiei kiba u Jisu Khrist u la leh, u dang leh bad un faileh na ka bynta jong ki.

Nyngkong eh, u Jisu Kkrist u dei u **SAKHI BA LAH BAN SHANIAH**. Kane ka dei ka **NAM**, kaba khraw da shisha, namarba ka kit jingmut haduh katta katta ha ka jingladei jong u Jisu Khrist bad u Blei, nyngkong eh, bad nangta bad ngi ki briew. Ia kane ka kyntien Khasi "**SAKHI**" ngi. Ia ring jingmut na ka Grik

1. Imat ki Longshuwa ki khun u Hynfiwretap ki mut la kane haba ki sneng ki kraw, To leh ia kiei kiei ha ka Hok katkum ka Hukum bad ka Bor".

“Martis”, kaba mut u briew uba kren ne pynbna ia kaei  
 kaei ba u la iohi da la ki khmat, ba u la iohsngew da la  
 ki shkor, ba u la ktah da la ki kti bad u kloi ban pynshi-  
 sha ia kata wat da kaba phlei ia la ka snam ruh. U  
 sakhi u kren namarba u la iohi, u la iohsngew bad u la  
 ktah da lade hi (I Jo 1:1-.) Uba kren namarba u la ioh-  
 sngew na kiwei pat um dei u sakhi. U dei tang u nong-  
 pathai khubor. Te u Ioannis u ai ha u Jisu Khrist ia ka  
 NAM SAKHI namarba u Jisu Khrist u la iohi ia u Blei,  
 u la iohsngew ia u Blei bad u la ktah ia u Blei, U Jisu  
 Khrist u dei u Sakhi banyngkong bad bakongsan tam ha  
 ka jingidei bad u Blei bad ka saiedur jong u. Baroh ki-  
 wei pat ki la iathuh ia kaba ki la iohsngew na kiwei ne  
 na u Blei, ym ia kaba ma-ki hi ki la iohi ha u Blei kum-  
 ba iohi bad iohsngew u Jisu Khrist. Lait noh u Jisu  
 Khrist, ym don uwei pat u briew uba la iohi shisha ia u  
 Blei da la ki khmat (Io 1:18) Namarkata dei tang u  
 Jisu Khrist Uba lah ban iathuh hok bad shisha ia ngi sha-  
 phang u Blei Kiwei pat ki briew ki lah ban kren sha-  
 phang u Blei, hynrei tang kumba ki la iohsngew na kiwei  
 ne na ki jingiohi-paw aiu re kibym dei ki jingiohi mar-  
 khmat pyllein pyllein. Dei tang u Jisu, Uba la iohi  
 pyllein pyllein ia u Blei da ki khmat jong U bad U-  
 ba la iohsngew ia U da la ki shkor jong U hi kum-  
 ba U long. Kane kein ka dei ka daw balei ngi ong  
 ba u Jisu Khrist u la pynpaw pura bad janai  
 tam shaphang u Blei. Um don shun hi uwei pat  
 u briew uba lah ban ai ka jingtip kaba kham pura ne  
 kham janai shaphang u Blei ban ia u Trai jong ngi u Jisu  
 Khrist: ha U ka jingpynpaw u Blei ia lade ka la pura  
 bad ka la janai bad ka la kut. Dei tang u Jisu Khrist Uba  
 la ai khubor shaphang u Blei beit na ka tyllong-khubor hi,  
 kata na u Blei hi. Ha ka Phareng ki ong ka “Eye-witness  
 information” ne “first-hand news”. Kiwei pat ki briew  
 ki shu pathai khubor (second-hand news). Namarkata,  
 na ki nonglam khubor baroh shaphang u Blei, u Jisu  
 Khrist u dei Uba khraw tam, Uba ha khlieb tam bad Uba  
 janai tam. Nalor jong U, ym lah shuh hi ban don uwei  
 pat lano lano ruh em! Bad kane kaba ngi la thoh la  
 long kaba shisha namarba u Jisu Khrist hi u ong. “Shisha,  
 shisha, Nga ong ha phi ba ngi kren ia kaba Ngai tip bad

Ngi sakhi ia kaba Ngi la iohi . (Io. 3:11)". Shuh-shuh u Jisu u ban tynggeh, "Na ka bynta kane Nga la wan sha ka pyrthei ba Ngan dup sakhi ia ka Jingshisha (Io.18:37)". Ka Jingshisha, hangne, ka mut ia ka saiñdur jong u Blei, ia kaba tang u Jisu Khrist hi u tip nadong shadong. Nangta dei na kane ka daw ba u Jisu Khrist u la kren shai, "Nga long ka Lynti, ka Jingshisha bad ka Jingim. Ym don uban poi sha u Kpa lait tang da Nga (Io.14:6)". Hangne ka paw shai ba ngi tip thikna bad pura shaphang u Blei tang da u Jisu bad ngi poi ruh sha u Blei tang lyngba u Jisu. Ngim don kawei pat ka lad lano lano ruh em. Da shisha u Jisu u dei u Sakhi ha ka jingiadei jong ngi bad u Blei.

Namarba u Jisu u sakhi ia kaba u la iohi da la ki khmat bad namarba U dei u Blei, um lah ban lamler ne ban thok ban shukor Ha U ka Hok ka Shi-kyntien ka long kaba tam. Ia kum une u briew ngi lah ban shaniah nadong shadong. Hangne ka don ka jingiapher hapteng u Jisu bad kiwei pat ki briew. Haba u Jisu u ai sakhi, Um lah ban lamler, katba kiwei pat ki lah ban kren thok kren shukor Kane ka dei ka nongrim jong ka jingshngaiñ jong ngi ki Khristan. Ngim don jingartatien bad kumta ngim tmang, ngim syier ioh ngi kum bakla.

Ka nam kaba ar pat de, ia kaba u Ioannis u ai ha u Jisu, ka dei kane : U Nongmih banyngkong eh na ka jingiap. Ia ka kyntien "banyngkong eh" ngi la ring jingmut na ka Grik Prototokos", kaba mut "u khun phrangsngi". Kane ka kyntien "khun phrangsngi" ka pyni ia ka jinglong nyngkong da shisha hapteng kiwei pat kiba kha na kaju ka kmie. Shisien ba la kha phrangsngi, u briew u long uba nyngkong tam bad ym lah da lei-lei ban pynduh ia kane ka jinglong nyngkong jong u. Te kane ka mut ba u Jisu u dei Uba nynekkong eh ban mih na ka jingiap ha ka por bad ha ka burom. Mynta ka jingmihpat na ka jingiap ka dei ka jingurlong bad ka jingpyndep pura bad janai ia ka saiñdur u Blei. Te ka paw shai-kdar ba baroh ka saiñdur u Blei ka dei na ka bynta u Jisu Khrist, u Nongpynim jong ngi, kumba u long mynta ha ka jinglongbriew bad ka jinglongblei. U Kpa u la kha la u Khun bamarwei jong u kum u Jisu Khrist, Uba long.

u briew bashisha ruh bad kum u Nongpynim jong ngi. La mutdur ia kiei kiei barob, ia ka mariang bad ia u khunbynriew ha u Jisu Khrist bad ia nynwandur ia ki katkum ka jinglong u Jisu Khrist. U Blei u la thaw ia u khunbynriew namar u Jisu Khrist, u 'Lei-briew. Te kum u briew, u Jisu u dei uba nyngkong eh ban ioh ia u soh bad ia ka burom jong ka saiñdur u Blei Nongbuh Nongthaw. Bad u soh bad ka burom ka saiñdur u Blei ka dei ka jingpura bad ka jingjanai ka longbriew manbriew hadien ka jingmihpat ra ka jingiap.

Khatduh eh, ia ki kyntien "han mih na ka jingiap" ngi la ring jingmut na ka Grik "TON NEKRON", kaba mut "jong kiba iap". Kane ka dei ka rukom kren jong ki Ju, kiba ngeit ba ka don kata ka Sheol ne ka Niamra shapoh khyndew, sha kaba baroh kioa iap ki leit hiar bad ki sah hangta. Te ban leit sha "kiba iap" ka mut ban iap shisha ne kumba ju ong "U la hiar sha Limbo", kaba mut ba u la iap bad la tep da shisha ia u Nangne ruh ka mih ka rukom kren ki Ju "ban mih na kiba iap", kata ban mihpat na ka jingiap, ne uba la iap u im biang. Ka dei ka idiom jong ki bad ia ki idiom ngim lah pynkylla kyntien pa kyntien. Ngì dei ban shim tang ka jingmut.

Ka nam kaba khatduh ba u Ioannis u ai ha u Jisu ka dei kane: UBA HA KHLIEH-DUH HALOR KI SYIEM KA PYRTHEI. Kane ka nam ka mut ba u Jisu u dei u Syiem u Patsha bad u Nongsynshar u Nongkhardar Uba halor tam. Ym don Syiem, ym don Patsha. Uba kham khraw ha ka jingiar jong ka hima, ha ka bor bad ka burom ban ia u Jisu Khrist. U Ioannis u la ai ia kane ka nam ha u Jisu Khrist, ban pynkynmaw ia ki khristan ba u Kaisar ha Rom um dei u Syiem u Patsha uba halor tam kumba ngeit ki khun ki hajar bad ki rafot jong u. U Kaisar ruh u don hapoh u Jisu Khrist, Uba synshar halor jong ki Syiem bad ki Patsha jong ka pyrthei baroh kawei. Ha ka Maitphang ngi la kdew ba ha kito ki por la ñiew ia u Kaisar ha Rom kum u tlei bad u Patsha uba halor tam bad uba khlaiñ tam. U Ioannis u ong ba kane ka dei ka jingbakla. U Blei ha ka dur-briew u dei tang u Jisu Khrist, Uba long ruh u Syiem bad u Patsha Uba donbor tam bad uba halor

tam ha ka mariang baroh lawei. U Jisu hi ruh u la kam ba kane ka nam ka dei ka jong U (Io.18:33-37). Bad u Jisu u la pynskhem ia la ka hima, ym da kaba leh lahduh halor jong ki briew, hynrei da kaba shahshitom, shahlap bad da kaba mihpat na ka jinglap. Ka sngi, ha kaba u Jisu u la kiew khet da shisha kum u Syiem u Patsha, ka dei kato ka sngi ha kaba u la mihpat na ka jinglap ha ka burom-blei jong u.

Ban pynkut, lada ngi shim lang ia kine ki ar tylli ki nam "Uba Lyingkong eh (Protokos)" bad "Uba ha khlieh-duh (Arkho)", ngi iohi shai kdar ba u Ioannis u kwah ban pynbna paitbah ba u Jisu Khrist u dei u Trai bad u Kynrad halor kiei kiei baroh, u Syiem bad u Patsha salonsar ha ka sla pyrthei, Uba la ioh ia ka Hima salonsar na u Blei bad da ka jingmihpat jong u na ka jinglap, da kaba u la pynurlong pura bad janai ia ka saiñdur u Blei ia ka mariang bad ia u khunbynriew. Kane ka khubor ka dei kaba sngewtynnat tam na ka bynta ki Khristan kiba shahshitom bad kiba jynjar, namarba mynta ki tip thikna ba ki don ha ka kti jong uwei uba lah uba iai da shisha.

(vii) HA U, UBA . . . . . AMEN !

Hadien ba la nam ia u Jisu Khrist kum ka tyllong batynrai jong ka jingaiei bad ka jingsuk, kum u Sakhi ha ka jingladi u khunbynriew bad u Blei, bad kum u Trai Kynrad jong kiei kiei baroh ha kane ka mariang, u Ioannis u ruwai pyndonburom ia u Jisu Khrist da kaba pynbna pyrthei ba dei tang u Jisu uba da dawa da shisha ia ka nam bad ka burom, ba dei tang u Jisu Khrist uba don bad uba bat ia ka bor-synshar batynrai bad bakbraw tam. Kane ka dei barabor ka rukom leh jong ki Ju hadien ba ki la niwtang ia ka jinglong bad ki jynleh jynkam jong u Blei Da kaba leh kumne, sa shisien u Ioannis u pynpaw ba u Jisu Khrist u dei u Blei Badonbor bad Badon-burom. Bad nangta ban pyni shuh-shuh ba u Jisu u dawa ia kane ka nam bad ka burom, u kdew sa katto katne ki daw, kata, ki jynleh jynkam jong u Jisu na ka bynta u khunbynriew. Ia kane ka phawar-pyndonburom ngi lah ban phiah ha ki saw bynta.

a) HA U, UBA IEIDSBUN ĪA NGI ( Ha ka Grik "To agapanti himas) Nalor ki daw ba la kdew haneng, u Ioannis u ai sa kane kawei bad ka dei kaba kongsan ram. Ym tang kata, ka dei ka daw kaba nyngkong eh bad kaba tynrai eh jong ka jingidei jong u Blei bad ngi u khunbynriew. Kane ka dei kata ka Jingieidsbun kaba khlem daw na ka liang kito kiba shah ieidsbun. Ha ka Hebru ki ong ka "HESED", ha ka Grik "AGAPI", ha ka Khasi "JINGIEIDSBUN". Ka kyntien Hebru "HESED" ka thew ia ka jinglong batynrai jong u Blei na kaba Um lah lait: U BLEI U LONG KA JINGIEID (I Io, 4.16). Da shisha kane ka dei ka jinglong batynrai jong u Blei bad ka dei kane ka Jingieidsbun ka tyllong bad ka thymmei jong ki jvleh jynkam jong u Blei ha ka histori jong u khunbynriew. U Blei u la thaw ia ngi na ka Suda khlem don daw eiei na ka liang jong ngi. Ka daw ka long tang na ka liang jong U suda, namarba u Blei u la kha ia la u Khun bamarwei kum u Jisu Khrist, u Blei bad u Briew bad u Nongpynim jong ngi. U la thaw ia ngi da u Jisu Khrist bad ha u Jisu Khrist. Namarkata u Blei u ieidsbun ia ngi salonsar.

Hynrei ha ki Khristan, kane ka jingieidsbun u Blei ka kham kyrpang, namarba u Blei u pynlong ia ki ki khunblei, ki khun binong bishon, ki khun bakhraw batri bad ki khun lyngdoh khun syiem Nangta u Jisu hi u la ieid ia ngi haduh ban da aiti ia ka jingim na ka bynta jong ngi halor ka Diengphna. Dei halor ka Diengphna, ha u Jisu Khrist. ba ka jingieidsbun u Blei ka la paw pura bad janai (Rom 3:21-26). Hangne ka paw shai ba ym don mano mano ruh uba kham ieidsbun ia ngi ban ia u Jisu Khrist. U Jisu u ieidsbun ia ngi kum ka kynhun bad shimet shimet ruh, bad u iai-ieidsbun khlempud !

b) UBA LA PYLLAIT ĪA NGI NA KI POP JONG NGI DA KA SNAM JONG U.

Mynta ngi iohi sa kawei pat ka daw balei u Jisu u dawa ka burom bad ka nam: U la loit la law noh ia u saiteh saikhum jong ka Pap ka Sang. Da ka jinglong-pap bad da ki pap ki sang ba ngi leh hi, ngi la shah dje kum ki mraw bad ngim lah shuh ban lait lada ym don mano mano ba wan pyllait ia ngi da ka dor. Ia ka kyntien

**"KI POP"** ngi la ring jingmut na ka Grik **"Hamartia"**, kaba mut, nyngkong eh, ka jinglong-pap jong u khunbynriew, uba ka jinglong jong u ka long ha kata ka rukom ba u noh sha ka leh pap ka leh sang. Kane ka long kum ka jingshah tehmrav hano re hano. Nangta ka mut ruh ki pap ba ngi leh kawei hadien kawei pat. Kine ki kampap ki pynskhem shuh-shuh ia ka jinglong-pap jong ngi naduh ka sngi ba la kha ia ngi.

Mynta ka mih ka jingkylli, **"Kaei kane ka Pap na kaba u Jisu u la pyllait ia ngi?"**. Ha kane ka dkhot, ka paw shai, ba u Ioannis u kren shaphang ka Pap kaba long ka Kmie jong ki kampap kamsang baroh. Ka dei ka jingkhlad noh jong u briew na u Blei, ka jingweng noh jong u briew ia lade na u Blei, ka jingjngai jong u briew na u Blei. U briew um ngeit shuh ba u Blei u ieidsbun ia u, u artatien ia ka jingieid jong u Blei, wat lada u Blei u iaieidsbun ia u briew khlem sangeb bad u iaibud-dien ia u. Ia kane ka jingleh jong u briew ban khlad na u Blei, ban jngai na U, ban weng noh ia lade na U, ban artatien ia ka jingieidsbun jong U, la pynskhem shuh-shuh da ki kampap kamsang ba u briew u leh na ki khep sha ki khep. Bad kane ka pynhiar kyrdan ia u briew, u klet noh ia ia ka kyrdan longbriew manbriew : ba la buh ia u ha kane ka pyrthei ban Kamai ia ka Hok bad ban synshar-khadar. U briew u bud pynban ia u Thlen, u ksuid, uba la ieng pyrshah ia u Blei bad uba la kren sarong," Ngan kamai ia ka Longspah bad ngan bam ia ka Longbriew." Na kane ki mih ki jingleh bymhok jong ki briew kiwei ia kiwei pat, ka jingbanbein kiwei ia kiwei pat, ka jingpyniapbriew bad kiwei pat ki kam snjew kam smeh. Bad katba u briew u dang jngai na u Blei bad katba um pat pdiang biang ia ka jingieidsbun u Blei, u nang kyrfiom shuh-shuh ha ka ahor jong ka pap ka sang kabym pyllait ia u. Dei na kane ka apot sepsngi ba u Jisu u la pyllait ia ngi bad U la pyllait ia ngi da ka snam jong U.

Ngi la iohsngew bunsien ia kine ki kyntien **"U Jisu u la pyllait ia ngi da ka snam jong U!"** Bad ngim ju kham kylli ha, kano ka rukom u Jisu u pyllait ia ngi da ka snam jong U. Don kiba pyrkhat ba u Blei Nongbuh



Nongthaw u thrang ia ka jingpynbiang na u briew na ka bynta ki pap ki sang bad U thrang ban ioh eiei. Hynrei ym don eiei ia kaba u briew u lah ban ai ha u Blei haduh ba u Blei un da hun hi jrut. Te u Jisu u phlei ia la ka snam bad ka snam u Jisu, kum ka snam u Blei, ka long kaba kordor tam. Bad u Blei da kaba ioh pdiang ia ka snam u Jisu ha ka kti jong U, U kmen bad U hun. Kane ka rukom pyrkhat ka bakla shibun. U Blei Nongbuh Nongthaw um dei Uba thrang snam ha kane ka rukom. Nangta ki don ruh kiba pyrkhat ba u Thlen ne u Ksuid u tehmrav ia ngi kumba leh ki briew ia la ki parabriew. U Jisu u siew da ka snam jong U ha u Ksuid bad u ksuid u khrei u hun hi jrut bad u pyllait ia ki briew. Kane ka rukom pyrkhat ruh ka bakla. Te kumno u Jisu keiñ u la pyllait ia ngi da ka snam jong U ?

Kumba ngi la kdew haneng, ka Pap batynrai tam jong u khunbynriew, kaba long ka kmie jong kiwei pat ki pap ki sang, ka dei ka jingbymngeit shuh jong u khunbynriew, kum ka kynhun bad shimet shimet, ia ka jingieidsbun jong u Blei bad kumta u khunbynriew u khlad noh na u Blei, u jngai noh na U bad u ngat ha ka apot sepsngi. U Blei u kwah ban pynsngewthuh ia u khunbynriew ba U dang ieidsbun ia u, wat lada u la pap katno katno ruh. U Blei u thrang ban pynpaw shai-kdar ha ki briew baroh ba U ieidsbun shi-ha ia ki. Mynta katkum ka jingpyrkhat briew jong ngi bad hangne u briew um bakla, ym don dak don shin eiei kaba kham shai-kdar ba uwei u briew u ieid shisha ia uwei pat, ban ia ka jing-kloi jong uta u briew wat ban lap ruh na ka bynta uto uwei pat. Wat lada u briew um ong eiei ba u ieid ia ngi, hynrei lada u shah lap da ka mon sngewbha na ka bynta jong ngi, ngim artatien eiei shuh ba u ieid u ñiewkor ia ngi lynda kumta un nym kloi han lap na ka bynta jong ngi. Ban kloi ban lap na ka bynta uwei pat ka dei ka dak ka shin jong ka jingieid bym lah shuh ban artatien. To ngiu shim kum ka nuksa. Shu tharai ba don uwei u longkpa. uba ieid shisha ia la ki khun, hynrei ki khun ki dei kiba mutlop bad kiba haramnimok. Namarba u kpa, uba long u briew, um lah ban ai ia kiei kiei ba ki pan khlem nongrim bad namarba ki sniew, kim pyrwa shuh ia u bad kim ngeit shuh ba

u da ieid ia ki haduh katta katta. Kane ka jingsngew ka la ialam ia ki suki suki ban nym kheiñ snep eiei shuh ia la u kpa, ki isih ia u bad ki mih noh na iing ban leit shong ba kawei pat ka iing para-maki. Kane ka jingisih bad ka jingshun ia u kpa ka la nang jur nang jur haduh ba ki la rai ban thang ia ka iing ba u shong katba u dang trei ha kper. Thui ka mih ka idem, ka khie ka ding. U iohi u kpa na kper. U mareh sha iing. Ki iohi ki khun, ki rkhiie beiñ. "U la thang u Bah-heh", ki ia ong sngewkmen. "Waw!", pyrta u kpa, "Ha ka synduk ki don ki kot-pynkam ka kamai umsyep jong nga na ka bynta jong phi, da kiba ki kur kim lah shuh ban kam ia kaba nga la ai." "Wat kren thok ia ngi, me tymmen bie", ki jubab ki khun. Hynrei u kpa u tur sha ka ding ban rung shapoh iing ban shim ia kita ki kot-pynkam namarba um kwah ba ki khun kin kyrduh tasam ne kin ngat ha ka jingjynjar. U ioh ia ki kot-pynkam ba la thep ha uwei u klong ba la sop da ka khyndew. Te ka ding kam lah ban ktah kloi ia u. Hynrei katba u dang wanphai, u la ngat ha ka ding, u la shah thang, hynrei u la kyrda dohiap ban mih shabar. Tang shu poi shabar u kyllon, kmen ki khun bad ki mareh ban peitkai ia u. Kim sngewsynei eiei wat lada u la ing ka met ka phad. "Khun baieid", u ong u kpa, "nga la ioh ki kot-pynkam ba nga la thoh bad soi na ka bynta jong phi. Sniewbok ba ka Bank Account te ka la ing. Hynrei ha ki kot-pynkam nga la thoh ka nombor bad ka kyrteng ka Bank. Te phin nym dub Nga la rung sha ka ding ba phin suk ma-phi. Shim ia une u klong, sei ki kot-pynkam bad shim ia kaba dei ka jong phi iwei-pa-iwei." Ki khun kim treh, khamtam eh u Bah-heh. Hynrei u khun khliengkpoh, uba kham bha. u la sdang ban sngewsynei ia la u kpa, u leit, u shim ia u klong, u sei ia ki kot-pynkam bad u pule, "Ha u khun phrangsngi nga pynkam ar lak tyngka, ha uba ar shilak, ha uba lai sanphew hajar, ha uba saw arphewsan hajar." "Khun, u ong u kpa, "phi la iohsngew. Ngam sngew eiei ban iap ba phin im ma-phi." Ym pat kut kine ki kyntien, u kpa u dkut mynsiem noh ha phyllaw. Lada kito ki khun kim pat kylla mrad da shisha, ha kum kane ka khap kim banse ban ong, "I pa i la ieid shisha ia ngi". Kham-

tam eh u Bah-heh jong ki um banse ban pyrta, "Wat ia nga la runar sat, i pa i la iehnoh arlak ha ka kot pynkam ia ka kamai umsyep jong i. Durlanot, nga la hamramnimok !" Bad baroh kin nym artatien shuh ba u kpa u la ieid ia ki haduh ba u la kloj ban shah thang bad ban lap tang ban ioh ia ki kot-pynkam na ka bynta jong ki, wat lada u la tip shai ba ki isih bad ki fiew-beiñ ia u.

Ka long kumta ruh bad u Blei. U khunbynriew, da kaba shahshkor ia u Thlen ban kamai ia ka Longspah bad ban bam ia ka Longbriew, da kaba bud ia ka nuksa u Ksuid Nongpynshoi, u la haramnimok ia u Blei, u la khlad na U, u la jngai na u bad um ngeit shuh ba u Blei u dang ieidsbun ia u. Kane ka la wallam ka jynjar ka lanot ha u khunbynriew. U Blei u la isynei ia u bad u la rai ban phah ia la u Khun ban pyni ba U dang ieid sbun ia u khunbynriew bad ban ai ka dak ka shin ba um lah shuh ban artatien. U Jisu u la wan ban tyrwa ia ka jingieidsbun jong u Blei ha kito kiba isih bad shun ia U. Um shym kynran dien na ki, hynrei U la aiti ia lade wat lada U tip ba kin lehbeiñ ia U bad kin pyniap ia U ha ka rukom kaba shyrkbei tam : halor ka Diengphna, namarba ha kata ka por ym don ka jingiap kaba kham shyrkhei ne kham jahburom ban ia ka jingshah sahnarphna. Bad dei ha kane hi ka khlep ba u Jisu u la pyni ia ka jingieidsbun u Blei da kaba ong, "Ko Pa, to map ia ki namarba kim tip ia kaba ki leh!" Hangne ka jingieidsbun u Blei ka la paw pura bad janai. U khunbynriew um lah shuh ban artatien naduh kane ka khyllipmat ba u Blei u ieidsbun ia u. Hoodid, u lah ban iaikyntait, hynrei ban artatien um lah shuh.

Hynrei lada kito kiba pdiang ia kane ka jingpynpaw ia ka jingieidsbun u Blei, lem bad u Jisu Khrist ki ong, "Pa, map ia kaba nga la leh!", shisyndon, u Blei u map bad ki briew ki lait na ki pap ki sang jong ki, ki khuid phar bad ki kylla biang ki khun baieid thepmynsiem jong u Blei. Bad kane baroh ka urlong lyngba ka jingiap u Jisu halor ka Diengphna. Kane ka dei ka daw balei ka long kaba myntoi barabor ban lalap shaphang

ka jingiap u Jisu halor ka Diengphna. Ka don ka bor maian aïu-re ban pynsgewthuh ba u Blei u ieidsbun ia ki briew bad da kaba pdiang ia kane ka jingieidsbun, kin phai sha u Blei, kin pan map bad kumta kin lait na ki pap ki sang jong ki.

Te haba ka Jynthoh Bakhuid ka ong ba "La pyllait ia ngi na ki pop da ka snam u Jisu" ka mut ban ong ba lyngba ka jingiap u Jisu halor ka Diengphna ngim artatien shuh ba u Blei u ieidsbun ia ngi bad haba ngi thikna ba u Blei u ieidsbun ia ngi, ngi shlur biang ban phai sha U bad ban pan map. Te hangne ki kyntien "da ka snam" ki mut "da ka jingiap u Jisu halor ka Diengphna. Haba ngi ong ba u Jisu u la sait khuid ia ki pop jong ngi ha ka snam jong U ngi mut ban ong ba da ka jingiap jong U, u Jisu u la pynsgewthuh shai ia ngi ba u Blei u dang iai ieidsbun ia ngi bad kumta ngi pdiang ia kane ka jingieidsbun, ngi phai sha u Blei bad pan map lem bad u Jisu bad kumta ngi iasuk biang bad u Blei. Kane keiñ kata ka jingsait ia ki pop jong ngi ha ka snam u Jisu Te ngim dei ban mutdur ba ngi sum ha ka snam u Jisu kumba ngi sum ha ka um kaba tuid na ka shyngiar.

### c) BAD UBA LA PYNLONG IA NGI KIKHUN KI HAJAR KA HIMA.

Hangne ngi iohi sa kawei pat ka daw halei u Jisu u dawa ka nam bad ka burom. U la kyntiew ia ngi sha ka kyrdan ka bakhraw, ka kyrdan ki nongsynshar ki nongkhadar.

Ha ka Grik ki kyntien "ki khun ki hajar" kim don, hynrei ngi la buh ban shai ka jingmut jong kane ka dkhoh. U Ioannis u dei u Ju bad ka lah ban long ba u kynmaw ia ka Exodus 19:6 ha kaba la thoh, "Phin sa long ha Nga ka Hima-lyngdoh bad ka jaitbynriew ba-kyntangl!" Bad ka jingmut ka dei kane : ki Israel hyn-dai ki la long ka jaitbynriew ba la jied jong u Blei. Hynrei kim pat don hima namarba ki dang iaidwir ha kata ka por. Te da kine ki kyntien, u Blei u kular ba Un ai ha ki ia ka ri ha kaba kin seng hima bad kin long ki nongsynshar ki nongkhadar. Bad kane ka hima kam dei kum ka hima jong kiwei pat ki jaitbynriew, ia kiba

la synshar da ki syiem. Em; ia ka hima ba ki Israel kin seng yn synshar da ki Lyngdoh bad kine ki Lyngdoh kin mih na ka jaitbynriew hi kaba long baroh kawei ka kur bad ka jait lyngdoh. Ha ki Ju hi, kane ka lah ban long ka jingmut ba u Ioannis u kwah ban ai.

Hynrei ia ka Kitab Jingpynpaw hi la thoh khamtam eh na ka bynta ki Khristan kibym dei ki Ju. Bad kine ki la don lypa ha ka hima ki Roman kum ki raŋot, ym kum ki khun ki hajar. Ha kane ka por, ka jingthrang jong ki raŋot Roman ka long ban poi sha ka kyrdan jong ki khun ki hajar jong ka Hima Roma. U Paulus Bakhuid u dei uwei na kito kiba la ioh ia ka kyrdan jong ki khun ki hajar ha ka Hima Roman. Te khlempep, u Ioannis u u mut ban ong ba lyngba u Jisu ki la kylla long mynta ki khun ki hajar jong ka Hima, kata, ki trai-ri bashisha bad nangta kin sa ioh ruh ia ka hima wat lada lehse ka dang slem khyndiat. Na ka jinglong raŋot ha u Patsha Roman, ki la kylla long ki khun ki hajar ha ka Hima u Blei lyngba u Jisu Khrist.

d) KI LYNGDOH BAN SHAKRI IA U BLEI BAD U KPA JONG U.

Hangne ngi iohi ba ka jinglong jong ki Khristan kum ki khun ki hajar ha ka hima ka iapher shibun na kiwei pat ki hima, namarba ha kajuh ka por ki long baroh na ka kur ka khong lyngdoh. Ki dei baroh ki lyngdoh bad ka hima jong ki ka dei ka hima lyngdoh, ym ka hima syiem ne hima patsha. Bad u Blei, Uba long u Kpa jong u Jisu Khrist, un kam ia ki kum ki lyngdoh jong U hi, kata ka mut ki dei baroh ki Lyngdoh-sohblei! Kane ka dei ka nongrim jong kata kaba ki khot mynta ka jinglong lyngdoh jong ki khun ki hajar jong ka Balang. Ka dei ka kyrdan kaba khraw bad kaba donburom. Ki Khristan kim dei ban klet ia kane ka kyrdan bakhrav jong ki! Kim dei ruh ban klet ban pynladei-dur la ka jingim jong ki bad kane ka kyrdan lyngdoh.

Ki kyntien "Ban shakri" te kim don ha ka Grik. Ngil buh ban shai ka jingmut. Ban shakri hangne ka mut ban synshar ban khadar, ban pyndep ia ki kam lyngdoh, ban pyndonburom ia u Blei, ban tei ia ka imlang sahlang ha ka Hok katkum ka Hukum. Ngil la

iohi ha ka Maitphang ba ka kyntien "Shakri ne mraw" ha ka Jynthoh Bakhuid ka dei ka nam ba la ai ha kito kiba pyndep ia ki deiti bad ki kam kiba kyrpang ha ka jingladei bad u Blei bad ki paid jong U. Kane kajuh ka jingmut ka paw ruh hangne.

Khatduh eh, dei hangne, na ka bynta ka sien kaba nyngkong, ba la nam ia u Blei Nongbuh Nongthaw kum u Kpa jong u Jisu Khrist. Da kane u Ioannis u kwah ban pynbna pyrthei ba u Jisu Khrist u don kajuh ka jinglong tynrai kum u Blei Nongbuh Nongthaw bad U iaryngkat kyrdan bad U ha ka jinglongblei. Ia u Jisu Khrist, kum u Blei, kum Uta u Person uba ar, ym shym la thaw, hynrei la kha na u Kpa, U la mih na ka jinglong batynrai jong u Blei hi. Wat lada naduh kato ka khyllipmat (ngi kren kum ki briew) ba u Kpa u kha ia la u Khun bamarwei, u Person Ba-ar jong ka Trinita Bakhuid, u la long u Jisu Khrist, u Nong-pynim jong ngi, hynrei ia ka longbriew man-briew jong U la thaw da u Blei. Te ha u Jisu ki don ar tylli ki jinglong: ka jinglong-blei bad ka jinglongbriew. U Jisu u ioh ia ka jinglong-blei da ka jing-kha na u Kpa katkum ka Hok tynrai jong U. Ma-ngi ruh, kum ki khun u Blei ngi don ar tylli ki jinglong: Ka jinglong-briew bad ka jinglong-blei. Hynrei ia ka jinglong-blei ngi la ioh kum ka Jingaiei jong u Blei lyngba u Jisu Khrist. Ngim don ka Hok tynrai ban ioh ia ka. U Blei u la shu aiei ia ka ha ngi namar ka jingieid-sbun jong U.

e) HA U KA BUROM KA BOR-SYNSHAR JUNOM LA JUNOM. AMEN!

Kane ka dei ka jingpynbna sangot ia ka burom bad ka bor-synshar jong u Jisu Khrist. Ka burom ka dei ka Hok tynrai jong U Kumjuh ruh, namarba U long u Khun u Blei, ka bor-synshar ka dei ka Hok tynrai jong U! Bad ki briew baroh ki dei ban ithuh ia kane ka burom bad ka bor synshar jong U.

Kine ki kyntien ki dei ruh ka bynta jong ka jing-lebniam lehrukom jong ka Balang hyndai. Ki dei ka jingpyrta ki paitbah kum ka kynhun. Hynrei hangne, ngi sngew'ba u Ioannis u don sa kawei pat ka jingmut

ba u kwah ban pynbna: Ka burom-blei bad ka bor-synsbar ki dei ki jong u Jisu Khrist, ym ki jong u Patsha Roman, ia uba ki raŋot jong ka Hima lem bad ki khun ki hajar jong ka ki pyndonburom khlem nongrim.

Shuh-shuh imat u Ioannis u dang don sa kawei pat ka jingmut haba u pyndonkam ia ka kyntien "BUROM". Ngi hi ngi ngeit ba ka Grik "doxa" imat ka wan na ka Hebru "Kabod", ia kaba la ring jingmut sha ka Pha-reng kum ka 'Glory bad sha ka Khasi kum ka "Burom". Ha ka jingshisha, ka kyntien Hebru "Kabod" ka mut ka dak ka shin ia kaba ngi lah ban iohi. ban iohsngew bad ban ktah ruh bad kaba kdew eiei sha lyndet, sha u Blei. Ka mut ka dak ka shin kaba paw bad ka kdew ia u Blei ba ngim lah ban iohi, hynrei uba trei-kam ha ka histori jong ngi u khunbynriew. Te ka kyntien "Kabod" kam da mut eh ka jingpyrta, ka jingrisa ne ka jingkyinhoi ban pyndonburom ia u Blei. Ka mut shisha kata ka dak ka shin kaba kdew ia u Blei, uba trei-kam hynrei ia Uba ngim lah ban iohi.

Mynta ia kane ka "Kabod" kaba mut ka "Burom" la ai ha u Jisu kum ka Hok tynrai jong u. Ha ngi hi ka shaj ba da kane ka kyntien u Ioannis u mut ban pynbna ba u Jisu u dei ka Burom, kata, ka dak ka shin kaba paw bad kaba kdew ia u Blei. U Jisu u kdew sha u Blei bad u dei, namarkata, ka dak ka shin kaba im jong ka jingdon bad jingtrei-kam jong u Blei ha ka histori jong u khunbynriew, namarba u dei hi Ma-u ruh u Blei bad u Trai Kynrad, ym u Kaisar ia uba ki raŋot ka hima ha Asia Minor ki fiiew kum u blei uba paw ha ka dur briew.

Nalor ka burom, u Jisu u don hok ruh ban ioh ia ka bor-synsbar ha ka Hima-bah jong u Blei. Ka kyntien Grik "Kratos" ka mut ka bor-synsbar ha ka hima, kaban neh shi-junom. Hangne ruh u Ioannis u pyntngen ia ki Khristan da kaba ong ba ka hima bad ka bor-synsbar u Jisu Khrist kin neh junom katba ka jong ki Patsha Roman ka long tang shipor. Bad kane ka la urlong da shisha. Ka Hima-bah Roman kam don shuh, hynrei ka hima u Jisu ha ka pyrthei ka nang iar nang iar bad kan nym kut shuh lano lano ruh em.

Khatduh eh, u Iōannis u pyrtā "Amen!" Kane ka long ka rukom pynkut ia ka jingduwai ne jingiaroh ia u Blei hapteng ki Ju hyndai. Ka Balang ka la shim ia kane ka kyntien bad ka la bat ia ka jingmut jong ka ruh. Kane ka kyntien "Amen" ka wan na ka berb Hebru "Aman" kaba mut ban pynskhem, ban pyniai-neh, ban kyrshan skhem. Te "Amen" ka mut "la pynskhem, ka long kumta, hooid ka dei keiñ, ka dei da shisha, thik kumta keiñ." Ka mut ruh "Ai kan long ne kan urlong kumba ngi la duwai ne ngi la pan." Te ka long kum ki kyntien ki Longshuwa jong ngi, "Sngew katta, rai katta, mo Blei Trai Kynrad!"

## KA SIENPAW I (1:7-8)

### 7. Hakhmih U wan ha ki lyoh !

Bad ki briew baroh kin iohi ia U,

Khamtam eh kito kiba la dung ia U !

Bad baroh ki jaitbynriew jong ka sla pyrthei

Kin tied la ka shadem bad kin lambynniaw ia U !

Da shisha *kun long kumta ! Amen !*

### 8. "Ma-nga Nga long u Alpha bad u Omega", u Blei Kynrad u ong,

"*Uta Uba long bad Uba la long bad Uban sa wan, u Badonbor baroh !*"

Ngi la batai bad pynshai, katba ngi lah ei, ia ka "Tienplie bad mynta ngi poi sha ka Sienpaw I jong kane ka Phang ne ka Sienleh I jong ka Kitab Jinpypaw, kaba long kum ka Drama, ha kaba ki Khristan kin iohi ia ka jinglong, jingim bad jingshahshitom jong ka Balang, na kaba kin ioh ia ka sneng ka khraw kumno ban im, kumno ban laid ban ieng bad ban leh ban kam ha kato ka khep bakordit jong ka Balang,

Kane ka Sienpaw ka long kaba lyngkot bad don tang uwei u nongkren. Ki nongpule jong ngi ki lah ban mutdur ia u kum u sangot. uba paw bad ieng halor u maw-kynto bad uba pynbna paitbah ia ka jingwan jong u Syiem Bakhraw jong ka Hima-sima ha ka burom ba-ipheng, ka bor bad ka iktiar ! Hooid, une u sangot u pyrtā jam ban pynbna ia ka jingwan jong u Jisu



Khrist ha ka burom ka ijot bad ka bor ban bishar ia ki brierw baroh. Nangta da ka sur shynna un kdew ia ka tyllong bad ka thymmei jong kane ka burom bad ka bor: u Blei Nongbuh Nongthaw. Te ka Sienpaw I ka don ar bynta.

(i) KA JINGPYNBNA ĪA KA JINGWANPAT U JISU

(a) HAKHMIH, UN WAN HA KI LYOH !

Ki Apostol bad ki Khristan hyndai ki ñiewkor bha ia ki kyntien ba u Jisu Khrist u la khlei na ki khep sha ki khep jong ka jingim jong u. Ki ju kynmaw bad pyn-donkam ia ki barabor katkum ka jingdawa jong ka por ha kaba ki im. Ki kynmaw khamtam eh ia ka jingku-lar jong u Jisu ban wan pat ha ka burom ban bishar ia ki jaitbynriew baroh katkum ki kam ba ki la leh. Kim ju klet ia kine ki ktien jong u Jisu, "Kin iohi ia u khun u brierw ba u wan ha ki lyoh ka bneng da ka bor bad ka burom bakhraw (Mt 24:30; Mk. 13:26)." Īa kane kajuh ka jingkular u Jisu u la pynbna paitbah ha ka Dorbar Sanhedrin kaba la tian bishar ia u, "Lawei phin iohi ia u khun u brierw ba u shong ha kamon u Blei Badonbor bad ba u wan ha ki lyoh ka bneng (Mt. 26:64; Mk. 14:62)." Bad u Jisu Khrist u la khlei ia kine ki ktien ban pyni ba ka jiugiathuhlypa ha ka Jutang Barim ka la urlong ha u. Ki paitbah, ki synran bad ki Ju, ha kiba u Jisu u la kren, khlempep ki la kynmaw ia kane ka jingiōhi-paw u Daniel ha ka por ba u Syiem Antiochus Epiphanes u dang pynshitom sat ia ki Ju, "Hakhmih, ha ki lyoh ka bneng, u wan uwei uba i kum u khun u brierw . . . bad la ai ha u ia ka bor-synshar, ka burom bad ka hima ba ki brierw bad ki jaitbynriew baroh, kiba kren ki ktien bad ki thylliej bapher bapher, kin shakri ia u (Dan. 7:13-14)." Bad ki la sngewthuh shai-kdar ba kane ka jingiathuhlypa ka la urlong ha u Jisu Khrist, uba la pynskhem ia ka arsien : ha ka jing-kren jong u ha ki paitbah bad ki synran bad ha ka Dorbar ki Ju, kaba tian bishar ia U. Ka dei kane ka kular jong u Jisu, kabym lah ban pulom, kaba la pynskhem ia ka jingngeit, kaba la pynshlur ia ki Khristan ban iaineh wat lada ki dei ban shahshitom katno katno ruh, namarba ki tip shynna ba ha kawei ka sngi ka

jingjop kan sa long ka jong ki lyngba ka jingwanpat u Jisu Khrist ban bishar ia ka pyrtthei da ka bor, ha ka burom ka ijot kum u Syiem u Patsha, uba ha khlieh tam. Ka dei kane ka jingngait bad ka jingkyrmen ba u sangot, ha kane ka Sienpaw I, u pynbna pyrtthei ha ki Khristan ha Asia Minor.

Namarba kane ka jingwanpat u Jisu ka dei kaei kaei kaba khraw, kaba phylla, kaba iphuh iphieng, kaba donburom na ka bynta ki Khristan kiba iaineh, bad kaba itriem na ka bynta ki bymman, ha ka jingpynbna jong u, u sangot u pyndonkam ia ka kyntien "HAKHMIH (Hebru "Hinne" bad Grik "Idu"), kaba kdew ba kaei kaei, kaba ki briew kim lah ban mutdur, kan urlong Ka jingpynbna "UN WAN HA KI LYOH" ka pynkynmaw ia ka jingurlong ka jingiathuhlypa u Daniel, kaba kdew ia u Messia, uban pyllait im ia ki paid u Blei. Bad une u Messia u dei u Jisu Khrist, Uba la pyndonkam ia kijuh ki kyntien ban batai ia la ka jingwanpat ban bishar ia ka pyrtthei da ka bor ha ka burom-syiem jong U. Ka jingwan ha ki lyoh ka thiew ia ka bor-bah bor-san, ka burom ba-iphieeng ka long-syiem mansyiem. Haba u iohi ia kane kaei kaei, u khunbynriew um banse ban kyih, ban tieng bad ki nongshun kin pyndem niuhmat tang shu iohi ia U ha kum kane ka burom ka ijot kaba palat liam ia kano kano ka burom ka ijot ha ka sla pyrtthei.

**(b) BAD KI BRIEW BAROH KIN IOHI IA U.**

Namarba ka jingwanpat u Jisu kan long ha ki lyoh, ha ka bor bad ka burom, baroh ki briew ha satlak ka pyrtthei kin iohi shynna ia U. Uwei u briew ruh un nym lait na kane ka jingiohi ia u Jisu. Na kane ka daw, ha ka Grik kane ka sentens ka long kumne "Bad kawei pa kawei ka khmat kan iohi ia U." Ha kato ka sngi ba u Jisu Un wanpat yn nym don mano mano ruh uba lah ban ong ba um shym iohi. Bad haba ki briew baroh ha kane ka snieh pyrtthei kin iohi ia u Jisu, kim banse ban ithuh ia U kum u Syiem, u Trai bad u Kynrad, Uba bat lut ia ka bor ka sor baroh ha ki kti jong U.

**(c) KHAMTAM EH KITO KIBA LA DUNG IA U.**

Hynrei na ki briew baroh, kiban iohi ia u Jisu ha ka jingwanpat jong U, kito ki bymman, kiba la dung ia U, kin kham iohi shynna ban ia baroh. Bad da kaba iohi kham shynna ban ia baroh, kim lah lait shuh na ka jingithuh ba Uto, ia Uba ki la dung mynnor, U dei u Jisu hi. Kiba dung ia U ki dei kito ki Ju hyndai kiba la mudui lamler ia U, kiba la pynrem ia U, kiba la dawa ba U dei ban shah sahnarphna bad kiba la kmen haba u shipai Roman u la dung ia U da u sum. U shi-pai Roman hi um shym don pap eiei namarba u la shu pyndep ia la ka kamram kum u shipai. Ka dei ka hukum jong ka aiñ ki Roman ban dung ia uba la shah sahnarphna khnang ban pynthikna ia ka jingiap jong u. Te "Kito kiba dung ia U" ki dei kito kiba la pyniap ia U bad kita ki dei ki Ju hyndai, ym ki Israeli kiba mynta.

Uba la kynmaw bha fa kane ka jingdung ia u Jisu da u sum jong u shipai Roman, u dei u Apostol Ioannis, uba la don halor u Lum Kalbari katba u Jisu u dang pisa halor ka Diengphna bad khamtam eh ha ka por ba U dkut mynsiem. Da la ki khmat u Ioannis u la iohi ia kane ka jingdung blar ia u klongsnam jong u Jisu da u sum uba nep her-her bad u la iohi ia ka snam bad ka um kiba tud ynda la sei ia u sum na u klongsnam. Da kane ka jingleh, la pynthikna ba u Jisu u la iap bad kumta ia ka met iap jong U lah ban ai noh ba kiba, ha iing ha sem ban tep katkum ki riti ki dustur jong ki. U Apostol Ioannis u la kynmaw kyndiang ia kane ka jingjia bad u la pynsah nam ia ka ha ka Kitab ka Khubor Babha ba u la thoh (Io.19.33-37). Kane ka jingjia ka la pynkynmaw ia u Apostol Ioannis ia ka jingiatuhlypa jong u Zacharia kaba ong kumne. "Kin sa peit puson ia Uta, ia Uba ki la sam lyngba blar bad kin iambyn-njaw ia U la kum ia u khun bamarwei, bad kin sa iambriew ia U kumba iambriew ia u khun phrangsngi (Za. 12:10)". Bad kumta u Apostol Ioannis u la sngewthuh ba kane ka jingiatuhlypa ka la urlong ba u Jisu bad kumta u dei Ma-u Uta u Nongaplangbrot bashisha jong u paid Israel. Te uto u nongialam ne u nonghikai pa, ia uba ki Ju hyndai ki la pyniap da kaba dung ia u bad ynda u la iap, ki la sngewbabe kylla bad ki la iambya-

niaw, u kdew ia u Jisu Khrist, Uba long shisha u Nong-  
ialam, u Nonghikai bad u Nongaplangbrot jong u paid  
Israel. Bad u Ioannis, u nongthoh jong ka Kitab Jing-  
pynpaw, u ong ba kan long kumta thik ha ka sngi ba u  
Jisu un wanpat. Ki briew jong ka pyrthei baroh kawei  
kin sa iohi shynna ia U, khamtam eh kito kiba la pyn-  
iap ia U.

**(d) BAD BAROH.....ĬAMBYNNIAW ĬA U.**

Kane ka jingwanpat u Jisu bad ka jingiohi shynna  
ia U da ki briew baroh kan ktah ia ki jaitbynriew baroh  
ha kane ka sla pyrthei. Ki briew kin sngewthuh, khat-  
duh khatwai, ia la ki jingbakla, kin iohi ba ki la leh  
pap leh sang. Kin tied ia la ka shadem bad kin iam  
sngewsih. Kin sngewthuh shai-kdar ba ki la leh bym-  
hok ia u Jisu. Kin babe kylla ia kiei kiei ba ki la leh  
ha U. Ka kyntien Grik "Kopsonte na ka berb "kopto"  
ka mut ban tied ia la ka shadem da ka jingbabe kylla  
bad ban iam kthang. Bad ia kane baroh ki jaitbynriew  
kin leh, ym tang ki Ju hyndaj. Da kaba leh kumne  
kiwei pat ki jaitbynriew ruh ki pyni ba ki la iadon kti  
lang ha kato ka kampap ban pyniap ia u Jisu Khrist.  
Kim lah shuh ban pynksan ia lade ne ban da rapjot  
da kano kano ka nia. Kiei kiei baroh kin sa paw  
penryngkew ha kato ka sngi jong ka jingwanpat u Jisu  
ban bishar ia ka pyrthei. Kim banse ban kam ia la ki  
pap ki sang bad ki jingbakla. Te kan paw shynna ka  
Hok jong u Jisu, ka bor bad ka burom jong U.

**(e) DA SHISHA KAN LONG KUMTA ! AMEN!**

Kane ka dei ka jingkubur bad ka jingrisa ki pait-  
bah kiba la iohsngew ia kane ka pyrta sangot kaba pyn-  
bna ia ka jingwanpat u Jisu ban bishar ia ka pyrthei.  
Ki paitbah kiba kubur bad kiba risa ki dei ki Khris-  
tan na kiwei pat ki jaitbynriew bad ki Ju, namarba ki  
dou ar tylli ki kyntien; ka kyntien Grik "Ne" bad  
ka kyntien Hebru "Amin!" Kine ki kyntien ki pyni  
ba ka jingwanpat u Jisu ka long kaba don nongrim bad  
kaba deipor. Ka jingmut jong kine ki ar tylli ki kyntien  
ka long kajuh bad ki mut "Da shisha kan long kumta!  
Hooïd, ka dei ban long kumta ! To kan long kumba  
phi la pynbna ! Ngi kubur bad ngi pdiang!"

## (ii) KA JINGPYNBNA ĪA KA TYLLONG BAD KA THYMMEI

“Ma nga ..... Badonbor-baroh !”

Hadien ba ki paitbah ki la kubur ĩa ka jingpynbna ĩa ka jingwanpat u Jisu ha ka bor ka burom ka ĩjot ban bishar ĩa ka pyrthei, ban pynrem ĩa ki bymman bad ban siewbainong ĩa ki briew kiba bha, u sangot u kwah ban kdew ĩa ka tyllong bad ka thymmei jong kane ka jingjia histori kaba khraw tam bad kaba donburom tam. Kane ka tyllong bad ka thymmei ka dei u Blei Nongbuh Nongthaw hi, na Uba kiei kiei baroh ki mih bad ki paw pyrthei. Kiei kiei baroh ki sdang na u Blei Nongbuh Nongthaw bad ki kut ki wai ruh ha U hi. ĩa kane u sangot u pynpaw ha ka rukom kren jong ki Ju, ĩa kaba la pynwandur ha ka Grik da kine ki kyntien “Ma-nga Nga long u Alpha bad u Omęga” U Alpha u dei u dak-thoh banyngkong jong ki Grik bad u Omega u dei u dak thoh bakhatduh. Ha ka Hebru u Alpha u dei u Aleph bad u Omega u dei u Tau. Haba ki Ju ki kwah ban ong ba u Blei u la kyrkhu ĩa u briew nadong shadong, ki ong, “U Blei u la kyrkhu ĩa phi na u Aleph haduh u Tau” Haba ki mut ban ong, “Phi la leh ĩa ki pap baroh”, ki ong, “Phi la leh pap na u Aleph haduh u Tau.” Bad ma-ngi ki khun u Hynńiew-trep ngi lah ban ong, “U Blei u la kyrkhu ĩa ngi na u A haduh u Y,” kata ka mut nadong shadong, ha ka liang ka met bad ka mynsiem Te ban ong ba u Blei u dei u Alpha bad u Omega ka mut ba ha u Blei ki don lut kiei kiei baroh, ba u Blei u dei ka jingsdang bad ka jingkut jong kiei kiei baroh, ba u Blei u long Uba dap miar khlem ka tam khlem ka duna ha kano kano ka liang

Ngı la kdew ha ka Maitphang ba ki kyntien “Uta uba long bad uba la long bad uban sa wan” ki dei ka rukom nam rukom kyrteng jong ki ju ĩa u Blei, ĩa Uba kim nud ban “khoh pyrtuit” kumba ong ki Pnar bad ki Bhoi. Ki thew ĩa u Blei, u Kpa, u Nongbuh Nongthaw kumba ngi la batai.

Khatduh eh, u sangot u pynwai ĩa kane ka jingpynbna da kane ka kyntien “BADONBOR-BAROH !”,

kaba pyni shaj-kdar ba u dei u Blei, uba don ka bor halor kiei kiei baroh, bad dei unc u Blei hi uba la saiñ-dur ba u Jisu Khrist un wanpat ha ka burom-blei ba-ipheng tam bad ban ioh ka jingnguh syiem nguh patsha na ki jaitbynriew baroh, ia kiba un bishar bad un siew-bainong katkum ki jynleh jynkam jong ki. Ngi la ring jingmut na ka Grik "Pantokrator" sha ka Khasi da ka kyntien "Badonbor-baroh", ka kyntien kaba iadei-dur da shisha, namarba ka kyntien Grik "Pantokrator" ka wan na ar tylli ki kyntien "Panto" kaba mut "baroh nadong shadong" bad "Kfator", kaba mut uta uba bat ia ka bor-synshar halor kiei-kiei baroh, uba long u Syiem bad u Patsha uba ha khlieh tam. Kane ka kyntien kan iaipaw bunsiem ha kane ka Kitab Jingpynpaw bad ka thew ia u Blei Nongbuh Nongthaw bad ia u Jisu Khrist, u Khun jong U, u Nongpynim jong ngi.

### KA SIENPAW II (1:9 11)

9. Nga u Ioannis, u parabangeit jong phi bad u nong-iaiohbynta-lem bad phi ha ka jingjynjar sat, *ha ka long khun long hajar* ha ka hima, bad ka jingiaishah-satar ha ka jingiasyllok-lem bad u Jisu, nga la don na ka Dewlyn-nong ba khot kyrteng Patmos namar ka Ktien u Blei bad ka jingsakhi ia u Jisu 10 U Mynsiem u la tyllap ia nga ha *kuwei* ka Sngi u Trai bad nga la iohsngew, na shadien jong nga, ka sur kaba jam syiang, la kum ka jong ka turoi, 11 kaba ong, "Ia kaba phi iohi mynia to thoh ha ka kot bad to phah sha ki hynñiew Balang: Sha Ephesus, Smirna, Pergamum, Thiatthira, Sardis, Philadelphia bad Laodisea."

Ha kine ki sngi jong ngi, ngi la ju iohi ba ha kano kano ka jingialang, ynda la pynbna ia ka Ajenda, ka don ka-jingjied ia u nongthoh ne u sekretari ban buh jingkyrmaw ia kiei kiei baroh ha ka jynthoh. Ha kane kajuh ka rukom, ynda u sangot u la pynbna, ha ka Sienpaw I, ia ka jingwanpat u Jisu ha ka bor bad ka burom ban bishar ia ka pyrtthei, la jied ia u Ioannis kum u nongthoh ne u sekretari ban buh jingkyrmaw ha ka jynthoh ia kiei kiei kibanjia. La hukum ia u ban thoh sha ka Balang baroh kaywei, ia kaba la mikhmat

da ki hynñiew Balang ne ki hynñiew tylli ki Jylla-niam ha Asia Minor, kumba la batai haneng. Te ia kane ka bynta jong ka jingpynpaw ngi lah ban khot ka Sienpaw jong ka Hukum ban thoh.

Khnanng ba u Ioannis kum u nongthoh ne u sekretari un ioh ka jinghsaniah jong ki nongpule, u pynpaw katto katne kiei kiei shaphang ka jingim bad ki jynleh jynkam jong u. Kata ka mut, u ai ia kita kiba ki khot ha ka Phareng ki "credentials" jong u. Ki "credentials" ki dei kito kiei kiei kiba pynngeit ia ki briew, kiba long ka daw bad ka nongrim balei ki briew ki dei ban pdiang ia kito kiba don kine ki "credentials". Te u Ioannis, nyingkong eh, u pynithuh ia lade da kaba kdew katto katne kiei kiei, ia kiba ki Khristan ki la tip shaphang jong u. Da kaba leh kumne u kyrmen ba kin pdiang bad kin ngeit ia kiei kiei ba un thoh ha kane ka Kitab Jingpynpaw.

Kane ka Sienpaw II ka don ar bynta: Ka jingpynithuh jong u nongthoh ia lade bad ka Hukum ban thoh na u Blei.

### (i) KA JINGPYNITHUH IA LADE. (1:9)

#### (a) NGA U IOANNIS, U PARABANGEIT JONG PHI.

Ban pynithuh bha ia lade ha ki Khristan ha Asia Minor, u nongthoh sa shisien u nam ia lade. U pynpaw ia la ka kyrteng, ia kaba baroh ki la bna. Um dei uno uno, hynrei uto u Ioannis, ia uba ki la ju iohi bad uba la trei hapdeng jong ki.

Nangta u Ioannis u ong ba um dei u 'riewkhyllah uba la wan na sha lyndet, hynrei u dei uwei na ki Khristan hi, uba don kajuh ka jingngeit bad ka niam. Ia ka kyntien Khasi "Parabangeit" ngi la ring jingmut na ka Grik "Adelphos", kaba mut u hymmen u para ha ka jingiadei doh iadei snam ha ka kur ka khong. Hynrei namarba ki Khristan ki don baroh kajuh ka jinglong-blei ba ki la ioh ha ka Jingkha-arsien, ki la ialong shikur shidoh shisnam ha u Blei lyngba u Jisu Khrist. Haba peit na kane ka liang, ki Khristan baroh ki long da shisha shihymmen shipara. Ki Khristan hyndai bad khamtam eh u Apostol Paulus ki la sngewthuh shai-kdar ia kane

bad kumta ki la ai nam kiwei ia kiwei pat da kane ka kyntien "Adelphos" na ka bynta ki shynrang bad "Adelphi" na ka bynta ki kynthei. Da kane ka kyntien bad ka nam, u Ioannis u kwah ban ong ba um dei u nongwei u nongar, hynrei u paradoh parasmam jong ki Khristan hi, u kur jong ki ha u Blei lyngba u Jisu Khrist, na Uba baroh ki la ioh ia ka jingim blei.

**(b) BAD U NONGIAIOHBYNTA LEM BAD PHI . . .  
HA KA JINGIASYLLOK-LEM BAD U JISU.**

Ban pynjthuh shuh-shuh ia lade u Ioannis u pynpaw ba ka jingim jong u kam iapher eiei na ka jingim jong ki Khristan, kiba ha kata ka por ki la ngat ha ka shemlanot namarba ki la pdiang ia u Jisu kum u Blei bad u Trai Kynrad, ym ia u Kaisar ka Hima-bah Roman. Te u Ioannis u ong ba ma-u ruh u don ha ka shemlanot kum ma-ki. Ban pynsgewthuh shai-kdar ia ki para Khristan, u Ioannis u pyndonkam ia kane ka kyntien Grik "Singkinonos" kaba wan na ki artylli ki kyntien "Sing, kaba mut "LEM BAD" bad "Kinonos" kaba mut "U NONG-IOHBYNTA-LEM". Ha ka jingshisha, tang ka kyntien "Kinonos" ka la biang. Hynrei u Ioannis u dang kwah ban ban tynggeh shuh-shuh ia ka jingiadon lem jong u ha ka shemlanot, te u buh sa ka kyntien "Sing (sin)" "LEM BAD" ne "RYNGKAT"

Mynta ka jingkylli ka mih, "Kaei ka jingmut bashisha jong kane ka kyntien "Singkinonos", ia kaba ngi la ring jingmut sha ka Khasi da ka kyntien "NONGIA-IOHBYNTA-LEM"? Hato kane ka jingiaiohbynta-lem ka long mo kum ka jingiaiohbynta-lem ha ka jingialeh-kai, ne ha ka khawai dawai ne ha ka trej ka ktah? Em; kane ka jingiaiohbynta-lem hangne ka iapher na kiwei pat. Ngilah ban ai tang kane kawei ka nuksa na ka longbriew manbriew, kaba pyni shai-kdar ia ka jingmut jong kane ka kyntien "Kinonos=nongiaiohbynta-lem", bad kane ka dei ka jingiadei i khun bad u kpa bad ka kmie. U kpa bad ka kmie ki dei ki "Kinoni=nongiaiohbynta-lem" ha i khun. Kata ka mut, i khun i dei i jong u kpa na khlieh haduh kjat; khyndiat ruh ym lait shuh. Kumjuh ruh i khun i dei i jong ka kmie na khlieh ha kjat khlem lait eiei ruh em. U kpa



u lah ban ong, "Ine i khun i dei i jong nga na khlieh ha kjat", bad ma-ngi baroh ngi kubur, "Hooïd keiñ!". Ka kmie ruh ka donhok ban ong, "Ine i khun i dei i jong nga na khlieh ha kjat", bad ngin kubur biang, "Hooïd keiñ"! Bad lada u kpa bad ka kmie ki pyrta jam da kawei ka sur, "Em, ine i khun i dei i jong ngi baroh ar ngut!", ngin iaikubur bad ngin pyrta ruh, "Hooïd keiñ! Hooïd keiñ!" Hangne ka paw shai-kdar ka jingmut jong ka kyntien Grik "Kinonos", ia kaba ngi la ring jingmut sha ka Khasi "nongiaiohbynta-lem". Ito i khun i dei i jong u kpa bad ka kmie kum ka kynhun. Ito i khun i dei ruh i jong u kpa shimet bad i dei i jong u kpa naduh khlieh haduh kjat Ngim lah ban ong ba i khun i dei i jong u kpa tang naduh khlieh haduh shadem bad naduh shadem shaduh kjat pat i dei i jong ka kmie. Kum ka kynhun ki ar ngut, u kpa bad ka kmie, ki don ka hok tynrai ban kam ia i khun kum i jong ki. Ha kajuha ka por, u kpa u don ka hok tynrai ban kam ia i khun kum i jong u shimet naduh khlieh haduh kjat bad ka kmie ruh ka don ia kane kajuha ka hok tynrai. Haba ka long kumne, kito, kiba don ka hok tynrai ban kam ia kaei kaei kum ka jong ki kum ka kynhun bad kum shimet shimet, ki long ki "kinonos-nongiaiohbynta-lem".

Mynta, kaei kata ia kaba ki Khristan ki lah ban kam ba ka dei ka jong ki kum ka kynhun bad ka dei ka jong ki shimet shimet? Ka dei ka jingim-blei ia kaba ki ia ioh na u Blei lyngba u Jisu Khrist ha ka Jingkha-arsien da ka um bad u Mynsiem Bakhuid. Ka jingim-blei ka don tang kawei, ka jinglong-blei ka don tang kawei! Kane ka jinglongblei ka dei ka ri-kynti jong ki Khristan kum ka kynhun bad ka markynti jong ki shimet shimet. Uwei pa uwei u Khristan u lah ban kam ia ka jinglong-blei ba u ioh ha ka Jingkha-arsien kum ka markynti jong u shimet, hynrei ha kajuha ka por ka dei ruh ka rikynti jong ka kynhun Khristan baroh kawei. Namarkata, ki Khristan baroh ki dei ki "Kinoni", kata ki Nongiaiohbynta-lem. Da shisha kane ka dei kaei kaei kaba itynnat ha ka jinglong bad jingim Khristan jong ngi. Da shirsha ngi ialong kawei kumba u Kpa bad u Khun ki ialong kawei. U Kpa bad u Khun ki ialong kawei da

ka hok tynrai lajong, ma-ngi ki Khristan ngi lalong kawei para ma ngi bad u Blei da ka Jinggaiei kumba ngi la batai haneng

Bad kane ka jingialong-kawei ka dei ban paw ha ka jingim, ha ki jynleh jynkam. Lada kam paw ha ki jynleh jynkam, wat ha ki khep ka shemlanot ruh, ka lah ban long ba ka jingim Khristan jong ngi kam long kaba shisha. U Ioannis mynta u batai ba u long u nongiaiohbynta-lem bad kiwei pat ki Khristan, ha ka jingim bad ha ki jynleh jynkam. Kumba long kiwei pat ki Khristan, kumta ruh u Ioannis u long. Kumba leh kiwei pat ki Khristan, kumta ruh u Ioannis u leh. Bad kane ka paw shai-kdar ha ki lai khep ne kyndon: ka shemlanot, ka jingiaishah-satar bad ka long-rangbah ne ka "dap-shynrang, dap-kynthei". Katkum u Apostol Paulus, kane ka dei ka jingim Khristan jong ngi ha kane ka sla pyrthei: ka Jingkyrmen, ka shemlanot, ka jingiaishah-satar, ka long-rangbah, ka jingkyrmen kaba kham khraw shuh-shuh! Nangta sdang biang ka jingkyrmen ka shemlanot, ka jingiaishah-satar, ka long-rangbah bad ka jingkyrmen kaba kham janai bad kumta shi kumta haduh kaba kut ka jingim.

U Ioannis ruh hangne u ong ba ka jingim jong u ka long thik kumba u Jisu u kwah bad u Apostol Paulus u batai (Rom.5:3-5; II Tim.2:12; Mt.24 13; Kam 14:22). Ba u don kajuh ka jingkyrmen, ka paw ha ka jingpynshuh ia lade kum u "Parabangeit", ka kyntien kaba kynthup ia ka Jingngeit, ka Jingieid bad ka Jingkyrmen. Te mynta u pyni shuh-shuh ba u long kum kiwei pat ki ki Khristan ha ka shemlanot, ka jingiaishah-satar bad ka long-rangbah ne ka mynsiem rangbah.

Ka kyntien Khasi ka "Shemlanot" ne ka "Jingjynjar-sat" ka dei ka jingring jingtut na ka Grik "Thlip-sis", kaba mut ka "Khim khait", ka "Shyngkhan-khait", ka "Shemlanot" bad ka "Jynjar-sat", kabym lah shuh ban batai bad bunsien ka mut ka jingshah pynshitom ha ki nongshun na ka bynta u Jisu Khrist. Te u Ioannis u ong ba, kumba u lalong kawei bad ki Khristan ha ka jinglong-blei, kumta ruh u long kawei bad ki ha ka Jingjynjar-sat ha kata ka por, ka jingshah pynshitom ha ki

Patsha Roman, namarba kim kwah ban mane-blei ia ki bad ia ka blei Roma. Ma-u ruh u la shahshitom jur kum ma-ki, lehse kham palat haduh ba u la shah pyn-ryngkangpar sha ka Dewlynnong Patmos.

Katkum ka rukom pyrkhat jong u Apostol Paulus, hadien ka jynjar-sat ne ka shemlanot, ka dei ban bud ka jingiaishah-satar. Hynrei u Ioannis u la pynkylla khyn-diat ban pyni ba na ka shemlanot ki Khristan ki poi sha ka hima da kaba peit kliaw sha ka long-ryngbah ne ka mynsiem rangbah. Ban long rangbah ne ban don ka mynsiem rangbah ka mut ban long ki khun ki hajar bapura bad bajanai jong ka hima. Kane ka dei ka thong sha kaba ki Khristan ki mir ha kane ka pyrthei. Te kumta u Ioannis u nam ia ka hima, kaba long ka jingring jingmut sha ka Khasi ia ka Grik "Basilis", kaba mut hi ka "Hima", hynrei hangne ka shim ia ka jaka jong ka "Dokimi, kaba mut ka long-rangbah ne ka mynsiem rangbah ne ka dap-shynrang bad ka dap-kynthei. Te ka jingthrang ia kane ka "Hima" kumba la batai haneng, ka pynlong ia u Ioannis ban tur sha ka shemlanot ne ka jynjar-sat bad na ka jynjar-sat u poi sha ka jingiaishah-satar khlem khium, khlem riej ia kiei kiei kiba lah ban long kum ki dingpynkiang ha ka lynti Khristan jong u. Ka kyntien "Jingiaishah-satar" ka dei ka jingring jingmut na ka Grik "Hipomoni", kaba mut ka jingbymieng ia ki jingeh, ka jingsblur khlem riej hakmat ka jingma, ka jingraikut ban tur sha ka jingjop jia katba jia ha lynti, ka jinglong-satar hapteng ki jingshahshitom bym lah shuh ban batai, ka mynsiem-radbah kabym, khein snep ia kano kano ka jingeh ne jingma. Te u Ioannis u pyni ba u long kum kiwei pat ki Khristan namarba kum ma-ki ma-u ruh u la ia id lyngba ka "thlip-sis", kaba mut ka shemlanot, ka jingiynjar-sat, lyngba ka "hipomoni", kaba mut ka jingiaishah-satar, ka mynsiem-radbah, bad kumta u poi sha ka "Dokimi", kaba mut ka long-rangbah bapura jong ki khun ki hajar ka hima u Blei. Ha ka Grik ka don tang ka kyntien "Hima", hynrei ban shai ka jingmut ngi la buh ruh ia kine ki kyntien "ha ka long khun long hajar".

Khatduh eh, u Ioannis u ong ba ma-u ruh, kum ki-

wei pat ki Khristar, u la shah-satar ia kine kiei kiei kum u Khristan, kata, na ka bynra ka jingneit bad ka jingieid ia u Jisu Khrist. Te u Ioannis u ong ba u la leh ia kine kiei kiei "en Jisu" ha ka Grik, ia kaba ngi la ring jingmut sha ka Khasi "ha ka jingiasyllok-lem bad u Jisu", kata ka mut "ha ka jingim jong u kum u Khristan, bad ka jingim Khristan ka itynnar, ka pura janai ha u Jisu Khrist. U Khristan um lah lait na u Jisu Khrist, ha Uba ngi im, ngi khiih ngi ksar bad ki leh ngi kam.

(d) NGA LA DON. ....PATMOS.

Hangne u Ioannis u nang kdew shai-kdar shuh-shuh kumno ma-u ruh u la iaaid lyngba ka shemlanot, ka jynjar sat bad ka jingiaishah-satar kum ma-ki bad lehse kham palat namarba u la shah pynryngkangpar sha ka Dewlynngong Patmos ban trei ha ki par-nar bad ki par-maw. Ban shah pyniap ne ban shah khrai khlieh ka long ka jingshahshitom kaba jur, hynrei tang shipor ka la kut bad ka bud shisyndon ka burom bad ka jingsuk ha bneng. Hynrei ban shah pynryngkangpar bad ban shah pyntrei jubor-justi ha ki par-nar ne ki par-maw ka neh da ki snem bad ka jingim ka long kaba kordit haduh katta katta ha ka jingshahshoh jan man ka sngi ha ki nongpyniaid, ha ka jingshah lehbein, ha ka jingshah sympat khlem isynei. Shisyng-ong, kine ki mraw ki long kham poh ban ia ki mrad. Ki mrad ki dang ioh ka bam kaba biang, hynrei kine ki mraw ba la shah pyntrei jubor-justi (forced labour) ki ioh tang khyndiat ka bam bad shibun bah ka jingtnei miet sngi khlem sangeh khlem kut shuh haduh ka jingiap, kaba lehse ka lah ban wan suki. Ka jingkordit kaba man la ka sngi! Da shisha, u Ioannis u la iaaid lyngba ka jynjar-sat. ka jingiaishah-satar bad kumta u poi sha ka long-rangbah ha ka jingim Khristan.

Wat lada ki don kiba ong ba ka Dewlynngong Patmos ka lah ban long tang kum ka dak ka shin jong ka jingshahshitom bakordit, hynrei ka khanapateng ka pynbna shai-kdar ba ia u Ioannis la pynryngkangpar da shisha sha ka Dewlynngong Patmos. Ngii la kdew katto katne ki sakhi ha ka Maitphang. Ha ka kot jong u "Ki 'Riewdonburom", u Jeronimus Bakhuid u thoh

ba ia u Ioannis la pynryngkangpar sha ka Dewlynnong Patmos ha ka snem kaba khatsaw hadien ka jingiap u Patsha Nero. ba u la sah kumba ar snem ha kato ka dewlynnong ha ka jingshahshitom kabvm lah ong shuh bad la pyllait ia u tang hadien ka jingiap u Domishian. Ha ka kot jong u "Ka Jingpynim u Bariewspah", u Klemen na Alexandria u iathuh ba hadien ka Jingiap u Domishian u Ioannis u la leitphai biang sha Ephesus na ka Dewlynnong Patmos. Uwei na ki nongthoh ka Balang hyndai, uba pawnsam, u dei u Tertullian bad u ne u nongthoh u kren shai ba ia u Ioannis la pynryngkangpar sha kato ka dewlynnong. U don sa uwei u nongthoh, uba iit-bniah ia kiei kiei, u Origen. Une u pyntip ba ia u Ioannis la rai pynrem ban trei juborjusti ha ka Dewlynnong Patmos namarba u la sakhi ia ka Ktien u Blei bad ba u la long u Khristan. Bad kumta ter-ter kane ka khanapateng ka la poi shaduh kine ki ongi jong ngi.

Ngila batat shaphang ka Dewlynnong Patmos ha ka Matphang, ha ka Batat Synop (Foot-note). Kane ka jingshah pynryngkangpar ka la ktah shibun ia u Ioannis bad ka paw ruh ha kane ka Kitab Jingpynpaw. Katno sien u la nam ia ka durjaw bad ia ka jingsawa jong ka bad ia ka jingitynnat jong ka por step bad ka por sepsngi.

#### (e) NAMAR KA KTIEN U BLEI BAD KA JINGSAKHI IA U JISU.

Hangne u Ioannis u kdew ia ka daw tynrai jong ka jingshah pynryngkangpar jong u sha ka Dewlynnong Patmos. Ka dei namar ka Khubor Babha bad namar u Jisu Khrist, ia Uba u Ioannis u mane kum u Blei, ym ia u Kaisar ka hima Roman.

Katto katne ngut ki 'riewstad ki ong ba ki kyntien "Namar ka Ktien u Blei" ki mut ba u Ioannis u la leit khnang sha ka Dewlynnong Patmos ban ialap ia ka Khubor Babha bad hapdeng kane ka kam ialap, u la shah kem kum u Khristan. Kane ka lah ban long. Hynrei kito, kiba ong ba u Ioannis u la shah kem bad shah pynshitom katba u dang ialap ia ka Khubor Babha ha Asia Minor, ki kham don nongrim bad na

ka bynta kane u Īoannis u la shah pynshitom da ka jingpynryngkangpar, kaba long kawei na ki rukom pynshitom jong ki Roman ia kito kiba pyrshah ia ki. Ka dei kawei na ki rukom pynshitom kiba shyrkhei, kham-tam eh haba ki dei ban trei jubor-justi ha ki par-nar ne par-maw.

Ki kyntien "Bad ka jingsakhi ia u Jisu" ki kdew ia kawei pat ka daw balei u Īoannis u la shah pynryngkangpar. Ngila batai ha ka Maitphang ia ka jingmut bajyliew tad baiar jong ka kyntien "Ka Jingsakhi (ba ka Grik Martiria). Hangne u Īoannis u kwah ban ong ba u la shah pynshitom namarba u la phla paitbah ia ka jingngeit jong u ha u Jisu kum u Blei bad u Trai Kynrad bad u la kyntait ia u Patsha bad ia ka blei Roma. Imat ka la jia kumne: la pynbor ia u ban leit sha ka duwan u Patsha bad ban thang khyndiat ka dhup bad ban pyrta, "U Kaisar u dei u Trai Kynrad!". U Īoannis u la kyntait ban leh ia kane ka kampap bad u la pyrta pynban, "U Jisu Khrist u dei u Blei bad u Trai Kynrad!" U Īoannis u la phla paitbah da ka ktien bad da ka kam ba u Jisu u dei u Blei bad u Trai Kynrad, ym u Kaisar. Na ka bynta kane, la rai ban pynryngkangpar ia u sha ka Dewlynnong Patmos bad ban trei jubor-justi ha ki par-nar bad ki par-maw.

## (ii) KA HUKUM BAN THOH (1:10-11)

Hadien ba u Īoannis u la pynithuh bha ia lade ha ki Khristan, u sdang ban khanatang kumno u Blei u la hukum ia u ban thoh ia kiei kiei kiba u la iohi. Kane ka la jia ha ka Sngi u Trai, ka sngi nyngkong jong ka taiew ki Ju, ka sngi hadien ka Sabat. Kane ka dei ka sien kaba nyngkong ba la nam ia ka "Sngi u Trai" ha ka Jutang Bathymmai. Bad ka pyni shai-kdar ba ki Khristan, ki la rakhe ia ka Sngi u Trai naduh ka por jong u Īoannis; ki la rakhe ia ka Sngi u Trai ha ka jakong ka Sngi Sabat. Na ka bynta ki Khristan kane ka dei ka Sngi kaba khraw baduh ba ki la nam ia ka "Ka Sngi u Trai jong ngi u Jisu Khrist". Ka daw ka shai-kdar. Dei ha ka sngi banyngkong jong ka taiew ki Ju ba ki Apostol bad ki synran u Jisu ki la bna ia ka jingmihpat jong U na ka jingiap. Te ka dei ka sngi

jong ka jingjop bad ka jingkmén! Ka sngi ha kaba ki Apostol bad ki synran ki la sngewthuh ba u Jisu u dei u Blei da shisha, namarha dei tang u Blei Uba lah ban mihpat na ka jingiap. Dei naduh kato ka step, ha kaba ki Apostol ki la ioh khubor ba u Jisu u la mihpat na ka jingiap, ba ki Khristan hyndai ki la sdang ban ñiewkor ia ka sngi banyngkong jong ka talaw ki Ju bad ki la nam ia ka "Ka Sngi u Trai!" Bad dei naduh kato ka por ba ki la burom bad rakhe ia kane ka Sngi u Trai ha ka jaka jong ka Sabat. Dei ha kane ka sngi ba ki la ju ialum lang ban duwai kum ka kynhun bad shimet shimet

Mynta u Ioannis u khanatang ba, ha kawei ka Sngi u Trai, lehse ha ka por darg step shuwa ban shah pynbor ban trei kum u mrad ne ha ka por-miet, u dang duwai-puson, u dang iaphylliew bad pyrshang ban iamir bad u Blei shaphang kito kiei kiei kiba la jia ha ki Khristan shaphang ka jingshah pynshitom ha ka kti ki bymman, kiba mane-blei ia u Kaisar Dei ha kane ka khep ba u Blei u hukum ia u ban thoh ia kiei kiei kiba un iohi ha kato ka sngi. Ka dei ka Hukum-blei bad u Ioannis u la kohnguh.

Da ki kyntien "U Mynsiem u la tyллеp ia nga", u Ioannis u mut ban ong ba, katba u dang duwai-puson, u la kynduh mynsiem bad dei u Mynsiem Bakhuid Uba la pynurlong ia kane ka jingakynduh mynsiem baphylla bad bakypang. Ia ki kyntien "U Mynsiem u la tyллеp ia nga" ngi la ring jingmut na ki kyntien Grik "Eienomin en Pnefmati", kiba mut, lada ngi pynkylla kyntien pa kyntien, "Nga la don ha u Mynsiem" ne "Nga la shem ia lade ba nga don ha u Mynsiem". Kane ka dei ka rukom batai jong ki Ju ia ka jingkynduh mynsiem ne ka jingfaphylliew bad jingiamir bad u Blei, kaba pynklet ia ki briew ba ki don ha kane ka pyrthei. Ka long kumba u Mynsiem u la rah noh ia u briew na kane ka pyrthei sha kawei pat ka pyrthei bamafao, kumba ka la jia ha u Ezekhiel (Ez 3:12) Ka long kum ka jingiohi-paw. Dei ha kane hi ka khep ba u Ioannis u iohsngew na shadien ia ka Hukum u Blei ban thoh. Ka sur jong u Blei ka long kaba jam-syang kum ka sur

turoi. Da kane u Ioannis u kwah ban iathuh ba ka jingloh Hukum jong u na u Blei ha kato ka sngi ka la long thik kum kato ka sngi ha kaba ki Israel hyndai, hapoh ka jingialam u Moses, ki la ioh ia ki Shiphew Hukum ha kjat u Lum Sinai (Ex. 19:16). Ka Hukum ka la shai shynna bad ym shym lah ban bakla ia ka! Shuh-shuh, u Ioannis u kynmaw ba u Jisu hi u la iathuhtypa ba, haba Un wanpat, kan don ka jingput turoi, ia kaba ki jaitbynriew baroh kin iohsngew kyndiang (Mt 24:31). U Apostol Paulus ruh u iathuh shai ba, haba u Jisu un wanpat, kan don ka jingsawa jong ka turoi (I Thes 4:16; I Kor. 15:42). Kane ka dei ka rukom batai jong ki Ju, ha ki kitab apokalyptik jong ki, ia ka jingwan jong u Blei bad u Messia ban jop bad ban bishar ia ki nongshun jong ki Ju. Kane ka jingwan jong u Blei ban jop hi thiaw bad ban bishar ia ka pyrthei ka dei ka jingwanpat u Jisu ha ka bor bad ka burom. Te ka jingsawa jong ka turoi kam dei ban duh. Ka dei ka rukom kren kaba mut ba ka Hukum ba u Ioannis u ioh na u Blei ka shai-kdar bad ka la wan ha ka bor bad ka burom, kaba iadei-dur bad u Blei Nongbuh Nongthaw. Uba don bor ban hukum ia ki jynthaw jong U. La hukum ia u Ioannis ban thoh sha ki hynñiew Balang ha ka Jylla Roman ha Asia Minor, ki hynñiew Balang kiba long ki nongmihkhmat jong ka Balang baroh kawei ha satlak ka pyrthei.

### KA SIENPAW III (1:12-20)

12 Nga la phai ban peit ka dei ka sur jongno kaba la kren ha nga. Bad nga tang shu phai, nga la iohi hynñiew tylli ki diengpyñieng sharak kiba da ka ksiar; 13 bad hapdeng ki diengpyñieng sharak, nga la iohi Uwei, Uba kum u Khun u briew, Uba phong da ka sopti kaba jynsur haduh ki kjat, bad u panpoh ksiar tawjar ka kut shadem jong u. 14 U 'ñiuhkulieh jong u u lieh shaid kum u 'saiwul bad kum ka ior bad ki khmat jong U ki phalang kum ka thylliej ding, 15 ki kjat jongu ki phyrnading kum ka rnong ba la saiñ ha shlem bad ka sur jong U ka kyrhuh kum ki kshaid-um. 16 U bat, ha ka kti



kamon jong U, hynñiew tylli ki khlur. Na ka shyntur jong U ka mih tluññ ka waitlam arliang-syrti kaba nep bad ka khmat jong U ka phalang kum ka sngi haba ka ka tyngshaiñ bha.

17 Tang shu iohi ia U, nga ia kyllon, kum uba iap, ha ki kjat jong U. *Hynrei Ma-u* U la bub ia la ka kti kamon halor jong nga bad U la ong, "Wat sheptieng shuh! Nga long u Banyngkong bad uba khatduh 18 bad u Ba-ım. Nga la iap shisien, hynrei, hakbmih, *myn-ta* Nga ım junom la junom! Nga bat ia ki shabi jong ka jingiap bad jong ka Niamra Namarkata, to thoh ia kiei kiei kiba phi la iohi, ia kito kiba jia mynta bad ia kito ruh kiban sa jia hadien habud. 20 Ka jingmut barieh jong ki hynñiew tylli ki khlur ba phi la iohi ha ka kti kamon jong Nga bad jong ki hynñiew tylli ki diengpynieng sharak, kiba da ka ksiar, *ka long kane*: ki hynñiew khlur ki long ki hynñiew ngut ki angel jong ki hynñiew Balang, bad ki hynñiew diengpynieng sharak ki long ki hynñiew Balang."

Ha kane ka Siempaw III, ngi iohi ia ka jingurlong jong ka jingpynbna u sangot ha ka Siempaw I bad ka hukum ban thoh ha ka Siempaw II. U Jisu Khrist u paw ha ka bor bad ka burom kum u Lyngdoh, u Syiem bad u Nonglathuhlypa, bad u Ioannis u Ioh, sa shisien, ka hukum ban thoh ia kiei kiei kiba jia ha kito ki sngi hi bad ia kiei kiei kiban jia hadien habud ruh.

Ngin pyrshang ban batai mynta hangno u Jisu u paw, kumno U riam u beit bad ka long kumno ka dur ka dur bad ka khmut, ka khmat jong U. Nangta ngin iohi ka jia aflu ha u Ioannis bad aflu u Jisu u ong ha u.

#### (i) HANGNO U JISU U PAW (1:12-13a)

U Ioannis u ong ba u tang shu iohsngew ia kato ka sur kaba jam-syiang kum ka turoi bad kaba wan na shadien, shisyndon u la kyrtiang dien ban iohi ~~mano~~ ba kren ne ~~mano~~ ba pyrta. Nyngkong eh, um ~~shym~~ iohi ia uno uno u briew, hynrei paw ~~shynna~~ pynban da ki hynñiew tylli ki diengpynieng sharak kiba da ka ksiar suda. Kine ki diengpynieng sharak ki ~~pynkymant~~

ia ngi ia ka Diengpynieng sharak jong ka Jutang Barim, kaba don hynñiew tylli ki tnat bad ha kliar jong kine ki tnat la buh ki sharak, kita ki hynñiew sharak (Ex.25:31-37). Kane ka Diengpynieng sharak, ka la long da ka ksiar suda. bad ka la don tang ha kawei ha ka Iingsad-ting-sunon ne Iingkyntang jong ka Jutang Barim. Mynta ha ka Jutang Bathymmai, kane ka Diengpynieng sharak ka la roi, kumban shu ong noh, haduh hynñiew tylli. Kane ka dei ka dak-pharshi ban pyni ba ka Jutang Barim, ka-bym pura, lem bad u paid Israel, uhy n pat janai, ki pura bad janai ha ka Jutang Bathymmai Te kumba u Ioannis hi un sa batai harum, u Jisu Khrist u paw hapdeng ki khun ki hajar ka Hima jong U hi, kata, ha ka Balang ha ka jingjanai bad ka jingpura jong ka. Ka ksiar nylla ka thew ia ka jingkordor jong kiei kiei kiba don ha ka Balang, ki thew ia ka jingitynnat bad jingiphuh iphieng jong ka Balang U nombor "Hynñiew", kumba ngi la batai, u kdew ia ka jingpura, ka jingbiang nadong shadong bad ka jingjanai. Te u Jisu um shym paw hangno hangno jaitnoh ha ka Balang kumba U la seng ia ka.

## (ii) KA DUR KA DAR KI JISU (1;13b-16)

U Jisu Khrist u paw ha ka Balang bad ha ka pyr-thei ha ka dur ka dar ba la batai da ki Nongiatuh-lypa, ban pyni ba U dei Ma-u Uta, ia Uba ki paid Israel ki la khmih lynti dik-dik. U la wan ha ka Hok katkum ka Hukum ne ka Saiñdur ieidsbun jong u Blei.

Nyngkong eh, u Jisu u la paw ka dur jong u Khun u briew, kata, ka dur ka dar u briew hi. Ia kane la iathuhlypa ha ka Kitab Apokalytik u Daniel ha kaba u Blei Nongbuh Nongthaw u pynkhamti ia ka hima, ka bor bad ka iktiar ha u Khun u briew (Dan.7:13). Na ka histori jong ki Ju, ngi tip ba ia kane ka lynnong ki la ñiewkor bha namarba ha ka ki la shem ne iohi ia u Messia, Uban pyllait-im ia ki na ki ktj ki nongshun. Te "U Khun u briew" ka dei kawei na ki nam ba ki Ju ki la ai ha u Messia. Ha kane ka liang, ki Ju, namarba ki dei u paid jong u Blei, kim shym bakla. Lyngba ka sap-blei (divine instinct) u paid Israel u la sngewthuh ba ki kyntien "U Khun u briew" ki kdew ruh, ha ka saiñdur bad ka jingmut u Blei, ia u Messia, Uban wan

ha kawei ka sngi. Bad u Jisu Khrist ruh u la kubur la kane ka jingsngew jong ki Ju bad katba u dang im ha kane ka sla pyrthei, u la nam ia lade kum "U Khun u briew (Mt 11:9; 16:13; 22:42; Mk. 14:61-62; Lk.22: 67-69). Te hangne ka shai-kdar ba dei u Jisu hi uba la paw ha u Ioannis bad ka khubor ba un ioh ka wan na u Jisu hi, ym na kiwei pat.

Nangta, u Jisu u paw ha ka dur u Lyngdoh-sohblei Rangbah. Kane ka paw shai na ka jynriam jong u. Ka sopti jynsur kaba poi haduh kjat ka dei kata kaba ki khot ha ka Grik ka "Podiris". Ka dei ka riam ka beit u Lyngdoh sohblei Rangbah ne u Lyngdohsad (Ex. 28:4; 29:5; Leb. 16:4) ha ka por ba ki lehniam lehrukom. Shuh-shuh ngi tip na u Jeseplus Flavius, u Ju uba la kylla Jentil, ba ki Lyngdoh, ha ka por jong u, ki riam ka sopti kaba jynsur bad kaba poi haduh kjat bad ki teh tawiar ka met da u kynja panpoh, ym tawiar ka syngkai, hynrei kham haneng, lah ban ong, tawiar ka kut-shadem, khyndiat harum ki dak jymbuiñ. Te ym lah shuh ban artatien ba u Ioannis u la iohi ia u Jisu ha ka dur ka dar u Lyngdoh-sohblei Rangbah.

Kane ka riam ka beit, ba ngi la batai haneng, ka dei ka jong ki Lyngdoh, hynrei ki Syiem bad ki Bakhrav Batri ruh ki pyndonkam hi. Ha ka Jyntboh Bakbuid hi, ngi shem ba u Saul, u Syiem Banyngkong ha Israel, bad u khun jong u, u Jonathan, ki la riam da kane ka sopti "podiris", kaba jynsur bad poi haduh kjat, lem bad uto u jynteh uba kham iapher na u panpoh, ia uba ngi ju teh ha syngkai (1 Sam 18:24; 24:5,12; Ez. 26:16). Te ym lah ban artatien ba u Ioannis, kum u Ju u la mut ruh ban ong ba u Jisu Khrist u dei u Syiem uba don bor, uba don iktiar.

Shuh-shuh, haba peit kyllum ia kane ka jingbatai. Ia ka riam ka beit bad ia ka dur ka dar jong u Jisu, u Ioannis u la pyniasyriem ia u bad u nonglam-khubor na ka liang u Blei. U nonglamkubor, uba kat u nonglam khubor ha ka pyrkhath pyrdaiñ ki Ju, u dei u Nonglathuhlypa (Dan.10:1-21). Bad ha kane ka khep, u Jisu u dei shisha u Nonglam-khubor jong u Blei, u dei u Nonglathuhlypa.

Namarkata, na ka riam ka beit, ka sopti jynsur haduh kjat bad u panpoh bakyrpang uba itynnat, uba bun rong, uba da ka ksjar, u Ioannis u kwah ba ngin ithuh ia u Jisu Khrist kum u Lyngdoh-sohblei Rangbah, u Syiem bad u Patsha bad u Nongiathuhlypa.

U Ioannis um pat hun tang ban ong ba u Jisu Khrist u dei u Lyngdoh Rangbah, u Syiem bad u Nongiathuhlypa. Da ki dur-pharsni u kwah ban kdew shai ba u Jisu u dei u Blei Bymjukut, Ubym don ka Mynnor ne ka Lawei, hynrei tang ka Mynta. Da kaba ong ba "u 'niuh-khlieh jong u u lieh shaid kum u 'saiwul bad kum ka ior," u Ioannis u pyniaryngkat ia u Jisu bad u Blei Nongbuh Nongthaw, ubym don ka sdang bad ka kut (Dan. 7:9), hynrei uba la don naduh ka mynnor ia kaba ngim lah ban niewtang ne ban khanatang. U palat liam ia ka ryta jong uno uno u briew ne u jynthaw. U Long uba khlem-pud.

Ki Ju hyndai ki la pynrem ia u Jisu. Ki la kynnoh ba u la krenbein ia u Blei, bad u la pynkhein ia ka Sabat bad kumta ter-ter. U Ioannis u kwah ban iathuh ba kane ka long ka jinglamler suda. U Jisu um don pap don sang eiei ruh em. Ban pyni shai ia kane, u Ioannis u ong ba u 'niuhkhlieh jong u u long kum ka ior kaba lieh phir-phir. Ha u Jisu ym don wat iwei i phngit jong ka pap ka sang ne ka be-ain. Dei na kane ka daw ba u Jisu hi u kylli ia ki Ju khlem sheptieng eiei, "Mano na phi uta lah ban kynnoh nongpop ia nga?" (Io. 8:46). U Apostol Paulus ruh u hikai ba u Jisu um don pap don sang eiei ruh em (Heb 4:15).

Da kaba ong ba "ki khmat jong u ki phalang kum ka ding", u Ioannis u kwah ban kdew ia ka maiñ u Jisu. Ha ki khmat jong u Jisu ka paw kata ka jingeh rngiew eh rngot, ia kaba ym lah ban pyndem lano lano ruh. Ngishem ia kane ka dur ka dar u Jisu ha ka Jynthoh Bakhuid hi kum ha u Daniel 10:6 bad ha ki Kitab jong ka Khubor Babha kum ha u Markus 3:5; 3:34; 10:21,23; 11:11. Ha ki khmat u Jisu ka paw ka maiñ dap-shynrang ha ki khep baroh jong ka jingim jong u. Nalor kane ka jingmut, ha ka Jynthoh Bakhuid hi ngishem ba ki khmat baphalang ki thew ia ka bor ban tip bad ban iohi ia kiei kiei baroh,

wat ki dohnud barieh jong ki briew ruh. Ki khmat u Jisu ki sam lyngba kiei kiei baroh tad ki lohi lut nadong sha-dong. U Jisu u dei uba tip lut.

Shuh-shuh, ka khmat jong u Jisu ka phalang kum ka thylliei ding, namarba ka tei bad ka pyniot kumban ong noh, ka kyntiew bad ka pynhiar. Hakhmat u Jisu, ki briew kim lah ban shu ieng ne long pdeng. Haba ka ding ka kynduh ia kaei kaei, kam ju pep ban trei-kam. Kam ju iehnoh ia kiei kiei kumjuh kumba ki long. Kiei kiei ki kylla. Kane ka pyni ia ka bor kaba mih na ka khmat u Jisu.

Ym tang ka khlieh, ka khmat bad ka met ka phad ki ishongkun bad ishong-blei, hynrei wat ki kjat ruh ki iapher na ki jong kiwei pat. Ki iasyriem ia ka rnong kaba kyrpang, ia kaba mynta imat ngim lah shuh ban shem ha ka pyrthei. Ngi la ring jingmut sha ka Khasi da ka kyntien "Rnong" ia ka kyntien Grik "Khalkolibanos", kabvm da mut shisha ka rnong, hynrei kaei kaei kaba la khleh lang da ka ksiar, ka rupa, ka rnong, bad leh-se kiwei pat ki jait nar. Namarba ka dei kaei kaei kaba la khleh lang da kiei kiei kiba kordor bad kiba eh, kane ka jait rnong ka long kaba eh haduh katta katta, kaba kham neh bad kaba kham kordor ban ia ka ksiar ka rupa. Haba phrang ia ka ha ka shlem kaba kbie-ir da ka ding, kane ka jait rnong ka phyrnai ding. Ha ka Phareng ki ong "incandescent with fire". Ia ka kyn-tien "phyrnai-ding" ngi la ring jingmut na ka Grik "Pepiromeni" kaba wan na ka berb "piroo", kaba mut ban rhem-phyrnai da ka ding, kaba la rung hapoh u nar. Ha ka Jynthoh sot-sani, ha kaba ngi la pynshong nong-rim ia ka jingring jingmut jong ngi sha ka Khasi, ngi lap ba ki 'riewstad ki la sot bad buh "pepiromenis"; ngim, pyrshah ia kane ka jingleh ki 'riewstad. Hynrei ha ngi hi shimet kan kham bha ban buh "pepiromeni" bad ban pyniadei-dur ia kane ka kyntien bad ka kyntien "podes", kaba mut ki kjat. Te ki dei ki kjat kiba phyr-nai-ding kum hapoh ka shlem. Mynta kine kiei kiei baroh ki dei ka dur-pharshi ban pyni shai ba u Jisu Khrisi u neh, ba U khlain, U eh bad U kordor kum kane ka jait rnong ba la batai haneng (Heb. 13:8). Ki kjat, kiba

phyrnai namarba ki la kem ding hapoh ka shlem, ki kdew ia ka jingiphuh iphieng bad ka burom jong u Jisu Khrist bad ka jingkmen-sngewtynnai ki 'riewhok. Ka thew ruh ia ka jingitriem jong ka jingwanpat u Jisu na ka bynta ki bymman, kibym lah ban lait na ki kti jong U. Kane ka jingphyrnai ding ka lah ruh ban mut ba u Jisu un nym pyntuud, hynrei Un stet bha ban wan bishar ia ka pyrthei bad ki bymman kin nym lah ban phet jngai na U ne ban rieh na U. Un lap ia ki kynyndit kynsan. Khatduh eh, kane ka dur-pharshi ka kdew ba u Jisu u ieng skhem ha la ka nongrim, ha la ka hima. Yn nym don mano mano ba lah ban pynkhih ia U. Triang Un ieng bad kiei kiei baroh kin liem hakmat jong U. Ka hima-bah Roman i kumba ka skhem bad ka neh, hynrei hakmat kane ka dingbah-dingsan, kaba long u Jisu Khrist, ka Hima-bah Roman kan um hin kumba um ka mombati ha ka ding.

U Ioannis u ong ba u Jisu u dei u Lyngdoh-sobblei Rangbah, u Syiem u Patsha bad u Nongiatuhlypa. La ju bna ba ki Lyngdoh, ki Syiem bad ki Nongiatuhlypa ki dei ki briew kiba don ka sap-kren, ka sur kaba hukum bad kaba pynkohnguh ia ki briew, ka sur kaba pyntieng, kaba pynsyier ia ki bynman, ka sur kaba khlain bad kaba dap-shynrang. Ban pyni ia kane u Ioannis u pyndonkam ia ka rukom kren jong ka Jynthoh Bakhuid, ha kaba ia ka sur u Blei la ju pyniasyriem bad ka jingsawa ne jingkyrhuh ka duriaw bad ki wabbah ha ka por ba ki shlei bad ki lyngkien (Ps. 29 ; Ez. 43 : 2). Ka lah ban long ruh ba u Ioannis u la iohsngew ia ka jingsawa bad ka jingkyrhuh jong ki jingatphyl-lung ka duriaw kaba ker tawiar ia ka Dewlynnong Patmos bad kumta u la pyniasyriem ia ka sur u Jisu Khrist bad kane ka jingkyrhuh bad jingsawa basngewphieng. Lada ka long kumta, ia ki kyntien Grik "hidaton pollon" ngi lah ban pynkylla sha ka Khasi da ka kyntiew "Duriaw". Hynrei ngi ring jingmut ia kine ki kyntien sha ka Khasi da kane ka kyntien "ki kshaidum" namarba ha kine ki lum jong ngi ngi la iohsngew ia ka jingkyrhuh jong ki kshaid ha ka por lyiur, khamtam eh ha ki Riat War, bad kumta ki paitbah kin

kham sngewthuh ia ka jingmut jong u I'oannis. Te ha-ba u Jisu u kren, ka mariang bad ki briew baroh ki kyjuh namarba U kren da ka bor bad ka iktiar jong u Blei.

Ha ka jingkyrhuh jong ka duriaw ne ki kshaid-um, ka paw ka bor basngewphieng, jong u Jisu Khrist ha ka jingwanpat jong u. Mynta u I'oannis un kdew shuh shuh ia kane ka bor da kawei pat ka dur-pharshi: u Jisu u bat ha la ka kti kamon, tang ha kawei ka kti, jin hyn-niew tylli ki khlur, kiba long ka dur ka dar jong ka mariang bad ka pyrthei. Dei tang u Blei Nongbuh Nong-thaw uba lah ban bat bad ban kyrshan ia ka pyrthei da la ka kti. Hangne ka paw ka berbah borsan jong u Jisu ha ka jingwanpat jong u. Ia ka jingmut jong kine ki kblur yn sa batai harum.

Nalor kane ka bor halor ka mariang baroh kawei, ia kaba la kdew da ki hyn-niew khlur, u Jisu u don ha lade hi ia ka bor ban bishar hok, ban pynshitom bad ban pynsngewthuh ia ki briew ia ka nongrim jong ki jynleh jynkam jong u. Ka dur-pharshi jong kane ka dei ka waitlam arliang-syrty kaba nep her-her bad kaba mih tluin na ka shyntur jong u. Kane ka wait kam dei kato ka waitlam kaba jrong, ka kham lyngkot ban ia ka jamdor ruh. Malu mala ka lah ban long kum ka kukri, tangba ka kukri ka kdor, katba kane ka shu long beit. Ka dei ka wait ba ki briew ki pyndonkam haba ki laleh makynti marmet. Shisien ba la poi ha kum kane ka jingialeh, uwei u dei ban jop bad uwei u dei ban iap. Ha kane ka jingialeh, ka jingjop kam lah lait na kawei ka liang bad ka jingrem bad ka jingiap na kawei pat, namarba ka waitlam ka nep baroh arliang bad shisien ba ka dei tiak, ka trei-kam, ka ot, ka dung, ka ngam. Mynta kane ka dur pharshi ka kdew ia ka bor bad ka sap bishar jong u Jisu. Shisien ba u Jisu u la rai, ym lah shuh bad ym don lad shuh ban pyni nia da kumwei. Ym banse ban ong, "Phi long uba hok, ko Trai, kiba dei suda ki rai-bishar jong phi (Ps 119:137). Ka tiphok jong u Jisu ka nep kum ka waitlam arliang-syrty. Hakmat jong u, ki briew, kiba hok, kin ioh la ka bainong bad ki briew, kiba leh pap, kim lah lait na ka jingpynshitom (Is. 11:4), la ki dei ki

Khristan ne kíbym pat pdiang ía ka Khubor Babha. Ka dei ruh ka dur-pharshi ba ka Ktien u Blei, kaba dei u Jisu hi, ka don ka bor ban trei-kam. Shisien ba Ka ía mih na u Blei, kam ju pulom (Is. 55:10-11). Kumjuh ruh shisien ba u Jisu u kren, ka Ktien jong u ka trei kam (Is.49:2). Ka Ktien jong u Jisu kan pynpaw lut ía kiei kiei baroh. Ym don mano mano ba lah ban buhrieh ei ei na Ka. ym don mano mano ba lah ban lait na Ka (II Thes.2:8; Heb 4:12). Khatduh eh, kane ka dur-pharshi ka pyni ba u Jisu u lah ban leh ía kiei kiei baroh da kaba jem, tang da ka Ktien, kabym ju pulom ne sep-ei ba ka jingtrei kam jong Ka. Hangne u Jisu kum u Syiem u íapher bak-lybak na u Kaisar, uba donkam ía ki shipai bad ía kiwei pat ki atjar ban trei-kam. U Jisu u lah ban leh ía kiei kiei baroh da lade bad da kaba jem khlem jingeh eiei.

Sa shi kyntien ar kyntien shaphang ka waitlam bad u nongbat jong ka. Ki Roman hyndai bad kiwei pat ki jaitbynriew ruh ki ía ju bna ía kata kaba ki khot ha ka Latin ka "Ius gladii", kaba mut ka hok jong ka waitlam ne ka iktiar jong ka waitlam. Ym dei uno uno uba don ía kane ka hok jong ka waitlam, hynrei tang u Syiem u Patsha ne u Nongsynshar Lahduh. Uba bat ía ka waitlam ne uba don ía kane ka hok jong ka waitlam, u don ka bor halor ka jingim bad ka jingiap jong ki khun ki bajar bad ki raíot. Te haba u Jisu u ong ba u bat ía ka waitlam ne u don ía ka waitlam, u mut ban ong ba u dei Ma-u U Trai bad u Kynrad jong ka jingim ki briew. Ka jingim jong ki ka don ha ka kti jong U bad tang ha ka kti jong U. Ka íap ka im ka shong ha U nadong shadong.

Khatduh eh, ngi íohi mynta ía ka maiñ badap shynrang, ka maiñ Syiem ba íphub íphieng u Jisu, kaba paw shynna ha ka khmut ka khmat jong u baroh kawei. U Íoannis u batai kumne, "Ka khmat jong u ka phalang kum ka sngi haba ka tyngshaiñ bha!" Haba ka suinbneng ka khuid kdiar-kdiar, ym don eiei kaba kham itynnat bad kham íphub íphieng ha ka mariang ban ía ka sngi haba ka íeng ha ka jingphalang bad ka jingtyngshaiñ ha pyrdi sahít ha ka por íeng-sngi. Kiei kiei baroh ki lip rong lut hakmat ka sngi ha kane ka por. I kumba ka long syiem marwei ha ka mariang. Kat-



kum u Īoannis. ka maiñ-blei, kaba paw ha ka khmut ka khmat u Jisu, ka long kum ka sngi haba ka tyngshaiñ kdiar ha ka sahit bneng. Bad kane ka jingbatai jong u ka don ka nongrim ha ka Jynthoh Bakhuid bad khamtam eb ha ka jingim jong u Jisu hi. U Apostol Īoannis u la ĩohi ĩa u Jisu halor u Lum Thabor bad ha kato ka sngi ka khmat jong u Jisu ka la tyngshaiñ palat han ĩa ka sngi. Khlempep une u Apostol u la ĩalap shaphang kane ha ki thaiñ Asia Minor bad namarba une u nongthoh jong ka Kitab Jingpynpaw u la long uwei na ki Khristan ha kito ki thaiñ, u la ĩohsngew ĩa u Apostol ba u batai shaphang kane ne u la ĩohsngew na kito kiba la ĩadon lang bad u Apostol Īoannis (Nbi 5:31; Mt. 17:1-8; Mk.9:2-8; Lk.9:28-36; II Pt 1:16-18). Hangne ngi ĩohi ĩa ka burom jong u Jisu ha ka jingwanpat jong U ban bishar ĩa ka pyrtnei bad ban pynngen ĩa kito kiba ngeit ha U.

### (iii) U ĪOANNIS U KYNDIT ĪAPLER (1:17a).

Ki Ju hyndai ki ju ngeit ba u briew uba ĩohi ĩa u Blei markhmat um lah ban im, u dei hi ban ĩap (Is. 6:4-5). Bad lada u briew, uba ĩohi ĩa u Blei um ĩap, la kumno kumno un kyllon kram da ka jingtieng ne ka jingsngewphieng (Ez 1:28; 3:23; 43:3). Kane ka jingkyndit bad ka jingĳapler u Īoannis ka dei ka dur-pharshi kaba kdew ba u Jisu u dei u Blei bad hakhmat jong U ki jynthaw baroh ki liem bad ki dem ngon. Khlempep u nongthoh ka Kitab Jingpynpaw u kynmaw bha ĩa kato ka jingjia ha Kper Gethsemani, mynba ki shipai, kiba la leit ban kem ĩa u Jisu, ki la kyllon kram, ki tang shu ĩohsngew ba u Jisu u ong, "Nga dei Uta!" Ha kato ka khep, ki shipai ki la kyndit thret han ĩohsngew ĩa kito ki kyntien, kiba mut " Nga dei u Blei (Is.43:10), ki la sheptieng her bad ki la kyllon kram. Ka la jia kumta ruh ha u Īoannis, u nongthoh ka Kitab Jingpynpaw.

### (iv) KA JINGPYNSHINGAIÑ BAD KA JING-PYNTNGEN (1:17b-19)

Hynrei ka jingpynpaw jong u Blei, wat lada haba sdang, ka pyntieng pynher syrngiew, kloian ka pyn-

tingen bad ka pynshngaiñ ia kiba hok bad kiba bha, ha kiba u Blei u paw ban ai khubor eiei Barahor ki iohsngew ia kine ki kyntien, "Wat sheptieng shuh!" Ne, "Sangeh noh ban tieng!" Ne "Keiñ noh ban tieng!" (Jen.15:1; 26:24; Is 43:5; Lk 1;12-13,31; 2:9-10; Mt.14:27; 17:7; Mk 6:50; Io.6:20). Bad tang shu iohsngew ia kine ki kyntien, ki briew, kiba hok bad kiba bha, ki shngaiñ shisyndon bad ki kloi ban leh ia kaei kaei ba u Blei u kwah ba kin leh. Nalor kine ki kyntien, u Ioannis u la iohi sa kawei ka dak jong ka jingieid bad jingsngewtynnat jong u Jisu ia u. U Jisu u la kner ia la ka kti kamon, u la kyrkhu ia u bad u la buh ia la ka kti halor ka khlieh jong u. U Jisu u la ju leh kumne ha ka jingim jong U(Mt.19:15). Kane ka jingleh u Jisu ka la pynshngaiñ, pyntngen bad pynshlur ia u Ioannis ha ka jingshahshitom jong u ha ka Dewlyn-nong Patmos.

Kh nang ba u Ioannis un shngaiñ shuh-shuh, u Jisu u pynpaw ia lade ha u bad u batai U dei Uei. Mynta ngin sa iohsngew sa katto katne ki nam jong u Jisu bad ka bor jong U.

#### (a) NGA LONG U BANYNGKONG BAD U BAKHATDUH BAD U BA-IM

Hangne ngi iohi sa lai tylli ki nam bad ki kyrteng jong u Jisu. U pynbna hi da lade. U Jisu u long u Banyngkong, kata, naduh ka Bymjukut, shuwa ba yn thaw ia kane ka mariang. Nangta u Jisu u long ruh U Bakhatduh, kata ka mut, Un iaineh junom bad baroh kiei kiei ki sdang na U bad ki kut ha U. Da kane u Jisu, sa shisien, u pynbna ba u dei u Blei hi, namarba kine ki artylli ki nam ki dei ki jong u Blei Nongbuh Nongthaw hi ha ka Jutang Barim (Is 44:6; 48:12). Sa shisien, ngi lah ban ong, u Jisu u pynthymmai ia la ka kular, "Ngan iaidon lem bad phi barabor, haduh kaba wai noh ka pyrthei (Mt 28:20). Bad kane ka kular kan urlong bad kan nym pulom lano lano ruh, namarba u Jisu u dei "U BA-IM". Kane ka khubor ka la pyinkmen ia u Ioannis. Namarba u Jisu u im, u Ioannis u la tip skhem ba un nym long ne sah marwei ha ka Dewlyn-

nong Patmos. U Jisu Uba im, u don lem bad u naduh basdang haduh bakut ka jingim.

(b) NGA LA ĬAP SHISIEN HYNREI, HAKHMIH,  
MYNTA NGA IM JUNOM LA JUNOM.

Hangne ka shai kdar ba une u Jisu, Uba la paw ha u Ĭoannis, u dei uto u juh u Jisu Uba la shahshitom bad shahiap halor ka Diengphna. Um dei u nongwei nong-ar, ia uba ki briew kim pat ithuh. Em; U dei uto u Jisu Uba la Ĭap halor ka Diengphna. Bad na ka bynta u Jisu, kane ka jingĬap halor ka Diengphna kam dei kaei kaei kaba jah burom, hynrei kaba donburom namar-ba dei da kaba Ĭap ba U la mihpat ha ka burom, bad ka jinglong-biei jong U ka la loh ka sakhi kaba shai tam bad kaba skhem tam.

Ĭa ki kyntien "Nga la Ĭap shisien" ngi ring jingmut na ki kyntien Grik "Eienomin nekros", kiba mut, kyntien pa kyntien, "Nga la long Uba Ĭap ne Nga la kylla long Uba Ĭap" U Jisu hi u pyndonkam ia ka berb "Ĭinome" ha ka Aorist "Eienomin". Baroh ngi la bna na ka Gramar shaphang kita ki "Tens" jong ki herb. Ha ka ktien Khasi kine ki "Tens" kim pat da biang bha ban pyni lut ia ki rukom pyrkhat bapher bapher. Ka ktien Khasi jong ngi kam pat pura bad kam pat janai kum ka ktien Grik. Ha ka Grik ki don ar tylli ki tens baladep (past): Ka Perfek bad ka Aorist. Ka Perfek ka kdew ia ka kam kaba la dep, hynrei ki soh jong ka ki dang bud-dien hi ia u nonglen ne ia kiwei pat. Ka Aorist pat de ka kdew ia ka kam kaba la dep bad kam don eiei shuh. Shisien ba ka la kut, ka la kut sah bad kam lah ban bieng shuh ha kano kano ka rukom. Te da kaba pyndonkam ia ka Aorist "Eienomin", kaba mut "Nga la long Uba Ĭap ne Nga la kylla long Uba Ĭap", u Jisu u mut ban ong ba kito ki jingshahshitom jong U bad ka jingĬap ba u la mad halor ka Diengphna ki la kut bad ki la kut sah. Un nym shahshitom shuh lano lano ruh, Un nym Ĭap shuh lano lano ruh. Kato ka jingmad bakthang jong U ia ka jingĬap ka dei kaba la dep bad kan nym wan shuh. Ki soh jong kato ka jingĬap kin nym ktah shuh ia u lano lano ruh. U la Ĭap shisien bad ka la kut artad. Ka jingmih-

pat u Jisu ka dei ka nongrim bad ka daw tynrai jong ka jinglong jong U kum u Syiem bad u Trai Kynrad. Da ka jingmihpat, u Jisu u im bad kane ka dei kaei kaei kaba phylla da shisha ha ka histori jong ka mariang bad ka pyrthei. Namarkata, u Jisu hi u ong, "Hakhmih!". Ka jingpyndonkam ia kane ka kyntien ka pyni ia kaei kaei kaba phylla da shisha. Bad ka jingim junom u Jisu hadien ka jingmihpat ka dei ka jingjia histori kaba khraw tam.

Ym tang ba u Jisu u im, u dei Ma-u ka tynrai bad ka tyllong jong ka jingim jong ngi. Ka jingim bad ka jingiap ki don ha ki kti jong U Namarba u Jisu u im bad u don ka jingim ha lade kum ka hok tynrai, ma-ngi ruh ngin im lem bad u (Io. 1:4;3:15 ; 5:21,26;14:19; II Tim. 1:10)

Ha ka rukom pyrkhat jong ki Ju, ka jingiap bad ka Niamra ki dei kijuh. Kine ki don ka khyrdop ia kaba lah ban plie da ki shabi. khnang ban ioh ban rung ne ban mih pat U Ioannis u dei u Ju bad um hanse ban pyrkhat kum kiwei pat ki Ju, kiba ngeit ba hapoh khyndew ka don ka jaka ba ki khot ka "Sheol ha ka Hebru" bad "Hadis ha ka Grik". Na kane ka ktien Grik ka wan ka ktien Phareng "Hades". Kane ka jaka kam da dei eh ka dujok, hynrei ka jaka ha kaba kiba hok bad kiba pap ruh ki dei ban shong ban sah hadien ka jingiap. Ki Ju hyn-dai ki pyrkhat kumne shaphang ka jingim sha lyndet namarba kim pat shai bha shaphang kane shuwa ka jingwan jong u Trai jong ngi u Jisu Khrist. Haba peit na kane ka liang, ngi ki khun u Hynñiewtrep ngi la kham shai ban ia ki Ju, namarba ki Longshuwa jong ngi ki ngeit ba, hadien ka jingiap ne ka jingklad na kane ka pyrthei, ki poi sha Dwar u Blei, na Dwar ki kiew sha Tyngkong, na Tyngkong ki rung sha Shlur bad na Shlur sha Rympei. U Jisu u pyndonkam ia kane ka rukom kren ban pynsgewthuh ia u Ioannis ba U bat Ma-u ha la ki kti ia ka iap ka im, kumba ngi ong. Te kumba ong u Apostol Paulus, ngi im ha u Jisu bad ngi iap ha u Jisu. Kane ka rukom kren ka mut ba ngi im tang ha u Jisu Khrist Uba la mihpat na ka jingiap (I Thes. 5:10)

Khatduh eh, u Jisu, ynda U la pyni shai-kdar ia lade, u hukum ia kiei kiei baroh kiba jia ha kito hi ki

sngi bad hadien habud.

(v) KA JINGBATAI ĪA KI DAK KI SHIN.

U Jisu Khrist u la wan ban pynshai ĩa ka pyrthei bad ĩa ki jaithynriew baroh. Kito kiba tur sha U kin nym sah ha ka jingdum lano lano ruh, namarba u dei ka Jingshai ba u Blei u la mang na ka bynta ki jaitbynriew bapher bapher ha kane ka sla pyrthei (Lk 2:32). Kane ka saiñdur u Blei ba u Jisu un long ka jingshai bad ka jingbatai ĩa kiei kiei baroh, ka paw shai-kdar mynta ha kane ka jingpynshai ba Un ai shaphang ki hynñiew tylli ki diengpynñeng sharak bad shaphang ki hynñiew tylli ki khlur ba U bat ha ka ktı kamon jong U. Hangne ka paw shai ba tang ha u Jisu kiei kiei baroh kin shai-kdar bad kin paw shynna, namarba Ma-u U dei da shisha u Tiplut, u Bnalut bad u Shemphanglut. Ki don bun kiei kiei kiba rieh ha kane ka pyrthei mariang. Dei tang u Jisu Uba tip nadong shadong ĩa ki jingmut jong ki bad dei tang ha u Jisu ba kin shai shynna ha ki briew baroh. Ha kane ka liang, u Īoannis u long uba donbok da shisha namarba da kaba ĩasyllok bad u Jisu, u ĩohi ĩa kiei kiei kiba u dei ban ĩohi bad ban tip khngang ba un pura bad un janai ka longbriew manbriew bad ba un lah ban pyn-dep ĩa la ka deiti. Kum u Īoannis, ma-ngi ruh ngi donbok namarba u Jisu um ju kyntait ban pynshai ĩa kito baroh kiba wan sha U (Io.8:12).

Khngang ba ngin sngewthuh bha, ngi donkam ban batai, nyngkong eh ĩa kawei ka kyntien, ĩa kaba ngin shem bunsien ha ka Jynthoh Bakhuid bad ka dei ka kyn-tien "Mistirion" ha ka Grik, ka "Mystery" ha ka Pha-reng bad ka "Jingmaĭa ha ka Khasi. Ma-ngi ngi la ring jingmut sha ka Khasi da ka kyntien "Ka jingmut barieh", ĩa kaba lehse ki paitbah kin kham sngewthuh.

Te ka dei kaei kane ka "Mistirion" ne ka "Mystery" ne ka "Jingmaĭa ne ka Jingmut barieh", Ka dei kaei kaei ĩa kaba u briew um don lad um don lynti eiei ban tip tad ban shemphang, lada u Blei hi um pynpaw ĩa ka. U briew u lah ban puson da ki snem, hynrei un nym lah ban lap da ka bor-pyr-khat jong u kum u briew. Hynrei lada u Blei u

pynpaw, u bried u sngewthuh shai-kdar bad u tip bha la kata bad tang kata kaba u Blei u la pynpaw. Te shi-sien ba la pynpaw, ka "Mistirion" ne ka "Mystery" ne ka "Jingmaia ne ka Jingmut barieh" kam dei shuh kaei kaei kaba long umdum. Em; ka shai-kdar namarba u Blei u la pynpaw. U Blei hi u kwah bad u thrang ba ngin sngewthuh ia kaba U la pynpaw. U Blei um long kum kito ki 'riewstad-kai kiba kren ha kata ka rukom ba ki bried kin nym sngewthuh ia ki bad kumta kin paw ba ki long kiba stad bad kiba don ki jingmut bajylliew. U Blei um long kumta. Haba U pynpaw, u kwah ba kiei kiei kin shai-kdar.

U Jisu mynta u batai ha u Ioannis ia ka jingmut barieh jong ki hynñiew tylli ki khlur, ia kiba U bat ha la kti kti kamon, bad u ong ba kine ki thew ia ki Angel jong ki hynñiew Balang. Ha u Ioannis hi kane ka jingpyn-shai ka la shai-kdar, namarba u Jisu u la pyndonkam ia ka rukom kren jong ki Ju hyndai, ia kaba lah ban sngewthuh lada ngi tip ia ka rukom pyrkhat pyrdaiñ jong ki Ju bad ia ka rukom kren jong ki.

Ngi la batai ha ka Maitphang ia ka jingmut bapher bapher jong kane ka kyntien Grik "Angelos", kaba wan na ka Hebru 'Malakh Yawe' bad ia kaba ngi la ring jingmut sha ka Phareng bad Khasi "Angel". Ha ka jingpyrkhat jong ki Ju ha ka por jong u Ioannis, une u "Malakh" ne u "Angel" u dei u jynthaw, uba im, uba sngewthuh bad uba shemphang. U don ka bor-pyrkhat kum ma-ngi, u don ka mon kum ma-ngi bad u trei katkum ka saiñdur jong u Blei, uba pyndonkam ia u ban lehbha ia u khunbynriew (Tob 5:1-21). U Angel u iapher na u bried, namarba um don ka met; u dei u jynthaw bakynja mynsiem (1). U Blei u pyndonkam ruh ia u Angel kum

1. Kane ka jingngait jong ki Ju ha ki Angel ka don khyndiat ka jinglasyriem bad ka jingngait jong ki khun u Hynñiewtrep ha ki Khyndaibynriew, kiba dang sah ba bneng bad u Blei. Haduh mynta ym pat don mano mano ha la thob bniah shaphang kine ki Khyndaibynriew Hynrei na ka khanatang ngi tip hi katto kat-ne kiei kiei shaphang jong ki. La ong ba u Blei u la thaw Khatynriew-bynriew, kiba don ar kynhun; Ki Khyndai bad ki Hynñiew. Baroh ar kynhun ki dei ki jynthaw kiba don ka borpyrkhat, ka on bad ki atiar trei-kam. Ki leid, ki burom bad

u nonglam khubor bad ka kyntien 'Angel' hi ka mut u nonglam khubor (Lk. 15:20,26-38; 2:8-14)

Ki Ju, ha ka por jong u Ioannis, ki ngeit skhem bha triang ba ki don ki Angel, ia kiba u Blei u la thung kum ki Angel Nongda jong ki briew bad jong ki shnong ki thaw, bad khamtam eh kum ki nongsynshar bad nong-pyniaid ia ka mariang. U Apostol Paulus u dei uwei na kite kiba ngeit bha ha ki Angel bad ki kynhun jong ki, kiba synshar ia ka pyrthei mariang (Eph.1:21; Rom.8:38). Nalor ba kine ki Angel ki pyniaid bad synshar ia ka pyrthei mariang, ki peit ki khmih ruh ia ki shnong ki thaw bad ia ki briew shimet shimet kum kita ki Angel Nongda. Kane ka jingngeit ka long kaba rim bha hapteng ki Israel (Ex.23:20-23; Dan.10:13,20,21). Napdeng ki jaitbynriew baroh, ka Israel ka don u Angel Nongda, u Michael (Dan 12:1). Ha ka Jutang Bathym-mai ruh, kane ka jingngeit ka paw shai (Kam 12:15). Bad u Trai jong ngi u Jisu Khrist ruh u kren shaphang ki Angel jong ki khynnah rit (Mt 18 10) Katkum ka jing-pyrkhat jong ki Ju bad jong u Ioannis ha kata ka por, ki Angel ki dou ka deiti ban peit ban khmih, ban pyniaid ban synshar ban khadar ia ki shnong ki thaw, ia kiba u Blei u la pynkhamti ha ki, bad kumjuh ruh ia ki briew shimet shimet. Kine ki Angel ki long thik kum ki kpa ki kmie kiba dei ban bah khala ia la ki khun. Lada ki khun ki runar, ki kpa ki kmie ruh ki ioh bi khyndiat ka

ki mane ia u Blei Nongbuh Nongtbaw bad ki imlang sahleng bad U ha ka suk ka said. Hynrei namar ka jingdonkam ha kane ka pyrthei, ia pynlong Dorbar ban iapyrkhat tano ban phah na bneng ban long nongsynshar khadar. Ha ka jingtatainia la shem ba ki Hynbiew ki long kiba bit tam namarba ka don ka jing-tadei hapteng jong ki bad ka pyrthei mariang, katba ki Khyndai, pat kim biang ba ki iapher eh na kiei kiei kiba ha kane ka pyrthei. Ki Longshuwa jong ngi kim ju batai ia kane ka jing-tadei bad ka jing-iapher. Hynrei ma ngi ki longdien ngi lah ban ring jingmut bad ban ong ba imat kane ka jingtadei jong ki Hynbiew bad ka pyrthei mariang ka long ba ki don ka met ka phad, ha ki iapoika peiman bad ki iar u tnum u tyndai. To kumta ki lah ban phiang kylleng ka sla pyrthei ban synshar khadar Ngim ju iohsngew ba ki Khyndai ki iar u tnum u tyndai. To imat ki iapher na ka pyrthei ba ki dei ki kynja mynsiem. Lada ka long kumta, kim iapher na ki Angel. To nang iapyrkhat!

jingkynnoh bad ka jingkynthoh. Ki Angel ki long kum ki nongmihkhmat jong ki jaitbynriew ne jong ki shnong ki thaw. Kumjuh ruh, haba ki khun ki leh bha, ki kpa ki kmie ki ioh burom. Imat ki Ju ki pyrkhata ba haba ki shnong ki leh bha ne ki briew shimet shimet, ki Angel Nongda jong ki ruh ki ioh burom ioh nam, namarba ki dei ki Nongbahkhala jong ki Shuh-shuh, ki Ju ki ngeit ba hapteng ki Angel bad ki shnong ki thaw ne ki briew shimet shimet ka don ka jingidei kata phylla haduh ba i-kumba ki ialong kawei Kane ka jingidei jong ki shnong ki thaw bad ki briew shimet shimet bad ki Angel Nongda jong ki ka iasyriem ia ka jingngeit jong ngi ki khun u Hynñiewtrep ba u briew bad ka rngiew jong u ki ialong kawei. Kumta u Angel ha bneng u long kum ka rngiew jong ka shnong ba u iada ne ka lah ruh ban long da kumwei, kata ka shnong ba u Angel u iada ka long kum ka rngiew jong u. Imat kane ka dei ka jingmut jong u Jisu ruh haba u ong ba ki Angel jong ki khynnah-rit ki iohi ia khmat u Blei ha bneng. U Jisu ruh u kren kum u Ju. Ym lah lait na ka rukom kren bad rukom pyrkhata jong ka juk lajong. Namarkata, bun ki 'riewstad, kum u Jeronimus, u Origen bad kiwei kiwei ki ong ba ki hynñiew khlor ki dei kine ki angel nongda jong ki Jylla-niam ha ka Jylla Roman ha Asia Minor. Ma-ngi ngi lambyrneit ia kane ka rukom pyrkhata. Da shisha haba bha ka shnong, u angel ruh u ioh burom. Haba sniew ka shnong, um banse, kumban shu ong noh, ban ngat ha ka jingkyntah narum naneng. Sa kawei ruh, namarba hapteng u angel bad ka shnong ne ka balang ka dor. ka jingidei kaba kyrpang, ka jingkynthoh bad ka sneng ka kraw ia u Angel ka long ha ka jingshisha, na ka bynta ka shnong ne ka Balang. Bad ki briew ruh kin nym da sngewrem eh lada kyntoh ia u angel ba kim lah ban iohi.

Hynrei ki don kiwei pat ki 'riewstad kiba ong ba ki angel hangne ki dei ki Lyngdohsad ne ki nongialam jong ki Balang. Hooi, uwei u Nongiatuhlapa, u Malachi, u ong ba ki Lyngdoh, kata, ki nongialam jong ki 'riewngeit ki dei ki nonglam-khubor jong u Blei bad ha ka Grik ia u nonglam-khubor la khot da ka kyntien "Angel"(Mal.2:7). Kane ruh ka lah ban long. Ki



hynñiew khlur, kiba long ki angel, ki dei ki Bishop ne ki Lyngdohsad jong kito ki Jylla-niam. Ka jinguior, jong ki katto katne kam da khlaiñ than eh. Ki ong ba, lada ki angel ki dei ki Lyngdohsad, u Ioannis u la pynjah burom la kumno kumno uwei na ki, u Lyngdohsad jong ka Laodisea. Ban kren paitbah kumne ne ban thoh da ka shithi shaphang u Lyngdohsad uba dang im, ka long khlem-akor palat Hood, ka long khlem-akor palat lada ngi bishar katkum ka rukom pyrkhat jong ngi mynta Hynrei ba kito ki por, ki Nongñathuhlypa kim ju kham pyrwa iano iano, la ki dei ki Syiem ne ki Lyngdoh. Ki ther ia ki ruh kumjuh khlem tieng eiei (Mt.14:4) Haba peit na kane ka liang, ym don jingeh eiei ba kine ki angel ki dei Lyngdohsad, kiba don hapdeng jong ki kiba bha bad kiba sniew ruh, kiba shitrhem bad kiba pjah kum u thah Hynrei ym ju kham iohsngew ba ki Ju hyndai ki la pyniasyrem ia ki nongñalam-niam bad ki angel.

Khatduh eh, u Jisu u batai ba ki hynñiew diengpyn-  
 ieng sharak ki thew pharshi ia ki hynñiew tylli ki Jylla-  
 niam, kiba long kum ki nongmihkhmat jong ka Balang  
 baroh kawei. Ngim dei ban klet ia ka jingmut jong  
 u nombor hynñiew, uba mut pharshi barabor, ha-  
 pdeng jong ki Ju, ia ka jingjanai ia ka jingpura, ka jing-  
 dap jingbiang. Te hynñiew khlur bad hynñiew diengpyn-  
 ieng sharak ki mut bad ki kdew ia ka Balang baroh kawei  
 ha ka pyrtthei bad ia ki nongñalam jong ki.

#### KA SIENPAW IV (2:1-3:27)

Ngì la iohsngew ha ka Sienpaw I ia ka jingpynbna u  
 sangot ba u Jisu Khrist un wan ban bishar ia ka pyrtthei  
 bad ban pyntngen ia ki Khristan kiba shahshitom sat ha  
 ka kti ki Patsha Roman, ha ka Sienpaw II ngi la ioh-  
 sngew ba ia u Ioannis la bukom ban thoh la kiei  
 kiei baroh kiba u iohi bad ha ka Sienpaw III ngi  
 iohi kyndiang ia u Jisu Khrist ba u wan kum u Lyngdoh,  
 u Nongñathuhlypa bad u Syiem u Patsha ban pyndep  
 ia ka deiti ba la lynsher ha U da u Blei Nongbuh Nong-  
 thaw: ban bishar ia ka pyrtthei, ban siewbainong ia kiba bha

bad ban pynshitom ia kiba sniew bad kiba leh pap. Mynta ha kane ka Sienpaw IV, u Jisu Khrist u sdang ban pyndep ia la ka deiti ba la lynsher ha U.

Ki 'riewstad ki ong ba, haba ngi kwah tan pynbha ia ka shnong ka thaw, ia ka ri ka raid bad ia ki parabrew, ngi dei ban sdang shuwa na lade. Ngi dei ban pynbit pynbiang shuwa ia la ka iing ka sem bad badien ngin sa lah ban pynbha ia kiwei pat. Kane ka long kaba dei bad u Jisu Khrist u leh kumta da shisha. Ha kane ka Sienpaw IV u Jisu un sa sneng sa kraw ia ka Balang baroh kawei. Un iaroh ia ka na ka bynta ka jingngeit, ka jingriewblei bad ki kam babha jong ka, bad un pynrem ruh ia ka na ka bynta ka iingleh pjah jong ka ha ka jingngeit bad ki pap ki sang jong ka ruh. U Jisu u la rai ban sar shuaw ia la ka iing ka sem, kaba dei ka Balang bad nangta ban sar ia ka pyrthei bad ia ki jaitbynriew, khamtam tam eh ia ki Patsha Roman, ia ka Hima-bah jong ki, ia ki khun ki hajar bad ki raiot jong ki, kiba mane blei ia ki bad ia ka blei Roma

Khnanng ba kane ka kam, ban pynkhuid shuwa ia la ka iing ka sem bad ia la ka hima, kan trei kam bad khnanng ba ka sneng ka kraw kan dup ngam shaduh ka khleiñ shyieng jong ki khun ki hajar, u Jisu Khrist, kum u Syiem, u Lyngdoh bad u Nongiathuhlypa u la rai mynta ban thoh hynñiew tylli ki shithi sha ki hynñiew tylli ki Balang ne Jylla-niam, kata, da ki purwana syiem syndon, ia kiba ki khun ki hajar ki dei ban pynbna paitbah bad ban kohnguh. Ki hynñiew tylli ki purwana sha ki hynñiew tylli ki raid ne ki shnat ki thew ia ka sneng ka kraw kaba pura bad kaba janai sha ka hima baroh kawei, namarba u nombor hynñiew u mut barabor ia ka jingpura jong kiei kiei baroh. Ha kine ki purwana, u Jisu Khrist, kum u Lyngdoh, u Syiem u Patsha bad u Nongiathuhlypa u kdew ia ki lait ki let, ki tam ki duna, ki rangkang ki palat, kibym iadei-dur bad ka Hima-bah jong U, ka hima ha kaba ki briew, kibym man, kin nym don bynta eiei (I Kor.6:10).

Na kiei kiei kiba la ong haneng, ka paw shai ba ia kane ka Sienpaw IV yn phiah ha ki hynñiew bynta katkum ki shithi bad ki Balang

(i) KA SHITHI SHA KA BALANG HA  
EPHESUS (2.1-7)

1 Ha u angel ka Balang ha Ephesus, to thoh: Uta Uba bat ia ki hynñiew tylli ki khlur ha ka kti kamong jong U, Uta Uba iaid hapdeng ki hynñiew tylli ki diengpyn-  
feng sharak, kiba da ka ksiar, U ong ia kine kiei kiei,  
2“Nga tip bha ia ki kamong phi, ia ka jingtrei shi-  
tom sat bad ia ka jingfaishah-satar jong phi; *Nga tip ruh*  
ba phim lah shah ia ki 'riewsniew bad ba phi la tyn-  
juh *bad bishar suni* ia kito kiba nam ia lade ki Apos-  
tol hynrei khlem long bad ba phi la lap ba ki dei ki  
'riewlamler. 3 Phi don ka jingfaishah-satar bad phi  
kit ia ka khia ka shon na ka bynta ka kyrteng jong  
Nga had phim kheñ eiei ia jingtrei-shitom-sat. 4 La  
jar katta Nga don eiei pyrshah ia phi: Phi la jehnoh  
ia ka jingieid jong phi kaba mynshuwa. 5 To kyn-  
maw kyudiang, namarkata, *ia la ka kyrdan* na kaba  
phi la hap. To kylla kaba mut noh bad to leh ia ki  
kam *babha jong phi* kiba mynshuwa. Lynda kumta,  
Ngan wan sna phi bad Ngan weng noh ia ka dieng-  
pynfeng sharak jong phi na ka jaka jong ka. 6 Hyn-  
rei phi don kane *ka jingbha*: Phi isih ia kam *hymman*  
jong ki Nikolait, ia kiba Ma-nga ruh Nga isih 7 Jar uba  
don shkor, to un sngap ia kaba u Mynsiem u ong ha  
ki Balang: *‘Ia uta uoa iaijop* Ngan ai ban bam na  
u dieng jong ka jingim, uba don ha ka kper jong u  
Blei.’”

Kane ka dei ka shithi ne ka purwana sha ka Balang  
ha Ephesus kata, sha ki Khristan bad ki nongialam jong  
ki kum ki Lyngdohsad, ki Lyngdoh-sohblei bad kiwei  
kiwei. Kumba ngi la batai haneng, kine ki dei ki nong-  
mihkhmat jong ka Balang baroh kawei bad jong ki  
nongialam jong ka.

Khnanba ngin sngewthuh bha ia kane ka shithi,  
ngi dei ban tip eiei shaphang ka Nongbah Ephesus  
kumno ka long ha ka por jong u Ioannis, u nongthoh  
jong ka Kitab Jingpynpaw.

Kumba ngi la kdew ha ka Maitphang. ka Pergamum  
ka dei ka Nongbah jong ka hima mynnor ha Asia Minor.

Hynrei ka shnong Ephesus ka kham pawnam ha kane ka por na ki bun ki daw. Lah ban ong ba ka dei ka Kongheh hapteng ki nongbah baroh jong kato ka Jylla Roman bad kane ka dei ka daw balei u Jisu Khrisť u sneng u kraw, nyngkong eh, ia ka Ephesus, namarba, ha ka jingshisha, ka dei ma ka ka nongialam jong kiwei pat ki shnong.

Nyngkong eh, ka Ephesus ka donbok ban ioh ka jaka, ha kito ki por, kaba kat ka jaka shong shnong da shisha. Ki surok-bah na kylleng kylleng ka Asia ki poi lut sha Ephesus, wat naduh Mesopotamia bad ka Them Iuphratis, namarba la tei ia ka ha them jong ka Wah Kaister La ong ba la tei ia ka ban kyunmaw burom ia ka jingkha ia ka blei Diana, ne Artemis. U Herodotus u thoh ba la seng ia ka da u Hercules, u Briew uba kblaiñ tam hapteng ki Grik, kum ha ka snem 1250 SK. Nangta ha kum ka snem 1044 SK, u Androclus u la beh noh ia ki nongshong shnong banyngkong bad kiwei pat ki Grik ki la wan ban buhai shnong. Na ka daw ka blei-thaw Diana, kane ka shnong ka la nang roi nang roi bad ka la kylla long kawei na ki shnong kiba heh ha kito ki thaiñ jong ka Asia Minor. Bad namarba ka dei ka kadlieng, ka nang beh nang heh katba ka nang iaid ka por. Ka la hap hapoh ka jingsynshar ki hima bad ki syiem bapher bapher. Ki Persia ki la synshar ia ka naduh ka por u Sirius haduh ka por u Darius III. Haden, ha kum ka snem 132 SK, ka la hap hapoh ka jingsynshar ki Roman bad u Patsha Augustus u la tei pynitynnat ia ka. Ka khanatang ka iathuh ba kane ka shnong ka la pawnam na ka daw ba ki jyntei ki itynnat bha, kum ka Gymnasium, ka jaka ialehkai, ka Stadium ne ka jaka pynmareh kulai, ka Lympung Thiatar ka baheh bad ka Dulan-kot u 'riewstad Celsius. Ka la pawnam khamtam eh na ka daw ki nongleh jadu, kiba leh mynleh ban pynkoit pynkhiah ia ki briew. Ha kapor jong ki Roman, kane ka shnong ka la long da shisha ka iewbah jong ki ri baroh ha ki thaiñ mihngi bad kino kino kiba kwah ban poi sha ka Nongban Rom, ki dei ban iaid lyngba ka Ephesus bad kumta ki Roman ki ju khot ia ka "Ka Jingshai jong ka Asia," bad ka "Iewbah jong ka." Te ka la long ka shnong kaba

riewspah. Ka la long kawei na kito shnong kiba laitulid bad kumta ki shipai Roman kim donhok ban shong ban sah ha kato ka shnong. Namarba ka pawnam, man la ka snem ki Lat Roman ki ju leit sha kane ka shnong bad la pdiang burom ia ki ha ka burom ka ijot bad ka jingiphuh iphieng.

Hynrei ka nam kaba kham khraw jong ka Ephesus ka dei ka blei thaw Diana ne Artemis. Ka Iingmane jong ka ka dei kawei na kito kiei kiei ba ki 'riewhyndai ki faroh bad ki burom. Ka dur jong ka blei-thaw hi te kam da itynnai eh, namarba ka iong bad ka bun bha ki jymbuiñ, kum ka dak ka shin ba ka dei ka blei jong ka jingka-roi bad ka bsa ka btjap. Ki don ruh ki Iingmane na ka hynta ki Patsha Roman kum u Claudius bad u Nero. Ka jingmane blei thaw bad ka jingmane ia u Patsha Roman bad ia ka blei Roma ka shongshit bha ha kane ka shnong. Nangta, ka jingbun jong ki Ju, ki ba tuid na kylleng, ka la nang pynpawnam shuh-shuh ia kane ka shnong.

Dei ha ka jingleit shang pyrthei kaba ar ba u Paulus u la poi sha Ephesus bau leit sha Jerusalem Umi shym sah slem, hynrei u la ithuh shisyndon ba ka don ka jingkyrmen na ka bynta ka Khubor Babha. Hadien u Paulus, la poi u Apollos, u Aquila bad i Priscilla. Kine ki la trei, hynrei imat kim shym lah ban ktah lut ia ki briew. Namarba ka don ka jingkyrmen na ka bynta ka Khubor Babha, u Paulus, ha ka sien leit jingleit kaba lai, u la sah haduh ar snem tam (56-58) ban ialap ia ka Khubor Babha ha Ephesus. U la leit jingoh ia ki briew na kawei ka thliew iing sha kawei pat ha ka jingshahshitom bad ka jynjar-lanot na ka daw jong ki Ju kiba la ialeh pyrshah ia u bad kibym shym pdiang ia ka Khubor Babha. U donbok ba u la ioh kawei ka jaka ialap, ka kamra iathuhkhana ne kamra hikai jong u Tyrannus. Ka jingtrei jong u Paulus ka la seisoh bad ka Balang ha Ephesus ka la suhthied bad ka la khelaiñ. Bad ka Balang ka la suhthied bad ka la khelaiñ namarba u Apostol Paulus u la iaishah satar ia ki jingeh baroh, u la trei-shitom sat, u la shah lehbeiñ lehkhoh bad u la syep la syar. Kawei ka dak ka pynpaw shai ba u Paulus u

la jop thiaw ha Ephesus bad kata ka dei ka jingkhíwín jong ki kamar kiba thaw ía ki stashu jong ka blei Artemis ne Diana (Kam 19:1-41). U Paulus u la ieid bha ía kane ka Balang bad u la thung Lyngdohsad ha Ephesus ía uwei na ki synran ba u ieid bad u shanjah eh, u Timothy (I Tim.1:3). Nangta, ha ka por ba u leit khatduh eh sha Jerusalem, na Miletus u la phah khot ía ki nong-íalam bad ki tymmen ki san jong ka Ephesus ban aikhu-blei ía ki bad ban sneng ban kraw ía ki ba hadien katto katne por kin mih ki nonghikái lamler bad ki nongíalam bakla ía ki briew bad kane ka jingíathuhlypa jong u Paulus ka la urlong shisha bad ngin íohi ba ki la mih shisha ki apostol lamler bad ki nonghikái bymman bad kita ki dei ki Nikolait(Kam 20:17-38).

Ban pynkut, kane ka shnong kaba pawnam, mvnta kam long eiei shuh. Ka kadlieng ka la dap da u shyiap bad ka khyndew ba wan kit ka Wah Kaister Ka Ephesus barim hi ka la kynjah bad kito ki jyntei ki la kyl-lon. Hadien ka jingwan ki Muslim, suki suki ka Niam Khristan ruh ka la troiñ bad ki don mynta sa tang khyndiat ngut ki Khristan.

Na kine kiei kiei ba ngi la ong haneng shanghang ka shnong Ephesus, ngi lah ban íohi ía ka jingma kaba ap ía ka Balang ha kato ka nongbah, ka jingma na ki nongbanbeiñ, ka jingma na ki 'riewbymman, ka jingma na ki nonghikái balamler bad ki nongíalam bakla, ka jingma na ka jingim awria bad lyngkar. U Jisu u kwah mynta ban pyllait ía ki Khristan na kine ki jingma, kiba bun na ki ki wan na rympei Khristan hi, ym nabar. U Jisu u kwah ban weng noh ía kine kiei kiei na ka Balang (I Tim.1:3-7)

Ha ka dkhot banyngkong, ngi íohi ía u Jisu kum u Trai jong ka Balang, u Nongpyníaid jong ka bad u Nongíalam jong ka, u Jisu Uym ju ngai na ka Balang, hynrei U íaisah bad ka (Mt 28:20).

Ka kyntien khasi "Ban bat" (ha ka Grik "Krateo") ha kane ka dkhot ka íapher na kato kaba la pyndonkam ha ka 1:16. Ha ka 1:16 la pyndonkam ía ka berb "Ekho", kaba mut shisha "Ban don", hynrei hangne pat da ka berb "Krateo", kaba mut ban bat skhem, ban bat

hi triang nadong shadong Da kane u Jisu u pyini ba U dei u Trai lahdudh jong ka Balang. Haba pyndonkam ia kane ka kyntien, ki Grik ki mut ban ong ba u briew, uba bat, un nym pyllait shuh lano lano ruh ia kato kaba u bat U Jisu u leh kumjuh Un nym pyllait ia ka Balang na ki kti iong U Ka Balang ka dei ka jong u Jisu Khrist bad Ma-u U dei U jong ka Balang. Namar-kata, ka Balang kan nym duh bat kan nym iap, namarba ka don ha ki kti jong u Jisu, Uban nym pyllait shuh ia ka lano lano ruh.

Hynrei kane ka jinglong lahdudh jong u Jisu ha ka Balang kam long kum ka jong ki Syiem ki Patsha jong ka Hima-bah Roman ne jong ki vei pat ki hima ha ka pyrthei. U Jisu u bat triang ia ka Balang, ym ban pyndonkam ia ka ban ioh jingmyntoi Em; Um pyllait ia ka khnang ba Un dup lah ban imsnge ia ka nadong shadong. Kane ka shai kdar ha kine ki kyntien "Uta Uba iaid hapdeng ki hynñiew tylli ki diengpyñieng sharak". U Jisu Khrist um shonethait, Um shong kli-kti. U don lut ha ki kyndong kynshrot jong ka Balang. Um thiah Um dem, hynrei U iaitrei khlempud khlem sangeh. Namarba u Jisu u trei khlempud, ka Balang kan iaikiew irat kum ka Balang Yn nym don kano kano ka bor pyrthei kaban lah ban khang lad ia ka. Shipor, ki bor ka jingdum ki lah lehse ban leh eiei, hynrei shi-junom kin nym lah namarba u Jisu hi u pahara ia la ka Balang haroh kawei, ia kaba la minkhmat da kito ki hynñiew tylli ki Jylla-niam ha Asia Minor.

Namarba u Jisu u dei u lahdudh jong ka Balang, namarba U jeid thoiñ thoiñ ia ka bad Um nym pyllait ia ka, namarba U imsnge ia ka Balang, U donhok ban kren bad ban sneng ban kraw.

Shuh-shuh, kane ka nam ba u Jisu u ai ha lade ka pynkynmaw ia ngi ia ka jinglong jong ka Ephesus ha kato ka por. Naduh ba u Paulus Bakhuid u la leit ia-lap ha Ephesus bad naduh ba u la thung bi ma-u ia u Lyngjohsad banyngkong, u Timothy Bakhuid, ia uba la minpli pat de da u Onesimus, uwei na ki mraw ba u Paulus u la pynlong khumblei da ka Jer ka Theh Bathymmai ha ka por ba u dang sah ha phatok ha ka

Nongbah Rom (Phm 1:8-20), ka Balang ha Ephesus ka la long kum ka Kongheh, kumba ngi la ong haneng. Ka la long ka Jylla-niam-bah (Archdiocese) kumba long ka Shillong mynta. Te lah ban ong ba, kum u Jisu, ka bat bad ka iajd hapdeng ki Balang ha Asia Minor. Te haba u Jisu u byrngem ban weng noh ia ka diengpynieng sharak, u mut ban ong ba lada ka Balang kam kylla ka-ba mut na ka jinglehklet ia ka jingieid Khristan, Un pynduh noh ia ka jinglong Kongheh jong ka hapdeng ki Jylla-niam bapher jong ka Asia Minor, kata ka mut, ka nam ka burom jong ka, na ka liang ka Niam ruh, kan lip rong bad kan jah-rngai.

Ka rukom sneng rukom kraw jong u Jisu ka long kaba itynnat da shisha U Jisu u tip bha ia ka long-briew manbriew jong ngi namarba dei Ma-u Uba la thaw ia ka. U tip bha ba kum ki briew ngim da sngew-tynnat eb ban shah mai mang mang. Shuwa ban mai ne sneng, ki 'riewstad ki iaroh shuwa ia kaba dei ban iaroh. U Jisu hangne u pyni ba u dei u Nongsneng Nongkraw Uba toit bha. Te U iaroh shuwa bad nangta U sa kynthoh. Bad ynda U la kynthoh, u iaroh biang sa khyndiat. Kane ruh ka long kaba donkam. Lada ngi iehnoh ia u briew kumto, ynda ngi la mai ia u bad ngim ong eiei shuh, u rit mynsiem noh bad u lah ban duh jingkyrmen ruh. Te hadien ka mai ka kynthied, dei hi ban ong eiei kum ka jingiaroh ne ka jingkhroh bad ka jingpynshlur ba uto, uba la shah mai, u dang lah ban sdang biang. Namarkata, u Jisu u iaroh biang ia ka Balang na ka bynta kawei ka kam babha jong ka, ba ka isih ia ki nonghikai lam-ler.

Hynrei kane ka jingiaroh bad ka jingkynthoh kin nym lah ban trei-kam haduh katta katta ha ngi ki briew, lada ngi tip ba ngin nym ioh jingmyntoi eiei. U Jisu u sngewthub bha ia kane ka jinglong jong ngi ki briew. Te hadien ka jingiaroh bad jingkynthoh, U U kular ruh ban ai ka bainong kaba khraw, ia kaba tang Ma-u hi U lah ban ai. Te kane ka shithi ka don saw bynta: Ka iaroh, ka Kynthoh, ka Pyntngen bad ka Pynshlur bad ka Khusnam.



## (a) KA IAROH (2:2-3)

Ki 'riewstad ki ong ba ym don eiei ha kane ka pyr-thei, ia kaba ki briew ki kham sngewtynn timer ban ia ka jingiaroh kaba shida bad kaba hok. Ki briew kim ju ngiah ban iohsngew ia ka jingiaroh kaba shida bad kaba hok. Katba ki nang iohsngew, katta ki nang bang ! Te ym don kyntien eiei, kaba kham thianger ha ki shkor jong ki briew baroh, ban ia ka jingiaroh bashida bad bahok ia kiei kiei ba ki la leh. Kane ka long katkum ka longbriew manbriew jong ngi bad u Jisu, Uba la thaw ia ka, u sngewthuh bha bad U leh katkum ka jingdawa bad jingdonkam jong ka ha ka Hok katkum ka Hukum. Kane keiñ ka dei ka nuksa ba ki nongpyniaid bad ki nongialam, la ha ka Balang ne ha ki hima-sima, ki dei ban kymnaw bad ban pyrthuhbud.

Nyngkong eh, u Jisu u ong, "Nga tip bha ia ki kam jong phi." Bad U tip da lade hi, ym na kiwei. U Jisu u tip lut ia kiei kiei ba ka Balang bad ki nongpyniaid jong ka ki leh. Ha kane ka liang, ym don ba lah ban thok ia U ne ban buhrieh eiei na U. U tip thikna bad u tip shai nadong shadong. Namarkata U kren da ka jingtip shynna, ym tang da ka jingsuba ne ka jingioh-sngew na kiwei.

Te u Jisu ong ba U tip "Ia ka jingtreishitom-sat." Ia kine ki kyntien Khasi ngi la ring jingmut na ka Grik "ho kopos," kaba mut ka jingtrei dohiap doh-im haduh ban da syep hi phup, haduh ban kyjuh ki khohsiew, haduh ban da kyllon iapler hateng hateng, hapdeng ka jingtmang, jinglyng-a bad jingsohsat na ki bun ki daw. Kane ka dei ka jingiaroh kaba sngewtynn timer namarba ka long kaba shida bad kaba hok. Ka Balang baroh kawei ha Ephesus ka trei dohiap doh-im, ka mih syep mih syar na ka bynta ka burom u Blei. Ka dei ka Balang kaba shitrhem, kaba smat, kaba sting, kabym kheiñ ia ka khia ka shon, ia ka thngan ka shang, ia ka miet ka iong, ia u slap ka lyer, ia ka shit ka khriat! U Apostol Paulus u pyndonkam ia ka berb jong kane ka kyntien ban bitai ia ka jingtreishitom-sat jong u bad jong ki para-nongtrei jong u (Kal 4:11; I Kor.15:10; Rom.16:12). Ha-

ba peit na kane ka liang, ka Balang ha Ephesus ka long ka nuksa bad ka nomuna.

Nangta u Jisu u ong, "Nga tip bha ia ka jingiaishah-satar jong phi." Kumba ngi la iohi, ka kyntien "jingiaishah-satar" ka dei ka jingring jingmut iong ka Griek "Hipomoni", kaba mut ka jingduriap bad ka jingiaishah da ka jingshlur badap-shynrang bad da ka jingkmien ka dohnud bad ka mynsiem. Kam dei ka jingiaishah jong kito kiba thnum, kiba ujo, kiba ud, kiba tim kiba tla Uba don kane ka "Hipomoni", u iaishah da kaba phuhsamrkhie khlem atnud iano iano, khlem ingkhong iano iano, khlem bitar iano iano. Ka dei da shisha ka jingiaishah-satar bad kane ka jia jan barabor ha ka por jong ka jingshah banbein jong ka Balang ha ka kti ki nongshun bad khamtam eh ki Patsha Roman kum u Nero bad u Domishian, kumba ngin sa iohi. Te kane ka kyntien ka pyni ba ka Balang ha Ephesus ka la shah, banbein bad ka la shah pynshitom ha ka por jong u Ioannis. Dei ha kum kane ka khiep ba ki Khristan ki pyni ia kane ka jingiaishah-satar, ia kaba u Jisu u iaroh bad U pyrto shida hangne Da shisha ka Balang Ephesus ka long kaba dap shynrang bad kaba shlur haduh katta katta ba ka la dawa hok ia kane ka jingiaroh na u Jisu hi, Uba tip lut ia kiei kiei barch.

Shuh-shuh, u Jisu u iaroh ia ka Balang ha Ephesus namarba kam ju aili bad ai lad ia ki 'riewsniew bad ki Apostol lamler ban pynkulmar bad ban ialam bakla ia ki 'riewngeit. Kine ki 'riewsniew bad ki Apostol lamler ki dei ki Ju, ia kiba la phah lehse na Jerusalem dano re danq, ne kito ki Ju kiba pynlong ia ka Niam ka lad ka lynti ban kyndoi jakpoh. Bad ka long kaba suk na ka bynta jong kine ki Ju ban poi sha Ephesus, kumba ngi la kdew haneng, namarba baroh ki surok, shuwa ban poi sha Rom, ki iakyndub ha Ephesus. Ki dei kine kijuh ki Ju kiba la pyndik sat ia u Apostol Paulus, kiba la kynthoh ia u laiphew jait, kiba la leh mynleh riwblei tang ban ioh lad ban pynsniew ia kiei kiei napoh, namarba kine ki Ju teng teng ki dei ki Khristan (Kal. 2:3,12; II Kor. 11:22-23). Ki dei kine ki nongialam bagap bad ki suri nongpynjot thik kumba u Apostol

Paulus shisien u la kdew ha ki nongialam jong ka Balang ha Ephesus (Kam 20:17-21). Kane ka sneng ka kraw ba ki nongialam ka Balang ha Ephesus ki la ioh na u Paulus Bakhuid, ka la iarap shibun ia ki ban wad, ban lap bad ban ithuh ia kine ki Ju, kiba dap da ka buit sianti bad kiba nang ban leh arsap, ban thok bad ban ialam bakla ia ki paitbah, khamtam eh da kaba ong ba ki dei ki Apostol ba la phah da u Jisu ne da ka Balang ha Jerusalem. Hynrei ha Ephesus kim shym ioh lad ban trei-kam namarba ka Balang ka la shahshkor ia ki jinghikai bad ka sneng ka kraw na ki Apostol bashisha (I Thes. 5:21).

Lehse kan mih ka jingkylli, "Balei u Apostol Paulus bad u Jisu ki pyrshah haduh katta katta ia kine ki Ju? Ki hikai aïu? Bad ki kwah aïu?"

Na ki shithi u Apostol Paulus ka shaj-kdar ba kine ki Ju, kiba bun na ki ki dei ki Khristan ba-arsap, ki hikai ba, nalar u Jisu Khrist, dang donkam shuh-shuh bun kiei kiei khnang ba ngin manhok hakhamat u Blei bad ba ngin ioh ia ka jingim Bymjukut. Ki ong ba ka jingngeit ha u Jisu kam pat biang. Ki ban tyngesh ba donkam ban otsher ia ki briew, donkam ban sang dohsniang, donkam ban sait ki ktï haduh tymbuit shuwa ban bam khnang ba ngin ioh ia ka jingim Bymjukut (Rom. 16:17-18; Kal 6:11-15). Kine ki Ju ki dei ki nongmihpli jong kito ki Ju hyndai liba hikai bakla ia ki briew bad ia kiba u Jisu Khrist hi u la pynrem (Mk.7:1-13). Ka jingngeit jong ki ha u Jisu kum u Khun u Blei bad u Nongpynim, ha Uba baroh kiei kiei ki la biang bad pura, kam shym da skhem haduh katta katta, haduh ba teng teng ki hikai ba ki don ki angel kiba kham kongsan ban ia u Jisu. Kine ki dei ki jinghikai bakla jong kine ki 'riewsniew bad ki apostol lamler. Da ka jingtrei shitom jong ka Balang baroh kawei, ki nongialam bad ki paitbah, kine ki apostol lamler kim shym ioh lad ban rung bad ban pynsniew ia ka Balang napoh. Shuwa ba kin lah ban leh ia ki kam sniew jong ki, ka Balang ka la lap ia ki bad ka la kyntait ia ki shisyndon. Na ka bynta kane, u Jisu u iaroh shida ia ka Balang ha Ephesus.

Khatduh eh, sa shisien u Jisu, u iaroh ia ka jing-

iaishah-satar (Grik "hipomoni), ia ka jingbymkheĩ eiei ia ka jingtreishitom-sat (Grik "u kapiao). U Jisu u nam biang ia kine ki ar tylli ki hok jong ka Balang ha Ephesus, namarba ki pynpaw ia ka jinglong shynrang jong ka. Ha kane ka liang, da shisha ka dawa ia ka jingia-roh bashida bad bahok na u Blei bad na ki briew, namarba ka iaishah satar bad ka trei dohiap doh-im, ka mih syep mih syar na ka bynta ka kyr teng u Jisu, kata ka mut, na ka bynta u Jisu Khrist hi, Uba im bad Uba trei-kam ha ka Balang ha Ephesus, bad kine kiei kiei ki kdew shai-kdar ia ka jingshitthem ki 'riewngait. Ngi la batai ba "Ka Kyr teng" ha ka pyrkhat pyrdaiñ jong ki Ju, ka mut "U briew hi uba im, uba khiih uba ksar, uba trei uba ktah bad uba leh eiei na ka bynta ka jingbha kiwei pat." Ka "Kyr teng u Blei" ka mut u Blei hi, uba don ha kane ka pyrthei bad uba iatrei-kam na ka bynta ka jingbha jong u khunbynriew.

#### (b) KA KYNTHOH BAD KA MAHAM (2:4-5)

U Jisu u iaroh ia ka Balang ha Ephesus namarba ka nang ban iaishah satar, ka don ka sap ban wad, ban lap bad ban rat dyngkhong ia ka jinghikai bakla jong ki 'riewsniew bad ki apostol lamler bad ka dem khui ha ka trei dohiap doh-im na ka bynta ka burom u Blei. Hynrei hapdeng kine ki kam babha, ka la jia kaei kaei kaba sniew tam. Ka jingjah-rngai jong ka Jingieid Khristan, kaba long kaba kongsan tam na ka bynta ki nongbud bashisha jong u Jisu Khrist. Kane ka jingieid (Grik "Agapi") hangne ka mut ka jingieid ia ki para-briew ne ka jingtiphriew kumba ong ki Longshuwa jong ngi. U Apostol Ioannis bad u Apostol Paulus ki ban tynggeh bha ia kane, kaba long ka nongrim jong ka jingim Khristan jong ngi. Katkum ka jinghikai jong u Jisu Khrist, jong u Apostol Ioannis bad u Paulus Bakhuid, lada ngim ieid naduh ka dohnud bad ka mynsiem ia la ki para-briew, ngim long eiei ruh em hakhmat u Blei (Mt. 5:43-48; Io. 15:9, 12, 13, 17; Io. 3:16-18; (Kor. 13:1 13). Kane ka jinglehklet ia ka jingieid para-briew bad ia ki kam babha, kiba dei ban mih na ka, ka dei ka Pap jong ka Balang Ephesus bad u Jisu u donhok ban mai

ban byrngem bad ban maham.

Kumno ka la jia kane ka jingjah-rngai jong ka jing-  
ieid para-briew ha ka Balang Ephesus? Ki 'riewstad  
ki batai ba ka la lah ban jia kumne: Ha ka jingshongshit  
ban pynduh ia ki jinghikai bakla bad ha ka jingrat  
dyngkhong ia ki jingsniew, ki nongialam bad ki paitbah  
ruh ki la kum jam ia u pud ha ka jingladei para-briew.  
Ki la klet ia ka Hukum ban isih ia ka Pap, hynrei ban  
ieid pat de ia ki briew kiba pap Ia ka Pap lah ban isih  
naduh ka dohnud bad ka mynsiem, hynrei ym lah bad  
ym bit ban isih ban i-khning ia ki para-briew. U Blei u  
isih ia ka Pap, hynrei ia ki briew u ieid thoiñ thoiñ.  
Imat kane ka dei ka kynja buaid-niam haduh ba ym  
kheñ snep shuh ia ki briew kum ki briew, haduh ba,  
ha ka jaka ban isih ia ka Pap bad ia ki ksuid, la pynlong  
Pap bad la pynlong ksuid pynban ia ki para-briew. Ban  
rat dyngkhong ia ka pap, ym shym kheñ briew shuh  
iano-iano, ym pyrwa shuh la ki iap ne ki im. Ka jing-  
buaid-niam (1) kam ju bha lano lano ruh bad u Jisu u

1. Kane ka jingbuaid-niam jong ki Ju hyndai ka dang paw ha  
kine ki sngi jong ngi ruh Baroh ki dang kymaw ia u Ayatul-  
lah Kumen, uba la rai pynrem ba u Rusdie u dei ban shah pyniap  
tang namarba u la thoh eiei kaba pyrshah ia kaba u ngeit ma-u.  
Kane ka dei ka dur kaba itriem tam jong ka jingbuaid niam. Hyn-  
rei kane ka buaid-niam ka paw ruh ha kiwei pat ki dur Ha ka  
jingshongshit than ban bat aiñ ban bat rul, ki briew ki kum jam  
palat ia u pud. Baroh ngi pynrem ia ka Klim ka ngoh Ka dei  
ka Pap kaba pyniewtung bad pynpyut ia ka longbriew manbriew  
bad ia ka imlang sahlang. Ka Hapkurim ruh ka long kaba  
sniew, ka pynsniewdur ia ka jaitbynriew bad ia ka Balang: Bad  
ka shong hok ba ki nongialam kin sneng kin kraw ia kum kine ki  
briew kiba bakla ha kane ka rukom. Hynrei ym dei ban palat ia u pud  
da kaba pynrem ruh ia i khunlung iba wan ha kane ka kkep  
basngewsih jong ka Klim ne ka Hapkurim. Ym dei ban kydnoh ia i  
khunlung "I Khun klim" ne "I khun hapkurim" I khunlung. im shym  
klim im shym hapkurim. I la wan sha ka pyrthei da ka jingibi t jong  
u Blei ha kato ka rukom. Lada u Blei um shym thaw ia i lem bad ki  
Nongthawlang, in nym wan sha ka pyrthei. Kumta, namar ka klim  
ki kpa ki kmie, namar ka hapkurim ki kpa ki kmie, ym dei ban pyn-  
shitom ia ki khun ha kano kano ka rukom, kumba ka la jia da kaba  
kyntait bao ai baptisma ia kine ki khunlung wat lada ki kpa ki kmie  
ki wan tyrwa ia ki. Tangon ia ki nongklim, sympat ia kiba  
hapkurim da u synrem, hynrei syrpad syrpa iat khunlung kibym  
don pap eiei ruh em bad haba i wan, i pyni ka dak ka shin, kumba

pynrem ia ka hangne, u Jisu Uba ia isneng, "To isih ia ka Pap hynrei to ia-iei para-briew"

Ki don kiwei pat ki 'riewstad kiba batai ba kane kam da dei eh ka jingjah-rngai jong ka jingieid para-briew, hynrei ka jingkhamehpjah ha ka jingieid ia u Blei bad ia ki para-briew. Kata ka mut, ka Balang ha Ephesus kam shongshit shuh kum mynshuwa. Ka jing-shitrhem ha kiei kiei baroh ka la duna kumba ka la jia ha ki Israel hyndai (Hos 16-17 Jer.2:2). Hynrei ha ka jingsngew jone ngi kane kam lah ban long Ka don ka jingshongshit bad jingshitrhem kaba paw ha ka jingiaishah-satar bad ha ka trei dohlap doh-im ban rat dyngkhong ia ki jingsniew. Te imat ka dei ka jingduna, ka jingtlot bad jingpiah ha ka jingiaieid para-briew. Mynshuwa ka Balang ha Ephesus ka la long ka rympei jong ka jingieid, nyingkong eh, para Khristan bad nangia para-briew bad ki jyntil ki la lah ban ong, "Hakhmih katno ki iaieid kiwei ia kiwei pat!" Hyurei ha ka por jong u Ioannis, u nongthoh ka Kitab Jingpynpaw, kane ka jingieid kam don shuh, ka la jah-rngai bad la synshar lahduh ka AIN bad ka JING-BAT-AIN. Ym shym ngeit shuh ba ki aif bad ki rul ki dei na ka bynta ki briew, ym ki briew na ka bynta ki aif

ong u Myllung Tagore, ba u Blei hi um pat ngiah sho fi ia u khunbynriew. Te ban kynthat ban ai baptisma ia i khunlung na ka daw ka klim ki kpa ki kmie ne ka hapkurim ka dei ka buaid-niam bad ka mane-blei thaw ia ka aif kaba pynrem tang ia ki nongklim bad, ki nongbapkurim, ym ia ki khun kiba jia ba ki wan da ka jingibit jong u Blei. Kumjuh ruh ban nym ai jaka tep eiei ia u 'riewpap ynda u la lap ka dei ka buaid-niam kaba la palat. Ynda u la lap, ban pynshitom ia kito ka met ba la lap kam myntoi eiei. Uba la lap um sngew eiei kumba ong u Stadblei Bollini, SDB. Tep ia u sbarud, to kata kam da lelei. Hynrei ban shu bret ia ka met kum ka met ki mrad te ym iadei dur shuh bad ka Jingieid Khristan. Imat ki dei kine ki kam buaid-niam ia kiba u Jisu u pynrem jur ha ka Balang ha Ephesus. Kane ka buaid-niam ka jalam sha ka jing-sngew hok than ia lade bad ka jingilong-pap jong kiwei haduh ba ki don ki briew kiba imangi tang ban lap ia ka jingduna kiwei bad ban trei, ia ki haban dasuwan. Shisien, uwei u briew u la kum, dia kiad bad u la kyllon ha naja. Shisyndon la ot balang ia u da kito kiba tharai ba ki hok bha hakhmat u Blei, Kine kiei kiei ki pynsiew dur haduh katta katta ia ka Balang bad kumta u Jisu u pynrem ia. ka,

bad ki rul, thik kumba pyrkhath ki Pharisi hyndai ha ka jingidei bad ka Sabat, ha kaba ym bit ban pynkoit ia uba pang jur (Mk.2:27; Lk 13:16; Io.9:1-34). Te shipot imat ki Lyngdohsad, ki Sohsla, ki Lyngdoh-sohblei bad ki paitbah Khristan ki la klet ia ki rangli ki juki, ki khunswet khunmyllung, ki sem-shiliang ki kup-shiliang, kiba pang, kiba shitom bad kiba duk kiba suk. Ym don ba putiaw shuh ia kine ki bapli.

Nangta u Jisu u pynkynmaw ia ka Balang Ephesus ba ym don kyrdan, ym don burom kaba kham khraw ban ia ka Jingieid para-briew. Ka dei ka kyrdan jingblei Nalor kane, ym don kyrdan shuh hi ha ka pyrthei bad ha bneug. Te ban hap na kane ka kyrdan ka long kaci kaci kaba sniewhok haduh katta katta. Ka dei ka jingduhnong kabym lah shuh ban batai. Namarkata, u Jisu u sneng ba ka Balang ha Ephesus ka dei ban kyndit bynriew da kaba pyndonkam ia kane ka kyntien "Kynmaw", ia kaba ngi la ring jingmut na ka Grik "Mnimo-neuo", kaba mut ban peitmat, kan kyndit bynriew, ban tipbriew, ban kynmaw ia kaci kaci ba ki briew ki la duh namar ka jingleh jong ki hi (Lk.15:17-18). Hangne u Jisu u kyntu ia ki Khristan ha Ephesus ban sngewbynnud ia kaci kaci kaba ki la duh, kaci kaci kaba kordor tam ha kane ka pyrthei. U kyntu ia ki ban sngewbabe ia kaba ia jia bad ban kylla kaba mut da kaba pyndonkam ia ka kyntien Grik "Metaneco"), kaba mut ban pynikylla ia la ka rukom pyrkhath pyrdaiñ bad ban pyrkhath thymmai da kumwei pat. Kane ka kyntien ka kit jingmut bba. Ka mut ban ñiewkor biang ia kaci kaci, kaba kordor da shisha, hynrei ia kaba ngi la kum ñiewbeiñ da ka jingbakla. Tharaj u briew u la kum ñiewkor ia ka rnong bad u ñiewbeiñ ia ka ksiar. Ynda u la tip ia ka jingshisha, khlempep un ñiewkor ia ka ksiar kumba ka dawa bad un buh sharud ia ka rnong. Kane ka jingkylla kaba mut ka long kaba donkam haduh katta katta bad ka dei ban paw ha ki kam. Namarkata, u Jisu u kyntu ia ka Balang ha Ephesus ban leh biang ia ki kam babha iong ka jingieid thik kum mynshuwa. Bad khnang ba ki ñiewngeit kin kylla kaba mut da shisha, u Jisu u maham bad u byrngem ban pynshitom jur ia ki lada kim phai biang sha ka jingieid para-briew. U byr-

ngem ban weng noh ia ka diengpynieng sbarak, kata ka mut ba Un nym ithuh shuh ia kato ka Balang kum ka jong U, kumba Un nym ithuh ia kito kiba ong ba ki dei ki nongbud jong U hynrei kim shym leh ia kaba u hukum (Mt. 7:22-23). Ia ki nongialam ka Balang, u Jisu un nym ithuh shuh kum ki nongialam bad ia ki 'riewngeit ruh Un nym niew shuh kum ki khun ki hajar ka Hima u Blei.

### (c) KA PYNTNGEN BAD KA PYNSHLUR (2:6)

Ka jingthmu jong ka sneng ka kraw, ka maham, ka byrngem ka long ban pynbha ia ki briew. Hynrei lada u nongsngeng nongkraw u sangeh bad u kut noh tang ha ka maham bad byrngem, ka lah ban long ba kito, kiba shah sneng shah kraw, kin duh jingkyrmen ne la kumno kumno kin rit mynsiem bad ki lah ban ong, "Te lada ka long kumta, ym don jingkyrmen shuh na ka bynta jong ngil!" Te kumta ka sneug ka kraw ka pulom bad ka sepei. Namarkata khnang ba ka sneng ka kraw bad ka maham ka byrngem kin trei-kam, ki nongshah sneng shah kraw ki dei ban iohsngew ba ki dang don lad hi ban leh eiei bad ba kim pat da sniew than eh haduh katta katta haduh ba ym don eiei shuh ha ki kano kano ka jingbha. U nongsngeng u dei ban pyni ba ki dang lah ban sdang biang, namarba ki dang don katto katne ki hok ka longbriew manbriew ha ki. U Jisu u leh kumta. U pyni shai ba ki 'riewngeit ha Ephesus ki dang ngeit ha U kum u Khun u Blei bad ba ka akor ka burom ka longbriew manbriew ka dang im bha ha ki, namarba ki isih ia ki kam bymman jong ki Nikolait, kibym ngeit ba u Jisu u dei u Blei bad kiba im ka jingim kaba awria haduh katta katta.

Mynta ka jingkylli ka mih, "Kiei kine ki Nikolait ia kiba u Jisu bad ki 'riewngeit ha Ephesus ki isih ia ki kam bymman jong ki?" Ka jubab kaba nyngkong eh ka dei kane: ki dei ki Khristan hi kiba im bad kiba trei ha Ephesus. Ka kynhun jong ki ka dei kawei na kito ki kynhun Khristan kiba trei-kam hapoh shnong poh thaw. Te kim dei ki briew kiba nabar. Namar ki kam bymman jong ki, ki buh ia ka Balang ha ka jingma na-



poh, na rympei kumban ong noh. Na ka khanatang  
ngi tip ba kine ki Nikolait kim ngeit ba u Jisu u dei u  
Blei bad ki pyndonkam ia ki jinghikai u Jisu bad jong  
ki Apostol hi ban da rapjot bad ban pynksan ia ka ru-  
kom im awria jong ki, kaba kham sniew ban ia ka  
jong ki jentil, namarba ki jentil kim da tip bha ia kaba  
ki leh.

Ki don ar tylli ki khanatang bad ki jingbatai sha-  
phang kine ki Nikolait. Ki don ki 'riewstad kiba ong  
ba kine ki Nikolait ki dei ki nongbud jong u Nikolas,  
uba long uwei na ki Sohsla banyngkong jong ka Balang  
(Kam 6:5) U dei u Grik na Antioch. Hadien katto  
katne por, u la hikai bakla ia ki briew bad u la hap  
niam. Kumta ki ong ki Kpa Balang kum u Hippolytus  
u Klemen na Alexandria, u Irenaeus bad kiwei kiwei  
de. Kine ki Kpa Balang ki ong ba u Nikolas bad ki  
Nongbud jong u ki im ha ka jingawria bad ka jinglyng-  
kar ha ka bam ka dih Ma-ngi ngi lambyrneit. Ia  
kane ka rukom pyrkhat jong ki Kpa Balang. Namarba  
u Nikolas u dei u Grik, ka jinghikai jong u khlempep  
ka la phriang khamtam eh hapdeng ki Khristan kiba  
long ki Grik. Kam shym long kaba eh ba na Antioch  
ki jinghikai bakla jong u kin phriang sha kiwei pat ki  
jaka, khamtam eh ha Asia Minor bad ha Ephesus, sha  
kaba ki briew baroh ki lah ban poi bad ban tuid da  
kaba suk.

Kawei pat ka khanatang bad ka jingbatai ka ong  
ba kine ki Nikolait kim dei ki nongbud jong u Sohsla  
Nikolas, hynrei ki dei ki Khristan hi na Ephesus, hynrei  
kiba la shah ia lam bakla. Ki ong ba kine ki Nikolait  
ha Ephesus ki long kijuh kum kito kiba don ha Perga-  
mum, kiba long ha kajuh ka por ki nongbud jong u  
Balaam hyndai.

Baroh ki la bna shaphang u Balaam ha ka jingladel  
bad ki paid Israel mynba ki dang ia idwir lyngba ki  
thaiñ Moab. U Syiem Balak u la khot ia une u Ba-  
laam ban tim ia ki Israel, hynrei ma-u u la kyrkhu  
pynban ia ki (Jkhn 22:1-24:25). Te ha ka jingshisha, u  
Balaam u la long u briew, uba bha, ubym shym iohi  
jingma eiei na ki Israel ha ka jinglaid lynti jong ki na

Moab. Hynrei kumno re kumno, da ki spah snem hadien, ka la mih ka parom hapdeng ki Israel ba u Balaam u dei u briew uba sniew bad uba la ialam bakla ia ki briew, hana, u la ialam ia ki sha ka jingmane ia ki blei-thaw. Nangno ka mih kane ka parom? Khlem-pep na ka Jynthoh Bakhuid hi. La khanatang ha ka Kitab Jingkheiñ ba hadien katto katne por u Balaam u la ai buit ia ki kynthei jentil ban khring ia ki Israel sha ka jingmane blei-thaw (Jkhn 31:16) Imat dei naduh kane ka por ba ia ki nonemane blei-thaw da ka jingaw-ria bad kiba bam bad dih lyngkar la sin kum ki nongbud jong u Balaam.

Te kine ki 'riewstad ki ong ba ka kyntien Grik "Nikolaitis" ka dei ka jingring jingmut na ka kyntien Hebru "Balaam" bad ka kyntien Balaam" ruh ka lah ban long ka jingpynkylia na ka Grik "Nikolaitis". Baroh ar tylli ki kyntien ki mut "ki Nongjop". Namakata, ki Nikolait bad ki nongbud u Balaam ki dei kijuh na kajuha ka kynthun, kaba don artylli ki kyrteng. Kane ka lah ban long kumta. Hynrei ha ngi hi shimet, imat ki don ar kyuhun: ki nongbud u Balaam bad ki Nikolait, kiba long ki nongbud jong u Nikolas, u Sohsla banyngkong. Ha ki jinghikai bakla bad ha ki kam awria te imat ki don ka jingladei.

Mynta ngin poi sha ki jinghikai jong kine ki Nikolait. Ngila kdew ba kim ngeit ba u Jisu u dei u Blei. Nangta ki dei kito ki briew kiba batai bakla ia ka jinghihai ki Apostol, khamtam eh ia ki shithi u Paulus, ha kiba u Paulus u ong ba ngi la lait na ka Aiñ bad ba ngi la laitulid ha u Jisu Khrist. Kine ki Nikolait ki batai bakla ba kane ka mut ba ym don aiñ shuh kaba lah ban teh ia ngi bad mynta ngi lah ban leh katba ngi mon. Ha ki shithi jong u hi, u Paulus u pynrem ia kine ki briew (Kal.5:13) Ha ka shithi kaba ar jong u Petrus Bakhuid ruh ka don ka jingud ba kine ki jait briew ki pyndonkam kulmar ia ki jynthoh jong u Apostol Paulus (II Pt. 3:14-16).

Na kine kiei kiei kiba ngi la ong haneng ka paw shai ba ki la hikai ba ki Khristan ki la laitulid bad kumta ki lah ban leh katba ki mon. Ym don ain shuh, ym

don rul shuh. Ha ka jingshisha, kane kam dei ka jing-laitluid, hynrei ka dei ka jingleh lyngkar, ka jingleh laitan.

Shuh-shuh, na ka khanatang, ngi tip ba ki la hikai ba kane ka met ka dei kaba sniew na lade hi, ba ym lah ban leh eiei ban pynbha ia ka. Dei tang ka mynsiem ia kaba ngi lah ban pynkiew irat ha ka Hok. Te haba ym lah leh eiei shuh, kam myntoi ban pyrshang ban teh la-kam ia kane ka met. Dei ban ai laitan ia ka ban leh katba ka kwah, wat ban leh awria kum ki nuti ruh. Namarkata, kim tip shuh ia ka raiñ ka rem, kim bna shuh ia ka akor ka burom. Ki kyrñiom ha ka jingthala bad ka jingawria. Bad haba peit na kane ka liang, kim iapher shuh na ki jentil ha kata ka por. Ki iakyrñiom lang ha ki jingawria kumba thoh u Paulus ha ka shithi jong u sha ki Roman (Rom.1:26-32). Shuh-shuh, ngi tip na ka khanapateng ba kine ki Nikolait kim pdiang ia ka jing-hikai ki Apostol bad jong ka Balang, kiba khang ban leh awria bad ban iadei-kti bad ka jingmane blei-thaw da ka ba bam ia ka dohkñia(1) ba la tyrwa ha ki blei-thaw (Kam 15:29). Ki la tip shai ba ki jentil ki tyrwa ia kane ka dohkñia ha ki blei-thaw bad ban bam ia ka, ka mut ban mane ia kito ki blei-thaw. Ha kane ka liang ruh, kim iapher eiei na ki jentil. Kane ka dei jingpynthut kaba khraw bad bun ki briew ki la shah ialam bakla na ka daw jong kine ki Nikolait. Ki dei ki Khristan hi,

---

1. Ka Kñia ka khriam ka dei kaei kaei kaba ngi shem ha satlak ka pyrthei. Ka don hapteng jong ngi ki khun u Hynñiewtrep bad ka dei ka tynrai jong ka Niam u Khasi ka Niam tipbriew tipblei, tiphok tipsoi, ka Niam kaba ap jingong. Ha ka jingshisha, ki khun u Hynñiewtrep kim ju tyrwa ia ka Kñia ka khriam lait noh ha u Blei Nongbuh Nongthaw. Kim ju kñia mrad. Te ym lah bandon dohkñia hapteng jong ki. Hynrei ba kiwei pat ki jaitniam, kum ha ki Ri Pdeng-mihngi, ki briew ki kñia ia ki mrad ki mreng ha ki blei jong bad ki ngeit bha ha kito ki blei-thaw. Ki tyrwa da shisha bad kumta kato ka doh ka long ka dak jong ka jingmane blei jong ki ia kito ki blei-thaw. Te ka don ka dohkñia hapteng jong ki bad ban bam ia kato ka dohkñia ka mut ban loh bynta lem ha kato ka jingkñia khamtam eh haba bam ia ka ha ki iingmane bleithaw jong ki. Kane ka dei ka daw balei ka Balang hyndai ka khang pyrshah ban bam dohkñia, namarba ka jingngeit jong kiba, bun hi ka dang tloq.

hynrei da ka jingim bad ki kam bymman jong ki, ki pynjot ia ka Balang na la rympei.

Hynrei donbok ba ha ka Balang ha Ephesus kine ki Nikolait kim don lad namarba ki nongialam bad ki 'riewngeit ki isih ia ki, ki pynbna paitbah ia ki jinghikai bakla jong ki, ki pynrem ia ki bad kim aili ia ki. Te u Jisu u iaroh ia ka Balang ha Ephesus na ka bynta kane.

#### (d) KA KHUSNAM (2:7)

Hadien ba u Jisu u la iaroh ia ka Balang ha Ephesus na ka bynta ki hok bad ki kam babha, hadien ba u la sneng la kraw, la maham bad la byrngem ia ka na ka bynta ka jinglehklet ia ka jingieid para-briew, namarba ka Balang ka kloj ban kylla kaba mut, u Jisu u pynbna ruh ia ka Khusnam na ka bynta ka Balang Ephesus bad na ka bynta ka Balang baroh kawei ha ka pyrthei. U Blei u dei u Nongsiewbainong Uba bha tam bad uba sbun tam. U kynmaw kyndiang ia ki kam babha jong ki briew bad u siewbainong ia ki kham palat ban ia kaba ki dawa. Bad kane ka jingpynbna ia ka Khusnam ka wan na u Mynsiem Bakhuid hi, uba trei-kam ha u Jisu Khrist kum u Nongiathuhlypa. Namarba ka wan na u Mynsiem Bakhuid kan nym pep ban urlong. Kito kita iajneh bad kiba iaitrei bha kum ki Khristan, kin iaijop bad kumta ka Khusnam ka dei ka jong ki.

Namarba kane ka Khusnam ka long kaba khraw, kaba khuid, kaba donburom bad kaba kyntang, u Jisu u ong ba Un nym pynbna ha kino kino ki briew, hynrei tang ha kito kiba don ka mon kaba bha bad kiba kwah ban iohsngew, bad ban tip. Ka daw ka long ba kito, kibym don ka mon ban iohsngew, kin nym sngewthuh ia ka jingmut jong kane ka Khusnam. Te u Jisu u ong shai, "Jar uba don shkor, to un sngap." Da kane, u Jisu um mut ban pynsngewthuh ia ngi ba ki don ki briew kiba khlem shkor. Em; baroh ki briew ki don shkor. Hynrei haba ki briew kim mon ban sngap ban sngew, wat lada ki don shkor ruh, ka long

thik kumba kim don, namarba kin nym sngewthuh<sup>1</sup> shai ia kaba ki iohsngew. Kane ka dei ka rukom kren jong u Jisu, haba U kyntu ia ki briew ba<sup>1</sup> iohsngew ia ka Khubor ba U ai lyngba u Mynsiem Bakhuid, Ubym ju sangch ban trei-kam ha U (Mt.13:9,43; Mk.4:9,23). U Jisu u kwah ba ki briew kin sngew kin sngap da ka jingngeit bad ka jingsngewnguh.

Ia ki kyntien Khasi "Uba iaijop" ngi la ring jingmut na ka Grik "NIKON", kaba long ka partisipyl bamynta(present) jong ka berb "Nikao", kaba mut ban jop thiaw. Baroh kiba pule Grammar, ki tip ba ka Partisipyl bamynta ka thew ia ka jingleh kaba dang iaid shaphrang bad kam pat kut. Te "Nikon" ka mut u briew uba dang iaijop shi iaijop khlem sangeh. Kane ka pyni ba ka jingim Khristan ka dei ka jingialeh kabym lah ban sangeh haduh ka jingiap. U Khristan um lah ban ong, "La biang katto!". Em; katba u dang im, u dei ban iaitur bad ban iaijop khlem sangeh. U Khristan u dei ban jop, ym tang shisien, hynrei bunsien ha ka jingim jong u, lah ban ong ba u dei ban jop man la ka khyllipmat. U dei ban iai-ialeh khlem sangeh. Um dei ban rem, hynrei u dei ban jop barabor bad un iaijop khlempep namarba u Jisu u iaidon lem bad u.

Ka khusnam ba u Jisu un ai ha ka Balang ha Ephesus, kaba dei ban iaijop khlem sangeh, ka dei u Dieng jong ka jingim. Ha ka jingmut jong u Jisu, une u Dieng jong ka jingim u dei ka jingim-blei ha U hi bad lyngba jong U ha u Blei da ka bor jong u Mynsiem Bakhuid. Shisyn-ong, une u Dieng jong ka jingim u dei u Jisu Khrist. Te u Jisu u tyrwa ia lade hi kum ka Khusnam jong kito ki Khristan kiba iaijop ha ka jingim jong ki.

Khnanng ba ngin sngewthuh balei u Dieng jong ka jingim u mut bad u thew ia u Jisu hi, ngi dei ban tip khyn-diat ia ka khanatang jong u na ka Jynthoh Bakhuid hi.

Ngilap ia u Dieng ka jingim ha ka Jynthoh Bakhuid, lyngkong eh, ha ka khanatang shaphang ka jingthaw<sup>1</sup> ia u briew (Jen.2:9;3:22). U dei uwei na ki dieng kiba nyngkong ba u Blei u la thaw katkum ka Baibyl. U don hapdeng jong ka kper Eden. U Adam bad ka Im kim shym ioh lad ban bam ia u soh jong une u Dieng namar-

ba u Blei u la beh noh ia ki hadien ba ki la bam ia u soh jong u Dieng Adong bad ki la ngat ha ka Pap ka Sang, da kaba ki la duh noh ia ka hok ban faishong laisah ha ka Kper Eden.

Imat une u Dieng u dei uto u dieng, ia uba ki 'riew-hyndai ha ka Ri Pdeng-mihngi ki la ngeit ba u lah ban laipynsamla ia ki briew bad kumta kin nym iap. Une u dieng u kdew ia ka jingthrang hir-hir jong u khunbynriew ban nym iap. U dei ka dak ka shin jong ka Jingim khlempud. Hynrei suki suki, ha ka Jynthoh Bakhuid hi, ka jingmut jong une u dieng ka la kylla. Ki Israel hyndai ki la sdang ban pyrkhat bad ban durlap shaphang jong u. Ha ka Kitab Phawar, la ong une u dieng ka jingim u dei ka Jingstad hi bad dei tang kito kiba loh ia kane ka Jingstad, ki lah ruh ban loh ia u Dieng jong ka jingim(Pha 3:18). Shuh-shuh, u nongthoh ka Kitab Phawar u ong ba ka jingurlong jong kano kano ka jing-angnud katkum ka Jingstad u dei u Dieng ka jingim (Ph.13:12). Nangta ngi pule ba kiba kamai ia ka Hok, ki loh ia une u Dieng ka jingim kum ka bainoug (Ph.11:30). Ia u Dieng ka jingim la pynlasysiem ruh bad ki ktien jali-ja-um kiba u briew u kren da ka Jingstad bad ka jingshemphang, kata ka mut ba u briew, uba nang ban kren, un jop thiaw ha ka jingim. Te haba peit kyllum, u Dieng jong ka jingim u thew ia ka jingim kaba bha, kaba hok, kaba pura bad kaba long ka lad ha u briew ban manbha manmjat. Une u Dieng ka jingim, namar-kata, u long uba kordor bad uba myntoi. Lah ban ong ba u dei ka Jingstad hi bad ka Jingstad, katkum kine ki nongthoh, ka dei ka Jynthaw bakynsai tam jong u Blei, ka jynthaw kaba nyngkong tam bad kaba la iadon lang bad u Blei haba U thaw ia kane ka pyrthei mariang (Pha 3:13-20; Sir. 24:1-22). Shisyn-ong, da ka Jingstad ki briew kin loh ia u Dieng ka jingim.

Khatduh eh, ha ka Jutang Barim, ngi shem ba kane ka Jingstad kam dei tang ka jynthaw bakynsai, kaba nyngkong bad kaba la iadon kti bad u Blei haba U thaw ia ka pyrthei mariang, hynrei ha ka Kitab ka Jingstad hi, ka dei ka jingphalang jong u Blei Nongbuh Nongthaw. I kumba ka la jan long kum Ma-u bad suki ki la

pynīadei-dur bad ka “Logos” ki Grik, ka hor mañan kaba pynīaid ryntih ia ka pyrtthei mariang. Bad ha ka Jutang Bathymmai, kane ka “Logos, kaba mut ka Ktien ne ka Hukum”, ka long u Blei hi, u Trai jong ngi u Jisu Khrist (Io 1:1-14). Bad u Jisu Khrist u dei ka Jingim bashisha jong ki briew baroh (Io.11:25;14:6; I Io.5:12). Te kumta u Jisu u kular ban ai ia lade kum ka Jingim ha kito ki Khristan baroh kiba lai-ialeh bad iaijop ha ka jingim jong ki.

Na ka liang ki Ju ruh ka don ka khanatang shaphang une u Dieng ka jingim. Ki ong ba u Adam u la duh noh ia uto u Dieng namarba u la shah beh na ka Kper Eden. Hynrei ha ka por jong u Messia, une u Dieng un sa mih bad ieng hapteng jong ki, u Dieng uba seisoh haduh katta katta bad kito kiba ioh ban bam ia u soh jong u, kin ioh ka jingsuk bad ka jing-kmen bad khamtam eh ka Jingim khlempud. Bad dei da u Messia ba kin ioh ia kine kiei kiei baroh.

Ban pynkut, na kine kiei kiei kiba ngi la ong hang-ne, ka paw shai ba u Dieng ka Jingim u dei ka Jingim kaba pura bad kaba janai katkum ka saiñdur jong u Blei na ka bynta u khunbynriew bad ngi tip ba kane ka Jingim kaba pura nadong shadong ka dei u Jisu Khrist, u Khun u Blei. Ym don eiei kaba kham kordor ban ia u Jisu. Ha u Jisu ngi ioh lut ia kiei kiei baroh. Bad u Jisu u kular ban ai ia lade hi kum ka Khusnam jong ki Khristan kiba iaineh.

Khatduh eh, une u Dieng ka jingim u don ba ka Kper u Blei. Ha ka Grik kane ka kyntien “Kper” ka dei “Paradisos” bad dei na kane ka kyntien ba ngi ioh ia ka “Paradais”, kaba raut ka jingsuk-bneng. Nyng-kong eh, ka dei ka kyntien Persia “Pardesos” bad lyng-ba u Xenophon, uba la thoh shibun kiei kiei shaphang ki nong Persia, kane ka kyntien ka la kylla long ka kyntien Grik “Paradisos”. Te Pardesos ne Paradisos ka mut ka ’persyntiew, ka ’persoh ’perpai’ jong ki Syiem ki Patsha ha Persia, ka kper ha kaba kine ki heh ki haiñ ki bam lyer, ki laidkai sngewbha bad ki pynsngew-tynnat ia la ka met ka phad. Ka dei ka kper ha kaba ki don lut ki jait syntiew bapher bad ki soh bapher.

**Ka dei ka kper jong ka jingkmén bad ka jingsngewbha.**

Haba ki Ju ki la ring jingmut ía ka Jynthoh Bakhuid sha ka Grik, ki la pyndonkam ía kane ka kyntien "Paradisos" ban pynkylla ía ka kyntien Hebru "Gan", ka ba mut ka 'persoh 'perpai. Ha ka jingpyrkhat jong ki Ju, ka dei ka kper kaba itynnát haduh katta katta.

Ha ka Balang hyndai, haba ym pat da shai bha ka jingpyrkhat shaphang ka jingim kaba sha lyndet, ki Khristan, khamtam eh kiba dei na ka jaitbynriew ki JU, ki ngeit ba ha kata ka "Sheol" ne ka "Ñiamra", kumba ngi ía batai haneng, ka don ka jaka na ka bynta kiba hok bad kiba bha bad ía kata ka jaka ki khot ka "Paradisos". Kumta u thoh u Origen bad u Terulljan. Hynrei suki suki kane ka rukom pyrkhat ka la dub noh namarba kam dei katkum ka jingshisha bad khatduh khatwai ka kyntien "Paradisos" ka mut ka bneng hi (Lk. 23:43). Te kine kiei kiei baroh ki thew ía u Jisu Khrist hi, Uba mynta, kum u Trai bad u Kynrad Uba la mih pat na ka jingíap, U don ha bneng bad U shong ha kamon u Kpa. Dei Ma-u keiñ ka Khusnam kaba khraw tam bad kaba donburom tam na ka bynta jong ngi ki Khristan.

Ban pynkut ía ka jingbatai ía kane ka shithi sha ka Balang ha Ephesus, u Jisu u íaroh ía ka jingtrei-shitom-sat, ía ka jingíaisah-satar, ía ka jingisih bad jingrat dyngkong ía ki jinghikai lamler bad bakla jong ki Nikolait. U kyntu ía ki Khristan ban íaineñ ha kine ki hok bad kumta kin íoh ka Khusnam kaba dei Ma-u hí, Uba long ka Jingim bapura jong ki briew. Hynrei u la sar ruh ía kane ka rympei Khristan da kaba pynrem ía ka jingjah-rngai jong ka Jingieid para-briew, ka jinglehklet ía ki baduk barangli ka jingbuaid-niam kaba burom palat ía ka aiñ bad kabym kheññ snep shuh ía ki briew.

## **(ii) KA SHITHI SHA KA BALANG HA SMIRNA (2:8-11)**

8 Ha u angel ka Balang ha Smirna, to thoh: U Bannyngkong bad U Bakhatduh, Uba la íap *shisien* bad Uba la im *biang*, u ong ía kine kiei kiei; 9 Nga tip *bha*



Īa ka jingjynjar-sat jong phi bad ka jingkyrduh-tasam jong phi, hynrei phi long uba riewspah. *Nga tip bha* ruh Īa ka jingshah-pynbudnam *jong phi* na ka liang ki-to kiba kob sarong ba ki dei ki Ju, hynrei kim long; *ki dei* pynban na ka sinagog jong u Soitan. 10 Wat sheptieng Īa kiei kiei ba phi dei ban shahshitom. Hakhmih, u ksuid un thep katto katne ngut na phi hapoh phatok ban tynjuh Īa phi! Phin jynjar-sat shiphew sngi. To Īaineh *ha ka jingngeit* haduh ka jingĭap, bad Ngan ai ha phi Īa ka pansngiat jong ka jingim.

11 Jar uba don shkor, to un sngap Īa kaba u Mynsiem u ong ha ki Balang:

“Īa *uta* uba ĩajop yn nym pynmysaw da ka jingĭap kaba ar.”

Ha kane ka shithi sha ka Balang ha Smirna, u Jisu Khrist u pynithuh Īa lade kum “U Banyngkong bad Uba khatduh bad uba la mihpat na ka jingĭap (Jpw 1:17-18)”. Kane ka dei ka nam ba u Jisu hi u la ai ha lade, ka nam Īa kaba ki Khristan ha Smirna ki la ĩohsngew bad ki sngewthuh bad kumta kin long kiba kloi ban kohnguh, thik kumba ki la ju leh naduh basdang.

Ka nam “U Banyngkong bad U Bakhatduh” ka dei kajuh thik kum kato kaba ngi la batai haneng, khlem don jingĭapher eiei (Jpw 1:17). Ha kajuh ka rukom, ka nam “Uba la ĩap shisien” ka long kum kato kaba ngi la pynshai lypa (Jpw 1:18). Bad ka nam “Uba la im biang” kam ĩapher eiei ha ka jingmut na kato kaba ngi la kdew (Jpw 1:17-18). Hynrei ha ka dur jong ka berb “Zao (ban im)” ka don ka jingĭapher. Ha ki dkhot 1:17-18, u nongthoh ka Kitab Jingpynpaw u pyndonkam da ka partisipyl bamynta, kaba pyni Īa ka jingĭai-im kabym kut shuh lano lano ruh. U Jisu u dei u “HO ZON”, kata ka mut, “U ĪAI-IM”. Ka jingim ka dei ka jong u Jisu bad kan nym phet shuh na U, kan nym lait shuh na U bad ym don mano mano ba lah ban knieh noh Īa ka na U. U long UBA-IM da ka hok tynrai, kaba dei ka jong U. Ha kane ka dkhot 2:8 pat de u nongthoh u pyndonkam Īa ka Aorist jong ka berb “Zao” bad u ong “KE EZISEN”, kaba mut, ha ka jingshisha, “Bad U la kylla long Uba im.” Ka mut ba “U la kylla long da

kumwej na kaba U la long", na "Uba iap U la poi sha Uba im", ba U la iap shisha hynrei U la kylla im. Te haba u pyndonkam ia kane ka tens Aorist, kaba thew tang ia kaei kaei kaba la dep bad kabvm nym wan shuh lano lano ruh, u Ioannis um mut ban len ba u Jisu u im namarba ka jingim ka dei ka jinglong jong U hi ne ka hok tynrai jong U, hynrei u ban tynggeh tang ia kato ka jingjia histori ba na Uba iap U la kylla long "Uba im". U Ioannis u da kwah ban ban tynggeh da shisha ia kato ka khyllipmat ha kaba ka Jingiap ka kylla long ka Jingim. Bad kato ka jingjia ka la jia tang shisien, kan nym jia shuh lano lano ruh. Ka dei ka jingjia kaba khraw tam bad kaba kyrpang tam ha ka histori bad ka saiñdur jong u Blei. Yn nym don shuh kawei pat ka jingjia kaban kham palat ia ka ha ka burom ka ijot bad ka jingmyntoi ia u khunbynriew. Ka dei ka pasoh-duh jong ki jingjia histori baroh. Ka dei ka pdeng jong ka saiñdur u Blei ha kane ka mariang baroh kawei. Da kaba ban tynggeh ia kane ka jingjia ka histori, u Ioannis u mut ban pynbna pyrthei ba ka Jingiap u Jisu Khrist kaba la kylla long pat de ka Jingim, ka dei ka Thong bad ka Mir banyngkong bad bakhatduh jong ka saiñdur baieidsbun jong u Blei na ka bynta u khunbynriew. Hangne ka paw ka jinglong bakongsan tam jong ka Jingmihpat u Jisu na ka Jingiap. Te da kaba pyndonkam ia kane ka kyntien. "Ezisen, kaba mut "U la kylla long Uba im", u Ioannis u pyrta sangot ia ka Jingmihpat u Jisu Khrist na ka Jingiap. Bad u Jisu u pynithuh ia lade da kine ki "Nam" khnang ban pyniadei ia ka Smirna bad U hi. Kum Ma-u ka Smirna ka la long ka Nongbah banyngkong jong kito ki thaiñ; nangta kumba saw spah snem ei ka la iap kumban ong noh, bad ka la khie-im biang ha ka burom ka ijot ha ka liang baroh jong ka longbriew manbriew.

Kane ka shithi ka dei kawei na kito ki shithi kiba sngewtynnat tam ha ka Jynthoh Bakhuid. Ngi ioh-sngew tang ka jingiaroh bashida suda. Ym don jing-kynthoh eiei. Ka itynnat bad ka janai ka Balang ha Smirna thik kumba long ka shnong na ka liang ka mariang ba la ai u Blei.

Te khuang ba ngin sngewthuh bha ia kane ka

shithi, ngi dei ban tip khyndiat khyensoit shaphang kane ka shnong bapawnam jong ka jylla Roman ha Asia Minor. Ha ka nam bad ka jingitynnat, ka Smirna ka duna tang khyndiat na ka Ephesus. Lehse ha ki bun ki liang. ka Smira ka kham itynnat ban ia ka Ephesus.

Kumba la ong haneng, ka Smirna ka donbok shibun na ka liang ka mariang. Ka sdang na rud duriaw, ka paw itynnat ha ka them jong ka Wah Hermus, jai ka kiew shaduh u Lum Pagos. Ki kjat-sngi ki shat sha ka khlempud bad ka lyer na duriaw ka beh sngewtynnat bir-hir. Ka dei kawei na ki kadlieng kiba itynnat. Haduh mynta mynne ka dang trei-kam.

Ka parom ka ong ba la tei nyingkong ia ka da ki Grik Aeolian ha kum ka spah snem kaba khat-ar SK. Kumba hynriew spah snem ka la khie la san bad ieng rasong bad ka nam jong ka ka la phriang. Hynreisniew-bok ba ha kum ka snem 600 SK, ka la shah pynjot thiaw ha ki Lydian kiba wan na shaphang mihngi. Ka jingpynjot ka la long kaba jur bad da ki spah snem ka la shu soh kum ka ri-kynjah. Donbok ba wan u Alexander Bakhraw, u la saiñdur ia ka da lade hi, khamtam eh ia ki jyntei, bad ha kum ka snem 200 SK, u Lysimachus u la tei biang ia ka kumba la saiñdur da u Alexander. Ki surok ki itynnat bad ki kylluid; bad kaba itynnat eh ka dei kata kaba ki khot ka "Surok Ksiar", naduh ka iingmane u Zeus, u blei rangbah ki Grik, haduh ka iingmane ka blei Cybele. Ki iing ki sem ruh ki iadei-dur bha naduh basdang haduh u Lum Pagos, ha uba halor jong u ieng rasong shisha ki iingmane bad ki jyntei ba-itynnat bad la iiew ia ki kum ka Pansngiat jong ka shnong baroh kawei. Haba peit na kane ka liang, ka Smirna ka dawa ia ka nam ba ka long ka "Khor ka khriam" jong ka Asia. Ka don kawei ka Stadium kaba heh, ha kaba ki Grik ki ialeh-kai man la ka snem, laiphew jait ki tempyl ha ki blei thaw khamtam eh ha ka blei Roma bad ha ki Patsha Roman kum u Tiberius.

Na ka liang ka ioh ka kot, ka khañi ka pateng bad ka nang ka stad ruh, ka Smirna ka la pawnam ha ki por hyndai. Namarba ka dei ka kadlieng, ki nongkhañi

kim banse ban tuid sha ka na kylleng ka them Hermus bad nawei. Ka la long kawei na ki shnong kiba riewspah bha. Nangta la ong ba ia u Homer la kha ha kane ka shnong. U Homer u dei u myllung uba khraw tam jong ki Grik. Ha Smirna ka don kawei ka paki dulan ba la tei nam ha une u Myllung, ka "Homereion." Ban burom ia une u Myllung, ki nongsynshar ki la shon ia ka dur u Homer ha ki tyngka jong ki. Shuhshuh, na ka liang ka Saians bad ka Jingstad-dawai ruh ka Smirna ka la ioh burom bha.

Na ka liang ka saiñ hima bad ka synshar ka khadar ka Smirna ka la long ka shnong balaitluid. Ki Roman ki la burom bad jeid bha ia ka, namarba ka la ieng barobor na ka liang ka Hima-bah Roman. Ka Smirna kam ju haramnimok ia ka Rom. Ban pyni ia kane ka jingñadei bad ka Rom, ka Smirna ka la tei kawei ka tempyl ha ka blei Roma ha kum ka snem 195 SK bad ka la long kaba nyngkong ban leh ia kane. Nangta ha ka snem 26 SK la jied ia ka Smirna na ki nongbah baroh ha Asia, ban tei ia ka tempyl ha u Tiberius kum u blei, ka burom ba wat ka Ephesus ruh kam shym ioh. Hynrei kane ka burom ka la pynsniew ia ka Smirna ha kawei pat ka liang. Ki brielw ha kato ka sh ong ki la shongshit palat ha ka mane-blei ia u Kaisarn bad ia ka blei Roma bad kumta ki la banbeñ ia ki Khristan, ki la pyniap ia ki, ki la thang ia ki, ki la eh laiphew jait kiei kiei namarba ki Khristan kim trehl ban ong, "U Kaisar u dei u Kynrad!"

Namar kane ka jingpawnam ha ka Hima-bah Roman, ki nong Smirna ki la sngew-sarong bha ia la ka shnong. Ki la iaroh ia ka bad ki kwah ban kyntiew burom ia ka ba kan long kaba nyngkong hapteng ki shnong baroh. Ki paitbah ruh ki la sngewsarong ia lade bad ha ka imlang sahlang ka la don ka mynsiem ban kiew shaphrang bad ban long nyngkong ha kiei kiei baroh. Kane te ka dei ka mynsiem kaba bha bad ka la iarap shibun ia ka Smirna ban kiew irat.

Ngi la kdew haneng ba ka khañi ka pateng ka la iaid bha. Kawei na ki daw ka dei ka jingbun jong ki Ju ha kane ka shnong Smirna. Ka jingbunbrielw jong

ki ka la pyndonburom ia ki bad ka la plie lad plie lynti ia ki ban kiew kyrdan ha ka imlang sahlang bad ban don kti ruh ha ka synshar ka khadar (1). Namarba kine ki Ju ki dei ki nongkhañi kibym kai, ki lah ban bei pisa ruh na ka bynta ka jingdonkam ki paitbah, kum ban pynbha ia ka shnong ka thaw. Kane ka la nang pyndonburom bad pynkhlañi shuh-shuh ia ki Ju. Hynrei ha kawei pat ka liang, kine ki Ju ki la ia leh pyrshah bha ia ki Khristan. Ki la pyrshang katba ki lah la ka bor ka sor ban pynjot bad ban pynduh ia ka Balang da kaba kynshoit ia ki ophisar Roman ban leh tyngah ia ki Khristan. Bun bah ki Khristan ki la shah pyniap na kane ka daw. Hynrei ki Khristan ki la iañeh skhem triang. Kim shym shah ia lam bakla hano hano ruh. Ka Khubor Babha ka la suhtied bad ka la seisoh bha ha Smirna haduh ba u Jisu Khrist hi um don eiei ban ong pyrshah kane ka Balang ha Smirna. Kane keiñ ka dei ka

---

1. Kawei na ki daw balei ka jaitbynriew Israel kan nym duh jait ka dei ba ki ngeit ha ka jingbun-briew. Katno sien ki la jan duh jait. Hynrei ki khie-im shi khie-im namarba ki kynmaw ia ka sneng ka kraw u Jeremia, mynba u la thoh sha ki Ju, kiba la shah pynryngkangpar sha Babilon, U Jeremia u ong. "To Iapoikha poiman, to ia-iah khun ioh kti! Pynpoikha poiman ia ki khun shynrang bad ki khun kynthei jong phi ba kin dup ioh khun ioh kti! To nang roi nang par hangto bad WAT PYN-DUNA BRIEW!" (Jer 29:6-7). Te kat shaba ki leit, ki Ju ki ia leh ban roi ban par bad ban bun briew khnang ban ioh ka burom ka ijot, ka ioh ka kot bad ka bor ruh ha ka imlang sahlang. Kane ka dei ban pynkynmaw ia ngi ki khun u Hynniewtrep ba lada ngi kwah ban donburom ha kane ka pneh batar ka Ri India, ngi dei ban poi sha ka lai million; lynda kumta ym don jingkyrmen na ka bynta ka lawei. Haduh mynta ngim pat poi sha ka phra lak ruh. Imat ngi dang sah shi sah ha ka hynriew lak, katba kiwei, kiba dang shu poi sha kine ki lum na rithor ki lai roi shi roi kum ki dkhiew. Nalor kata, ki don ki doktor bad ki nors Khasi ruh kiba pynshlur ban pynduh khun ne ban pynduna khun wat lada ym don nongrim ha ka liang ka jingkoit jingkhiah. Hynrei tang namarba ka Sorkar ka ong ba dei hi ban leh pap. Hei-ho! Ko ki khun u Hynniewtrep, bud ia ka nuksa ki Ju hyndai bad to nang roi nang par ha ka jingbunbriew ba phin dup lah ban im ha ka burom ka ijot, lynda kumta kiwei pat kin sa Miewbeñi ia phi bad kin iubroit ia phi hapoh la jat. Ka jingbunbriew ka dei ka kyndon kaba nyngkong eh ban longbriew manbriew,

burom bashisha bad baneh junom jong ka shuonng Smirna bad ka Balang.

Kumba ngi la kdew haneng, ha kane ka shithi ka don tang ka jingiaroh bad ka jingpyrto ia ka jingngeit, ka jingriewblei bad ka jingbha mynsiem. U Jisu u kdew san tylli ki hok jong kane ka Balang.

Nyngkong eh, u Jisu u kdew ia ka jingjynjar-sat (Ha ka Grik "Thlipsis), kaba mut khamtam eh ka jingshahlehbein ha ki nongshun jong ka Balang bad ka shemlanot kaba mih na kane ka apot-sepsngi. U Jisu u iaroh ia ka mynsiem dap-shynrang jong ka Balang ban iaishah ia kane ka jingjynjar-sat. Khlempep kane ka jingjynjar-sat ka wan na kawei ka tyllong; ka jingmane blei ia u Patsha Roman bad ia ka Blei Roma. Ki nongialam jong ka Balang bad ki 'riewngeit baroh ki kyntait ia kane ka Pap; kim mynjour ban ong, "U Kaisar u dei u Kynrad" bad nangta ban thang dhup halor ka duwan. Na kane ka daw ki hap ha kane ka jynjar-sat ne ka shemlanot kaba ma-ngi ngim lah ban mutdur.

Nangta u Jisu u pyrto ia ka jingkyrduh-tasam jong ki Khristan ha ka shuonng Smirna kaba riwspah haduh katta katta. Ka jingkyrduh-tasam jong ki Khristan ka wan na ka jingbymtreh jong ki ban mane-blei ia u Kaisar bad kumta bunsien ki shahknieh ki mar ki mata, ki khyndew ki shyiap, wat ki iing ki sem run bad kumta ter-ter. Te ki Khristan bapli kim banse ban im kyrduh-tasam. Ka kyntien Grik "Ptokhia" ka mut thik ka jingkyrduh-tasam namarba ki Khristan kim don eiei haba peit na ka liang ka ioh ka kot bad ka spah ka hajar. Ki la jynjar-sat ha kane ka liang ruh. Hynrei ki shitrhem ha ka jingngeit bad ki iaishah-satar ia kane ka jingkyrduh tasam da kaba phuhsamikhie bad da ka jingkmien na ka bynta ka burom u Blei bad u Jisu.

Hynrei u Jisu pat u ong ba ki riwspah palat ha kawei pat ka liang. Ki riwspah ha ka jingieid ia u Blei bad ia ki para-briew. U Ioannis u pyndonkam ia ka kyntien Grik "Plusios", kaba mut, ym ka jingbit jingbiang, hynrei ka jingshlel ha ka spah ka hajar bad ka ioh ka kot. Ha ka jingladei bad u Jisu, ki Khristan ki riwspah bha bad kim duna eiei ruh em. Hynrei ha

ka jingīadei bad u Kaisar bad ka Hima-bah jong u, Ri kyrduh tasam bad kim don eiei namarba bun na ki ki dei ki mraw, bad ki mraw ha kata ka por kim don eiei. Hynrei ha u Jisu, kim dei shuh ki mraw ne ki raŋot, hynrei ki khun ki hajar, ki bakhraw batri bad ki kynrem ki lyndan. Namarkata, ki dei hi ban long kiba riewspah bad ia ka spah jong ki ym don ba lah ban knieh.

Shuh-shuh, u Jisu u padiah iarah ia ki Khristan ha Smirna namarba ki shah pynbudnam lamler na ka liang jong ki Ju, kiba kob sarong ba ki dei ki paid jong u Blei, hynrei ha ka jingshisha ki dei ki paid jong u ksuid, jong u soitan. Ia ka kyntien "Jingshah-pynbudnam" ngi la ring jingmut na ka Grik "Blasphemia", kaba mut ka jingkynnoh sniew lamler khlem nongrim. Bad ki Ju ki la lah ban pynbudaam ia ki Khristan namarba ki jentil ki la njewkor ia ki. Ka la jia kumne: namarba ka Niam Ju da shisha ka kham bha ban ia ka Niam ki jentil, kiba mane da ki hajar hajar ki blei kynthei bad ki blei shynrang, kiba ialeh awria kum ki briew bad teng teng palat ban ia ki briew, bun ki jentil, khamtam eh ki longkmie na ki iing ki sem kiba kham bit kham biang, ki la pdiang ia ka Niam Ju wat lada kim pat pdiang lut nadong shadong. Ia kum kine ki jentil la nam ki "Briew kiba sheptieng ia u Blei." Napdeng kine ki longkmie, kiba shah khring sha ka Niam Ju, namarba ka kham khuid ban ia ka Niam jentil, ki la don ruh ki kurim jong ki heh ki haiñ ha ka synshar ka khadar. Te lyngba kine ki longkmie ki Ju ki la ioh lad ban pynbudnam ia ki Khristan bad ban pynkohnguh ia ki nongsynshar ban pynshitom ia ki. Na ka khanatang ngi tip katto katne na ki jingpynbudnam jong ki Ju ia ki Khristan. Ki ong ba ki Khristan ki dei kiba khlem-blei namarba kim treh ban mane ia u Kaisar bad ia ka blei Roma. Kane ka dei ka jingpynbudnam kaba khraw tam bad dei namar kane ka budnam ba ki Khristan ki la dei ban shahshitom bad shah iap. Shuh-shuh, ki Ju ki ong ba, namarba kim treh ban mane ia u Kaisar bad ia ka blei Roma, ki haramnikok ia ka Hima-bah Roman, ba ki dei ki nongshetkylla bad kumta dei ban pynshitom jur ia ki, wat da ka pynlap ruh (Kam. 13.50).

Ki Ju ki la nang ioh dong shuh-shuh ban pynbud-

nam ia ki Khristan na ka daw ba teng teng ki don ki iing ki sem ha kiba shiteng ki long Khristan bad shi-teng pat ki dang long jentil bad bunsien kiba dang long jentil ki pyndik ia ki Khristan haduh katta katta ba kim banse ban mih bad ban phet. Ki Ju ki ong ba kane ka dei ka jingpynpait-pynpra ia ki ing ki sem bad ka jingpynjot ia kano kano ka jaitbynriew, ha kaba ki don ki Khristan. Ki Khristan, namarkata, ki ong ki Ju, ki dei ki nongpynkulmar ia ka imsuk imsaif ha ki iing ki sem, ha ka shnong ka thaw, ha ka ri ka raid, ha ki hima-sima.

Namarba ki Khristan ki kren bunsien shaphang ka jingwanpat u Jisu, ha kaba un bishar ia ka pyrthei da ka ding, ki Ju ki la shim kabu ban mudui lamler ba ki Kkristan ki dei ki briew kiba mlien ban thang ia ki iing ki sem, ia ki shnong ki thaw bad ia ki ri. Kumne u Nero u la pynbudnam ia ki Khristan.

Ki Ju ki la kynnoh ruh ba ki Khristan ki bam dohbriew bad ki dih snambriew, namarba ki ong ba ki bam ia ka Met u Jisu Khrist bad ki dih ia ka snam jong U. La ju tharai ba ki Khristan ki pyniap ia ki khunlung bad ki bam doh ia ki. Ki Ju ki la mudui bad pynbudnam lamler ba ki Khristan ki leh awria haba ki lehniam lehrukom namarba bunsien ki ju nam ia ka Jingpynmynta ia ka Jingkñaia Iukharist kum ka "Khawai Jingleidsbun." Na ka daw jong kine ki jingpynbudnam bapher bapher, ki Khristan ki la shah pynshitom beif bad ki la shah pyniap.

U Jisu u pynrem ia kane ka jingpynbudnam ia ki Khristan na ka liang ki Ju bad u ong ba ki leh kumne namarba ki dei ka kynhun u Soitan, ym ka kynhun u Blei. Ki Israel ki ju nam ia lade "Qehal Yawe", kaba mut ka Jingialang "ne ka jingialum-lang ki paid u Blei." La nam ia ka jingialum-lang jong ki Ju da kane ka kyrteng khamtam eh haba ki ialang khruai ha ka Tempyl, ha Jerusalem. Ia kane kajuh ka jingialang ban mane ia u Blei shabar ka Jerusalem ki khot ha ka ktien Grik "Sinagofi", kaba mut ka "Jingialum-lang ban mane ia u Blei ne ban lehniam lehrukom. Te ki Ju ki nam ia lade kum ka kynhun u Blei ne ka jingialum



lang u paid u Blei. Hynrei namar kane ka jingleh-pap jong ki pyrshah ki Khristan, u Jisu u ong ba ki dei na ka kynhun u Soitan, ym na ka kynhun u Blei. Haba u Jisu u ong ba kim long ki Ju, U mut ban kdew ba u Blei um ñiew ia ki kum ki jong U, wat lada ki tharai ba ki pyndonburom ia u Yawe da kaba pynñap ne banbeifñ ia ki Khristan. Kim dei shuh ka "Qehal Yawe", namarba ki tuaid-niam bad kim ieid ia ki para-briew. Ka buaid-niam kam ju lah ban pynsngew-bha ia u Blei. Kito kiba pynñap ne banbeifñ ia kiwei namar ka Niam, ki la len ia u Blei bad ka Niam jong ki kam don dor eiei ruh em. Ka Niam bashisha ka pynlong ia ki nongbud jong ka ban burom, ban ieid bad ban ñiewkor ia kiwei. Hooïd, ki lah ban ialap, ban pyni, ban khring da ka nia, hynrei ym da kaba pynñap briew ne da kaba thang fa ki iing ki sem ne ki skul kumba ngi la kdew haneng. Ngim lah ban pyni ia ka jingieid ia u Blei da kaba isih ia kiwei kumba la leh ki Ju hyndai. Te kine ki jait Ju kim dei shuh ki Ju kiba shisha, hynrei ki la kylla jentil bad lehse kham sniew ban ia ki jentil, kibym pat tip bha shaphang u Blei bad ka jingieid para-briew. Hynrei ki Ju ki tip. Te ka pap jong ki ka khraw da shisha!

Shuwa ban pynkut ia kane ka phang, ngi sngew donkam ban ong eiei shaphang ka kyntien "Soitan" bad ka kyntien "Ksuid". Kane ka kyntien Soitan ka ka wan na ka Hebru "Satan." Ngi lap ia kane ka kyntien, kaba long ka kyrteng ha ka Kitab u Job (Job 1: 6-12; 2:1-8). Ha kane ka Kitab, u "Satan" u dei uwei na ki angel, kiba shakri ia u Blei. Um dei uba sniew. U shakri hok ia u Blei da kaba leit pahara ia ka pyrthei bad ia u khunbynriew. Um dei u nongshun jong u Job. Kaba u "Satan" u kwah ka long tang ban tynjuh ia u Job la u ieid shisha ia u Blei ne u kham ñiewkor ia ki jingkyrkhu ba u ioh na u Blei. Te ka kyntien "Satan" na kaba ngi ioh "Soitan" kam thew ia u ksuid ha ka Kitab u Job. U dei pynban u angel babha.

Nangta ngi lap ha kiwei pat ki bynta jong ka Jyn-thoh Bakhuid ia kane ka kyntien "Satan" bad ka mut "U nongñaleh-pyrshah, u dongmuñui hakhmat ka khet

bishar ki Syiem bad ki nongsynshar (Ps 109:6). Ha kane ka Psalm u "Satan" u dei u nongmudui lamler, u briew uba sniew bad uba shun ia kiwei khlem nongrim. Imat nangne ka sdang ka jingpyrkhat ba u "Satan" u dei u jynthaw uba sniew bad ki jingsniew ki mih na u (Zak.3:1-2; I Jth 21:1; Lk. 10:18). Kane ka rukom pyrkhat ka la ia id shaphrang hapdeng jong ki Ju bad khatduh khatwai u "satan" ne "Soitan" u dei u ksuid Na ka bynta u Ioannis, u nongthoh ka Kitab Jingpynpaw, u Satan ne u Soitan u dei u 'Suidbah u 'Suidsian bad u long thik kum u "Diabolos" ha ka Grik, ka kyntien kaba wan na ka berb Grik "Diaballo", kaba mut ban ia leh pyrshah, ban kren pyrshah, ban pynbudnam ban mudui (Lk. 16:1). Te u "Satan ne u "Diabolos" u dei u Ksuid u Khrei ha ka ktien Khasi.

## **(ii) KA KYNPHAM BAD KA PYNSHLUR (2:10ab)**

Hadien ka jingiaroh bashida bad bahok, u Jisu mynta u kynpham bad U pynshlur ia ki Khristan ban ia iatur shaphrang. U Jisu, namarba u dei u Blei, u la iohi ia ki dohnud bad ki mynsiem babha bad basngur jong ki Khristan ha Smirna. U iohi ruh ia ka jingtieng, jingtmang bad jingsngewsyier jong ki haduh ba teng teng ki khiih khulai da shisha. Wat lada ki jynjar-sat bad ki satsyllang, u Jisu u kren shaikdar ba kim don nongrim ban khiih khulai ne ban tmang namarba U ia idon lem bad ki. U hukum ia ki ban nym sngewtieng sngewsyier. U hukum ia ki ban saugeh noh ban sngewtieng namarba kam don nongrim eiei. Ka jynjar-sat, ka kyrduh-tasam bad ka jingsshah-pynbudnam kim long ki daw kiba biang ban sngewsyier ne sngewtmang. Ia ki kyntien "Wat sngewsheptieng shuh" ngi la ring jingmut na ka Grik "Miden phobu", kaba mut shisha "Sangeh noh ban tieng". U Ioannis u pyndonkam ia ka Imperatib bamynta ha ka Grik bad kane ka Imperatib bamynta ka hukum ban sangeh ia ka kam ba la sdang lypa. Te ki Khristan, katkum ka longbriew manbriew, ki la sdang ban tieng, ban tmang bad ban sngewsyier namar ki jingeh bad jingsshah-pynshitom. Hynrei u Jisu u hukum ba ki dei ban keiñ noh hi ban sheptieng, namarba ka tieng, ka tmang bad ka jingsngewsyier kim iadei-dur bad ki

Khristan kiba im ha u Jisu Khrist. Hynrei da kane, u Jisu um mut ban ong ba kin nym shem jynjar shuh. Em; ki dang bun ki jingeh ba kin kynduh, ki dang dei ban shahshitom, kin sa shahkem bad kin sa shah set hapoh phatok kum ki 'riewbymman. Bad kane ka jingshah set phatok kan sa long kaba shyrkhei bad kumta u Jisu u pyndonkam ia ka kyntien "Hakhmih (ha ka Grik 'Idu!"). Ha ka Jynthoh Bakhuid, la ju pyndonkam ia kane ka kyntien ban pyni ba kaei kaei kaban jia kan sa long kaba phylla ne kaba shyrkhei ban iohsngew ne ban iohi. Bad kane ka jingshah set phatok kan sa long ka jingtynjuh, ka jingphrang kum ha ka shlem, kaban pyni pat de ia ka jinglong banylla jong ki Khristan. Ka jingtynjuh kan pynsatsyllang ia ki, kin jynjar-sat, hynrei kan nym neh slem, kan neh tang shipor, kata tang shiphew sngi. Ki kyntien "shiphew sngi" kim mut shiphew sngi shisha. Em; ki mut ba ka jingtynjuh bad ka jynjar sat kin nym neh slem. U nombor "shiphew" ha ka rukom pyrkhat ki Ju, u kdew ia ka jinglyngkot, ka jingbymbiang, ka jingbyslem bad ka jingbypura jong kiei kiei. Kata ka mut ba ki Khristan kin shahshitom shipor, hadien pat kin sa lait da ka bor jong u Jisu Khrist.

Shuh-shuh, u nombor shiphew u pynkynmaw ba ka jingshah pynshitom jong ki Khristan ka i-shyrkhei bad i kumba ka pynpaw ia ka borbah borsan jong ka Hima-bah Roman. Hynrei kane ka bor kam long eiei. Ka long kum ka tдем kaba rhem, hooid, hynrei ka dei ka tдем 'langiap bad tang katno kato ka ding kan lip bad ka tдем ruh kan jah-rngai. Ka la urlong shisha kumta. Ha kata ka por, i kumba ka bor jong ka Hima-bah Roman kan nym khyllem shuh lano lano ruh. Hynrei ka la khyllem bad mynta kam don shuh, katba ka Balang ka nanglaid shaphrang bad ka la poi sha ka 900 million ha ka jingbun-briew!

### (III) KA KYNTU BAD KA PANSNGIAT (2:10d)

Hadien kane ka jingiaroh bashida bad bahok la ki Khristan, u Jisu u kyntu bad U pynshlur shuh-shuh ia

ki ban ïai-ïeng skhem hi triang ha la ka ïinggeit wat lada ki dei ban ïap ruh na ka bynta jong U. Ia ka kyntien 'ïaineh' ngi la ring jingmut na ka Grik "Pistos." Kane ka kyntien Grik ka don ar tylli ki jingmut: ba lah ban shanjah (Jpw 1:5) bad baïaineh. Hangne ka mut "baïaineh", "baïeng skhem" Kane ka kyntien ka thew ïa u briew uba bat ïa la ka nia ka jutang bad ki briew kiba don ïa kane ka hok ki lah ban pyrta da kine ki kyntien, kum ha ka Jingruwai da u Sohblei Francis Kharwanlang, "Hei, ngi bat ho la ka nia, ngi pynieng la ka jutang ha duwan u Khun u Blei." Ki briew kiba ïaineh ki dei kito kiba bat ïa ka Hok ka Shikvntien ba ki la khlei. Ki Khristan ki la khlei ïa ka Hok ka Shikyntien ha ka sngi ba ki la ïoh Baptisma Kane ka dei ka Nia bad ka Jutang ïa kaba ym lah shuh ban nguid lano lano ruh (Kam.13:34; Ka1 3:9). Kumta, shisien ba la long Khristan, shi-junom ngi dei ki Khristan; ym lah shuh ban kylla.

Shuh-shuh, ba kane ka hukum ban ïaineh bad ban bat jutang, Jisu u pyndonkam ïa ka imparatib bamynta, kaba mut ba u briew u dei ban ïaibteng ïa kaba u la leh lypa. Bad ka berb ba u Jisu u pyndon ka dei "ïinome" bad ka imparatib bamynta jong ka ka dei "ïinu", kaba mut to ïailong, to ïaibteng ban long. Te ka hukum ka long, ym tang ban ïaineh ne ban bat jutang nabar, hynrei ban long hi naduh ka dohnud bad ka mynsiem. Namarkata, kane ka hukum jong u Jisu na ka bynta ki Khristan ha Smirna ka long kum ka syrpuð syrpai ïa u kulaj, uba mareh stet, ba un mareh stet shuh-shuh. Kane ruh ka dei ka jingïaroh ïa kane ka Balang ha Smirna ne ka jingai sha ka kmie ïa u khun, uba la khreh kot lypa, ba un khreh kot shuh-shuh. Bad kane ka jingïaineh ka dei ban long haduh ka jingïap martir da kaba shah khrai khlieh lane da kaba shah bret ha ki sing lane da kaba shah thang-im bad kumta ter ter. Bad kane ka jingïaineh haduh ka jingïap kan nym lehnoh-ei, hynrei kan sa ïoh ka bainong bad ka burom paitbah kaba khraw, ka burom ha ka lympungbah-lympungsan jong ka jingïaleh-thong ha ka jingim. Te u Jisu u kular skhem ba un pynphong pansngiat ïa ki Khristan kiba ïaineh haduh ka jingïap, ka pansngiat

kaba donhurom tam, ka pansngiat u nongjop ha jing-  
iamareh-thong ha kito ki jingialehkai Olympik jong ka-  
ta ka por ha ki Stadium bapher bapher jong ki Grik  
bad ki Roman.

Īa kane ka pansngiat ha ka Grik la khot ka “Ste-  
phanos”, ka pansngiat da ki tnat dieng, khamtam eh  
ki tnat dieng-olub, ne ki syntiew ba-iwbiñ. Ka ĩapher  
na ka pansngiat ba ki jer ka “Diadema”, kaba long ka  
pansngiat ksiar jong ki Syiem bad ki khun syiem, ĩa  
kaba ki lah ban iohpateng tang namarba la kha ĩa ki na  
ki kpa kiba long ki syiem, wat lada kim shym pat leh  
eiei ban dawa ĩa ka. Īa ka “Stephanos” ym lah ban  
shu ioh ei khlem ka jingialeh dohiap doh-im, khlem  
da mih syep mih syar, khlem da thait da jrem. Kane  
ka “Stephanos” ka kdew ruh ba uba ioh ĩa ka, u dei u  
briew uba la pynkhreh la slem, uba la kyndiah na ka  
leh lyngkar ha ka liang ka met ka phad, uba la kilan  
met bha ĩa lade na ka bynta ka jingialeh. Ka pyni ĩa  
ka mynsiem dap-shynrang bashisha. Kane keiñ ka dei  
kata ka pansngiat ba u Jisu u kular ha kito kiba ĩaineh  
haduh kaba kut.

Khnannga ngin sngewthuh bha bad ba ngin nym  
bakla ĩa ka jingmut, kan bha lada ngi tip khyndiat  
khyonsoit shaphang kine ki pansngiat tnat dieng ne syn-  
tiew ba ki Grik bad ki Roman ki ju pyndonkam. Ha ka  
jingshisha ki don bun jait.

Nyngkong eh, ki ju pyndokam ĩa kine ki pansngiat  
tnat dieng bad syntiew ha ki khawai dawai paitbah kum  
ka dak jong ka jingkmen bad jingsngewbha. Nanğa ki  
pyndonkam ruh haba ki mane ĩa ki blei-thaw jong ki ha  
ki tempyl. Khlem kine ki pansngiat kim lah ban rung  
sha kine ki jaka mane blei thaw. Kito kib kwah ban rung  
ban mane-blei ki dei ban phong ĩa kine ki pansngiat.

Shuh-shuh, ki Grik bad ki Roman ki pyndonkam ĩa  
kine ki pansngiat tnat dieng bad syntiew ban pyndon-  
burom ĩa ki ophisar kiba trei-kam bha. Ki long kum  
ki medal ha kine ki sngi jong ngi. Uno uno uba la  
shakri hok ĩa u Kaisar bad ĩa ka Hima-bah Roman, u  
ioh ĩa kane ka pansngiat tnat dieng ne syntiew kaba long  
ka burom kaba khraw tam ha ka hima.

Hynrei ka jingpyndonkam ia kane ka pansngiat tnat dieng ne syntiew, kaba kongsan tam bad kaba donburom tam eh, ka dei ha ka por ba ki Grik bad ki Roman ki ialehkai ha lypung, khamtam eh ha ka jingiamareh-thong. Kumba ngi la kdew, ha Smirna ka don ka Stadium kaba heh, ha kaba man ka snem ki mih madau ki nongiamareh-thong na ki shnong bapher bapher ban ioh ia kane ka "Stephanos", ka pansngiat tnat dieng-olib, ia kaba mynta ki khot ha ka Phareng ka "Laurel Crown". Kane ka dei ka pansngiat kaba donburom tam bad ki briew ki ialeh dohiap dohim ban ioh ia ka Ym don kawei pat ka nam ka burom paitbah na ka bynta ki khun hajar ki jong ka Hima-bah Rom.

Khlempep u Jisu u la don kine ki jingmut haba u la kular ban ai pansngiat da ka "Stephanos" jong ki Grik bad ki Roman. Ka jingim Khristan ka dei ka jingialeh, ka dei ka jingiamareh, thong kumba ong u Paulus (II Tim.4:7) bad u Khristan uba iaineh haduh kaba kut, u dei u nongjop ha kane ka jingiamareh Olympik bad u dawa ia ka Stephanos", ka pansngiat dieng-olib, kata ka jingim bymjukut ha u Jisu Khrist. Ka jingim Khristan ka dei ruh ka jingshakri paitbah. U Khristan um dei ban im tang na ka bynta ia lade khlem da pyrkhat ia kiwei. U Khristan bashisha u dei uta uba shakri ia kiwei, khamtam eh ia kito kiba shem jynjar bad shemlanot (Mt.25:31-46). Ka jingim Khristan ruh ka dei ka jingmane-blei kaba khlem kut shuh bad ka dak ka shin ba u briew u dei u nongmane-blei uba shisha ka long ka jinglaineh ha ka jingogeit bad ka jingieid ia u Jisu bad ia la ki para-briew. Shuh-shuh, ka jingim Khristan khatduh-khatwai kan sa long kum ka jingkhawai dawai ha ka jingkmene, ha kaba u Blei un burom bad un siewbainong ia kito baroh kiba ieid ia U (Mt.22:1-14; Lk 14:15-24). Khatduh eh, imat u Jisu u pynkynmaw ia ki Khristan ba kito kiba iaineh haduh kaba kut kin itynnat thik kum ka Nongbah Smirna, kaba ka pansngiat ba-itynnat jong ka ka dei u Lum Pagos, uba dap da ki jyntei kiba itynnat haduh katta katta. Long katba long na ka liang u Jisu, ka dur-pharshi te ka shai-kdar : ki Khristan kiba iaineh

kin loh ka nam ka burom hakhmat ki paitbah jong u Blei; yn ithuh ia ki kum ki nongjop ha ka jingfaleh kaba jur, sha kaba tang kiba dap-shyrang ki nud bad ki lah ban tur Bad kane ka burom bad ka nam ne ka pansngiat ka dei ka Jingim-blei, ka Jingim Bymjukut, namarba u Jisu hi u ong, 'Ngan ai ka pansngiat jong ka jingim."

#### (iv) KA KHUSNAM (Jpw 2:11)

Nalor ka pansngiat ka burom ka nam paitbah, u Jisu, lyngba u Mynsiem Bakhuid, Uba itairei-kam khlem sangeh ha ka Balang, u kular ban ai sa kawei pat ka bajnong, ka Khusnam kaba kyrpang ha ki Khristan ha Smirna bad kata ka dei "Ka jingbymlah jong ka jinglap kaba ar kan ktah ia ki ha kano kano ka dur." Ka jinglap kaba ar kan kyoran-dien na ki Khristan ha Smirna. Kan nym nud ban tur shaphrang ban ktah kti ia ki bad kumta kin lait na ka jingmynsaw na kane ka mrad kaba itriem haduh katta katta. Ha kane ka Khusnam ba la kular ha ki Khristan ha Smirna la urlong ki kyntien jong u Paulus Bakhuid sha ki Roman, ba ym don eiei kaba lah ban ktah kti ne ban pynmynsaw ia kito kiba don ha u Khrist (Rom. 8:31-39).

Kaei kane ka jinglap kaba ar? Ha ka Jynthoh Bakhuid, ngim ju lap ia kane ka jinglap kaba ar laitnoh ha kane ka Kitab Jingpynpaw. Khlempep kam dei ka jinglap ha kane ka pyrthei, ia kaba lah ban niew kum ka jinglap kaba nyngkong. U Ioannis u ong shai ba kane ka jinglap kaba ar kan nym lah da leilei ruh ban ktah kti ia ki Khristan. Hynrei u Ioannis u tip ba ki Khristan kim lah lait na ka jinglap ha kane ka pyrthei. Ma-u hi u la thoh ia ka jingpynshlur u Jisu ban iaineh haduh ka jinglap (Jpw 2:10).

Na kine kiei kiei ngim banse ban ring jingmut ba ka dei ka jinglap kaba sha lyndet kane ka pyrthei. Ka dei ka jingshah pynrem ban poi sha dujok (Mt. 25:41-46). Ha ka khanatang jong ki Ju, ngi shem ba ki don kane ka jingneit ba ki briew bymman, ynda ki la lap ha kane ka pyrthei, kin sa lap ruh sa shisien ha kawei pat

ka pyrtnei. Ka dei u soh jong ka jingbishar u Blei bad ka jingrai pynrem jong U ia ki 'riewbymmman, katba ia ki Khristan, kiba iaineh bad kiba iaijop, kane kaei kaei kan nym ktah ia ki.

Ia ki kyntien "Yn nym pynmynsaw" ngi la ring jingmut na ka Grik "Adikeo" kaba mut ban leh bymhok ia ki briew, ban ktah kti ia kiwei, ban tare mutsniew sha ki briew. Da kane ka kyntien u Mynsiem Bakhuid u mut ban ong ba ia u briew la mang, ym na ka bynta ka dujok, hynrei na ka bynta ka jingim bymjukut ha u Jisu Khrist U Blei, lyngba u Jisu Khrist, u donhok ban ai ha ki briew ia ka jingim namarba U ieid-sbun ia ki. Ka jingpynrem, ka dujok bad u ksuid kim donhok satja ban kam ia ki briew na ka bynta ia lade. Hynrei sniewbok ba ki don ki briew kiban aiti ia lade ha ka Pap ka Sang bad kumta ka dujok ka lah ban ktah kti ia ki bad ban pynjot ia ki, wat lada kam don ka hok tynrai ban leh kumta.

Ban pynkut, kane ka jingma na ka liang ka jingiap kaba ar, kumba ngi la batai haneng, kan jngai lai lum lai wah na ki Khristan ha Smirna. Ka dei ka jingdonbok kaba khraw da shisha. Bad lada ka jingiap kaba ar kan nym lah ban ktah kti ia ki, ka paw shai ba la kam ia ki da u Blei ha ka Hok katkum ka Hukum. Ym don bhah ym don bynta kaba kham khraw ban ia kane. Ym don Khusnam kaba kham myntoi ban ia kane!

### (iii) KA SHITHI SHA KA BALANG HA PERGAMUM (Jpw 2:12-17)

- 12 Ha u angel ka Balang ha Pergamum, to thoh : Uta Uba bat ia ka waitlam arliang-syrti kaba nep, U ong ia kine kiei kiei : 13 Nga tip bha hangno phi shong-iing trai *thik ha kato hi ka jaka*, ha kaba ka ieng ka khet u Soitan. *Nga tip bha ruh* ba phi bat skhem tri ang ia ka kyrteng jong Nga bad phi shym len ia ka jingngeit ha Nga, wat ha kito ki sngi ba u Antipas, u sakhi baiaineh jong Nga, u la shah pynlap hagdeng jong phi, ha *kato hi ka shnong* ba u Soitan u don iing don sem. 14 Lajar katta, Nga don khjndiat kiei kiei pyrstrah ia phi,



ba phi don hangto ki *briew* kiba bat skhem trfang ia ka jinghikai u Balaam, uba ia aibuit ia u Balak *kumno* ban pynthut ia ki khun Israel, *da kaba pynshoi ia ki* ban bam ia ka dohkñia bad ban leh awria. 15 Kumjuh ma-phi hi phi ri phi kdup ia ki *briew* kiba bat triang ia ka jinghikai ki Nikolait 16 Namarkata, to kylla kaba mut noh ! Lynda kumta, Ngan wan kloi-lan sha phi bad Ngan ialeh thma bad ki da ka waitlam jong ka shyntur jong Nga. 17 Jar uba don shkor, to un sngap ia kaba u Mynsiem u ong ha ki Balang : 'Ha uba lai-jop. Ngan ai *ba un bum* na u manna ba la buhrieh; Ngan ai ruh ha u ia u mawlieh bad ha *uia* u maw la thoh ka kyrteng bathymmai, ia kaba ym don uba tip laitnoh uto uba iohpdang ia ka !'

Kane ka shithi sha ka Balang ha Pergamum ka ia-syriem ia ka shithi sha ka Balang ha Ephesus. Kum ka Balang ha Ephesus, ki Khristan ha Pergamum ruh ki jynjar-sat na ka daw ka jingsbah pynshitom beif ha ka kti ki 'riewbymman kiba mane-blei ia u Kaisar bad ia ka blei Roma. Hynrei ka don ka jinglapher. Ha Ephesus, ka Pap ka dei ka jingjah-rngai jong ka jingieid para-briew kumba hikai u Jisu. Ha Pergamum ka Pap ka dei ka jingbam dohkñia bad ka jingawria, ia kiba la hikai, kyntu bad pynphriang da ki nongbud jong u Balaam bad ki Nikolait. Ngi la batai shaphang u Balaam, ki nongbud jong u, shaphang ki Nikolait bad ki jingbikai bakla jong ki (Jpw 2:6), Te khnang bangin sngewthuh bha ia kane ka shithi, ngi donkam ban tip khyndiat shaphang ka Nongbah Pergamum.

Ka Pergamum, ha ka thaiñ Mysia, ka dei kawei na ki nongbah bapawnam tam ha ki por hyndai. La lap ba kane ka nongbah, ha ka por u Syiem Eumenes I, ka la lah ban saiñ hi ia la ki tyngka ne ki mohor ksiar ne rupa. Ka la long ka nongbah kumba saw-spah snem tam bad ha ka por jong ka Kitab Jingpyn-paw ka dang long ka nongbah: ka nongbah jong ka Jylla Roman ha Asia Minor. Da shisha ka la long ka shnong kaba pawnam bha bad baroh ki briew, ha ka por hyndai, ki la bna shaphang jong ka.

Ka khamatang hapdeng ki Grik ka ong-ba kane ka

shnong ka la paw pyrtthei nyngkong eh hadien ka jing-lap u Alexandar Bakhraw bad hadien ba ka Hima-bah jong u ka la pait la pra bad la sam bhah sam bynta ia ka hapteng ki jernel jong u. La lathuh ba cei uwei na kine ki jernel u Alexander, u Lysimachus, uba la pynlong ia ka kum ka kut jong u. Shen hadien u Lysimachus u la shah jop ha u Seleucos, uba la pynlong ia ka Pergamum ka nongbah jong ka Hima-bah jong u, kaba iar naduh India haduh Asia Minor, ha kum ka snem 282 SK. Hadien katto katne por, ki jingjia histori ki la pynbha bok ia ka Pergamum bad kumta ha ka por u Syiem Attalus I (241-197 SK) ka Pergamum ka la kylla long ka nongbah jong ka hima thymmai, ka hima Attalid, kata ka hima ki Syiem naduh u Attalus I ter-ter. Kane ka hima thymmai ka leh sian shibun da kaba pynladei lok bad ki Roman, kiba ha kane ka por ki la long kiba khlain bad kiba donbor. Te ka Pergamum ka la kiew irat ha kiei kiei biror bad ka kolshor jong ka ka la iphuh iphieng haduh katta katta. Kane ka la jia khamtam eh ha ka por u Syiem Eumenes II (197-159 SK). Kane ka hima ka la ladei jingmut bha bad ki Roman, kiba la niewkor bad iarap ia ka ha ki liang baroh. Te kum ka dak ka jingsngewnguh bad ka jingniewkor ia ki Roman, u Syiem Attalus III (133 SK) u la pynkam ia la ka hima ha ki Roman, kiba la pynlong Jylla-bah ia ka bad ki la pynlong ia ka Pergamum kum ka nongbah jong ki, na kaba ki la synshar ia ka Asia Minor baroh bad ia kiwei pat ki jaka. Te wat lada ki surok-bah jong ka khaai ka pateng kim dei laid na Pergamum, la jar katta ruh ka la kylla long ka nongbah kaba kongsan tam bad ki briew kim banse ban tuid sha ka na ka daw ka synshar ka khadar. Dei hangne ba u Proconsul Roman, uba bat ia ka bor ka waitlam (ius gladii ha ka Latin) u shong u sah. U dei u Lat uba don bor bad u lah ban rai pynrem ia ki briew wat ban shah pyniap ruh, namarba u bat ia ka iktiar jong ka waitlam.

Na ka liang ka mariang ruh, ka Pergamum ka la donbok, La tei ia ka halor uwei u lum-mawsiang lah ban ong, uba itynnat bad uba heh. Nalor une u lum lah ban iohi ia ka duriaw Mediterranean, kaba jngai kumba

15 mer na ka shnong. La tei ruh ia ka halor ka rudwah jong ka Wah Kaikus bad kane ka pynitynnat bad pyn-pyngngad ia ka shnong. Naduh basdang kane ka shnong ka la pawnam ha ka liang ki jynte, ki paki dulan bad ki ling ki sem. Te haba peit na ka liang ka mariang bad ki jynte, ka Pergamum ka la paw kum ka nongban ki Syiem ki Patsha. Ka dur bad ka nam ki la iadei bha.

Na ka liang ki jynte, kaba pawnam tam eh ka dei ka Dulan-kot (Library) Kane ka dulan-kot ka la long kaba ar ha ka pyrthei hadien ka Dulan kot ha Alexandria. La ong ba ka don kumba 200,000 (ar lak) ki kot-kli bad kumta ka nam jong ka ka la phriang kyl-leng kylleng. Katba ka nang laid ka por katta ka nang pawnam shuh-shuh Ka don kawei ka parom kaba ong ba u Syiem Eumenes II u la kwah ban pynheh bad ban pynpawnam shuh-shuh ia ka dulan-kot jong ka hima bad ban jop hi thiaw ia ka dulan-kot ha Alexandria ha Ijip. Te u la iasuh buit bad uwei u riewstad ha Alexandria uba trei ha ka dulan-kot u Ptolemy Philadelphus, Syiem Ijip. U la kular ban ai sbai rupa ia u Kumno. re kumno, u Syiem Ijip u la loh jingtip shaphang kane bad u la bitar lep. U la set phatok ia une u riewstad, u Aristophanes, khnang ba un nym loh lad ban leit sha Pergamum. Nalor kane, u Syiem Ijip u la rai ban pynshitom ia u Eumenes II da kaba pynsangeh ban khaii pateng ia ka tiar thoh-kot ba ki khot u "Papyrus", khnang ba ka dulan-kot ha Pergamum kan nym heh shuh. U papyrus u dei u jynthung uba mih ha ki jaka sangam kum ha bir bad ki jaka harud jong ki. U dei u kynja khah kynja nor. Ynda u la jrong, ki ot ia u, ki pied kumba pied thri, ki pyndait ia ki lyngkhot ba la pied da kaba buh uwei halor uwei pat, ki thad bad hadien katto katne por, la loh ka kot-papyrus ban thoh. Ka kyntien Phareng "Paper" imat ka wan ka na kane ka kyrteng "papyrus", uba mih bha ha ri Ijip. Da kane ka jingleh u Syiem Ijip, ka dulan-kot ha Pergamum ka la jynjar. Te ki la wad ki lad ki lynti kumno ban loh kawei pat ka lad bad ka tiar ban thoh kot. Ki la shem ka lade ha snieh marad. Ki pyinkhuid ia kine ki snieh marad, ka

pynstang ia ki, ki thad ia ki bad ki kylla long ka kynja kot-sada kaba jwat bad kaba neh, kaba kham bha ban ia ka kot-papyrus, kaba lah ban pyut bad ban duh nob. Tang shu mih kane ka kynja kot-sada da ka snieh ki mrad. ka nam jong ka ka la phriang bad ki briew ki la sdang ban thied ia ka bad ban klet noh ia ka kot-papyrus. Ia kane ka kynja kot la nam ka "Kot Pergamena" ne tang kane kawei ka kyntien "Pergamena". Bad kane ka nam ka la poi sha ngi haduh kine ki sngi bad kan iajneh junom. Te ka nongbah Pergamum ka la sahnem da shisha. Mynta ngim lah ban ong la kane ka parom ka long katkum ka histori ne em. Ki don kiba ong ba ka long kaba shisha, don kiwei pat kiba ong ba ka shu long tang ka parom. Long katba long, ka kot-pergrmena ka dang trei-kam haduh kine ki sngi bad ka kot-papyrus pat ka la duh la dam.

Nalor kane ka dulan-kot, ki dang don sa kiwei pat ki jyntei ha ka Pergamum, kum ka iingmane ka blei Athene, ka nongda jong ka shnong Pergamum, ia kaba la tei ha kliar-lum. Hakhmat jong kane ka tempyl ka blei Athene, la tei kawei ka duwan kaba heh bad kaba jrong sanphew phut tam, halor u mawsiang, kum ka dak ka jingsngewnguh ia u Zeus, u blei rangbah jong ki Grik, na ka bynta ka jingjop thiaw ia ki 'riewkhlaw Galati ha kum ka snem 240 SK. Ka la long kum ka khet kaba phylla da shisha. Shuh-shuh, tawiar kane ka duwan, la pruid dur ha u mawsiang hi ia ka jingfaleh bad ka jingjop jong ki blei ki Grik ia ki Ksuid Ramhah. Nangta ki don ruh ki tempyl ha la tei ha u blei Asklepios, u blei ka jingkoit jingkhiah, ia uba la ju nam kum u blei ka Pergamum. Ki briew na kylleng kylleng ki la tuid sha kine ki tempyl jong une u blei ban ioh ka jingkoit jingkhiah bad ki dawai. I kumba kito ki iingmane ki dei kum ki lypung pynkoit pynkhiah. Na kane ka daw, la ainam ia une u blei kum u Soter ne u Nongpynim. Une u blei u don ruh ka Pher; ka dur u bsein. Kiwei pat ki blei ruh ki la don ia ki tempyl kum n Dionysius bad kumta ter-ter.

Nalor kine ki iingmane ha ki blei bapher bapher ki don ar tylli ki iing thiatar. Kawei na kine ka ngiam haduh 3,500 ngut ki nongpeitka. Ka don ruh kawei

ka Stadium ban iāmareh bad ban iālehkai. Kine kiei kiei ki la pynitynnat bad pynpawnam iā ka Pergamum. Hynrei kaba la pynbna nam bha ka dei ka jingmane-blei iā u Kaisar bad iā ka blei Roma Kumba ngi la kdew ha ka Maitphang, ha ki Jylla bapher bapher, jngai na Nongbah Rom, ki briew ki la shongshit bha ha kaba mane iā u Kaisar bad iā ka blei Roma Ka Sorkar Roman ym tang ba kam shym khang, hynrei ka la pynshlur ruh namarba kane ka dei kawei na ki lad ki lynti ban pyniatehsong iā ki jaitbynriew bapher bapher kiba don hapoh ka Hima-bah Roman Kumta ha ki jylla bad ha ki nongbah jong ki ki la mih ki tempyl, ha kiba la mane iā u Kaisar bad iā ka blei Roma. Ki shong kiba kham shongshit ha kane ka mane-blei iā u Kaisar bad iā ka blei Roma, ki la ioh nam ioh burom kum ki "Neokori (Neokoros-neokoroi), kata ki Nongsar-iingmane. Kumba ngi la kdew ha ka Maitphang, iā hukum iā ki raŋot ban paw hakmat ka duwan u Kaisar bad ka blei Roma, ban thang shi-symboh ka dhup bad ban pyrtā jam, "U Kaisar u dei u Trai Kynrad!". Hadien kane, u nongmane u ioh kawei ka kynja Sertiphiket ba u la pyndep hok iā la ka kamram kum u trai-ri Roman ne u raŋot jong ka Hima-bah. Hadien kata u lah ban mane iā kiwei pat ki blei iāda u mon.

Na ki nongbah baroh, ka Pergamum ka la long ka nongialam kaba radbah ha kane ka mane-blei iā u Kaisar bad iā ka blei Roma, namarba ka dei ka Nongbah jong ka jylla Roman ha Asia Minor, ha kaba u shong bad u synshar u Proconsul, uba don ka bor halor ka jingim bad ka jingiap jong ki briew namar ka iktiar ka waitlam, kaba ki khot ka "Ius gladii" ha ka Latin. Ba kane ka mane-blei iā u Kaisar bad iā ka blei Roma kan iaid beit bha, iā phiah iā ka Asia Minor ha ki jyllaniam bad ki Shnat-niam, iā thung iā ki Lyngdohsad ha ki jylla-niam bad iā ki Lyngdoh-sohblei ha ki Shnat-niam, kiban pynfaid iā kane ka kampak-kamsang ban mane blei iā u Kaisar bad iā ka blei Roma. Kumba ngi la kdew haneng, kine ki Lyngdohsad, ki Lyngdoh-sohblei bad kiwei pat ki nongiatrei lang jong ki ki la shirhem bha ha kane ka mane-blei iā u Kaisar bad iā ka blei Roma, khamtam eh ha Pergamum. Lah ban ong ba ha

Pergamum kane ka kampap ka la suhthied bha bad ka Sorkar Roman ha kane ka jylla ka la pynshlur ia ka, namarba kane ka dei kawei na ki dak ki shin ba ki briew ki leid bad ki ñiewkor ia ka Hima-bah Roman bad ki kmen ban long ki raiot bakohnguh jong ka. Bad kito kiba la kyrñiom ha kane ka mane-blei ia u Kaisar bad ia ka Blei Roma ki la manbha manmiat bad ki la ioh burom surom.

Hynrei ki Khristan ki la ngat ha ka apot-sepsngi. Kim lah ban kohnguh ia ka hukum ban mane-blei ia u Kaisar bad ia ka blei Roma. Kim lah ban thang dhup ha ka duwan u Patsha bad ban ong, "U Kaisar u dei u Trai Kynrad", namarba dei tang u Jisu Khrist Uba long u Trai Kynrad. Dei na kane ka daw ba ki Khristan ha Pergamum ki la jynjar sat da shisha.

Hadien ba ngi la batai shai khyndiat shaphang ka Nongbah Pergamum, mynta ngin duriap ia kane ka shithi u Jisu sha ka Balang bad ki Nongpyniaid jong ka ha kato ka shnong. Ngi la phiah ia kane ka shithi ha ki san bynta: ka iarah, ka Pynrem, ka Kyntu, ka Byrngem bad ka Khusnam.

### a) KA IAROH (2:12-13)

Nyngkong eh, u Jisu u pynbna paitbah u dei U-ei. U dei "Uta Uba bat ia ka waitlam arliang-syrti kaba nep." Ngi la batai ia ki jingmut bapher bapher jong kine ki kyntien (Jpw 1:16). Hangne u nongthoh u kwah ban ban tyngeh khamtam eh ia kawei ka jingmut: Ka iktiar ka waitlam, ka bor ka waitlam katkum ka Riti-synshar jong ki Roman ha kata ka por. Ki la ju don ar kynhun ki Lat Roman ha kito ki por: kito kiba don ka iktiar bad ka bor jong ka waitlam bad kito kibym don. Kito kiba don kane ka iktiar bad ka bor, ki lah ban rai pynrem ia ki briew ban shah pynlap. U Lat jong ka Pergamum u dei uwei na kine kiba don ka iktiar jong ka waitlam. Ngi pynkynmaw ia ki nongpule ba u Lat jong ka Palestina, u Pontius Pilatus, u la don kane ka iktiar bad ka bor bad kumta

u la lah ban pynrem ia u Jisu ban shah pynlap halor ka Diengphna

Da kaba pynbna, nynekong nyngshap eh, ba U dei "Uta Uba bat ia ka waitlam arliang-syrti kaba nep", u Jisu u mut ban pynshai ba U dei Ma-u Uba don, katkum ka hok tynrai, bad uba bat ia ka iktiar jong ka waitlam, kata, jong ka jingim bad ka jingiap, bad ym u Lat Roman jong ka Pergamum. U Jisu u mut ban pynsgewthuh ia ki Khristan ba ka jingim bad ka jinglap ki don tang ha ka kti jong u, Ma-u Uba long da shisha u Khun u Blei, u Nonghuh Nongthaw, u Nongpynlong-pynman, u Nongbuhbynta bad u Nong-sambynta. Kiwei pat ki bor bad ki iktiar ki don hapoh jong U. Da kane u Jisu u kwah ban pynkynmaw ia ki Khristan ha Pergamum ba ki don ha ka liang jong ki Uwei Uba don ka bor bad ka iktiar ka waitlam, kaba kham nep shispah shah ban ia ka jong u Lat Roman ha kato ka nongbah Kane ka dei ban pynshngaiñ ia ki hapdeng ki jingjynjar sat jong ki.

Nangta u Jisu u ong ba U tip lut ia kiei kiei baroh ki-ba jia ha kato ka Nongbah Pergamum, ha kaba ki Khristan ki don la ki iing ki sem bad ki shong-iing-trai. Ia ki kyntien "phi shong-iing-trai" ngi la ring jing mut na ka kyntien "Katikis" ha ka Grik, kaba wan na ka berb "Katikeo", kaba mut ban shong ha iing la jong kum u trai, ym kum u wanwir wanhap ne u palatshnong kum-ba ki ong, kaba mut ban shongneh shongsah. Kata ka mut ba ki Khristan ki dei ki "Katiki", ki nongshong, neh ha Pergamum bad kim dei ki "Pariki" (berb parikeo: ban shongbasa kum u wanwir wanhap shipor). Ha ka Jynthoh Bakhuid (I Pt. 2:11) la ju pynfasyriem ia ki Khristan bad kine ki "pariki", ki wanwir wanhap, ki palatshnong ne ki barshnong. Dei na kane ka kyntien "Parikeo-parikia, parikos) ba ka wan ka kyntien Parish, kaba mut ka jaka shongbasa shipor, ka jaka sahmiel sahiong, ki sohshnong sohthaw. Hynrei hangne ym shym nam ia ki Khristan ki sohshnong, ki wanwir wanhap shipor, hynrei ki trai iing trai sem, kiba dei ban sah hangto hi bad kim bit ban phet ne mih na ka shnong Pergamum. Hangne u nongthoh jong ka Kitab jing pynpaw u batai bad u pynshai shuh-shuh ia ka jingaiñ

jong kine ki kyntien u Jisu, "Ngam pan ba phin shim noh ia ki na ka pyrthei, hynrei ba phin iada ia ki na u Bymman (Io. 17 : 15)." Namarkata, ki Khristan ki dei ban sah ha ka pyrthei katkum ka saindur u Blei, namarba ka jingdon jong ki ka long kaba donkam. Kito kiwei pat ki kyntien u Jisu, "Haba ki pynshitom-bein ia phi ha kawei ka shnong, to phet noh sha kawei pat, kim pyrshah ia kane ka hukum ban sah ha kajuh ka jaka, namarba ki lah ban don ki khap ha kiba ki Khristan ki dei ban sah hajuh namar ka jingdonkam jong ka Balang, khamtam eh haba ki dei ki trai-shnong naduh basdang, ym ki sohshnong kiba la shu poi ryngkhat sha kano kano ka shnong. Te u Jisu u iarah ia ki Khristan ha Pergamum ba ki iaineh bi triang, ym tang ha ka jingngeit, hynrei ha ka jaka shong jaka sah ruh ban sakhi ia ka jingngeit bad ban pynskhem ia kiwei pat ha ka jingiaineh. Kane ka pyni ba ki Khristan kim dei ban long kiba tiengpud, kim dei ban khaw-eit hynrei ki dei ban shlur, ban tur ia ki jingeh bad ban jop thiaw ia ki.

**HA KABA IENG KA KHET U SOITAN :** Kine ki kyntien ki kdew ia ka jingmane-blei ia u Kaisar bad ia ka blei Roma ha ka shnong Pergamum. Namarba kane ka mane-blei ia u Kaisar bad ka blei Roma ka la suhthied bha ha kane ka shnong, la pyniasyriem ia ka bad ka khet ha kaba u ksuid u shongneh. Ym shym don nongbah ha kaba kane ka mane-blei ia u kaisar bad ia ka blei Roma ka la kham shongshit ban ha Pergamum. Namar-kata kane ka dei ka Pap ka Sang ka kbrau tam, u ksuid khlempep u kmen u sngewbha bad u la pynlong ia ka Duwan, ha kaba la thang ia ka dhup ha u Kaisar, kum ka khet jong u.

**PHI BAT SKHEM TRIANG IA KA KYRTENG JONG NGA :** Ngi la kdew ia ka jingmut jong ka berb Grik "krateo", kaba mut ban bat skhem khlem da pylait shuh, jia katba jia. Ngi la batai ruh ba ka "Kyr-teng" ka thew ia u briew. Te ka kyrteng u Jisu ka mut "U Jisu bi uba trei kam ha ka shnong Peramum." Kane ka pyni ba ki Khristan ha Pergamum ki ngeit skhem ha u Jisu bad ki pynpaw ia kane ka jingngeit



jong ki ha kiwei pat khlem tieng khlem riej. U Jisu u iarah ia kane ka jingngeit jong ki. Hynrei hangne ka "Kyrteŋ" ka thew ruh ia ki kyn-tien ba ki briew ki khlei haba ki thang dhup ha ka duwan u Kaisar, da kaba ong, "U Kaisar u Kynrad!" Te ki Khristan kim ju pyrta kumne hynrei ki pyrta pynban "U Jisu u Kynrad!". Ki bat triang ia kane ka kyrteŋ u Jisu kum u kynrad jong kiei kiei baroh.

**PHIM SHYM LEN IA KA JINGNGEIT HA NGA:**  
Kine ki kyntien ki thew ia ka jingngeit tang ha u Jisu ba u long u Blei, ym ha kiwei pat ki blei ne u Kaisar. Ban thang dhup ha u Kaisar ka dei ka jinglen ia la ka jingngeit. Ki Khristan ha Pergamum kim ju leh ia kane. Ki kyntait ban pynhap wat shi-symboh ka dhup ha ka duwan u Kaisar bad kim ju pyrta, "U Kaisar u Kynrad", hynrei barabor, "U Jisu Khrist u Trai Kynrad!" Bad ki Khristan ki la phla ia la ka jingngeit ha ki sngi jong ka jingshah pynshitom-beiñ haduh katta katta bad uwei na ki u la shah pynlap shykhei : U Antipas !

**U ANTIPAS, U SAKHI BAIAINEH :** Hangne u Jisu u iarah bad u pyrto ia ka jingngeit bad jingshlur jong uwei na ki Khristan ha Pergamum, u Antipas. Shaphang une u Antipas ngim tip eiei shuh laitnoh tang kane ka jingiaroh na u Jisu Khrist hi. Ka parom te ka don ba hana u la shah set hapoh kpoh jong uwei u u masi-rnong bad u la shah sdieh haduh ban da iap. Kane ka lah ban long. Ki nongshun jong ki Khristan ki la ju leh kum kine ki kampap ruh. Shuh-shuh, u Jisu u ai nam ia u Antipas da kaba khot ia u "U SAKHI." Kane khlempep ka mut ha u Antipas u la ialap shaphang u Jisu khlem tieng khlem riej ha ka shnong Pergamum bad haba u la shah kem bad shah pynbor ban thang dhup, um shym treh bad u la pyrta pynban "U Jisu u Trai Kynrad!" U la sakhi ia u Jisu da ka ktien, da ki kam bad da ka jingim. U la im pura bad janai kum u Khristan. Hynrei hangne kane ka kyntien "Sakhi" ha ka Khasi bad "Martis" ha ka Grik ka don sa kawei ka jingmut bad kata ka dei ka jingshah pynlap na ka bynta ka jingngeit. Nangne ngi loh ia ka rukom kren "Ban iap martir." Da shr-

sha uba iap martir u dei u sakhi uba janai tam. Ym don kawei pat ka sakhi jong ka jingngeit kaba kham khraw ban ia ka jingkloi ban shah pyulap na ka bynta ka kyrteng u Jisu. Ka dei ruh ka dak ka shin jong ka jingieid kaba khraw tam. Kane ka nam ba u Jisu u ai ha u Antipas ka dei kato kajuha ka nam ba u nongthoh jong ka Kitab Jingpynpaw u ai ha u Jisu hi (Jpw 1:5). Te u Antipas u la long uba iaineh haduh kaba kut bad u dei ruh u Khristan uba shida, u bahok, ia uba lah ban shaniah nadong shadong. Um ju lamler, um ju thok. Ki ktien bad ki jingpyrkhat ki iadei-dur. Da shisha u la long u Khristan uba nylla. Te u Antipas u dawa da shisha ia kane ka nam bad ka burom

**Ha ..BA U SOITAN U DON IING DON SEM:**  
 Kumba ngi la batai haneng, kine ki kyntien ki kdew ia ka jingmane-blei ia u Kaisar bad ia ka blei Roma. Hangne ngi iohi ba u Ksuid ruh u dei u "Katikos" kata u trai-ling ha Pergamum, ym tang u "Parikos", kata u wanwir wanhap ne u barshnong. U Ksuid u shongneh shongduh ha Pergamum ha ka dur ka mane-blei ia u Kaisar bad ia ka blei Roma. Da shisha kane ka Pap ka Sang ka la long trai na Pergamum kum ka Nongbah jong ka Jylla Roman, ka nong-ialam ha kane ka mane-blei ia u Kaisar, kaba long ka mane-ksuid mane-khrei.

### (b) KA PYNREM (2:14-15)

Hadien ka jingiaroh bad ka pyrto pyndonburom, u Jisu um banse ban kynthoh bad ban pyrem ia ki bun ki Khristan ha Pergamum, kiba ialam bakla ia ki paitbah ban pyrthubbud ia ka jinghikai u Balaam bad ban bam dohkña bad ban leh awria kum ki Nikolait. Ngila kren haneng shaphang u Balaam, u Balak bad ki Nikolait (Jpw 2:6). Ha ka jingsugewthuh jong ngi, ki Nikolait bad ki nongbud u Balaam ki dei ki ar kynhun ki Khristan hi, hynrei kiba don ka jingsugewthuh kaba bakla ha ki katto katne kiei kiei kiba ktah bha ia ka jingim ki Khristan. Ki nongbud jong u Balaam bad ki jinghikai jong u ki ialam sha ka jingmane bleithaw da kaba iasylok khlem sngewthuh bad ki jentil,

kibym pat long Khristan. Ka long malu-mala kum kataba kaba ki khot ka "Ecumenism" kaba palat ia u pud, kaba hikai ba ban iasyllok ka mut ban ia-lohbynta lem ha ki njam ki rukom jong ki, khamtam eh ha ka knia ka khriam jong ki bad ban iabam ia u dkhot u dkhai na ka duwan dupat jong ki. Kane ka dei ka jingma kataba knraw na ka bynta ki Khristan ha Pergamum bad ka mih na kine ki Khristan kiba la shah ialam bakla. Ha kine ki sngi ruh ki dang don kum kine ki Khristan, wat ha kane ka Ri India jong ngi ruh. Ki pynlong ki jingiaseng da kaba pule lang ia ka Jynthoh Bakhuid bad kiwei pat ki jynthoh kibym iadei-dur, ki ianam lang ia u Jisu, ia u Khrishna, ia u Vishnu ne u Siva bad kumta ter-ter Kine ki dei ki nongbteng jong ki jyn-leh jynkam jong ki nongbud u Balaam kumba ngi la batai. Baroh ngi iohi ba hangne ka don ka jingma na ka bynta ka jingngeit. Kane ka kynia "Ecumenism" kam iarap eiei. Bad kumta u Jisu hi u pynrem ia ka bad ia kito baroh kiba pyrshang ban pynsniewdur ia ka Balang ha kane ka rukom.

Shaphang ka dohknia ruh ngi la batai haneng. Hapdeng jong ngi ki khun u Hynniewtrep, ym don dohknia namarba ngim ju knia mrad ha u Blei. U don tang u dkhot u lamjew ne u dkhot u dkhai jong kawei pa kawei ka kur ia uba tang ki dkhot jong ka kur ki lah ban iabam iasip. Ban ai ha kiwei kibym dei na ka kur, ka dei ka Pap ka Sang. Hynrei hapdeng ki Grik bad ki Roman ka la don ka knia-mrad ha ki blei jong ki bad ka jingiabam ia ka dohknia ka dei kawei na ki bynta bakongsan jong kane ka mane bleithaw. Te ban leit bam dohknia ha ki tempyl ne ha ki jingialang jong ki, ka long thik kumba ia-loh bynta lem ha ka mane blei-thaw, ia kaba ki Khristan ki dei ban kiar raimaw raidieng. Kine ki nongbud ia ka jinghikai u Balaam ki ong ba ki dei ban pyni ia la ka jingkylluid mynsiem da kaba iabam ia ka dohknia ki Grik bad ki Roman wat ha ki tempyl jong ki ruh. Ka shai-kdar ba ki Khristan hi kim lah ban leh ia kane. Te u Jisu hi u la pynrem ia kane ka jingiabam dohknia ha ki tempyl bad ha ki jingialang jong ki nongmane, bleithaw.

Ki Niko'ait ruh ki dei ki Khristan hi, kiba nam ia

lade kum ki 'riewpyrkhat bad kiba tip lut ia kiei kiei. Ki ong ba u Jisu u la wan rah ka jinglailuid. Te kumta ngi lah ban leh ia kiei kiei katba ngi mon. Ka Pap kam ktah ia ka mynsiem hynrei tang ia ka met, kaba sniew baduh katta katta ba ym lah shuh hi ban pynbha ia ka. Kane ka met, ki ong, ka don ki jingkwah-brai, ia kiba lah ban pynhun katba mon namarba kim ktah ia ka mynsiem. Te ki shah ban leh awria, ban leh nuti bad ban im dakaid. Ka shaikdar ba kane ka rukom pyrkhat kam iadei-dur satia bad ka jingim Khristan Te u Jisu u pynrem jur ia ki Nikolait na kane ka daw. Te sniewbok ba ki Khristan kiba bha ha Pergamum kim shym kyndat shisyndon sharud ia kine ki jinghikai kiba bakla haduh ba u Jisu u dei ban mai tynggeh da kaba ong, "Phi ri phi kdup ia ki Nikolait", kata ka mut, ki Khristan kiba bha kumno re kumno ki la kum ailad ia ki Nikolait ban pynphriang ia la ka jinghikai kaba bakla.

#### **c) KA KYNTU BAD KA SNENG KA KRAW (2:16a)**

Ki Khristan ha Pergamum ki la shah ialam bakla ha kiwei pat ki para Khristan kiba kwah ban leh 'riewpyrthei. Hynrei ka dang don ka jingkyrmen na ka bynta jong ki. Ki dang lah ban kylla kaba mut kumba ngi la batai haneng. Ban kylla kaba mut, kaba wan na ka berb Grik "Metanoeo", ka mut ban kylla ka rukom pyrkhat pyrdajñ, ka rukom ngeit bad ka rukom ñiewkor bad khejñ kor ia kiei kiei ha kane ka pyrthei. Ka mut ban pyrkhat da kumwei pat bad ban leh da kumwei pat katkum ka saifdur jong u Blei. Kim dei shuh ban pyrkhat bad ban leh kumba pyrkhat bad leh ki nongbud u Balaam bad ki Nikolait.

#### **d) KA BYRNGEM (2:16b)**

Hynrei lada ki Khristan ha Pergamum kim kylla ka rukom pyrkhat bad ka rukom leh ha ka jingladei bad ki nongbud u Balaam bad ki Nikolait, u Jisu. Uba bat ia ka waitlam arliang-syrti, Uba don ka bor bad ka

iktiaŕ ka iingiap bad ka jingim (ius gladii), un wan hiarthma ia kito ki nonghikai bakla. Te u Jisu u ong, "Ngan ialeh thma bad ki." "Bad ki" ka mut bad kito ki Khristan kiba hikai bad ialam bakla ia ki paitbah. U Jisu um ong, "Ngan ialeh thma bad phi", kata bad ki Khristan, namarba kine ki la kum shah ialam bakla. Hynrei ia kito ki Khristan, kiba ialam bakla ia kiwei, u Jisu un ialeh da ka waitlam jong u, kata ka mut da ka bor bad ka iktiaŕ ba u la ioh na u Kpa jong u. Ha ka rukom pyrkhat jong ki briew, ka thma ka dei ka dak ka shin jong ka jinglashun haduh ban ia umsnam, haduh ka jingiap, haduh ban da lyko hi pom. Ka thma ka dei kaei kaei kaba shyrkhei namarba ka thew beit ia ka waitlam, ka phlei snam bad ka jingiap.

#### e) KA KHUSNAM(2:17)

U Jisu mynta u kular ka bainong bad ka khusnam ha kito ki Khristan kiba iai-ialeh bad iai'op shi jop ha ka jingim jong ki haduh kaba kut. U kular ban ai ban bam na u manna ba la buhrieŕ bad ban pynkham-ti ia u mawlieh ha uba la thoh kawei ka kyrteng kaba thymmai. U-ei une u manna ba la buhrieŕ? U-ei une u mawlieh ha uba la thoh ne pruid ia ka kyrteng ba-thymmai?

#### i) U MANNA BA LA BUHRIEH

Ki nongpule ki la iohsngew shaphang u manna ba ki khun Israel ki la bam ha ka por ba ki dang laidwir ha ki thaiŕ Sinai (Eks. 16:11-15). Na ka bynta ki khun Israel kane ka jynbam ka la long kaei kaei kaba phylla. Ka la bsa ia ki da ki snem bad kim lah shuh ban klet ia ka. La ong ba u manna u la hap na bneng. Da ki kyntien "Bneng", ka Jynthoh Bakhuid kam mut tang ka suifi ne ka sahit, hynrei ha ka Baibyl "Ka Bneng" ka mut u Blei hi. Ka Hima ka Bneng ne ki Bneng ka mut ka Hima u Blei. Te kumta haba ki ong u manna u la hap na bneng, ngim dei ban mutdur ba ki la iohi ia u

manna u ba hap kum u slap na suiñ. Em; ka Jynthoh Bakhuid ka mut ban ong ba u Blei u la pynkhreh ia u manna kum ka bam na ka bynta ki khun Israel ha ka por ba ki donkain bad kim don jynbam shuh ban im. Dei u Blei Uba la pyndap pynbiang ia ki.

Ha ka jingshisha bad katkum ka Geography, ha ki sharing lum Sinai bad ha ki them, ha kita ki por, la don u kynja dieng, ia uba mynta ki Stad-jynthung ki khot "Tamarix Mannifera." Ha ki por hyndai une u jait diengrit u bun bha ha kito ki jaka. Na une u dieng ka mih ka kynja pnur kaba iasyriem ia ka umkseh. Kane ka jia ha ka por lyiur ha ki bnai Jylliew, Naitung bad Nailar khamtam eh. Ha kine ki bnai uwei u kynja khñiang ne u kynja puit, uba don ka shyntur kaba nep, u puh bad u sam ia ka snep jong une u dieng ban dih ia ka umthiang na u. Ia une u kynja khñiang ne puit ki 'riewstad ki khot "Gossypara Mannipara." Ynda u dep kjit bad kdang, u her noh bad na kato ka jynmong ha u dieng, ka tuid kane ka umthiang bad ka par ha u dieng hi. Ha ka por met, kum ha ka por shiteng-synnia, ha kito ki jaka, kyndit kynsan ka wan ka jingkhriat bad ka pynkylla ia kato ka um kaba par halor ka snep dieng kum u thah, uba lieh bad uba thiang. Ynda la eh kum u thah, u hap sha khyndew bad lah ban tam ia u bad ban bam. Ki ong kito kiba tip ba ha ka por step lah ban iohi ia ka sharing lum ba ka lieh shaid da une u manna.

Ki khun Israel ki la mih na Ijip, hapoh ka jingia-lam u Moses, ha kum u brai Lber, ki la iaïd lyngba ka ri shyiap, ki la jam ia ka Duriaw Basaw, ki la poi sha ki thajñ Sinai ha kum u bnai Jylliew ne Naitung, thik ha ka por ba u manna u ju hap na ki dieng ha ka por miet. Namarba ki la iaïd shi iaïd lynti, ki khun Israel kim don jynbam shuh bad ki la thngan pha. Te ha kane hi ka kkep, kumba la kular da u Moses ba u Blei un ai bam ia ki, ki la iohi ha kawei ka step ia une u manna. Tang shu iohi ki la pyrtä, "Mah-hu? ne "Man-hu?", kaba mut "U-ei une?" Te ki 'riewstad ki ong ba imat ka kyntien "Manna" ka wan na kane ka kyntien "Mah-hu ne Man-hu?" Bad

haba thngan, kano kano ka jynbam ka bang bad ka biang hi ban teh ia ka met bad ka mynsiem. U Blei u la pyndep ia ia ka kular lyngba u Moses. Bad namarba ki khun Israel kim pat ju tip tad kim pat ju iohi ia kum une u jynbam, ha kato hi ka khep, kim banse ban ong ba dei u Blei uba la ai bam ha ki. Bad ka dei da shisha. Kiei kiei baroh ki wan na u Blei, wat u kha u khaw jong ngi ruh. Ha ka por kaba biang, ha ka por ba ki thngan, u Blei u la pyndap pynbiang. Kane keiñ ka dei kata ka dak ka shin kaba kdew ba u Blei u don lem bad ki khun Israel. Ka dei ka kamphylla, ka dei ka kambah kamsan! Kane ka jingjia ka la shoh jingmut shibun ia ki khun Israel bad kim ju klet shuh ia ka lano lano ruh. Ki la iaikynmaw ia ka bad ki la mih bun bun ki parom shaphang jong ka kumba ka ju jia ha kiwei pat ki jait-tynriew ruh. Bad kawei na kine ki parom ka ong ba khyndiat na une u manna la lum lang bad la thep ha uwei u khiew bad la buh ia une u khiew hapoh ka Synduk ka Jutang bad u la neh la sah hapdeng ki khun Israel haduh ka por ba u Nabuchadnezzar, u Syiem Babylon, u la pynjot thiaw ia ka Jerusalem ha kum ka snem 587-536 SK bad ia ka Tempyl ba la tei da u Solomon Shuh-shuh, ka parom ka ong ba ia une u khiew la shim da u Nongiathohlyp. Jeremia bad la buhrieh ha kawei ka synrang-maw ne ka krem-maw ha ki thaiñ Sinai. Une keiñ u dei uta u Manna ba la buhrieh. Hynrei ha ka por jong u Messia, u Jeremia un wanphai biang bad un wan rah biang ia une u manna na ki lum Sinai bad ki khun Israel kin ioh ban bam biang ia u kum mynshuwa. Te "ban bam ia u manna ba la buhrieh" ka mut ban ioh bynta ha ka jingkyrkhu, ha ka suk ka saifi bad ka kmen ka sngewtynnatt ha ka por ba un wan u Messia. Na ka bynta ki Khristan, une u Messia u dei u Jisu hi.

U nongthoh jong kane ka Kitab Jingpynpaw u dei u Ju bad u la pyrkhat kum kiwei pat ki Ju, kiba la khmih lynti dik-dik ia ka jingwan jong u Messia bad kum ka dak ka shin jong ka jingkyrkhu u Blei kin sa ioh ban bam ia une u mana ba la buhrieh. Kumba ngi la ong haneng, na ka bynta ki Khristan, u Jisu u dei u Messia ne u Khrist, ym uwei pat. Te u "manna ba la buhrieh" u

thew ia u Jisu hi. Da kaba kular ban ai ban bam na u manna ba la buhrieh, u Jisu u la kular ban ai ia lade hi ha ki Khristan kum ka Khusnam, ka Khusnam kaba kordor tam : u Jisu Khrist hi !

Na kine kiei kiei, ka paw shai ba ki Ju hyndai ki la bna bha shaphang une u manna na ka Jynthoh Bakhuid bad na ki parom jong ki Ka Jynthoh Bakhuid hi ka nam bunsien ia u manna (Eks. 16:1-35; Jkhn 11:7 9; Ps 78:24-25; Jst 16:20-21; Io 6:49).

U Mawlieh, ha uba la thoh ka kyrting bathymmai, u dei ka Khusnam kaba ar ia kaba u Jisu u la kular ban ai. La ong ba ia kane ka kyrting ym don ba lah ban tip laitnoh kito kiba iohpdjang ia une u mawlieh. Te u-ei une u mawlieh bad kaei kane ka kyrting bathymmai ia kaba ym don ba lah ban tip laitnoh kito kiba iohpdjang ia u mawlieh ?

Nyngkong eh, ngi kwah ban batai ia ki kyntien "balieh bad bathymmai" Naduh ki por hyndai, ka rong lieh ka la ju long ka dak ka shin ka jingkmien, ka jingbhabok bad ka jingjop ruh. Ka dei ka rong jingblei. Ka kyntien Grik kaba la pyndonkam hangne ka dei "lefkos", kaba mut ka ronglieh kaba phyrnai, kaba phalang bad kaba tyngshaiñ kum ka sngi. Kito kiba la iohi ia ka ior ha ka por ba tyngshaiñ ka sngi, ki sngewthuh bha ia kane ka jait rong-lieh. Te kano kano kaba lieh ha kane ka rukom, ka dei kaei kaei kaba kyrpang bad kabym ju kham don ha kane ka pyrthei. Ka dei kzei kaei kaba kynja bneng, da shisha ka rong-lieh jingblei.

Ha ka ktien Grik, ki don ar tylli ki kyntien kiba mut "bathymmai": neos, kaba mut kaba thymmai katkum ka por. Kum ka nuksa: lada ngi leit sha Myliem, ngin iohi ia ki kamar kiba thaw waitlyngkut ne mohkbiew, kum ki mohkbiew puh lyngkha. Hadien shi-snem ki thaw kiwei pat; ki dei kiba thymmai, hynrei ynda ngi la khmih-it bha, ngi shem ba ki dei kijuh ki jait mohkbiew. Kim iapher eiei ha ka jinglong: ka juh ka nar, kajuh ka syrti, kajuh ka jingheh. Ka jing-iapher ka long tang ha ka por: ia kine la thaw ha ka snem ba la lah, ia kitañ la thaw ha kane ka snem.



Nangta ka don sa kawei ka kyntien "Kenos", kaba mut "bathymmai hi." Hynrei ka'n dei ka jingthymmai tang ha ka por, ka dei kaba thymmai ha ka jinglong. Kata, ka mut, kano kano kaba long thymmai katkum ka kyntien "kenos", ka mut ba kam shym don mynshuwa; ka dang shu mih mynta hi bad ka iapher baklybak na kiwei pat kiei kiei. Kam don jingladei eiei bad kaba rim. Ka long tang ma-ka marwei, ka long kyrpang da shisha.

Te u maw u lieh phalang, u lieh phyrnai bad u tyngshaiñ, katba ka kyrteŋ pat ka long kaba kyrpang, kabym pat ju don mynno mynno ruh.

Mynta ka jingkylli ka mih, "U-ei une u maw ba-lieh? Kaei kane ka kyrteŋ bathymmai?"

Ki jingbatai jong ki 'riewstad ki bun bha katkum ka jingshem jong ki ia ki jingpyndonkam bapher bapher ia u mawlieh bad ia ka jingmut jong ka kyrteŋ kaba thymmai. Ki bun ki jingbatai namarba u mawlieh bad ka kyrteŋ bathymmai ki dei ki dak ki shin bad ki dur-pharshi, ia kiba u nongthoh ka Jingpynpaw u pyndonkam ban kdew ia kaei kaei kaba ma-u u tip bha bad ia kaei kaei ba ki nongpule jong u ruh ki bna bha namarba u la ai ha ki ia u shabi kumban ong noh. Hynrei ma-ngi mynta ngim tip shuh ia une u shabi bad kumta ngim banse ban shu ring jingmut na ki jingpyndonkam ia u mawlieh bad ia ka kyrteŋ bathymmai.

Kawei na ki jingpyndonkam ia ki maw pyllon barit, kiba lieh, ka long ban deng ia kine ban bat kum ki kynja kuboit. Teng teng ki lah ruh ban long ki mawkordor, hynrei bunsien hi ki dei ki maw balieh salonsar. Ha kine ki maw la pruid ne la thoh ia ka kyrteŋ jong uwei u blei, tharai kum u blei Asklepios, u blei ka jingkoit jingkhiah. Ki Grik bad ki Roman ki ngeit ba uno uno ne kano kano, kiba ioh ia une u mawlieh, ha uba la thoh ia ka kyrteŋ uwei u blei, ka kyrteŋ kaba u dei ban tip tang ma-u ne ma-ka, ki la ioh kaei kaei kaba kordor haduh katta katta, ki la ioh ka borblei hi, namarba da kaba tip ia kane ka kyrteŋ, ki lah ban nam ia une u blei ha kano kano ka por bad um banse ban wan ban iarap ia ki. Da kaba tip ia ka kyrteŋ jong uto u blei,

u briew. u lah ban hukum ruh ia u katba u mon bad uto u blei u dei ban kohnguh namarba la nam ia ka kyrteng jong u, ia kaba tang uto u briew hi u tip. Te kiwei kim dei ban tip ia kane ka kyrteng. Lada ki tip, ka bor jong uto u blei ka tlot noh bad kam trei-kam shuh. Kane ka rukom pyrkhat ka don ha kane ka Ri India bad ha ki Lum u Hynñiewtrep. Ki Dkhar ki don kita ki mantras, ha kiba ki nam ia ki kyrteng ki Thakur ai-u-re, ia kiba ki tip tang ma ki hi bad kim bit ban iathuh ha kiwei pat. Kumjuh ruh ki khun u Hynñiewtrep, kiba ai dawai kynbat, ki ngeit ba kim bit ban iathuh ia ka kyrteng u kynbat hano hano, lymda kumta u duh bor noh.

Lada u nongthoh ka Jingpynpaw u la pyndonkam ia kane kaei kaei ba ngi la batai kum ka dak ka shin bad ka dur-pharshi, te u mut ban ong ba une u maw balieh jingblei u dei u Jisu hi, uba iajdon lem bad uno uno ne kano kano ka Khristan. Bad ka kyrteng u Jisu ka dei kaei kaei kaba thymmai da shisha, kabym ju pat don ha ki por ba la leit noh. Bad kumba ngi la batai, ka kyrteng ka thew ia ka jinglong bad ka jingtrei-kam jong u briew. Te ka jinglong jong u Jisu bad ka jingtrei-kam jong u ki long kiba thymmai da shisha, kibym pat ju don mynno mynno. U Ioannis u kwah ban pynkynmaw ia ki Khristan ia kine ki kyntien u Jisu, "Shisha, shisha Nga ong ha phi : lada phi pan eiei na u Kpa ha ka kyrteng jong Nga, Un ai ha phi. Haduh mynta phim pat shym pan eiei ha ka kyrteng jong Nga. To pan bad phin sa iohpdiang khnang ba ka jingkmen jong phi kan dup long kaba pura (1o 16:23-24). "U Jisu u trei-kam bad un leh lut ia kiei kiei kiba ngi donkam ban pura ha ka longbriew manbriew ha ka liang ka met bad ka mynsiem. "Ban tip ia ka kyrteng u Jisu", namarkata, ka mut ban sngew bad ban mad da lade ia ka bor trei-kam jong u Jisu ha ngi iwei pa iwei. Haba kane ka jia, kam paw shabar bad kiwei kim lah ban tip. Ki tip tang kito ha kiba u Jisu u trei-kam ha ka met bad ka mynsiem jong ki. Te da kane ka khu-snām, u Jisu u kular ban ai fa lade hi bad ia ka bor trei-kam jong u bad kumta ki Khristan ki lah ban ong kumba pyrta u Paulus Bakhuld, "Nga lah ban leh

ia kiei kiei baroh ha Uta Uba shanbor ia nga (Philip. 4:13).'

Ki iathuh ki 'riewstad ba hapdeng jong ki Ju ka don ka parom ba lem bad u manna u Blei u la pynhap ruh ki mawkordor. U Nongthoh jong ngi u dei u Ju bad u lah ban mut ia kane ruh. Te u mawlieh u thew ia kiei kiei kiba kordor ba u Blei u la ai bad un sa ai ha ki Khristan. Kumta kin nym duna eiei ha ki liang baroh jong ka jingim.

Shuh-shuh ki 'riewstad ki ong ba ha ki por hyndai ka la don ka dustur ban pyndonkam ia ki kynja tiket ia kiba la ju khot ha ka Latin ki "Tesserae". Haduh mynta mynne ki dang pyndonkam ia kane ka kyntien Latin "tessera" ha Rom bad ha kiwei pat ki jaka ha Italy. La shna ia kine ki "tesserae" da ki dieng ne ki nar bad ki lah ruh ban long ki maw. Halor kine ki kynja tiket la thoh eiei ruh ban pyni ia ka hok jong kito kiba bat ia ki, ban leh eiei ne ban ioh eiei.

Nyngkong eh, ha ka Hima-bah Roman ki la ju don ki jingialehkai ha ki Stadium. Ia u nongjop la ju ai ia kane ka tiket ne ka tessera, da kaba u lah ban rung ei khlem siew eiei ha kano kano ka lympung ialehkai ne leh sngewbha kum ha ki thiatar bad kiwei kiwei ki jaka. Lada u Ioannis u mut ban pyndonkam ia kane ka dak ka shin bad ka dur-pharshi, u mut ban ong ba ki Khristan kiba bha ki don ka hok ban ioh bynta ha ka jingim-blei, ha ka nam bad ka burom hakhmat u Blei. Ym don ba lah ban khang ia ki ban rung sha ka lympung-blei. Ki la ioh lypa ka tiket da kaba la ithuh ia ka hok jong ki.

Nangta ha ka Nongbah Rom ki la ju don ki jingialeh makynti ha ka Lympung Arena, ba ki ong, hapdeng ki 'riewtalaiñwait (gladiators) bad kine ki ju ialeh haduh ka jingiap ban pynsngewbha ia u Patsba, ia ki Bakhrav Batri bad ia ki paitbah Roman ha kate ka por. Lada jia ba don uwei na kine ki 'riewtalaiñwait uba la jop shi jop bad uba la pynsngewbha ia ki paitbah, khatduh khatwai ha ka jinglong tymmen, une u ioh ia kane ka tiket tessera ha kaba la thoh SP, Spectatus, kata ka mut u 'radbah bad u 'riewshlur byn lah shuh ban artatien da lei-lei. Kat shaba u lei, ia

burom ia u. Mynta lada u nongthoh jong ngi u la pyn-donkam ia kane ka dak ka shin bad ka dur-pharshi, te u mut ban ong ba ki Khristan ki dei ki radbah bad ki 'riewshlur bad kumta ki dawa ka burom, ka nam bad ka jingsuk kynjai khatduh khatwai.

Khatduh eh, ha ka Nongbah Rom hi, ka la don kawei ka dustur hapdeng ki heh ki haiñ kiba riwspah, ba ki ju don ki kynja paralok ba ki ieid thepmynsiem, ia kiba ki ju khot "Clientes" (nangne ka wan ka kyn-tien Phareng "Client"). Kine ki paralok bakyrpang ki ju ioh na kine ki heh ki haiñ ka kynja tiket tessera da kaba la ithuh ia ki da baroh. Man ka sngi ki rah ia kane ka tiket tessera, ki pyni ha kito ki heh ki haiñ bad ki ioh ka bam ka sa bad kiei kiei ba ki donkam. Kane ka tiket tessera ka iasyriem ia ka "Ration Card" jong ngi mynta Lada ka dei kane ka dak ka shin bad ka dur-phyrshi ba u nongthoh u pyndonkam, te u mut ban ong ba ki Khristan, namar ka jingim jong ki, ki ioh ka hok ban iohpdang na u Blei ia kiei kiei ba ki donkam ha ka jingim. Ki don ka dak da kaba u Blei u ithuh ia ki bad kumta ki ioh kat kaba ki pan bad ki donkam.

Nangta ki 'riewstad ki la shem ruh ba la ju pyn-donkam ia ki mawiong bad ki mawlieh da ki nongbishar haba ki rai pynrem ne pynksan. U mawiong u thew ia ka jingpynrem bad u mawlieh ia ka jingpynksan. Kumta hadien ka jingbishar bad ka jingiasaid, ki nong-bishar ki thep u mawiong ne u mawlieh ha uwei u khiew. Ki sei ia ki bad ki ñiew. Lada bun u mawlieh, ka mut ba la pynksan ; lada bun pat de ki mawiong, u briew u la shah pynrem. Lada kane ka dei ka dur-pharshi, u Jisu u mut ban ong ba ki Khristan ki la lait na ka jingshah pynrem bad la pynksan ia ki bakhmat u Blei. Ki nym shah pynrem shuh, namarba lyngba u Jisu Khrist hi ki la lait na ki pap ki sang jong ki baroh. Ki la khuid phar bad ki la kylla long kiba lui-lui.

Shuh-shuh, ka don ka khanatang ba hapdeng ki nong Thracia bad ki nong-Scythia ka la don kawei ka dustur ban tip, ha ka jinglong tymmen, lada ka jingim jong ki ka la long kaba suk ne kaba jynjar. Ki buh uwei

u khiew ha iing. Ha kano kano ka sngi kaba suk kaba saiñ, kaba bha kaba miat- ki thep u mawlieh. Ha ka sngi ba ki jynjar ki lanot, ki thep ki mawlong. Ha ka jinglong tymmen, shuwa ban kut ka jingim, ki sei ia kine ki maw, ki ñiew ia ki. Lada bun ki mawlieh, ka mut ba ka jingim ka la long kaba suk basaiñ bha. Lada bun ki mawlong, ka thew ba ka jingim ka la long kaba jynjar-sat. Dei kane ka dustur kaba la pynlong ia ki 'riewhyndai ban nam ia ka sngi kaba suk, ka sngi kaba lieh-phar bad kane ka dustur ka la poi sha Gris bad sha Rom ruh. La parom ba uwei na ki radbah jong ka Gris, u Pericles, u la pyndonkam ia kane ka dustur ban iarap ia ki shipai jong u ban nym sngewthait ha ka por ba ki dang kerkut ia ka Samos, kaba khlaiñ bad kumta kim shym lah ban jop ia ka ha ki kyndiat sngi. U la phiah ia ki shipai ha ki phra kynhun. Man ka sngi ki iakhalai nusip Ki pyndonkam, da ki sym-bai-phniang tohtari ne rymbai-ja. Uwei na kita u dei uba lieh. Te ka kyahun kaba ioh ia une u phniang ne u symbai balieh, ka ioh shuti ban iakmen iasngewbha baroh shi sngi. Ia kane ka sngi la ñiew kum ka sngi kaba lieh na ka bynta kato ka kynhun. Kumjuh ruh ha ka Nongbah Rom, ia ki sngi ha kiba ki briew ki jop ne ki iohnong ne ka jia eiei kaba bha, la ñiew kum ki sngi balieh bad la ju ong ba la pynkyrpang ne pynshynna ia ki da u maw balieh tam. Te lada u nongthoh jong ngi u la pyndonkam ia kane ka dur-pharshi, u Jisu u kular ha ki Khristan ia ka jingkmén bad jingsuk kabym kut shuh. Yn nym don shuh ka syep ka syar, yn nym don shuh ka kit ka bah, hyndei tang ka shuti bad ka suk ka saiñ.

Nangta ka don sa kawei ka dustur ha ki por hyn-dai, mynba kim pat ioh lañ ban ioh ki kot ban buh jingkménaw kum haba ñiew ia ki pisa ki tyngka ne kiei kiei. Te ki ju pyndonkam ia ki mawlieh ne ki maw-saw ne mawlong katkum ka jingkwah jong ki. Lada ka dei kane ka dur-pharshi, te u Jisu u mut ban ong ba ia ki Khristan ha Pergamum la ñiew lang bad kiwei pat ki khun jong u Blei ha bneng bad ha khyndew, la kyntiew, kumban ong noh, ia ki kyrteng jong ki ha ki ri-jister bad la kheiñ lang ia ki bad kiwei pat ha ka

## Hima u Blei.

Khatduh eh, ba ka jingidei bad ka kyrteng bathymmai, ka don kawei ka dustur kaba ngi shem ha ka Jynthoh Bakhuid hi bad ha kiwei pat ki jaitbynriew ruh. Ki ju shim ka kyrteng kaba thymmai haba ki kylla jingim ne haba ki shimti ia kawei pat ka kam kaba kyrpang. Ha ka Bajbyl ngi lap bun ki nuksa. Ia u Abram la khot noh u Abraham hadien ba u Blei u la jied ia u ban long u Thawlang jong ka jaitbynriew kaba khraw (Jen.17:5) Kumjuh ruh ia u Jakob la nam noh Israel hadien ba u la jop ia u Angel ha ka jing-iakura bad u la kylla ka jinglong bad ka kam ha ka histori (Jen.32:28). Ha kajuh ka rukom, ia u Simon la jer pat "Kephas ne Petrus" da u Jisu hi hadien ba U la jied ia u Simon kum u nongbud jong u (Mk.3:16). Wat ia ka jaitbynriew ruh la ju kylla kyrteng haba ka jinglong jong ka ka kylla bak-lybak, haba na ka jing-jem rngiew ka poi sha ka burom ka ijot kumba ka la jia bunsien ha u paid Israel bad kumba ki nongiathuh-lypa ki la kular (Is.62:2). Ka kyrteng bathymmai ka pyni ia ka kyrdan bathymmai jong ka jaitbynriew Israel. Haduh mynta mynne ka dang im kane ka dustur ha ka jingidei bad u Kpa Bakhuid ha Rom. Ynda la jied Kpa Bakhuid iano iano, ia ka kyrteng ruh la kylla. Ia une u Kpa Bakhuid bamynta la ju tip kum u Karol, hynrei ynda la jied Kpa Bakhuid ia u, la nam pat ia u kum u John Paulus II. Kane ka dustur ka la wan na ki Ju. Shuh-shuh, la iathuh ba ha Palestina, ki briew ki ju ai kyrteng thymmai ia uno uno u nongpang khnangba un koit noh. Ki ju ai da ka kyrteng u radbah ha ka longbriew manbriew. Lada kane ka dei ka dur-pharshi ba u nongthoh u mut, u Jisu u kular ha ki Khristan kiba iaineh bad kiba skhem ka jingngeit ia ka kyrdan kaba thymmai, ka burom ka ijot bathymmai bad ka bor ka iktiar bathymmai. Ka jingim, ka jinglong bad ka kyrdan jong ki ki iapher bak-lybak na ki por ba la lah. Ki dei kiba thymmai ha ka kyrdan, ka nam bad ka burom.

Mynta ka jingkylli ka mih: Kaei ka dur-pharshi ba u Ioannis u mut? Ka long kaba eh ban jubab namarba ngim tip shuh ia u shabi. Hynrei ha ka

jingsngew jong ngi, ka dur-pharshi jong u. maw, pylon balieh bad ka kirteng u blei aiu-re ki kham ia-dei-dur. Hynrei ki nongpule ki lah ban jied katba ki mon. Ki dur-pharshi baroh ki biang hi, khamtam eh ka dur-pharshi banyngkong, namar ka kirteng kaba thymmai ia kaba ym don ba lah ban tip laitnoh uto uba lohpdjang ia u mawlieh. Da kane u Jisu u mut ban ong ba u dei Ma-u uta u mawlieh ne u Jyndeng, Uba lah ban iada ia ki Khristan na kano kano ka jingsniew ne ka jingma, namarba U iaitrei-kam khlem sangeh ha kito baroh kiba ngeit, kiba ieid bad kiba pdiang ia U.

iv) KA SHITHI SHA KI KHRISTAN HA  
THIATIRA (Jpw 2:18-29)

- 18 Ha u Angel ka Balang ha Thiatira, to thoh; U Khun u Blei, Uba don ki khmat *kiba* kum ka thylliej-ding, Uba ki kiat jong U kiba kum ka rnong ba la saifi phynai, u ong ia kine kiei kiei: 19 Nga tip bha ia ki kam jong phi, ia ka jingieid, ka jingngeit, ka jing-shakri bad ka jingiaishah satar jong phi. *Nga tip bha ruh* ia ki kam bakhatdub jong phi, kiba kham bun ban ia *kito* kiba mynshuwa. 20 La jar katta, Nga don *kane* pyrshah ia phi: phi shah ia ka longkmie Jesebel, kaba nam ia iade *kum* ka nongiathuhlypa, kaba hikai bad ialam bakla ia ki shakri jong Nga ban leh awria bad ban bam ia ka dohkia. 21 Nga la ai ha ka ia ka por ban kylla kaba mut, hynrei kam treh ban kylla kaba mut na ka jingleh-awria jong ka.
22. Hakhmih, Ngan bret ia ka ha ka jynthiah *pang* bad ia kito, kiba iaklim bad ka Ngan *lynshop* ha ka jinginyar-sat kaba khraw lada kim kylla kaba mut *bad iehnoh* ia ki kam *bymman* jong ka, 23 bad ia ki khun jong ka Ngan tangon pyniap, bad ki Balang baroh kin tip ba Nga dei Ma-nga Uba *lohi shai bad* bishar-bniah ia ki jingmut-jingkwah bad ia ki dohndud bad Ngan ai ha uwei pa uwei na phi katkum ki kam jong phi. 24 Mynta Nga kren sa ha phi kiwei pat kiba don ha Thiatira, kito kibym pat bud ia

kane ka jinghikai, kito kibym pat tip ia ki thwei *ba-jylliew jong ki buit-siantu* jong u Soitan, kumba ki khot ia ki : Ngan nym pynkit eiei shuh halor jong phi. 25 La kumno kumno, to bat skhem ia kaba phi don haduh ba Ngan da wan.

- 26 Ha uta, uba iaijop bad uba iai-imsngi *ban leh* ia ki kam jong Nga haduh kaba kut, Ngan ai ka bor bad ka iktiar halor ki jaitbynriew, 27 bad Un sharai ia ki da u diengduh-nar bad Un pynpait lyngkhot-lyngkhai ia ki kum ki khiew khyndew. 28 *Hooïd Ngan ai ia ka bor bad ka iktiar* kumba Ma-nga Nga la iohpdjang ia ka na u Kpa jong Nga; bad Ngan ai ha u ia u 'lurstep. 29 Jar uba don shkor, to un sngap ia kaba u Mynsiem u ong ha ki Balang.

Na ki shithi baroh, kane ka shithi sha ka Balang ha Thiātira ka long kaba jrong tam, wat lada ka shnong Thiātira hi kam shym long ka shnong kaba khraw ne kaba kongsan ha kito ki por. Ha ka jingshisha, ka long kawei na ki shnong kibym shym da pawnam haduh katta katta. Kam shym dei ka ktem ne ka lympung jong ka jingmane blei ia u Kaisar bad ki Khristan ha kane ka shnong kim shym shah pynshitom eiei na ka liang ka niam. Imat ym shym don tempyl eiei ha u Kaisar ne ha ka blei Roma. Ka la don tang kawei ka kynja iingmane ha kaba la ju iathuh ia kiei kiei kiban jia ha ki briew kum ha Delphi. Kaba leh bad pyndep ia kane ka kam ka dei kawei ka kynthei, ia kaba la jer ka "Sambathe." Lait na kane, ym don eiei shuh ha Thiātira na ka liang jong ki jentil. Hynrei ka shithi te ka jrong bad kane ka pyni ba don eiei da shisha ha kato ka shnong. Khnang ba ngin sngewthuh bha, ngin khanatang khyndiat shaphang ka shnong Thiātira.

Ka khanatang ka ong ba ia ka shnong Thiātira la seng da u Syiem Seleucos I hadien ba ka Hima-bah u Alexander ka la shah pharia ha ki jernel jong u. La seng ia ka ha kum ka spah snem kaba lai SK harud ka Wah Lycus, kaba ka them jong ka ka pynia-snoh, kum ka jynkiehng, ia ki thembah ka Wah Her-



mus bad ka Wah Kaicus. Bad dei nangne ba ka laid ka lyntibah jong ka khaii ka pateng, kaba sdang na Pergamum, ka poi sha Sardis bad na Sardis sha Philadephia, sha Laodisea bad sha kiwei kiwei ki jaka. Ka dei kane ka lynti ba ki nonglam khubor bad ki nongrah shithi ki pyndonkam ban pathai khubor kyl-leng kylleng. Na kane ka daw, ka Thiatira ka la long kawei na ki shnong ha kiba ka khaii ka pateng ka laid bha, bad ka ioh ka kot ka biang bha ha ki bun ki liang, khamtam eh ha ka liang ka thain ka wet, ka airong ia ki jain, ka trei-snieh, ka trei-nar, trei-rnong bad kiwei kiwei ki kam. Ka pawnam bha ha kata ka airong sawbthuh (purple industry). Kawei na kine ki nongtrei ha kane ka kam ka la poi sha ka shnong Philippi ha Ri Gris bad ka dei kawei na ki Khristan banyngkong jong u Paulus Bakhuid ha kato ka shnong. Te haba peit na kane ka liang jong ka trei ka ktah, ka Thiatira ka la pawnam (Kam 16:14). Bad kaba la pynpawnam bha ia ka Thiatira ka dei ka jingengrasong jong ki kynhun bapher bapher hapdeng ki nongtrei nongktah. Kine ki kynhun ki la-syriem ia ki kynhun bud-bara ha ka Them Ribhoi ne kita ki "Trade Unions" ba ki ong ha kine ki sngi. Te kito kiba trei ia kajuha ka kam ki la pynlong kawei ka seng ban iarap ia ki ban kiew irat ha kato ka kam ba ki trei, kum ka seng kiba trei 'saiwul bad kiba thain ki jaiwul, ka seng ki kamar bad ki nongtrei-rnong, ka seng ki nongthaw-khiew, ka seng ki nong-shna snieh, ka seng ki nongthain jaisala, ka seng ki nongairong, ka seng ki nongsuhjain, ka seng ki nong-die-soh die-pai, ka seng ki nongkhain, ka seng ki nong-shet-ruti, ka seng ki nongkhain-bleng, ka seng ki nong-khain-mraw bad kumta ter-ter. Uwei pa uwei u trai-shnong u dei ban don la kumno kumno ha kawei na kine ki seng-trei seng-ktah. Ka la long kaba eh ba uno uno un lait na kine ki seng. Ban pynlatehsong ia ki dkhot jong kano kano ka seng, ki dkhot jong ka ki ju iabam khawai bunsien, ha kaba baroh ki dei ban lakynduh, ban ithuh kiwei ia kiwei bad ban sngew kum shihymmen shipara ha ka kam ka jam. Bad ia kine ki jingkhawai ki ju pynlong ha ki tempyt

jong ki blei-thaw, ha kiba, shuwa ba kin iabam iadih, ki ju kñia ia ki mrad ha ki blei-thaw jong ki. Kum ka nuksa, ka kynhun ki nongai-dawai ki ju kñia ki mrad ha u blei Asklepios, uba ai ka jingkoit ka jing-khiah. Hadjen kane ka kñia ka khriam ha ki blei-thaw, ki iabam ia kato ka dohkñia bad katkum ka dustur jong ki, baroh ki dei ban iabam na kane ka dohkñia. Teng teng ki pynlong ia kine ki jingkhawai ha ki ling ki sem jong ki briew, hynrei kim ju pep ban kñia mrad shuwa ha ki blei-thaw jong ki, bad nangta ban bam ia kane ka dohkñia. Nangta ha kine ki jingkhawai bunsien ki ngat ha ka leh awria ruh. Ha ka iadih-iabam, ha ka buaid ka shongshit, ka awria ka ioh dong bha bad bunsien ki jia ki jingleh nuti, ki jingklím bad ki jingleh khlemraiñ har-rukóm.

Khatduh eh, ka khanatang ka ong ba ha Thiñatira ka la don kawei ka kynhun shipai ha ki por hyndai. Ka jingthmu ka long ban iada ia ka shnong Pergamum lada jia ba ki nongshun ki wan hiar thma. Namarba ka Thiñatira ka don ha ka them, kam shym lah ban long ka kut kaba khlaiñ. La katta ruh kato ka kynhun shipai ha Thiñatira ka la iarap ia ka Pergamum ha ki bun ki khép da kaba khang shipor bad pyntuud ia ka jingtur ki nongshun sha ka Nongbah.

Na kine kief kiei kiba la ong haneng, ka Thiñatira kam da dei eh ka shnong kaba sniew bad kaba buh ia ka Balang ha ka jingma bad ka jing-jynjar. Lajtnoh kato ka kynthei kaba pule nusip bad kaba iathuh ia ka nusip jong ki, ia kaba la ju nam ka Sambathe, kumba ngi la kdew haneng; laitnoh ki jingkhawai jong ki seng ki nongtrei bapher bapher, ha kiba ka don ka jingma kaba khraw ban ngat ha ka mane blei-thaw, ym don eiei kaba lah ban pynwit ne pynthut ia ka jingngeit. Ha Thiñatira hi ka mane blei ia u Kaisar kam shym don. Hynrei la katta ruh, kumba ngi la kdew, ka shithi ka long kaba jrong bad ka jingbyrngem ka long kaba shyrkhei. Te ka don kaei re kaei bad ia kane ngin sa lah bad iohi shai-kdar ha ka shithi hi.

Īa kane ka shithi kaba jrong ngi lah ban phiah ha ki san bynta : ka Jingpynithuh bad ka ĩaroh, ka Byrngem, ka Kyntu ĩa kiba bha, ka Khusnam, ka Jingthmu jong ka shithi.

Kumba U ju leh, u Jisu u pynithuh shuwa ĩa lade. U ong ba U dei u Khun jong u Blei, u Nongbuh Nongthaw, u Nongsambynta u Nongbuhbynta, Uba long ka tynrai, ka tyllong bad ka thymmei jong kiei kiei baroh. Kum u Khun jong u Blei. u Jisu u long u Balah-baĳai, U Batip-lut, u Ba-ĳohi-lut, namarba baroh kiei kiei ki don ha ki kti jong U. Shisyn-ong, u Jisu u long u Badonbor-tam bad ym lah ban ĩaleh-kai bad U.

U Jisu u long u Khun u Blei, Uba don ki khmat kiba kum ka thylliej ding Da kine ki kyntien, u Jisu u ong ba u ĳohi shai-kdar ĩa kiei kiei baroh. Ym lah ban buhrieh eiei na U. Ha U, wat ki jingmut barieh jong ki briew ruh ki long kum ka kot kaba ĩa plied war. U don ki khmat kiba kum ka ding kaba pyn-shai ĩa kiei kiei, ĩa ki kyndong kynshrot. Ki khmat u Jisu ki sam lyngba shaduh ki dohnud bad ka khleiĳ shyieng Ki khmat u Jisu ki long ki khmat kiba dap-shynrang, kiba don ka maiĳ-blei! Bad ha kajuh ka por ki long kum ka thylliej-ding kaba klang bad kaba lah ban thang bad ban bam duh, ban pynlyko pom ĩa kiei kiei baroh, khamtam eh ĩa ki nongshun bad ki 'riewbymman, kiba pyrshah ĩa ka saiĳdur jong u Blei. Ki khmat kibym lah shah ĩa kaei kaei kaba sniew bad kaba pap. Bad ki kjat jong u ki long kum ka rning ba ĩa saiĳ phyrnai bha (Jpw 1;15). Kane ka dei ka dur jong ka jingkhleiĳ bad jingskhem jong ka bor u Jisu. Yn nym don mano mano ba lah ban pyndem ĩa u Jisu. Baroh kiei kiei ki liem ha U, kat ba Ma-u pat U ĳeng triang shi-junom. Kane ka dei ka jingbatai jong u Daniel ĩa u Nonglam-khubor jong u Blei ha ka Kitab jong u (Dan.10:6). U Ioannis u pyndonkam ĩa kane ka dur-pharshi namarba u tip bha ĩa ka Kitab u Daniel, ĩa kaba ki Ju baroh ki ĳeid ban pule.

Hadien kane ka jingpynithuh ĩa lade, u Jisu u

iaroh shida ia ki bun ki Khristan ha Thiitatira bad ia ki kam babha jong ki. Nangta u Jisu u nam saw tylli ki hok kiba kongsan jong ki Khristan : ka jingfeid, ka jingngeit, ka jingshakri bad ka jingiaishah-satar. Ka hok kaba nyngkong bad kaba kongsan eh jong kine ki Khristan ka dei ka jingieid, ia kaba la ring jingmut na ka ktien Grik "Agapi", kaba mut ka jingieid-sbun naduh ka donnud bad ka mynsiem, ka jingieid kaba paw ha ki kam ha ka jingiaidei bad u Blei bad ki para-briew, ka jingieid kaba pynlong ia ki briew ban long kiba kloi wat ban aiti ia la ka jingim na ka bynta kiwei. Ka dei kato ka jingieid ba u Paulus Bakhuid u ruwai padiah ha ka shithi jong u sha ki Korinth(Kor 13:1-13). Nangta u Jisu u iaroh ia ka jingngeit kaba skhem jong ki Khristan ha u Blei bad ha u Jisu hi kum u Khun u Blei bad u Nong-pynim. Na ka jingieid bad ka jingngeit ka mih, kum na ki umpohliew, ka jingshongshit bad jingkloi jong ki Khristan ban shakri ia la ki para Khristan bad ia ki para-briew ha ki jingdonkam jong ki. Ia ka kyntien "jingshakri" ngi la ring jingmut na ka Grik "dian-kania", kaba mut ka jingleh ia ki kam babha ha kito kiba donkam kum ban iasam ia ka bam ka sa, ka jaiñ ka nep ha kiba duk bad kiba rangli, ban sumar bad peit ia kiba pang bad kiba shitom, ban leit ingoh ia kiba la shah set phatok, ban ri ban sumar ia ki khunswet khunmyllung bad ia ki 'riewkynthei ba la tymmen bad kumta ter-ter. Kane ka pyni ba kine ki Khristan ha Thiitatira ki leh bun ki kam kiba bha na ka bynta kiwei, kim shong kli-kti. Ka Balang ka shongshit ha kaba leh ia kine ki kam babha. Nalor kine ki kam babha, ki Khristan ki kloi ruh ban shahshitom sat na ka bynta u Blei, u Jisu Khrist bad ka Khubor Babha jong U. Ka jingiaishah-satar (Grik, hipomoni) ka paw shai-kdar ha ka shnong Thiitatira. Ki jingeh bad ka jingjynjar, kiba katno katno ruh, kim lah ban pynkynran-dien ia ki Khristan. Ki tur beit shaphrang, ki shahshitom bad ki jop. Ki dei da shisha ki dap shynrang.

#### d) KA PYNREM (2:20-23)

Shuh-shuh, u Jisu u iaroh bad pyrto la ki Khristan

tan namarba ki kam babha jong ki, kiba dang leh ha shen, ki kham bun ban ia kito kiba ki la ju leh mynshuwa. Kata ka mut ki kam babha ki nang roi nang roi, ki nang bun nang bun. "Ki kam bakhatduh" ki thew ia kito ki kam babha ba ki dang dep leh hashen bad mynta-mynne. Da shisha kine ki Khristan ki dawa ia kane ka jingiaroh na u Jisu.

Hynrei ki don ki Khristan ha Thiitira kiba dawa ia ka jingpynrem kaba jur. Hapdeng kito ki kam babha laiphew jait, ka don kaei re kaei kaba sniew tam bad ka don hapdeng ki Khristan hi. Kata ka mut, ka mih na la rympei, ym nabar. Kane ka jingsniew ka dei ka jingaijem bad ka jingailad ia ka kawei ka longkmie kaba kyrteng ka Jesebel ban khyrwa ia ka Balang napoh napoh, ban pyntlot bad khatduh khatwai ban pynjot thiaw ia ka ia ka kyntien "ka longkmie" ngi la ring jingmut na ka Grik "Tin iineka", kaba wan na ka Hebru "Isha." Kane ka kyntien Hebru "isha" bad ka kyntien Grik "Iini" ki mut ka kynthei kaba long kmie bad kaba la san ha ka ryta. Ka dei ka briew da shisha ym tang ka dak ka shin ne ka dur pharshi. Ka dei kawei na ki longkmie kiba kham pawkhamat. Ka dei ka kynja kmie balang, ia kaba ki briew ki kloj ban ngeit bad ban kohnguh. Ka don shibun ki nongbud bad ki nongkyrshan. Haba peit nabar, imat ka dei ka briew kaba donburom.

Ka kyrteng jong ka ka dei ka Jesebel. Kane ka kyrteng ka lah ban long ka kyrteng bashisha jong kawei ka longkmie bad ka lah ruh ban long ka Ju, namarba ka kyrteng ka dei ka kyrteng jong ki kynthei ha Palestina. Hynrei kane ka kyrteng ka lah ruh ban long tang ka dur-pharshi, namarba u nongthoh um kwah ban pynpaw ia ka kyrteng bashisha jong ka. Hynrei ka briew ha ka doh ka snam te ka don da shisha bad ka trei-kam. Lada ka dei ka kyrteng kaba shisha, te kane ka longkmie ka dei ka "mita (1)" jong kato ka

---

1. Ha ki bun ki jaka ha kine ki lum u Hynfiewtrep bad khamtam eh ha ka Them Ribhoi, ka jia bunsien ba arngut ki briew ha ki shnong bapher ki kum don ia kajuh ka kyrteng. Tharai uwei u nongkhal ha Shillong u kyrteng u "Kbrawkupar", bad uwei pat la Nongpoh ruh u kyrteng "U Kbrawkupar".

Jesebel ha ka Jutang Barim (I Sy. 16:29-33; 19:1-2; 21:1-16; 21:24 26; II Sy. 9:30 37). Hynrei wat la ka kyrteŋg ka long kumno kumno ruh, ka jingmut jong u Ioannis ka shai-kdar: u mut ban ong ba kato ka longkmie, la ka kyrteŋg jong ka ka dei ka Jesebel ne em, kata kam pher, ka long ka briew kaba sniew kum ka Jesebel jong ka Jutang Barim. Kumba ka Jesebel jong ka Jutang Barim ka la leh ha Israel, kumta ruh kane ka longkmie ha Thifatira ka la neh ha ka Balang ha kato ka shnong.

Baroh ki nongpule ki la bna shaphang ka Jesebel jong ka Jutang Barim na ki lynnong ba ngi la sot ha-neng. Ka dei ka khun u Ethbaal, u syiem ka Sidor, ka hima jentil. Te ka Jesebel ka dei ka jentil paka, kaba mane bun ki blei shynrang bad kynthei kumba dang leh ki Hindu mynta. La ong ba ka long kaba ehrang, kaba dukhi, kaba kwah rhah bad kaba snar ka jinglong.

U Ahab, u Syiem jong ka hima Israel, u briew uba be-niam, u la iap-mat ia kane ka Jesebel bad u la iapoikha bad ka. U la pynlong ia ka ka Mahadei jong u bad ka Bahalor jong kiwei pat ki tnga kliar jong u. Naduh basdang ka Jesebel ka la pyni ka mynsiem ba-khyllah jong ka: ka jingkwah rhah, ka buit-sianti bad ka jingsnar. Na ka liang jong ka niam, ka la long ka jentil paka, kaba mane ia ki blei baroh shynrang bad kynthei. Namarba ka kham dap-shynrang ma-ku ban ia u Ahab, ka la pynsngewthuh ia u ba ka kwah bad ka donkam ia ki blei, khamtam eh ia u blei-thaw ki nong Kanaan, u Baal. Ka la pynkohnguh ia u kurim jong ka ban pynieng uwei u paia ban mane blei-thaw. Kam shym kyntait ia u Blei bashisha ki Israel, u Yawe. Ka la kmen pynban ban foh sa uwei u Blei. Kane ka dei ka rukom leh ki jentil ha Ri Gris bad ha Rom ruh: ki pdiang lut ia ki blei baroh, bad ki kmen ban foh shuh-shuh ki blei thymmai. Te ka Jesebel kam shym pyrshah ia u Yawe ki Israel. hynrei ka la raikut ban mane lang ia U bad u blei Baal jong ka lem bad kiwei pat ki blei shynrang bad kynthei. Ha kawei ka Kine arngut ki falong shi "mita" bad tang shu bna, ka sdang ka jingsngewleid bad jingsngewladi kaba kyrpang hapdeng jong ki, na ka daw ba ka kyrteŋg ka dei kaju.

liang, i kumba ka long kaba riewblei bad ka la klof ban bei pisa ban ri bad ban bsa ia ki nonglathuhlypa jong kine ki blei. kumba sawspah ngut. Ki nonglathuhlypa ki dei kito kiba ialap shaphang kine ki blei bad kiba pyniaid ia ka niam ka rukom ban mane ia ki. Kata ka mut ba tang ha lingsyiem ki la don haduh sawspah ngut kine ki nonglathuhlypa, kiba kum ma-ka; ki mane lut ia ki blei baroh lem bad u Yawe ruh. Bad kam shym pyrshah ia u Elija, namarba u mane ia u Yawe, hynrei ka la bitar ia u namarba u la mane tang ia u Yawe bad um shah ban mane ia kiwei pat ki blei, khamtam ka la ingkhong khaht namarba u la isih ia u Baal, u blei bakongsan jong ka. Haba peit na kane ka liang, ka la long kaba sbun ha ka liang ka niam bad ka la klof ban lut spah ban bsa, ban pynkup pynsem ia ki sawspah ngut ki lyngdoh kumban shu ong noh. Namarba kine ki lyngdoh ki bun ka niam ka rukom, ka hima ruh ka la iphuh ha ka rong ka rup, kumba kwah ka Jesebel, kaba mane lut ia ki blei baroh.

Kane ka jingleh jong ka Jesebel ka la pynbitar ia u Blei bashisha bad ia ki nonglathuhlypa, kum u Elija bad kiwei, kiba ngeit tang ha uwei u Blei jong ki Israel, u Yawe. Nangta ki la pyrshah jur ruh ia kane ka mane blei-thaw namarba ka ialam sha ki jingsniew laiphew jait, khamtam eh sha ka jinglehnuti bad leh-awria. Ki tempyl jong u blei Baal bad kiwei pat ki blei jong ka Jesebel ki don barabor kito ki nuti-blei shynrang bad kynthei. Ia kine ki nuti-blei shynrang ki Ju ki ju khot ia ki ki "Sewbnaled. Ia ki nuti-blei kynthei ki Grik ki ju ai ka kyrteng "Hierodule", kata ka mut ki "Shakri bakhuid". Ha India ruh ki don bad la khot ia ki ki "Devadasis", kaba mut "ki shakri-blei". Te ki paitbah, kiba leit mane ha kine ki tempyl ki ialeh awria, ki iaklim bad ki ialehsang laiphew jait. Dei na kane ka daw ba la mih ka rukom kren ba ka jingmane blei-thaw ka dei ka klim ne ka lehawria: Te lada don uno uno u Israel uba jehnoh ia la ka niam bad u mane ia ki blei-thaw, la njew ia u u nongklim bad u nonglehawria, namarba ha ka jingshisha ym ju duh kane ka klim ne ka lehawria ha ki tempyl bapher bapher jong

ki blei-thaw. Ha kito ki lynnong bad ki dkhot ba ngi la sot, ki nongpule kin lap ba ka Jynthoh Bakhuid ka pynrem ia ka Jesebel na ka bynta kane ka kam dakaid bad ba ka dei ka kmie jong ka mane blei-thaw bad ka klim, ka awria ha Israel.

Shuh-shuh, ka Jesebel ka long ka briew kaba snar ; kam tieng eiei ban lamler bad ban pynlap briew kumba ka la leh ha u Naboth. Baroh ki la bna shaphang u Naboth, ubym shem tieng ban kyrngah wat ia u Syiem, uba la kwah rhah ia ka brisoh wain jong u. U Naboth u la ong ba um lah ban die ia ka khyndew ba u la ioh pateng na ki Longshuwa Man-shuwa, namarba ka long kaba kyntang. U Syiem Ahab um sngap ia kane ka nia namarba u kamai ia ka Longspah bad u bam ia ka Longbriew. Dei ka Jesebel kaba la ai buit ia u kumno ban leh da kaba pynlap bein ia u Naboth.

Khatduh eh, ka dei ka briew kaba sarong bad kaba dukhi. Ha ka jingshisha, dei ma-ka kaba synshar narieh narieh bad ka la paring ia u Ahab shane shatai kum u masi samkhamut. Ka la long kaba sianti haduh katta katta. Hynrei namarba ka Hok ka im bad ka Pap ka lap, khatduh khatwai ka la ioh ia la ka bainong, Da ka hukum u Jehu, ki lunok ki la bret ia ka na jynkhang-it ka iingsyiem. Ka la lap bad ki ksew ki la bam ia ka metlap jong ka.

Mynta kane ka longkmie ha Thiitatira, la ka kyr-teng jong ka ka dei shisha ka Jesebel bad kumta ka dei ka mita jong kato ka Jesebel ka Jutang Barim ne la ka dei tang ka dur-pharshi, ka la long ka briew thik kum kato ka Jesebel ka Jutang Barim. Ka la long ka Khristan, hynrei ka pdiang lut ia kiwei pat ki blei ruh bad ki niam. Imat kam pyrwa eiei ban leit bam khawai lem ha ki jingialang jong kito ki seng jong ki nongtrei bapher bapher, wat lada ka la tip ba ha kum kato ka jingkhawai ka ju don ka jingknia mrad ha ki blei-thaw bad ba ki labam ia ka dohknia kumba ngi la batai. Hynrei ka leit la ka leit bad ka ialam bakla ia kiwei ruh ha kane ka rukom. Ka dei ka briew kaba pdiang la ka, "Ecumenian" kaba palat shisha ia u



pud haduh ban da lamane lang ia ki blei shynrang bad kynthei laiphew jait. Bad kumba ngi la kdew haneng, ha kine ki jingkhawai jong ki seng ki nongtrei bunsien ka mih ka jinglehawria kaba ialam sha ka klim ruh bad ka lehsih-lehsang Hynrei kine kiei kiei kim long eiei ha kato ka longkmie, ia kaba u Ioannis u nam kum ka Jesebel Kane ka jingleh jong ka ka la pyntlot bad pynsniew ia ka Balang napoh, na la rympei, namarba habar bad ha bapaw kato ka longkmie ka long ka Khristan bad ka kynja kmie balang ruh, kaba pawkhmat ha ki kam babha ha kiba duk bad kiba pang bad ha kiwei pat ki kam paitbah. Te ka la long kum ka bampong, ia kaba ym lah ban iohi da ki khmat briew. Hynrei ki khmat u Jisu ki iohi ia ka jinglong jong ka bad ia ki kam sniew jong ka. Da ka nuksa bad ki ktien jong ka, ka ialam bakla ia ki para Khristan ban iakyrñiom, ban ia-ioh bynta ha kito ki jingkhawai jong ki seng ki nongtrei ha kiba ki kñia mrad ha ki blei-thaw bad ki bam ia ka dohkñia. Lehse ka la ong kumne, "Haba phi dei ki dkhoh jong ka seng ha ka trei ka ktah, phi dei ruh ban leit bam khawai bad ban bam dohkñia; kam dei ka pap." Hooid, ki Khristan kim banse ban rung ha kawei na kito ki seng bhalang na ka bynta ka trei ka ktah, hynrei ban ia-ioh bynta ha ka khawai ha kaba ka don ka mane blei-thaw, ki Khristan kim lah bad kim bit wat ban iajan ruh, namarba ka ialam sha ki jingsniew babun kumba ngi la kdew haneng. Te kito kiba la ngeit ia kane ka kmie balang, ki la ngat shisha ha ka mane blei-thaw kaba long ka jingklm ha ka jingladei bad u Blei bad kaba ialam bunsien sha ka leh awria ruh ha ka met ka phad. Kane ka la pynjakhlia ia ka Balang. Te u Jisu, Uba iohi shai-kdar ia kiei kiei u, mai bad u pynrem ia ka Balang ha Thilaira ba kashah bad ka ailad ia kum kane ka briew ban ialam bakla ia kiwei pat ki para Khristan.

Kane ka Jesebel ha Thilaira ka la nam ia lade ka nongfathuulypa. Kata ka mut ka la leh kum kawei na kito ki nongialap ia ka Khubor Babha. Imat ka long kaba pnah ktien pnah thylliej bha bad kaba don ka sap ban pyngngeit ia ki briew. Ha ka jutang

Barim, ki la don ki kynthei kiba long Nongĩathuhlypa, kum ka Hulda ha ka por jong u Jeremia. Ha ka Jutang Bathymmai, ngi lap ia ka Anna ha ka Tempvl ha Jerusalem (II Sy.22:12-20; Lk.2:36-38) Kine ki Nongĩathuhlypa kynthei ki dei ki nongĩalap, kiba nang ban kren paitbah, ha kiba u Blei u la ai ka sap, ia kiba la ithuh da ki paid u Blei. Ha ka Balang hyn-dai ki bun bha kine ki nongĩathuhlypa kynthei, kata ki nongpynbna ia ka Khubor Babha kum ki khun sot-ti jong u Sohsla Philip (Kam 21:9-10) Te kane ka longkmie ha Thiĩatira ka la leh kum kine ki nongĩathuhlypa bashisha, ia kiba u Blei u la jied. Ka dei ka nongĩathuhlypa ba shu thung-hi da lade. Nangta ka lah ruh ban long ka nongleh byrtong aĩu-re kaba iathuhlypa ia ki jingjia kiban wan. Ngĩ tip ba bun ki briew ki kwah ban tip aĩu kan jia ia ki. Lada don kino kino kiba ong ba ki tip ia ka lawei, bun bah ki tur sha ki wat ha kine ki sngi ruh. Lehse kane ka longkmie ruh ka leh kumta, kumba leh kato kawei pat ka kynthei ia kaba la nam ka Sambathe, kaba ju iathuh ha ki briew ia kiei kiei kiban jia ha ki. Hynrei namarba u Blei um shym ai ha ka ia ka sap bashisha, ka la shu kren thok kren lamler ha ki briew bad ki briew pat ki la shu ngeit biej bad shah thok ei.

U Jisu u ong ba ka ialam bakla ia ki shakri jong U, kata ka mut ia ki Khristan kiba bha, kiba shida bad kiba khujd mynsiem. Hynrei namarba ki duna ka siantj, ki la shu ngat ha ka jynriam jong kane ka Jesebel. Ka ialam bakla ban leh awria, kata ka mut sha ka mane blei-thaw, ha kaba ka ju don ka leh nuti bad ka leh awria da ka met ka phad ruh. U Jisu u pynrem ruh ia ka ba ka ialam ia ki Khristan ban bam dohkĩia khamtam eh ha ki jingkhawai jong ki seng ki nongtrei nongktah. Dei ia kum kane kaei kaei ba u Paulus Bakhuid u pynrem ha ka shithi jong u sha ki Korinth (I Kor. 8:1-13). Ngim dei ban klet ba ki jentil hyndai ki da ngeit shisha ba ki blei-thaw jong ki ki don bad ki blei-thaw ki dei kito ki dieng ki maw hi, kito ki mrad ki mreng hi ba ki mane blei kum ia u bsein. Ha kine ki sngi ka la mih ka jingong ba ki jentil kim mane ia ka maw ka dieng ne ia ki mrad, hynrei

ki shu pyndonkam ia ki tang kum ka dak ka shin, kumba leh ma-ngi ha ka jingidei bad ki dur jong ki 'Riewkhuid. Hynrei kane ka rukom pyrkhat ka dei kaba mynta. Ki 'riewhyndai kim ju pyrkhat kumta. Ki jentil ki da ngeit hi ba kito ki dur-maw ki dei ki blei jong ki hi bad ki tyrwa ia ka kñia ha kito hi ki blei jong ki. Bad ban bam ia kum kane ka dohkñia, ka long kumban mane ia uto u blei-thaw. Ki paitbah salonsar hi ki ngeit kumta. Te ha kata ka por, ka long kaba ma shibun na ka bynta ka Balang ban leit bam dohkñia ha ki tempyl jong ki blei-thaw bad ia kito ki jingkhawai jong ka seng nongtrei nongktah ki pynlong ha ki tempyl ki blei thaw.

Na kine kiei kiei kiba ngi la ong haneng, kato ka Jesebel ka dei da shisha ka Kkristan kaba sniew, ka nongshun jong ka Balang napoh rympei hi. Bad ka dawa ban shah pynshitom shisyndon Hynrei u Jisu u long Uba sbun bad U ai lad ia ka ban kylla kaba mut, U la ai por. Hynrei kane ka Jesebel kam treh ban kylla kaba mut, ka iaineh hi triang ha ka jinglehawria jong ka, kata ka mut ka iaikyrñiom ha ka mane blei thaw, kaba ialam bunsien sha ka leh awria ha ka met ka phad bad ka jingklm ruh. Ha ki dkhot 20 bad 21 ia ki kyntien "ban leh awria" ngi la ring jingmut na ka Grik "porniia", kaba mut ka jingleh-awria ki briew kibym pat iapoi kha poiman, kum ka jinglahap-kurim ki samla. Ka dei ka jingleh dakaid, hynrei kam dei ka jingklm namarba kito kiba leh ia ka kim pat iapoikha poiman. Te khlempep kane ka thew ia ka jingialam bakla jong ka Jesebel ia ki samla shynrang bad kynthei kibym pat iapoikha poiman ha ka Hok katkum ka Hukum. Hynrei ha ka dkhot kaba 22 ngi shem ia ka kyntien Grik "Mikhevo", kaba mut ban klim. Ng tip ba ka klim ka dei ka pap ka sang ba leh kito kiba la iapoikha poiman ha ka Hok katkum ka Hukum. Kane ka lah ban don ar tylli ki jingmut: nyngkong, ka jingialam bakla jong ka Jesebel ia ki Khristan sha ka jingmane ia ki blei-thaw kaba la palat ia u pud, sha ka ahor syndon jong ka jingmane ia ki blei-thaw, ha kaba ki kam dakaid laiphew jait kim ju duh, ka ba-ar, ka lah ban thew ia ka jingiaklim bashisha ha pdeng. ka Jesebel, bad ki nongmane blei-thaw ha

tempyl. Ka dei ka jingklím na ka líang ka Jesebel, namarba ka la don u kurim ha ka Hok katkum ka Hukum. Namarkata, u Jisu u byrngem ba Un lynshop ía ka bad ía kito kiba íaklím bad ka ha ka jynjar-sat bad ka jingkhlemrain kumba la jia ha ka Jesebel jong ka Jutang Barim. Ka kyntien Grik ka dei "thlipsis", kaba mut ka jynjar-sat kabym lah shuh ban mutdur bad kato ka longkmie ka dawa ía kane ka jingpynshitom namarba ka la kylla long ka nuti-blei ha ki tempyl, tangba jar-jar khlem da paw pyrthei. Dei tang u Jisu Uba la íohi ía kine ki kam pap kamsang kiba rieh. Hynrei la katta ruh, ka dang don ka jingkyrmen na ka bynta kito kiba íaklím bad ka, hynrei imat na ka bynta jong ka te ym don jingkyrmen shuh namarba kam kwah ban kylla kaba mut. Harieh harieh hi ka íaineh hi triang ha ki pap ki sang jong ka. Te u Jisu u ong, "Ngan pynjynjar sat ía ki lada kim kylla kaba mut bad íehnoh ía ki kam bymman jong ka." U ong, "Ki kam bymman jong ka", kata ka mut ba dei ma-ka kaba pynshoi bad kynshoit ía kito ki briew ban íaklím bad ka. Kata ka mut, ha kine ki pap ki sang, ka kham kít pap ma-ka namarba ka dei ka nongíalam, ka nongkyntu bad ka nongleh ruh. Hynrei lada kam íalam ma-ka, kam kyntu ma-ka bad kam leh ma-ka, kine ki briew imat kin nym leh ía kito ki pap ki sang, namarba imat ki dang don hi khyndiat ka jingtiplem. Hynrei ha ka jingshalai basianti jong ka, ki la ngat hi pluk ha ka ahor ka pap.

Hynrei ha ka dkhot kaba 23, u Jisu u ong ba un tanong pyníap ía ki khun jong ka. Kane ka lah ban thew ía ki khun bashisha jong ka, kito kiba la kha na ka hi. Hynrei hangne hi ka mut bad ka thew ía kito ki Khristan kiba bud bad snob ha ka haduh ba kim lah shuh ban khlad na ka bad kumta ki la long kum ki khun jong ka hi. Da kane u Jisu u mut ban ong ba ki don ki Khristan ha Thilátira kiba bud ía ka Jesebel da ka jingsngewthuh bad da ka mon kaba skhem wat lada ki la tip ba kato kaba ki leh ka dei ka pap ka sang. Ki la íeid ía ka kum ía la ka kmie na kaba kim lah shuh ban khlad. Ía kine u Jisu u ong ba Un sa tangon pyníap. Ía ki kyntien "Ngan tangon pyníap"

ngi la ring jingmut na ka Grik "Apokteno en`thanato" kaba mut kyntien pa kyntien "Ngan pyniap da ka jingiap", Kane ka dei ka rukom kren jong ki Israel hyndai haba ki mut ban kdew ia ka khlam afu-re kaba ialam mar-mar sha ka jingiap (Ez. 33:27) Te lah bam pynkvlla ruh sha ka Khasi kumne, "Ngan pyniap ia ki da ka khlam". Hynrei namarba ki kyntien "Ngan pyniap da ka jingiap" ki lah ruh ban mut "Ngan pyniap khlempep ne da shisha", ka jingring jingmut jong ngi kam bakla bad ka biang hi. Nangta u Jisu u ai ka daw balei Un leh kumta. Da ka jingiap kaba shyrkhei bad kabym ju jia mynno mynno, ki briew kin tip ba ki la shah pynshitom da u Blei na ka bynta ki pap jong ki, ia kiba la buhrieh da ki snem; hynrei u Jisu u iohi lut nadong shadong wat lada ki pyrshang ban buhrieh katno katno ruh. Ha u Jisu kiei kiei baroh ki paw shai-kdar. Namarba u Jisu u tip lut, ka jingbi-shar jong U ka long kaba hok bad kumta U lah ban siewbainong ia ki briew katkum ki kam ba ki la leh da shisha. Ia ki kyntien "ki jingmut-jingkwah" ngi la ring jingmut na ka kyntien Grik "Nephrus", kaba mut ki khyllai. Ha ka rukom pyrkhath jong ki Ju hyndai, ki khyllai ki dei ka tyllong, ka tynrai bad ka thymmei jong ki jingmut, ki jingkwah, ki jingangnud, ki jing-sngew.

Na kine kiei kiei kiba la ong haneng, ka paw shai ba ka don da shisha ka "bampong" kaba rieh ha ka Balang ha Thifatira bad ka kmie jong kane ka bampong ka dei kawei ka longkmie kaba paw kum kaba bha, hynrei kaba la ialam bakla ia ki pajtbah ha ka rukom pyrkhath bad ha ki kam bymman ruh. U Jisu u kwah ban weng noh ia kane ka bampong na ka Balang khnang ha kan long kaba koit kaba khiah nadong shadong.

### (c) KA KYNTU IA KIBA BHA (2:24-25)

Ha kine ki ar dkhoh ka paw shai ba ym baroh ki Khristan ki long ki basniew ha Thifatira. Ki don shibun kibym pat shah ialam bakla ha ka Jesebel. Kine

ki lah ban long kito ki Khristan kiba la kyntait ban shahshkor ia ka Jesebel bad kibym shym pdiang ia ki jinghikai bakla jong ka. Ne ki lah ban long ki Khristan, ia kiba ka Jesebel kam pat ioh lad ban lalam bakla. Te u Jisu u maham ia kine ban phikir bha ioh ki kum ngat ha ki jynriam jong ka Jesebel. Ka dei ka sneng ka kraw deipor, namarba kato ka longkmie Jesebel ka long kaba dap da ka buit-sianti bad ka lah ban shukor ia ki briew da kaba paw kum u angel wat lada ha ka jingshisha ka dei ka ksuid ka khrei.

Shuh-shuh, u Jisu u ong ba kine ki Khristan, kiba bha, kim pat tip bad kim pat bna eiei ia "ki thwei bajylliew jong ki buit-sianti jong u Soitan." Ia kine ki kyntien "ki thwei . . . . . u Soitan" ngi la ring jingmut na ka Grik "ta Bathea", kaba mut ki jingjylliew ne ki thwei bad la khot ia ki kumta da kito ki briew kiba la ngam ba ki. Kiei kine ki thwei bad ki jingjylliew jong u Soitan? Kine ki thwei ki thew ia ki ar tylli kiei kiei: nyngkong eh, ka dei ka jingstad ne ka jingtip kaba jylliew, ia kaba bun kiwei pat kim bna bad kim tip eiei; nangta ki dei ki kam ba ki briew ki leh namar kane ka jingstad ba ki la ioh. Ia kine kiei kiei ka Jesebel bad kito, kiba bud ia ka jinghikai jong ka, ki tip bha bad dei ma-ki kiba khot ia ki ki "thwei" ne ki "jingjylliew u Soitan."

Kito kiba bud ia ki jinghikai ka Jesebel ki ong ba ki don ka jingstad bad namar kane ka jingstad ki tip bha ba don ka jingfapher hapdeng ka mynsiem bad ka met. Kine ar kim don jingiadei eiei. Ka mynsiem ka bha nadong shadong bad ka mynsiem jong kito kiba la ioh ia kane ka jingstad kam lah ban shah pynsniew dano dano ne da-ei da-ei. Ka met ka long kaba sniew nadong shadong. Ym don jingbha eiei ha ka. Te ka met ka dei hi ban pynhun ia ia ki jingkwah-brai thala. Kam lah ban leh da kumwei pat. Hynrei kine ki jingkwah-brai thala jong ka met kim lah ban pynsniew ia ka mynsiem. Ka jingleh awria, ka leh-nuti ka met kam ktah ia ka mynsiem jong kito kiba la ioh ia kane ka jingstad. Ki la ioh ia ka jinglailtuid kaba shisha. Ka met jong ki ka lah ban leh katba ka mon: ban klm, bah leh awria bad kumta ter-ter. -

Shuh-shuh, ka Jesebel bad ki nongbud jong ka ki ong ba ki briew kiba la ioh ia kane ka jingstad, ki don ka kamram kumban ong noh, ban mad ia kiei kiei baroh ba kane ka jingim, wat ia ki pap ki sang, wat ia ka lehsih lehsang ia ia ka met ka phad ruh. Ki ong ba ban tip haduh katno ka jingklm ka sniew, ki briew ki dei ban klim. Ban sngewthuh haduh katno ka jingleh awria ka sniew, ki dei hi ban leh awria katba ki lah ei. Ki dei ban ngam shaduh tynrai jong ka ahor ka pap ka sang ban sngewthuh kumno ka long ka pap ka sang. Ki dei ban mad lut ia ki jingbrai thala ka doh, khnang ban sngewthuh haduh katno ki sniew bad haduh katno ka mynsiem ka bha. Tang kawei ki ong ba ki dei ban leh: ka mynsiem kam dei ban kubur ia kine kiei kiei. Ka dei ban isih ia ki, katba ka met ka dang leh ia ki. Kane ka jingmad lut ia ki jingkwah-brai ka doh ka long kum ka kilan-mynsiem ban pynkhlaiñ bad ban pynskhem ia ki ha ka jingbha bad ka hok. Te dei ban ai lad ia ki briew ban ngam sha ka ahor jong ka jingawria jong ka jingklm bad kumta ter-ter, khnang ba ka mynsiem kan khlaiñ shuh-shuh.

Na kine kiei kiei ka shai-kdar ba kane ka rukom pyrkhat ka long kaba mynsaw haduh katta katta ia ka jingim Khristan. Kane ka jinghikai kam ladei-dur eiei ruh em bad ka jingim Khristan. Ka pyrshah ia ka nadong shadong. Te u Jisu u pynrem ia kane ka jinghikai bad ia kine ki kam pap kamsang ia kiba ka Jesebel bad ki nongbud jong ka ki khot "ki thwei" ne ki jingjylliew". Hynrei u Jisu u ong ba kane ka jingstad kam dei ka jingstad bad kito ki kam kim pynkhlaiñ eiei ia ka mynsiem, hynrei ki dei ka ktem jong u Ksuid u khrei. Imat ka don kum kane ka rukom pyrkhat hangne ha India ruh. La ong ki don kita ki briew kiba ong ba ynda ki la kynjoh sha ka kyrdan bakyrpang jong ka hok bad ka jingriewblei, ki lah ban leh katba ki mon, ki lah ban klim, ki lah ban leh awria, ki lah ban laid lyngkhuit ruh khlem jaiñ khlem nep, ki lah ban thiah bad kino kiba ki mon. Baroh ngi iohi ba kane ka dei ka jinghikai kaba bakla haduh katta katta bad kam ladei-dur bad

ka Niam Khristan bashisha. Kiba leh kumne kim dei shuh ki briew, hynrei ki dei ki ksuid ki khrei.

Khatduh eh, u Jisu u ong ba Um don eiei shuh ban hukum ia kito ki Khristan kiba bha ha Thiitatira, namarba ki la bit la biang ha ki liang baroh. Hynrei kane ka jinglong babha jong ki kam dei ban pynmyllen ia ki ne ban pynshoh samthiah ia ki. Hynrei ki dei ban peitngor bad ban sumar bha ich ki kum ngat ha ki shangkawiah jong ka Jesebel bad ki nongbud jong ka. Te ki dei ban iaibat hi triang ia ka jingshisha. Ki dei ban pyni shida ia la ka jingieid, ka jingngeit, ka jingshakri ia kiwei bad ka jingiaishah-satar, ym ban leh arsap kum ka Jesebel bad ki nongbud jong ka. Bad kine ki Khristan, kiba bha, ki dei ban iaineh haduh bakut, haduh ka sngi ba u Jisu hi un wan sa shisien ban bisshar ia ki briew baroh bad ban siewbainong ia ki katkum ki kam ba ki leh.

#### (d KA KHUSNAM (2:26-28)

Ia kito kiba iaineh, kiba iaajop ha ka jingfaleh bad ha kito kiba dem thlip ban leh ia ki kam babha, u Jisu u kular ban siewbainong. Hangne ngi lap kawei kaei kaei kaba sngewtynnai bad ia kaba ngi dei ban iaikynmaw dngong: ia ki kam babha ba ngi leh, u Jisu u niew ba ki dei ki kam jong U hi. Haduh katne ki kordor ki kam babha. U Jisu u ong, "Uba ia-imsngi ban leh ia ki kam jong nga." Kiei kita ki kam u Jisu? Kito kiei kiei baroh ia kiba ki Khristan ki dei ban leh ha ka Hok katkum ka Hukum. Haba ki Khristan ki pyndep ia ka mon jong u Blei, ki leh ia ka kam u Jisu hi. Haba ki iarap ia kiba duk ne kiba pang, ki leh ia ka kam u Jisu hi. Namarkata, kiei kiei ba ki Khristan ki leh, ki dei ki kam jingblei suda bad u Jisu u niew ba ki dei ki jynleh jynkam jong U hi. Katne ka jingkordor jong ka jingim Khristan! Hynrei ki Khristan ki dei ban iaineh. Kam biang ban shithem tang shipor. Dei ban iaineh hi triang haduh kaba kut.

Ka Khusnam ba u Jisu un ai ha kine ki Khristan babha ka dei ka ber bad ka iktiar synshar khadar halor



ki jaitbynriew baroh, kata ka mut ba kin sa long ki nongialam, ki nongbtin lynti, ki nongpeit nongkhmih, kiba imsngei shisha ia ka jingbha u babun u balang. U Ioannis u dei u Ju bad um lah ban pyrkhat pyrdaiñ da kumwei pat. Ha ki Ju hi, dei u Messia, uban pynbit pynbiang ia kiei kiei baroh: ha ka synshar ka khadar, ha ka imlang sahleng, ha ka trei ka ktah, ha ka ioh ka kot. ha ka akor ka burom. Dei u Messia uban saiñdur ia ki jaitbynriew baroh, kumba ong ka Psalm 2:8,9 :-

“Pan na Nga bad Ngan ai bynta ha phi ia ki jait-  
bynriew;  
Bad ia ka pyrthei na kut sha kut phin sa ioh  
ma-phi.

Phin sharai ia ki da u diengduh-nar,  
Phin sa pynlwet ia ki kum u khiew-khyndew.”

Ia kane ka Psalm ki Ju ki la ju fiaw ba ka dei ka phawar shaphang u Messia, uban jop ia ki jentil na ka bynta ka jaitbynriew Israel. U Messia un pyndem ngon ia ki hapoh ka bor jong ki Israel da kaba pynduh pyndam ia ka bor synshar jong ki bad da kaba pynshi-shitom ia ki na ka bynta ki jingleh jong ki pyrshah ki Israel. U Messia un sa long u nongjop kum ki Syiem ki Patsha ha kata ka por. Ka dei kane ka jingmut ba ki Ju ki la don shaphang u Messia. U Ioannis u dei u Ju, hynrei u dei ruh u Khristan bad na ka bynta jong u, u Jisu u dei u Messia, Uba la wan bad Uba la jop ia kiei kiei baroh. Hynrei ka jingjop jong u ka iapher na kiwei pat ki jingjop jong ki Syiem ki Patsha da ka waitlam bad da ka thma. U Messia jong ka Jutang Bathym-mai bad jong ki Khristan un jop da ka jingieid kaba la paw shynna ha ka jingiap jong U halor ka Diengphna. Nyngkong eh, u Messia un jop ia ka pap ka sang bad Un weng noh ia ka na ki khun ki hajar jong u Blei (Mt.1:21) Da kaba jop ia ka pap, Un jop ruh ia kiei kiei kiba mih na ka pap. Nangta u Messia un long kum u nongap-langbrot ha ki jaitbynriew baroh. Te Un nym synshar lahduh ia ki, hynrei Un sharai ia ki bad Un peit un khmih ia ki da ka jingieid. Un synshar da kaba sharai bad da kaba im-sngi kumba leh u nongap-langbrot. Hynrei ban sharai kam mut ban aili ne ban aijem. Ha ka ka jing-

İadei bad ka pap, u Messia un pyrkhing ha ka Hok katkum ka Hukum. Kane ka dei ka jingmut jong ki kyntien "ban sharai da u diengduh-nar." Bad İada İia ba ki briew kim shahshkor bad ki leh mutlop, kin İoh ka jingpynshitom kaba İur bad kaba İadei-dur bad ki kam İong ki. Kin nym İait na kane. Te u Messia un İong kum u nongthaw-khiew, uba pynpait İyngkhot-İyngkhai İa kito ki khiew kibym itvnnat bad kibym İadei-dur bad ka İingthmu İong u İynrei wat İada U pynpait ruh, u İah ban thaw İiang İa ki, namarba U İong Uba donbor.

Na kine kiei kiei ka paw shai ba u İisu u kwah ban siewbainong İa ki Khristan kiba bha da kaba pynlong İa ki kum Ma-u ha ka İingİadei bad ki İaitbynriew. Kin sa İong ki nongsynshar ki nongkħadar kum Ma-u bad İin synshar İin kħadar ruh kum Ma-u İi. Kane ka mut ba ki Khristan İin İong u İisu İi ha ka İistori, namarba kane ka İor kaba u ai ha ki Khristan ka dei kato kajuh ka İor ba Ma-u İi U İa İoh na İa u Kpa: Ka İor İingİlei bashisha!

Ka don sa kawei ka jingmut bad ka İong kaba dei: U İisu un ai ha ki Khristan, kiba bha, ka İor, İktiar bad ka sap ban pynphriang İa ka Khubor Babha. Ka jingpynİna İa ka Khubor Babha bad ka jingpdıang İa ka da ki briew ka dei da shisha ka jinglongsyiem, İongİrai, İongkynrad ħalor ki İaitbynriew. İm don jingİop kaba kħam kħraw bad kaba kħam don burom ban İa kane. Da ka Khubor Babha, ki Khristan ki İop da shisha İa ki İaitbynriew baroh bad ki synshar İa ki da ka jingİeid bad ka jingİmsngi ba kin kiew irat ha kiei kiei baroh ha ka İongİbriew manİriew. Ka jingshİrħem bad jingİnang ban pynİna bad ban İalap İa ka Khubor Babha ki dei ki jingİiei bakyrpang İong u İisu ha kito kiba İeid İa U bad kiba İmsngi İa ka kam İong U. Ka dei ka kħusnam da shisha bad ka jingİaroh ba u İisu u ai ħaba, da ka jingİalap İong ngi İa ka Khubor Babha, ki briew ki pdıang, ki kylla kaba mut bad ki İoh bİptisma. Kane keİİ ka dei ka jingpynphong paİsngiat İong u İisu İa ki nongİud İong U, kiba İadei-dur bad U. Namarkata, ka İylla-İiam ne ka Shnat-İiam, kaba İalap İa ka Khu-

bor Babha bad kaba Ioh ban ai baptisma ia ki briew, ka dei kaba la Ioh Khusnam na u Jisu ha kane ka sla pyrthei, ka dei kaba la Ioh Medal ksiar nylla na u Syiem ki syiem baroh ha kane ka pyrthei mariang. Namarba ka dei ka jingai-sngewbha jong u Jisu, kane ka bor, ka iktiar bad ka sap ban ialap ia ka Khubor Babha ba ki briew kin kylla kaba mut bad kin Ioh baptisma, ka trei-kam bad kam lah ban pulom lada ka Jylla-niam ne ka Shnat-niam ka Iatrei lang bad u Blei. Lada ka Jylla-niam ne ka Shnat-niam kam trei lang bad u Blei, ka mut ba kato ka Jylla-niam ne ka Shnat-niam ka dei kabym pat Ioh Khusnam na u Jisu bad kumta kam long kaba bitdor.

Khatduh eh, u Jisu u kular ban ai ha ki Khristan, kiba Iaineh, ia u 'Lurstep. U-ei une u 'Lurstep? Ngishem ha kane ka Kitab Jingpynpaw hi ba une u 'Lurstep u dei u Jisu hi (Jpw 22:16). Te ka shai-kdar ba u Jisu un ai ha ki Khristan, kiba bha, ia lade hi kum ka Khusnam jong ki. Bad ym don eiei kaba kham kordor ban ia u Jisu Khrist, u Khun u Blei. Kiba Ioh ia u Jisu, ki Ioh lut ia kiei kiei baroh. Ki briew, ha kiba u Jisu um don, ki dei kiba kyrdudh tasam tam na baroh.

Mynta ka mih ka jingkylli: Balei u Jisu u nam Ia lade u 'Lurstep? Ki 'riewstad ki ong ba ki don bun ki daw bad ki nongrim. Nyngkong eh, u Jisu u long kum u 'Lurstep da ka jingmihpat jong U na ka jingiap. Ka jingiap ka long kum ka miet badum bad ka jingmihpat u Jisu na ka jingiap ka dei da shisha ka step-phyrngab, ha kaba ngi lah ban Iohi Ia u 'Lurshai ne u 'Lurstep. Te kum u Jisu, ki Khristan kiba Iaineh, kin mihpat na ka jingiap thik kumba u Jisu u Ia mihpat ha ka burom ka ijot jingblei. Nangta ki Khristan, kiba Iaineh, kiba bha bad kiba hok, ki pynlainei ia kiwei, ki pynbha ia kiwei bad ki pynhok ruh Ia kiwei da ka nuksa bad ka ktien jong ki. Ki dei ki nonglalam bad ki nongbikai kiba shisha, ym kum ka Jesebel bad ki nongbud jong ka, kiba long ki nongbikai balamler, kiba Ialam bakla ia ki briew. Ka Jyathoh Bakhuid ka ong ba ki Khristan kiba Ialam Ia

kiwei sha ka Hok kin tyngshaiñ kum ki khlur bad ka sn̄gi. (Dan.12:2,3; Sir 50:6; Mt.13:43). Kata ka mut ba kin sa ioh ka burom ba-iphien̄g, ka burom jingblei na ka bynta ka jingim babha jong ki.

Nalor kine ki jingmut jong u 'Lurstep ba ngi la ai haneng, ki 'riewstad ki ong ba ka jingmut hangne ka lah ban long ruh kane : u 'Lurstep u dei ka kyrteng u Ksuid kumba ngi ju ong u Lusipher. Te "ban ai ia u 'Lurstep ha ki Khristan" ka mut ba u Jisu un ai ha ki Khristan ka bor ban jop thiaw ia ki ksuid ki khrei bad ia ki jingsniew baroh. Kane ka lah ban long ka jingmut lada ngi shim ba ka dei ka Bor ba u Jisu un ai ban jop ia kiei kiei baroh, khamtam eh ia u Ksuid, uba pyrshang ban pynngop ia ngi ha ki bun ki jingsniew. Hynrei lada ka thew ia ka jingjop hi, te imat kam da iadei-dur bad ka jingkular ia ka Khusnam bad ka Khusnam hi kam dei ka jingjop, hynrei u soh jong ka jingjop, ka pansngiat bad ka burom na ka bynta ka jingiaijop.

### (e) KA SNENG KA KRAW IA BAROH (2:29)

Ha kilai tylli ki shithi banyngkong, kine ki kyn-tien ki dei ka lamphrang ia ka jingpynbna ia ka Khusnam. Hynrei hangne bad ha kilai tylli ki shithi kiban bud, kam dei shuh ka lamphrang ia ka jingkular ia ka Khusnam. Ka dei pynban ka sneng ka kraw ia baroh ka Balang ha ka pyrthei bad ia ki jaitbynriew, bad ia uwei pa uwei ne kawei pa kawei shimet shimet. Ka khubor ka dei na ka bynta jong ki, ym kum ka kynhun kyllum, hynrei shimet shimet hi. Kim lah shuh ban ong ba kane ka sneng ka kraw ha ka shithi kam dei na ka bynta jong ki, hynrei na ka bynta kiwei pat. Da kane u Jisu u mut ban ong ba uwei pa uwei u briew ha ka pyrthei u dei ban bat ia kito ki hok ba ki Khristan ha Thifitira ki la pyni, kum ka jingieid, ka jingngeit, ka jingkloi ban shakri ia kiwei bad ka jingiaishah-satar. Ha kajuh ka por uwei pa uwei u dei ban kiar na ka tap eitmiaw ia ia ka jingsniew da ki kam

babha kiba tang habar kumba leh ka Jesebel bad ki nongbud jong ka. I kumba ki dei ki soh, kiba la ih bha bad kiba ibang, phewse ki dei pynban ki soh, kiba la bam khüiang bad pyut shapoh.

### v) KA SHITHI SHA KI KHRISTAN HA SARDIS (3:1-6)

- 1 Ha u Angel ka Balang ha Sardis, to thoh: Uta, Uba bat ia ki Hynñiew Mynsiem u Blei bad ia ki hynñiew tylli ki khlur, u ong ia kine kiei kiei: Nga tip bha ia ki kam jong phi; *Nga tip ruh* ba la nam ia phi kum uba dang im, phewse phi long uba la iap! 2 To kylla long uba ñaipeitngor! To pynkhlaiñ bad pynskhem ia kiei kiei kiba dang sah bad kiba la jan iap. Ngam pat shem ba ki kam jong phi ki la biang pura hakhmat u Blei jong Nga. 3 To ñaikynmaw, namarkata, kumno phi la pdiang bad shahshkor ña *ka Khubor Babha!* ñaibat skhem triang ia ka bad to kylla kaba mut. Lada phim peitngor, Ngan wan kum u nongtuh bad phin nym tip ia ka kynta ha kaba Ngan wan sha phi. 4 Hynrei phi don katto katne ngut ki briew ha Sardis kibym shym pynbit-ngit ia la ki jaiñkup bad kine kin ñaid lang bad Nga ha ki jaiñlieh phyrnai namarba ki long kiba bitdor. 5 ña uba ñaijop yn pynkup kumne da ki jaiñlieh phyrnai bad Ngan nym pyndam ia ka kyrteng jong u na ka kitab ka jingim, hynrei Ngan phla ia ka kyrteng jong u hakhmat u Kpa jong Nga bad hakhmat ki Angel jong U. 6 Jar uba don shkor, to un sngap ia kaba u Mynsiem u ong ha ki Balang.
- Dei tang kane ka shnong, kaba ka kyrteng jong ka ka dei ka plural ha, ka Grik "Sarðeis", namarba ka don ka shnong barim bad kaba thymmai. Tang ha kane ka shnong, ka Balang kam don eiei ban loh jingiaroh. Ka long ka Balang kaba la ñapier. Ki bok ki sot kam don, bad ki pap ruh kim da paw eh. Ka don tang kane ka pap: ka jingbym-pyrwa, ka jingbym-salia, ka jingbym-kitkhia, ka jingsamthiah ngai-ngai ha ka kyn-oi aïu re, ka jingbym-peitngor bad ka jingbym-lohi-jngai. Ka mane blei-thaw ym don, ka awria

ym don, hynrei tang ka jingsuk bad jingim kaba mem-  
mem kum ki shynrang kiba la kylla kynthei. Ban sngew-  
thuh bha !a ka jinglong jong ka Balang ha kane ka  
shnong, ngi donkam ban tip ia ka histori jong ka  
shnong bad ki briew jong ka.

Kane ka shnong Sardis ka don shaphang mihngi  
jong ka Smyrna kumba 50 mer ei bad ka ieng ha ka  
rudwah kaba sha kamon jong ka Wah Pactolus, ha  
ki sharing jong u Lum Tmolus. La ong ba la seng  
ia ka ha kum ka snem 1200 SK bad ka dei ka Nong-  
bah jong ka Hima Lydia hyndai. Na ka liang ka  
Geography, kane ka shnong ka don ha ka Them-bah  
jong ka Wah Hermus bad kane ka la ai lad ia ka  
Sardis ban kylla long ka shnong ka kha'i ka pateng,  
kaba la wan rah ha ka ka spah ka hajar kabym lah  
shuh ban batai.

Ka dei ka shnong ha kaba da ki spah snem ki  
Grik kim shym loh lad ban buhai shnong. Ki nong-  
Sardis ki la isih ia ki Grik haduh katta katta ba ki Grik  
ki la tiengiap tiengim ia ki. Te ki trai-shnong ki la  
long tang ki nong-Asia suda. Bad ki Grik kim shym  
lah ban jop ia ka, namarba ka long kum ka kut halor  
lum, ia kaba ka long kaba eh ban kiew bad ban rung. Sha-  
phang shatei jong kane ka shnong u don u syntai Lum  
Tmolus. Dei ha kawei na ki sharing jong une u Lum  
ba la tei ia ka shnong Sardis. Ka shnong ka la heh  
bad ka la laiheh shuh-shuh katba ka por ka dang iaid,  
haduh ba ki Briew kim banse ban hiar shuh-shuh  
shaduh trai ka sharing-lum bad ban tei ia ka kyntoit  
bathymmai jong ka shnong.

Kumba ngi la kdew haneng, ka Sardis ka dei ka  
Nongbah jong ka Hima Lydia. Ka la long kawei na  
ki shnong kiba pawnam bad kiba riewspah ha ki por  
hyndai. U Syiem uba khraw tam u dei u Croesus.  
Dei hapoh ka jingsynshar jong u ba ka Sardis ka la  
ieng rasong bad ka la tyngshaifi ha ka burom ka ijot,  
ha ka loh ka kot, ha ka spah ka hajar, ha ka suk ka  
saiifi bad ka jingshngaifi na ki nongshun namarba ka  
ka dei ka kut halor lum, ia kaba ym lah ban jop da  
kaba suk. La parom ba ka Wah Pactolus ka don ksiar

bad kane ka la iap ia ka Sardis ban riewspah bha. Dei ha ka por u Syiem Croesus ba ha Sardis ki la saiñ tyngka Dei ha kane ka shnong ba ki briew ki la nang ban airong ia u 'saiwul bad ka khai ka pa-teng u 'saiwul ka la paw nam bha ha Sardis. Nalor kane ka kam, ki don kiwej pat ki rukom trei rukom ktah, kum ka saiñksiar Ha ki por hvndai ym don shnong kaba kham riewspah ban ia ka Sardis bad ym shym don Syiem uba kham khraw spah ban ia u Croesus, haduh ba la mih ka 'Gientymmen, "Ban riewspah kum u Croesus."

Ka don ka parom kaba ong ba u Solon, u 'riewstad jong ki Grik, u la leit ingoh ia ka shnong Sardis bad u la iohi ia ka spah ka hajar, ia ka jingiphuh iphieng jong ka shnong, ia ka pahuh-pahai ha ka bam ka dih, ia ka kmen ka sngewbha bad ia ka jingsngewsbngaiñ jong u Syiem bad ki khun ki hajar jong u. U la iohi ba ki briew ki long kiba kwah tang ka imsuk, tang ka trei-suk, tang ka iohsuk, tang ka bamsuk bad ka thiahsuk. Um i dap-shynrang eiei ia ki samla, ki rangbah jong ka. Une u 'riewstad u la iohi ia ka jingma kaba lah ban mih na kane ka imsuk than, na kane ka jingbym pyrwa bad ka jingbym-salia, ka jingbym-phikir bad ka jingbym-iohi-jngai. Te ka parom ka ong ba dei ha ka jingladei bad u Croesus ba u Solon u la khlei kine ki kyntien jingstad, "Wat nam Bhabok Iano Iano shuwa ba un iap." Kane ka long kaba dei Wat lada u briew u koi u khiah bha, wat lada u riewspah bha, hynrei ka lah ban jia eiei ha u bad baroh kiei kiei ki lah ban pulom. Te ka dei ka deiti jong ki briew baroh ban hysiar, ban phikir, ban peitngor bad ban iohi jngai. Ki briew kiba thiahtai ha ka suk ka sadhai, ki lah ban ngat kyndit kynsan ha ka shemlanot bad ka sat-syllang.

Bad ka la long kumta thik ha u Croesus bad ka hima jong u. Ki nongthoh histori Grik ki lathuh ba u Croesus u la kwah ban ialeh thma bad u Sirus jong ka Persia, u Syiem Badonbor bad uba jur ha ka thma ka wait. Ki 'riewstad ki la sneng la kraw la u Croesus ban nym mih na shnong ban leit kynduh ia u Sirus ha ma-dan thma. Hynrei um sngap. U shanah pynban ha

ka jingfathuhlypa na Delphi kaba ong, "Lada phi jam sha shiliang ka Wah Halys, phin pynjot ia kawei ka hima-bah." Kine ki kyntien ki lah ban don ar jingmut. Lada u Croesus u jam shiliang ka Wah Halys, ka jaka ha kaba u Sirus bad ka kynhun shipai jong u ki dang sher-dara, un pynjot ia ka hima-bah u Sirus ne ia la ka hima-bah. U Croesus u la tharai ba ka jingmut ka dei kaba nyngkong. U la kynduh ia u Sirus ha madan thma bad u la rem thiaw. La tlot ka bor jong ka hima bah jong u. Hynrei um pat jem rngiew, u dang sarong hi namarba ka Nongbah jong u ka long ka kut ia kaba imat ym lah ban jop. U la leit phai sha la shnong bad u la pynkhlaifi ia la ka nongbah da ka jingsngewshngai fi kabym lah ong shuh. U Sirus u la bud-dien bad u la kerkut ia ka shnong. Ka la long kaba eh ban kiew sha ka bad ban rung. U Sirus u la dei ban ap khatsaw sngi pura. Haba u Sirus u la iohi ba ym lah shisha ban kiew beit beit sha ka shnong Sardis, u la kular ban ai buskit ia uno uno uba lah ban lap ia ka lad ka lynti ban kiew sha Sardis. Ka burom bad ka khusnam ka la leit sha uwei u shipai uba kyrteng u Hyeroeades, uba la iohi ha kawei ka sngi ba uwei u shipai Sardis u la kum hap ka tupia-nar shapoh them bad kloj lan une u shipai u la hiar ban leit tam ia ka. Kane ka la pynsngewthuh ia u Hyeroeades ba ka don ka jaka kaba lait na kaba lah ban kiew shapoh ka shnong Sardis, bad kane ka jaka ka don hagdeng kito ki sharinglum ha ka jaka ba ki kynduh ia u Lum Tmolus. Ha kawei ka miet, katba ki nong Sardis ki ioththiah ha ka jingshngai fi khlem peitngor bad khlem ap-phira, u Hyeroeades bad ki shipai Persia ki la kiew jar jar shapoh shnong bad ki la jop thiaw ia ka. La kyllon ka Sardis ha ka kti u Sirus namarba ki nong Sardis kim shym peitngor bad kim shym ap-phira. Tang shu loh rung ha ka shnong Sardis, u Sirus, uba la sngewthuh bha ia ka jinglong jong ki briew, u la ai lad ai lynti ia ki ban kmen ban sngewbha. U la hukum ia ki ban riam kum ki aktor, ban phong ki khulom ba-itynnat, ban ruwai, ban tem jingtem bad ban shad ban kmen. Um shym ailad ia ki ban long shipai bad ban



kieng atiar. Ki paitbah ki la kmen bha bad ki la hiar kyrdan ha ka longbriew manbriew. U Sirus u la leh ia ka nong Sardis kumba ka Sorkar India ka la leh ia ki Naga da kaba theh ka pisa ka tyngka ba kin ioh lad ban leh kmen leh sngewbha bad kumta ban duh ka dap-shynrang. Ka Sorkar Phareng ruh ka la leh kumjuh ia ngi ki khun u Hynñiewtrep, ia ki Karbi bad ki Assamia. Ka Sorkar Phareng kam shym ai lad la ki hun u Hynñiewtrep ban long shipai kumba ka la ai lad ia ki Mizo. Hynrei ki la pynrung pynban da ka kiad bad ka kani. Hai re hai ki briew jong ngi bad ki Assamia lem bad ki Karbi ki la kmen ha ka phohsniew ngai-ngai ka kani bad ka kiad, bad kumta ki shynrang jong ngi haduh mynta kim da iapher eh na ki kynthai ha ka dap-shynrang. Ka la long kumta ha Sardis naduh ka por u Sirus Bakhraw haduh ka por jong u Ioannis, u nongthoh jong ka Kitab Jing-pynpaw.

Namarba ki shynrang iong ka Sardis ki la long kum ki masi-dab, u Alexander Bakhraw u la jop ia kane ka shnong da kaba jem bad u la pynrung ia ka ktien bad ka kolshor jong ki Grik. Hadien ka jing-yap jong u Alexander, kane ka shnong ka la poi sha ka kti u Achaeus Hynrei ha ka jingialeh bad u Antiochus Bakhraw, ha kum ka snem 218 SK, u Achaeus. u la rem bad u Antiochus u la ioh rung shapoh kane ka shnong da ka jinglehshlur jong uwei u shipai jong u, u Legoras, uba la leh thik kum u shipai u Sirus, u Hyeroeades. Katba ki nong Sardis, kiba la sngew-shngaiñ palat, ki dang iohthiah khlem ap-phira ia ka shnong bad khlem peitngor, ki shipai u Antiochus ki la ioh rung mynmiet bad ki la jop ia ka shnong.

Khatduh khatwai, ka Sardis ka la hap ha ka kti ki Roman bad ki la pynlong ia ka ka jaka ha kaba ki bishar bad pynbeit ia kino kino ki jingjia. Kane ka shnong ka la jan duh jan dam ha ka snem 17 HK, mynba u jumai bashyrkhei u la pynjot thiaw ia ka shnong barok kawei. Donbok ba u Tiberius, u Patsha Roman, u la kloiban bei pisa ban tei biang ia ka da kaba ai sngewbha kumba phra klur tyngka. Da kane

ka pisa, ki nong Sardis ki la tei suk ia la ka shnong khlem da mih syep mih syar da lade. Namarkata, ha ka por jong u Ioannis, u nongthoh jong ka Kitab Jingpynpaw, ka Sardis ka la itynnat biang bad ka la riewspah bad ki briew ki dang iaibteng ban imsuk sadhai khlem pyrwa eiei. Ki la nang iohlad shuh-shuh ban lehkmien ha ka Stadium ka baheb, ka thiatar, ka Gymnasium bad ka jaka-sum paitbah. Ki don ki tempyl kum ka jong u Zeus, ka jong ka Artemis, bad ka jong ka Cybele, ia kaba ki paitbah ki ngeit ba ka don ka bor ban pynmih ia ki briew na ka jingiap. Hynrei ka mane-blei ia u Patsha bad ia ka blei Roma kim shym treikam ha kane ka shnong. Te ki Khristan ki la lait na ka jynjar-sat bad ka shemlanot ha kaba kiwei pat ki Balang ki la ngat. Ka Balang ha Sardis ka la ioh imsuk than eh bad kumta kam shym don ki hok ki sot bad kam shym don ruh ki pap ki sang kiba shyrkhei. Ka la shu long blem-blem: pawnam ruh ym pawnam, budnam ruh ym budnam! Kumba long ki briew ha Sardis, kumta ruh ka la long ka Balang bad ki Khristan. Kane ka long kaei kaei kaba jahburom: ka Balang kabym don jingim, ka Balang kabym leh eiei! Ka Balang kaba iohthiah ngai kum ka nongbuaid kani. U Jisu um sngewtynnat ia kane ka Balang. Hynrei la katta ruh ki don hi khyndiat ngut ki Khristan kiba bha bad kiba shitrhem kumba ngin sa iohi haba ngin batai ia ki dkhot jong kane ka shithi.

Ia kane ka shithi lah ban phiah ha ki hynriew bynta: Ka Pynithuh ia lade, ka Pynrem Banyngkong, ka Kyntu bad ka Pynrem kaba ar, Khyndiat ki riew-shitrhem, ka Khusnam bad ka Sneng ka kraw ia baroh.

#### a) KA PYNITHUH IA LADE (3:lab)

Ha ka Balang ha Sardis u Jisu u pynithuh ia lade kum Uta Uba bat ia ki Hynriew Mynsiem bad ia ki hynriew tylli ki khlur. Ngai la batai ia ki jingmut bapher bapher jong ki "Hynriew Mynsiem (Jpw 1:4) bad ia ka jingmut jong ki hynriew tylli ki khlur (Jpw 1.20). Ki kyntien "Ki Hynriew Mynsiem" ki

thew ia u Mynsiem Bakhuid, kumba ngi la batai haneng. La batai ba une u Mynsiem Bakhuid u treikam ha ki hynñiew rukom, kata ka mut, ha ka rukom kaba janai tam. U treikam ha ki hynñiew Balang bad ha ki Balang baroh ha satlak ka pyrthei. U Jisu u ong ba U bat Ma-u ia Une u Mynsiem, kata ka mut, u Mynsiem Bakhuid u dei u jong u Jisu bad U iatrei-lang bad u Jisu. U Jisu bad u Mynsiem Bakhuid ki ialong kawei (Io 16:13.15) Shuh-shuh, ka dang don sa kawei ka jingmut hangne. U Jisu u bat ia u Mynsiem Bakhuid, Uba long ka tyllong bad ka thymmei jong ka jingtrei shitrhem, jong ki jynleh jynkam kiba pyndonburom ia u Blei. Kiei kiei kiba iadei bad u Jisu ki shitrhem, ki shongshit, kim ju blem-blem. Te u Jisu u kwah ban pyni katno ka Balang ha Sir-dis ka iapher na U, Uba long Uba shitrhem bad Uba trei shongshit ha ka Hok katkum ka Hukum. Haba ka Balang ha Sardis ka iapher haduh katne na u Jisu, hato dang lah mo ban ñiew ia ka kum ka jong u Jisu? Ngì ngeit ba ka dei kane ka jingmut ba u Jisu u kwah ban pashat sha ki nong Sardis, kiba iapher ka dur ka dar na U namar ka jingbym-salia jong ki, namar ka jingkheijnsting jong ki ia kiei kiei baroh. U Jisu, kum u Mynsiem Bakhuid, u husiar, u peitngor, U sharai; hynrei ka Balang ha Sardis ka iohthiah ngai ngai kum kaba la buaid kani, kumban shu ong noh.

Nangta u Jisu u ong ba u bat ia ki hynñiew tylli ki khlur. Kumba la batai haneng, kine ki thew ia ki nongpyniaid ia ki Balang bad ia ka Balang hi baroh kawei. Da kane u Jisu u kam ia ka Balang bad ia ki nongpyniaid jong ka ba ka shnong Sardis. Baroh ki don ha ka kti jong U bad ki dei ki jong U wat lada kim dondor kumba ki long ha kane ka por. Lah ban ianujor ia ki bad ka lut tyngka kaba shispah kabym dei kaba shisha, hynrei ia kaba u nongrep u la foh na u marwari da kaba die shiteng byrni u phan. U phan u don dor. Hynrei ka lut tyngka, ynda la pyni ha ki nongpyniaid ka bank, kam don dor eiei ruh em. Kumjub, u Jisu u la iap bad U la shah-shitom, U la phlei ia la ka snam ban ioh ia kato

ka. Balang, hynrei ynda u ja ioh bat ba kti, la shem ba kam don dor. Kumta ka long ka Balang bad ki nongpyniaid jong ka ha Sardis.

### b) KA PYNREM BANYNGKONG (3:1c-2)

U Jisu u ong ba u tip bha ia ki kam jong ka Balang ha Sardis, hynrei ki dei ki kam kibym don dor. Haba peit nabar, na ka liang ka pyrthei, ka Balang ha Sardis i kumba ka im bad ka trei-kam, hynrei ha ka jingshisha ka la iap. Bad kane ka jingiap ka lah ban long bun jait. Nyngkong eh, ka la iap ka bor-pyrkhat. Ym don jingkwah shuh ban tip shuh-shuh shaphang ka Khubor Babha bad shaphang u Jisu Ym don jinghikai-niam, ymdon jingialap, ym don jingdur-iap ia kiei kiei kiba iadei bad ka niam. La shu im kumto blem-blem khlem pyrwa eiei na kane ka liang.

Nangta, haba ym don shuh ka jingtrei-kam ka bor-pyrkhat, ka mon ban leh eiei ruh kam don shuh. Ym lah rai eiei shuh, ym lah shuh ban ia-ieng ialeh, la shu dem lin-lin kum u phlang ha ka lyer. Ym don jingkwah shuh ban leh eiei. La shu iehnoh ia kiei kiei kumba ki long. "Long katba long" ki ong ki nongpyniaid bad ki paitbah.

Bad haba ymdon shuh ka mon, ka tipbriew tipblei ruh ka jah noh. Ym don jingsngew eiei shuh, la ka dei ka hok ne ka pap. Baroh kiei kiei ki long kumjuh. Ka hok ka long kum ka pap bad ka pap ka long kum ka hok. La shu pdiang kyllum ia kiei kiei baroh.

Te haba ym don shuh ka bor-pyrkhat, ka mon bad ka mynsiem tipbriew tipblei bad tiphok tipsot, kaba ieng rasong, ka dei ka Pap, ym ka Hok. Te khlempep ha Sardis ka leh awria ka la don, hynrei ym don ba pyrwa, ym don ba pyrshah, ym don ba sneng ba kraw. Khlempep ka la don ka kwah rhah bad ka mane bleithaw ia ka spah, hynrei ym don ba kdew ba ka dei kaei kaei kaba sniew. Khlem artatien ka don ka klim ka ngoh, hynrei ym sngew jakhlia eiei bad ym sngew pap eiei ruh em. Ka la don ka tuh ka thim ruh,

ka lamler, ka thok ha shukor, hynrei la ia shu myllen baroh bad ym don ba patiw. Kane ka dei ka dūr bashyrkhei jong ka jingīap na ka liang ka mynsiem. Bad ka jingim kaba kum kane, kam iapher na ka jingīap. Ki Longshuwa jong ngi ki ju ong ba ka Pāp ka iap. Kane ka dei ka jingmut jong ki bad ka Jynthoh Bakhuid ruh ka kren kumjuh (Jst 2:23-24; Lk. 15:24; Eph. 2:1,5; 1 Tim. 5:6). Ka Balang bad ki nongpynīaid jong ka, kiba im ha kane ka rukom ki long, thik kum kiba la iap.

Bad kane ka jinglong jong ka Balang ha Sardis ka la mih na kawei ka thymmei: ka jingbym-husiar, ka jingbym-peitngor, ka jingbym-sharai, ka jingbym-iōhi jngai, ka jingbym-pyrwa, ka jingbym-salia. La shu thiah sngi khlem pyrkhāt eiei. Ka dei ka Balang kaba khlem nongsharai bad nongpeit nongkhmih. Te u Jisu u kyn-tu, "To kylla long uba iapeitngor." Ka shnong Sardis ka la shah jop bad ka la jot na ka daw ba ki nongsyn-shar bad ki paitbah kim peitngor bad kim ap-phira. Haba ym don nongap-phira, ki nongshun ki ioh ban rung: Ki nongshun hangne ki dei ki pap ki sang bad ki jingsniew laiphew jait.

Ki kyntien u Jisu "To pynkhlaifñ . . . . iap", ki kdew ba dang don eiei, kaba bha, kaba dang sah salit kumban shu ong noh. Hynrei kane kaei kaei kaba bha ruh ka la jan iap. Tip kumno re kumno ka dang im. Na kane kaei kaei kaba dang im bad kaba dang bha, ka Balang bad ki nongpynīaid jong ka ki lah ban khie-im biang. Khatduh eh, u Jisu u ong ba Um pat lah ban shem eiei kaba da bha shisha ha Sardis. Ym pat don da shisha kaba lah ban pynsngewbha ia u Blei haduh katta katta. La lap ba ki don tang ki jingduna suda, na ka daw ka jingbym-kitkhia bad ka jingbym peitngor.

### c) KA KYNTU BAD KA BYRNGEM KABA AR (3:3)

Hangne u Jisu u iaroh ia ka jingshitthem kaba

mynnor jong ka Balang ha Sardis. U Jisu u kyntu ia ki paitbah ban iaikynmaw dngong ia ka jingshongshit bad ka jingshitrhem jong ki ha kito ki sngi ba ka Khubor Babha ka la poi nyngkong ha Sardis. Hynrei kane ka jingshitrhem ka la duh noh. U Jisu u kyntu ia ki Khristan ban pynkhie-im biang ia kane ka jingshitrhem bad ka jingshongshit bad ban iaineh ha ka. Kane ka dei ka jingkylla kaba mut ba ki Khristan ha Sardis ki donkam. Kim bit shuh ban shu im blem blem namarba kam iadei-dur bad ka kyrdan jong ki.

Bad kane ka jingkylla kaba mut, lada ka long kaba shisha, ka dei ban ialam ia ki Khristan sha ka jingpeitngor, sha ka jinghusiar, sha ka jingsharai, sha ka jingphikir bad sha ka jingimsngi ia kiei kiei baroh ha ka Balang. Kim dei ban ong, "To, mat leh kiwei! Kam dei ka deiti jong nga!" Ki dei ban sharai bad ban ap-phira ia ka Balang ioh ba ka pap ka sang kan ioh rung. Lada kim peitngor bad kim imsngi, hynrei ki thiah ngai-ngai, kan jia ha ki thik kumba ka la jia ha ka shnong ha ka por ba u Sirus bad Antiochus ki la kerkut ia ka Sardis. Kan wan ka jingsbahjop bad ka jingjot ha ka por ba kin khmih lynti (Mt. 24:42; 25:13; Mk. 14:38).

#### **d) KHYNDIAT NGUT KI 'RIEWSHITRHEM** (3:4)

Kumba ngi la iohi haneng, ka jingdum ka la tap tyllep ia ka Balang ha Sardis. Hynrei da ka jingisynei u Blei, dang don hi hangne hangtai iwei ar i jingshai. Ki dang don ki biew kiba hok bad kiba shitrhem. Kane ka pyni ba u Jisu um peit tang ia ki pap ki sang ne ki tam ki duna, hynrei U wad bad u iit ruh ia ki hok bad ki kam babha. Wat lada kiba bun ki sniew bad ki pynbitar ia u Blei, kumban shu ong noh, u Blei um ju klet ia kiba bha wat la ki khyndiat katno katno ruh. Te u Jisu u ong ba ki dang don hi khyndiat ngut kiba, bha, kiba hok bad kiba shitrhem. Kane ka pynkmen ia U. Bad u Jisu u ia roh ia ki ba,

namarba ki bha, ki hok, ki shitrhem, ki peitngor, ki phikir, ki sharai ia lade bad ia kiwei ruh, kim shym pynbit-tngit ia la ki jaiñkup, kata ka mut ba kim shym hap ha kito ki pap ki sang bad ki tam ki duna kumba la hap kiwei pat na ka daw ka jingbympeitngor jong ki. Bad kumta ki jaiñkup jong ki ki iailieh phyrnai.

Kiei kine ki jaiñlieh phyrnai? Ka jaiñlieh phyrnai ka thew ia ka jingim kaba khuid, ka jingim kabym don jingthohbria shuh. Ki Khristan hyndai ki ju phong da ki jaiñlieh phyrnai hadien ka Baptisma jong ki, ban pyni ba ki la khuid na ka pap ka sang bad ba ki la kup da ka hok ka sot. U Jisu, namar-kata, u pynkynmaw ba, wat lada bun ki la pynjakhlia ia la ka jingim da ka pap ka sang hadien ka Baptisma jong ki, ki dang don katto katne kiba la bat hok ia la ka juban-lak baptisma bad ki la ri khuid ia lade khlem jingthohbria. Ka jaiñlieh phyrnai, namarkata, ka dei ka dak ka shin jong ka jingkhuid bad ka jing-lui-lui hadien ka baptisma bad ki la kylla long ki khun baieid jong u Blei. Ia kane ka dak ka shin ki jentil ruh ki la pyndonkam ha ka jingiadei bad ki blei jong ki. La ong ba ka don ka dustur hapteng ki jentil ruh ba ym shah iano iano ban rung ha ka tempyl ban mane blei, lada ki jaiñjong ki ki jakhlia bad ki tngit. La dawa ba ki dei ban phong ki jaiñlieh. Ki Khristan ki la shim ia kane ka dak ka shin, kaba paw ban pyni ia ka jingkhuid phar jong ki na ka pap ka sang hadien ka baptisma. Ka dei ka dak ka shin kaba iadei-dur bad kumta ki Khristan ki la pyndonkam ia ka, namarba u Jisu um shym wan ban pynduh pyn-dam ia kaba bha, hynrei ban pynjanai bad ban pyn-pura,

Kine ki khyndiat ngut, u ong u Jisu kin iaid lang bad U ha ki jaiñlieh phyrnai. Kane ka dei ka rukom kren jong ki Israel hyndai. Bad iaid lang bad u Blei ne ban iaid hakmat u Blei ka mut ban imlang sahlang bad u Blei (Jen. 5:22,24). Ha kine ki dkhot la ong ba u Enokh u la iaid bad u Blei ha kane ka pyrthei kata ka mut u la imlang sahlang bad u Blei ha ka Hok katkum ka Hukum. Te u Jisu u mut ban ong ba kine

ki Khristan, kiba bha, ki imlang sahlang bad U ha kane ka pyrtnei bad kin imlang sahlang ruh bad U ha bneng ha kawei ka sngi. Bad kin imlang sahlang bad U ha ki jaiülieh phyrnai kata ka mut ha ka Hok katkum ka Hukum. Hangne ngi iohi ia ka jingitynnat jong ka jingim Khristan. Ki Khristan, kiba bha, ki im kajuh ka jingim-blei kum u Jisu, ki ia-imlang bad U naduh kane ka pyrtnei haduh ba kin da poi sha Tyngkong jong u Blei. Ka jingim jong ki Khristan kam dei shuh tang ka jingim-briew, hynrei ka jingim jingblei da shisha. Shuh-shuh, u Jisu u ong ba ki long kiba bitdor, kata ka mut ba ki la dawa ia kane ka jingim lem bad U ha ka burom ka ijot. Kane ka long thik kumba ong ki Longshuwa jong ngi ba ki briew, kiba bha, ki kamai ia ka Hok. Haba u briew u kamai, u dawa ia kato kaba u la kamai kum ka hok tynrai, kumban shu ong noh. Kane ka dei kawei na ki jingshisha kiba pynkmen ia ngi ki Khristan bad ia ki briew baroh. Ka jingneit ka dei ka jingaiei jong u Blei. Da kane ka jingneit la pynmanhok ia ngi bad kumta ngi la ioh ka jingim-blei, ngi la kylla long ki khun bashisha jong u Blei. Ha kane ka jingim-blei pat de, ngi lah ban leh bun kiei kiei bad da kine ngi dawa ia ka Burom ka ijot na u Blei. Ngii kylla long da shisha kiba bitdor bad ngi donhok ban ioh eiei kum ka jong ngi. Bad ia kaei kaei kaba ngi dawa lyngba ka jingimblei, ngi lah ban kam kum ka jong ngi bad u Blei u kmen ban pyrtai, "Hooiid, ka dei ka jong phi! Phi la dawa bad phi la bitdor!"

Khatduh eh, ban laid lang bad u Blei ka lah ban mut ruh ban ioh ka jingkmen bad ka jingsngewtynnat kum haba ngi laidkai ha ki lum ki them ha ka por pyrem ne ka por synrai. Katno ka jingpyngnad bad ka jingsngewtynnat! Shuh-shuh, ka lah ruh ban mut ban shah jied kyrpang bad ban ioh ka burom kaba kyrpang. Ki Syiem ki Patsha jong ka Ri Pdeng-mihngi ki ju don ki kper ba ki dkhót "pardesos", ha kiba tang ki Syiem bad ki Patsha ki don ka hok ban laidkai ban bam lyer pyngngad. Bad bunsien hi kine ki Syiem ki Patsha ki laidkai marwei ne bad ki



khun ki kti jong ki. Hynrei ka lah ban jia ba ki don ki briew ia kiba ki da ieid thep mynsiem bad ki burrom haduh katta katta bad ban pyni ia kane ka jing sngewkyroang ki khhot sngewbha ia ki ban laidkai bad ki ha kine ki kper. Te ban laid bad u Blei ne bad u Jisu, ka mut ban long ki paralok baieid thep mynsiem u Jisu, ia kiba U khot kyrpang ban kmen bad ban sngewtvnnat bad U. Hangne ka paw ka jingieid bad ka jingbha jong u Jisu!

### e) KA KHUSNAM (3:5)

Ha ki Khristan liba laieh. u Jisu mynta u kular ban ai lai tylli ki bainong ne ki khusnam: ka jaitlieh phyrnai, ka jingneh jong ka kyrteing ha ka Kitab ka jingim bad ka jingpyndonburom da u Jisu hi ha khmat u Blei u Kpa bad hakmat ki Angel.

Ngi la batai haneng ia ka jingmut jong ka "jaitlieh phyrnai". Hynrei hangne ka jaitlieh phyrnai ka dei ka Khusnam bad kam dei tang ka jingim kaba hok bad kaba khuid hakmat u Blei. Hood, ka jingim kaba khuid bad kaba hok hakmat u Blei ka dei ka tynrai bad ka tyllong jong kiei kiei kiba bha, ha kane ka pyrthei. Khlem kane ka jingim hok bad ba-lui-lui, ym lah imlang sahlang bad u Blei bad u Jisu (Mt 5:8).

Nangta ka rong lieh ka dei ruh ka dak ka shin jong ka jingjop. Ki nongjop ha ka por hyndai ki ju phong da ki jaitlieh phyrnai, khamtam'eh ha ka Nongbah Rom, haba ki laid byllien ban burom ia uno uno u nongjop uba wanphai sha ka Nongbah. Ha kum kane ka kkep, wat ia ka Nongbah ruh la ju khot ka Shnong Balieh na ka daw ka jingjop jong ka jaitbynriew ia la ki nongshun ne ki nongialeh-pyrshah. Ki Khristan, da ka jingim kaba hok bad kaba bha, ki top ia ka Pap ka Sang, ia u Ksuid u Khrei, kiba long ki nongshun jong u Blei bad jong ki ruh. Nangta barabor na ka jingjop ka mih ka jingkmen bad ka jingsngewbha, ka nam bad ka burom. Ha ka por ka kmen ka sngewbha, ka khawai ka dawai, ki riwyndai ki ju phong

da ki jaiñlieh (Koh. 9:8). Te ka jaiñlieh ka thew ruh ia ka jingkmén, ka jingsuk bad ka jingsngewbha ba ki Khristan, kiba iaineh, kin ioh na u Jisu.

Ka khusnam kaba ar ka dei ka jingdon bad ka jingpaw jong ka kyrteng jong ki ha ka kitab jong ka jingim. Kane ka kitab jong ka jingim, kaba long kum ka Rejistor u Blei, ka paw bha ha ka Jynthoh Bakhuid. Da kane, ka Jynthoh Bakhuid ka mut ba ong ba ki riewhok ki dei ki khun ki hajar jong ka Hima u Blei (Ex. 32:32-33; Ps. 69:28; 139:16; Dan 12:1; Philip. 4:3) Kane ka dei ruh kawei na ki dustur jong ki Syiem ki Patsha hyndai ba ki ju thoh bad buh jingkyndmaw ia ki kyrteng jong ki khun ki hajar ha kawei ka rejistor. Lada jia ba uno uno u haramnimok ne u leh pap leh sang bad u pynjah burom ia u Syiem ne ia ka hima, ki pyndam noh ia ka kyrteng jong u na ka rejistor bad kumta um long shuh u khun u hajar bad u ioh ka jingpynshitom. Te u Jisu ruh, kum u Syiem u Patsha, u kular ban nym pyndam lano lano ruh ia ki kyrteng jong ki Khristan kiba iaineh bad kumta kin iailong barabor ki khun ki hajar jong U, ym ki raïot.

Ka khusnam kaba lai ka dei ka jingpyndonburom ia ki Khristan balaineh da u Jisu hi hakhmat u Blei u Kpa bad ki Angel katkum ka kular jong U (Mt. 10: 32-33; Lk. 12:8-9). U Jisu un pynbna, un iaroh bad un pyrto ia ka jingim babha jong ki bad Un padiah ia ki kam babha jong ki. U Jisu u dei u nongiaroh Uba bha tam, bad ka jingiaroh jong U ka don ka nongrim da shisha. Ka jingiaroh ki briew kam long eiei haba ianujor bad kane ka jingpyndonburom da u Jisu hi.

## f) KA SNENG KA KRAW IA BAROH (3:6).

Thik kum ha ka shithi sha ki Khristan ha Thia-tira, hangne ruh u Jisu u sneng u kraw ia baroh ba ki dei ban peitngor, ban sharai, ban phikir ioh ki kum ngat ha ka jingma bad ka jingjot. Kane ka sneng ka kraw ka long kaba deipor da shisha. Kito kibym

phikir, kito kibym kitkhia, ki ngat ha ki bun ki jing-  
sniew, ki jingma bad ka jingjot ruh ka ap dngong.

vi) KA SHITHI SHA KI KHRISTAN HA  
PHILADELPHIA (3:7-13).

7 Ha u Angel ka Balang ha Philadelphia, to thoh: Uta u  
Bakhuid bad u Bashisha, Uba don ia u shabi jong u  
Dabid

Uba plie bad ym don ba lah ban khang,  
Uba khang bad ym don ba lah ban plie,

u ong ia kine kiei kiei : Nga tip bha ia ki kam jong  
phi Hakhmih, Nga la pynkhreh ia ka jynkhang kaba  
plie war hakmat jong phi, ia kaba ym don ba lah ban  
khang. *Nga tip bha ruh ba phi don ka bor kaba rit,*  
hynrei phi la bat skhem triang ia ka Ktien jong Nga  
bad phim shym la len ia ka kirteng jong Nga. 9.  
Hakhmih, Ngan ai ha phi ia kito kiba dei na ka  
Sinagog u Soitan, kiba khot ia lade ki Ju, hynrei kim  
long bad ki shu lamler pynban. Hakhmih, Ngan pyn-  
wan ia ki *sha phi* bad kin dem ngon ha ki kiat jong phi  
bad *kumta* kin tip ba Nga la iei id ia phi. 10 Namar-  
ba phi la pyndep ia *ka hukum* jong Nga ban iaishah-sa-  
tar, Ma-nga ruh Ngan sa ri kyndong ia phi ha ka por  
jong ka jingtynjuh, kaban sa wan ha ka pyrthei baroh  
kawei, ban tynduh ia ki briew kiba shong ha ka sla  
pyrthei. 11 Ngan wan kloi. To bat skhem ia *kata*  
kaba phi don, loh shim noh mano re mano ia ka  
pansngiat na phi. 12 ia uba ia iajop Ngan pynlong u  
rijied ha ka tympyl u Blei jong Nga bad un nym mih  
shuh *na ka*. Ngan thoh halor jong u ia ka kirteng  
u Blei jong Nga bad ia ka kirteng ka nongbah u Blei  
jong Nga, ka Jerusalem bathymmai, kaban wan bias  
na bneng na u Blei jong Nga, bad ia ka kirteng ba-  
thymmai jong Nga. 13. Jar uba don shkor, to un  
sngap ia kaba u Mynsiem u ong ha ki Balang.

Kum ka Smyrna, ka shnong Philadelphia ruh ka  
la loh tang ka jinglaroh suda na u Jisu naduh hasdang  
haduh bakut ka shithi. Ka dei kawei na ki lynnong

kiba sngewtynnatt ha kane ka Kitab Jingpynpaw. Bad kane ka shnong ka dawa ia kane ka jingiaroh namar ki kam babba jong ka. Ka Balang, na Philadelphia ka la' tong ka Balang kaba janai da shisha bad u Jisu u la sngewhun hi jrut.

Namarba ki briew kiba shong ha kano kano ka shnong ki iasyriem ia ka jinglong jong ka, kan myntoi shibun ia ngi lada ngi lah ban tip eiei shaphang ka Philadelphia na ka histori.

Ka histori ka iathuh ba ia ka shnong Philadelphia la seng da u Syiem Attalus II jong ka Pergamum ha ka spah snem kaba 13. Namarba u la ieid thep mynsiem eh ia u para jong u u Eumenes, ia ai nam ia u u "Philadelphos", kata ka mut, u briew uba ieid ia la u para. Te katkum ka dustur ba ki Syiem ki la ju bud haba ki seng kano kano ka shnong thymmai, une u Syiem ruh u la jer ia kane ka shnong "Philadelphia."

La toi ia ka Philadelphia, katkum ka Geography, ha iduh jong kawei ka Them kaba heb, ia kaba ki Grik ki khot ka Katakekavmeni, kaba mut ka Ri ne Jylla ba la thang. Shisien kane ka them ka la ju mih ding. Ha ka por ba seng ia ka, kine ki jaka mih ding (vulcano) ki la duh noh. Ha kum kine ki jaka, ka khyndew ka long kaba sbob bad kaba seisoh. U dieng sohwaifi bad kiwei pat ki iynthung jyntep ki mih bha ha kane ka them. Te ka la long ka shnong kaba bit babiang.

Hynrei ka nam jong ka Philadelphia kam shong ha ka spah ka hajar jong ka, hynrei ha kawei ka kam ba ka la leb, katkum ka jingthmu jong u nongseng jong ka. La seng ia ka, ki khanatang ki ong, ban pynphriang ia ka rukom im ki Grik, ia ka kolshor jong ki, ia ka philosophi jong ki bad khamtam eh ia ka ktien ka thylliej jong ki. Ba kane ka kam kan suk, u nongseng u la jied ka jaka kaba bit bha: ka khap pud jong ki lai tylli ki hima ne ki Jylla, ka Phrygia, ka Mysia bad ka Lydia. Nangne u Attalus u la rai ba ka kolshor, ka philosophi, ka rukom im bad ka Ktien Grik ki toi ban phriang sha Lydia, bad sha Phrygia.

Kane ka jingthmu ka la urlong, namarba ka Philadelphia ka la ioh shisha ka lad ka lynti ban pyndep la kane ka deiti ba la buh bad ba la mang. Hynrei ka rukom pynphriang ia ka kolshor jong ki Grik bad ia ka Ktien jong ki ka iapher na kato ka jong u Antiochus Epiphanes, uba la pyntian jubor ia ki briew. Ki nong Philadelphia ki la leh ia kiei kiei ha ka rukom kaba bha tam eh, khlem pynbor iano iano, hynrei tang da kaba pyni ia ki jingmyntoi ba ki briew ki lah ban ioh. Te kloi lan ka Grik kolshor bad ka Ktien ki la phriang ha ki hima Lydia bad Phrygia bad ki briew ki la kten Grik kylleng kylleng(l). Hangne ka paw ba ki briew ki la long kiba bha mynsiem bad kumta ki lah ban pynsgewieid ia ki briew ha ka jingladei bad ka kolshor bad ka kten jong ki. Hynrei na kawei pat ka liang, ka Philadelphia kum ka shnong ka la budnam ha ka jingladei bad ki Khristan. Namarba kane ka shnong ka iadei bha bad ka Pergamum bad namarba ha Pergamum ka mane-blei ia u Kaisar bad ia ka blei Roma ka jur bha, ki Khristan ki la ngat ha ka jynjar-sat na kane ka liang.

Namarba ia ka Philadelphia la tei ha thmied ne ba tduh jong u Lum Tmolus ha ka jaka kaba bun jumai, ka la ngat ha ka shemlanot ha ka snem 17 HK, mynba u jumai-bah u la pynjot ia ka bad ia ka Sardis. Ka khanatang ka ong ba kiwei pat ki shnong ruh ki la jynjar. Hynrei u jumai u la jur shisha ha Philadelphia

1 Dei hangne ba ka Sorkar India, ha ka jingladei bad ka Hindi, bad ka Sorkar Assam, ha ka jingladei bad ka kten Assamisa ki la bakla namarba ki la kum bud ia ka nuksa u Antiochus Epiphanes bad kim shym leh kumba la leh ka shnong Philadelphia. Kajingieid bad ka jingniewkor ia ka Hindi ka la idang ban teng rasong ha ki Jylla baroh jong ka Ri India, khamtan eh ha Madras. Hynrei uwei u Myatri, u Triguna Sen, u la pynmih ka aifi afu-re ban pyntian jubor ia ka Hindi. Baroh ki dang kynmaw ba ki Jylla Bashathic ki la haramimok bad ki la prie ia ka Hindi na la ka shyntur kumban shu ong aoh. U Triguna Sen u la bam jakhluit Kumjuh ruh ka Sorkar Assam ka la pyntian jubor ia ka Assamia, bad kumta ki la mth ki Jylla bapher bapher ha kane ka Dong Shatei Lam-mihngi jong ka Ri India. Kine ki Sorkar ki la bakla namarba kum shanor ia ka sneng ka kraw jong ka histori.

bad um shym kut kumba u la kut ha kiwei pat ki jaka, Da ki snem, ki nongthoh histori ki ong, u jumai u laikhoh shi laikhoh ha Philadelphia, wat lada um da jur kum uto uba ha ka snem 17 HK. Da ki snem ki briew ki la im ha ka tieng ka syier. Bunsien ki la dei ban mih na la shnong namar kane ka jingtieng la u jumai. Katno ki la khmih lynti ia ka por bad ka ia ha kaba kin nym mih shuh na la shnong !

Hynrei ka Philadelphia, kum ka Sardis, ka la donbok namarba u Patsha Tiberius u la iarap ia ki briew ban tei biang ia la ka shnong. Ban pyni ia la ka jingsngewnguh, ki trai-shnong ki la kylla noh ia ka kyrteng Philadelphia sha ka Neocaesarea, kata ka mut, ka shnong bathymmai u Kaisar. Shuh-shuh hadien ba ki la loh jingiarap na uwei pat u Patsha, u Vespasian, uba na ka kur Flavius, ki la kylla biang bad ki la khot ia ka ka Flavia. Hynrei kine ki kyrteng bathymmai kim shym neh.

Khatduh eh, kito kiba la loh lad ban shang kylleng ka Asia Minor, ki sakhi ba bun na kine ki shnong ki la kylla long ki shnong jong ki Muslim hadien ka jingwan hiar thma ki Turk. Hynrei bhabok ba ha Philadelphia ki Khristan ki dang bun haduh mynta, wat lada ka imlang sahlam kam long shuh kum ha ki por hyndai hynthai.

Na kine kiei kiei kiba ngi la ong haneng, ka paw shai ba ka jinglong jong ka shnong Philadelphia ha ka histori ka phalang ruh ha ka jingim jong ka Balang bad ki Khristan ha pneh jong ka. Ka dei ka Balang bad ka kynhun Khristan kaba bha da shisha kumba kan paw shai-kdar ha ka jingbatai ia ki bynta bapher jong kane ka shithi.

Ia kane ka shithi lah ban phiah ha ki saw bynta : ka Jingpynithuh ia lade, Ka Iaroh, ka Khusnam bad ka Sneng ka kraw ia baroh. Ym don ka Pynrem, ym don ka Byrngem, ym don ka Jingkynthu ban kylla kaba mut, namarba ki Khristan ki la long kiba bha suda, bad ki long ka nuksa ia baroh.

## a) KA PYNITHUH ĪA LADE (3:7)

Ha kane ka jingpynithuh ĩa lade, u Jisu u ai ha lade hi lai tylli ki nam: u Bakhuid, u Bashisha bad u Shabi u Dabid. Bad kine ki nam ki don ka jingla-dei bad ka Balang bad ki Khristan ha Philadelphia.

Nyngkong eh, u Jisu u nam ĩa lade kum u Bakhuid ha ka Khasi, "Hagios" ha ka Grik bad "Qadosh" ha ka Hebru. Kane ka dei ka nam, ĩa kaba ka Jynthon Bakhuid ka ai ha u Blei. Bad u Blei hi ruh u nam ĩa lade u Bakhuid (Leb. 11:44; 20:26; Is. 6:3; 41:14; 43:15; Hos 11:9). Īa ka jingmut tynrai jong kane ka kyntien, ngi loh na ka Hebru "Qadosh", kaba mut "ba la pynĭa-khlad na, kaba ĩa buh kyrpang, baĭapher na kiwei pat." Hoodid, u Blei u ĩapher bak-lybak na ngi ki briew bad na kiei kiei baroh, wat lada ngi dei ka dur ka dar jong U. U Blei u ĩeng kyrpang na kiei kiei baroh. U kyrpang ha ka jinglong bad ki kam. Te da kane ka nam, u Jisu u pynbna ba U dei u Blei Bashisha.

Shuh-shuh, kane ka kyntien "Bakhuid" ha ka Khasi bad "Qadosh" ha ka Hebru, bad "Hagios" ha ka Grik kam thew ĩa ka jingĭapher ne ka jingkyrpang kaba pynjngai ĩa u Blei na ki briew bad ka mariang. U Blei u long kyrpang khnang ba Un dup leh eiei, bad ban leh eiei na ka bynta ka jingbha jingmiat u khunbynriew. U Blei u long u Bakhuid, u Bakyrpang, u Ba-la-pynĭakhlad namarba U imsngi ĩa ngi bad u leh u kam ba ngin myntoi ma-ngi. U Blei u long u Bakhuid namarba u trei bad U trei da ka bor bad ka iktiar. Kumjuh ruh u Jisu u long u Bakhuid, namarba U long u Blei bad U imsngi ĩa u khunbynriew.

Khatduh eh, ha ka Jutang Bathymmai ruh, ĩa kane ka nam ĩa ai buhsien ha u Jisu naduh basdang (Lk. 1:35; Mk 1:24; Kam 3:14). Namarba u Jisu mynta u dei u Bakhuid, u dei ruh u Blei Uba imsngi ĩa u khunbynriew da ka jingieid jong U.

Ka nam kaba ar ba u Jisu u ai ha lade ka dei kane: U long u Bashisha. Bad ngi ĩa ring jingmut ĩa kane ka kyntien Khasi na ka Grik "Alithinos". Kane

ka kyntien ka long kaba kyrpang bha. Ka thew ia kaei kaei kaba paw kumba ka long tynrai. Ka long kumba ka paw bad ka paw kumba ka long Ngi la ju poi sha ka Shad Weiking, ha kaba ngi iohi ia ki 'rang-dajied bad ki 'theikynsai kiba la rium da ki 'piengksiar banylla bad ka ksiar ka dei ka ksiar da shisha. Hynrei ngi la ju poi ruh sha ki Shad Suk Mynsiem ha ki pongkyngdong. Ngi iohi ia kito ki kpieng Ki i thik kum ki 'piengksiar ha Weiking. Hynrei ynda ngi la peit bad twad, ki dei pynban ki kpieng ba la thied na ki Kharbhut ha lewduh Ki dei tang kiei kiei kiba la shu pyrbuhbud bad ba la shu mutdur. Kim dei ki 'piengksiar bashisha, bad kato ka ksiar kam dei ka ksiar hynrei tang ka rong ksiar. Te ngi ong ba ki kpieng ha ka Shad Weiking ki long "alithini" bad kito ha ki nongrit nongkyndong pat kim long. Ha Weiking ka ksiar ka paw bad kato kaba paw ka dei ka ksiar hi. Ha ka jingshisha, ia kane ka kyntien Grik "Alithinos" ia dei ban ring jingmut sha ka Khasi da ka kyntien "Banylla." Te kane ka kyntien ka thew ia ka jinglong. Te ha u Jisu ka don tang kaei kaei kaba nylla suda. U Jisu u long ka jingim bad kane ka jingim ka dei ka jingim banylla. U Jisu u long uba hok bad kane ka Hok ka long kaba nylla, ym tang kaba shu paw. Ha u Jisu ka don tang kaei kaei kaba long shisha. Te kane ka kyntien ka iapher na kawei pat ka kyntien Grik "Alithes" kaba mut kaei kaei kaba shisha bad kaba pyrshah ia ka lamler ne ka thok. Ka thew khamtam eh ha ka jingiadei ka pyrkhat bad ka ktien.

Khatduh eh, ha ka Jutang Bathymmai u Jisu bun-sien u ai ha lade ia kane ka nam ha ki jingkren bapher bapher jong U (Io. 6:33; 15:1). Te ka dei ka nam ia kaba ki Khristan hyndai ki sngewthuh bha. Bad u Jisu u pyndonkam ia kane ka nam ban iarah bad pyrto ia ki jinglong banylla jong ki Khristan ha Philadelphia.

Ka nam kaba lai ba u Jisu u ai ha lade ka dei: U shabi u Dabid. Khlempep haba u Ioannis u la thoh ia kane ka lynnong, u la kynmaw ia u Eliakim, uba long u nongpeit-nongsumar ia ka lingsyiem ha Jerusalem. U Biei in u ong, "Nga pyntawan ia u shabi ka ling u Dabid bator ka kyrpeng jong u, lada un plie, te yn



ym don ba khang; lada un khang, yn ym don ba plie (Is 22:22). Da kane u Jisu u mut ban ong ba Ma-u u dei u nongsumar sukber ia ka iing ka sem u Blei. Dei Ma-u uba bat ia u shabi ka paki dulan u Blei. Tang da U marwei ki briew ki lah ban poi sha u Blei. Kim don kawei pat ka lad ka lynti. Ha ka Jutang Bathymmai la ban tynggeh bha ia kane (Io. 1:18; 14:6; 1 Tim2:5-7; Heb. 4:14-16; Mt. 11:27) Hangne ngi iohi ba u Jisu u bat ha la ki kti ia u shabi jong ka Hima u Blei bad jong ka iing ka sem jong U. Ki briew kin poi sha u Blei tang lyngba u Jisu.

### b) KA ĪAROH BAD KA PLIE LAD (3:3-10)

Kumba ngi la kdew haneng, u Jisu u dap tang da ka jingīaroh na ka bynta ki Khristan ha Philadelphia. Um lap eiei ka kampap kamsang hapteng jong ki. U iohi tang ki kam babha suda bad kine ki kam ki dei shaphang ka jingpynphriang ia ka Khubor Babha ha kiwei pat kibym pat iohsngew ne tip shaphang u Jisu bad ka Khubor Babha jong U. Namarba u Jisu u bat ia u shabi jong ka Hima u Blei bad kiei kiei baroh ki shong ha U, U pynbna ba U la plie lad plie lynti khnang ba ki Khristan kin duplah ban iaid shaphrang ha kane ka kam kaba khraw tam: ban ialap ia ka Khubor Babha. U Jisu u ong ba ka lynti, ka dwar, ka jynkhang ki plie rynghang da ka jingpynkhreh jong u. Yn nym don ban pynwit haduh katta katta ia kane ka kambah kamsan ban pynphriang ia ka khubor Babha. Kane ka pyni ba ka jingshitrbem had ka jingshlur jong ki nongpynphriang ia ka Khubor Babha ka dei ka jingplie lad plie lynti jong u Jisu hi. Ka dei ka jingleh u Jisu, ym ka jong ki briew. Shuh-shuh, kine ki kyn-tien u Jisu "Hakhmih, Nga la pynkhreh ... ban khang" ki mut ba ki nongialap bashitrbem shisha kin nym duh lad duh lynti haduh katta katta; kan don hi ka lad ka lynti kumno re kumno. Yn nym don ba lah ban khang lad ia ki lada ki don ka mon kaba skhem ban ialap ia ka Khubor Babha, namar dei u Jisu Uba iatrei lang. Ha ka jingsngew jong ngi, kane ka dei ka jingmut kaba kongsan tam.

Ki dang don kiwei pat ki jingmut ia kiha ngi lah ban kdew na ka Jynthoh Bakhuid hi. Ngi shem ba u Jisu u nam ia lade ka Jynkhang, ka Dwar, ka Khyrdop (Io. 10:7,9; 14:6). Da kane, u Jisu u mut ban ong ha U la pynlong ialade ka Khyrdop, ka Dwar, ka Jynkhang na ka bynta ki Khristan ban rung sha ka Hima u Blei bad ban poi sha u Blei hi. U Jisu u tyrwa ia lade kum ka lad ka lynti bad ka atiar ban kiew irat shaphrang ha ka longbriew manbriew. Kane ka jingmut ka lah ban long, hynrei kato kaba ngi la ai haneng ka kham iadei-dur. Na Philadelphia ki surok bad ki lynti ki poi kylleng kylleng sha mihngi sha sepngi shatei bad shathie ruh. Ka don harud ka surok-bah na kaba ki la iaid ki kynhun shipai bapher bapher, na kaba ki la iaid ki nongkhaji nongrateng naduh ki ri mihngi. Kumba ki Grik ki lah ban pynphriang nangne ia la ka kolshor bad ka ktien, ki Khristan ruh ki lah ban pynphriang ia la ka Khubor Babha bad kane ka lad ka lynti ka dei ka jingai iong u Jisu hi, kata ka mut ba u Jisu hi u la pynkhreh ia kine kiei kiei ban pynjem ia ka jingeh ban ialap ia ka Khubor Babha.

Hynrei ka don tang kawei kabym iadei-dur bad kane ka lad ka lynti kaba khraw ba u Jisu hi u ia pynkhreh na ka bynta ka Balang ha Philadelphis. Bad kane ka dei imat ka jingkhyndiat briew jong ki. Haba ki briew ki khyndiat than eh, ka bor ruh ka tlot. Ka jingbun-briew ka dei ka bor, namarba ka lah ban shim kabu ia ki lad ki lynti baroh kiba ka lah ban ioh. Haba ym don briew ban trei, wat lada ka don ka pisa ka tyngka ruh, wat lada ka bun ka lad bad ka kabu ksiar ruh, ka kam kam lah ban iaid shaphrang. Ka jingbiang ha ka bunbriew ka long kaba kongsan bha na ka bynta kano kano ka kam radbah. Te u Jisu u ong, "Phi don ka bor kaba rit". Hynrei hangne shisyndon ka paw sa kawei kaei kaei kaba 'itynnat ha ka Balang ha Philadelphia. Kane ka bor jong ka Balang ka long kaba rit naduh basdang na ka daw ka jingkhyndiat briew. Hynrei la katta ruh, ka Balang ka la jop thiaw ha kawei ka kbep jong ka jingshah lehbein na ka bynta ka Khubor Babha. Ka lah ban long ka jinglatyngkhuh bad ka mane-blei ia u Kaisar bad ia ka blei Roma ne kano

kano kawei pat ka daw. Hynrei ka Balang ka la iaineb ha ka jingneit bad kam shym len ia u Jisu. Ki Khristan kim shym thang dhup ha ka duwan u Kaisar bad kim shym pyrtá, "U Kaisar u dei u Trai Kynrad!", hynrei ki la pynbna barabor, "U Jisu u dei u Trai Kynrad bad u Nongpynim!" Te kumta ki la jop thiaw bad kato ka jingshah banberñ imat ka la kut bad ka la sangeh. Ki Khristan ki la ioh lad ban pynhiar mynsiem bad bñ tur shaphrang. Hynrei na ka daw ka jingduna-bor na ka liang ka jingbun-briew, kin nym lah ban pyndep bha ia la ka deiti. Ki don kam shuh-shuh ki para Khristan. U Jisu mynta u kular ban pynbun briew ia ka Balang da kaba pynkylla kaba mut ia ki Ju, kiba don ha ka shnong Philadelphia. Da ka jingrung Balang jong kine ki Ju, ki Khristan kin ioh bor shuh-shuh bad kumta kin sa tur shaphrang. Kane ka pyni ba ka jingkylla kaba mut ki briew bad ka jingmih ki Khristan bathymmai ki pynkhlaññ ia ka Balang bad ia ki Khristan barim. Haba ym don ka jingkylla kaba mut ki briew, ka Balang ka lah ban tlot kumba ka la jia ha Sardis. Hooïd, ki Khristan bathymmai ki pynkhlaññ ia ki Khristan barim bad ki ai bor ai sor ia ka Balang ha ka jingialap ia ka Khubor Babha.

Kiei kine ki Ju kiban kylla kaba mut ? Ki dei ki Ju kiba dang sah ha Niam Ju barim bad kibym pat pdiang ia ka Khubor Babha jong U. U Ioannis, u nongthoh jong ka Kitab Jingpynpaw, uba long u Ju ma-u ruh, u ong ba kine kim dei ki Ju kiba shisha. Ki Ju kiba shisha mynta, ki Israel ki bashisha bad kiba thymmai, ki dei ki Khristan. Ka Israel kaba rim ka la kut, kam don shuh. Ki Ju kiba rim kim don shuh, ki la kut. Ki la mih ki Israel bathymmai bad ki Ju bathymmai bad kita ki dei ki Khristan, kiba la pdiang ia ka Khubor Babha bad ia u Jisu Khrist kum u Messia, u Nongpynim bad u Khun u Blei. Te nange ne ka paw shai ba ki Khristan Ju hyndai ki ñiew bad ki sin kyrteng ia ki 'Ju, kiba dang sah ha niamrim jong ki, kum ka kynhun u Soitan. Bad namarba ki mane-blei ha ka Sinagog, ki sin kyrteng ia ki "Ka Sinagog u Soitan", namarba kim dei shuh ki Israel.

jong u Blei, kim dei shuh ki Ju jong u Blei u Abraham, u Isaak bad u Jakob. Kine ki Ju, kiba dang sah ha ka niam-rim jong ki, kim da iapher eh haduh katta katta na ki jentil. Te haba kine ki Ju ki kobsarong ba ki dei ki Ju, katkum u Ioannis uba long u Ju, ki kren lamler namarba kim long shuh ki Ju kiba shisha katkum ka saifdur u Blei ha u Jisu Khrist.

Te da ka jingialap ia ka Khubor Babha, ki Ju, kiba dang sah ha ka niam-rim jong ki, kin sa kvlla kaba mut da ka bor bad ka jingialam jong u Jisu hi, kin pynrit ia lade hakamat ka Balang kaba long ka Israel bathymmai bad kin rung Balang da ka baptisma bakhuid. Hangne ka paw ba ka jingkylla kaba mut ka dei ka kam jong u Blei, ym ka jong ki briew. Dei u Blei uba pynkylla kaba mut ia ki briew. Ki briew ki lah tang ban pynbna ia ka Khubor Babha bad ka dei ka mon u Blei ba kin ialap ia ka Khubor Babha. Hynrei hadien ba la pynbna ia ka Khubor Babha, dei u Blei Uba trei ha ki dohnud jong ki briew bad Uba pynkylla kaba mut ia ki. Te lada u dei u Blei Uba pynkylla kaba mut ia ki briew, ym don ba lah ban khang ne pynwit iano iano. Lada uno uno u pynwit ne khang, u ialeh pyrshah ia u Blei. Haba u Blei hi u la mon ki briew kim lah ban uxor ne ban pyrshah.

Nangta u Jisu u ong ba ka jingkylla kaba mut jong ki briew ka dei ka dak ka shu kaba shai-kdar ba u Blei u sngewtynnat, U sngewkmen, U kubur bad U hun hi jrut ia ka jingialap ia ka Khubor Babha da kino kino ki Khristan. U Jisu u kren shai ba, ha ka jingkylla kaba mut jong ki, kito ki Ju kin iohi shynna ba u Jisu bad u Blei ki ieid bad ki burom ia ki Khristan kiba la ialap ha ki ia ka Khubor Babha. "Kin tip ba Nga la ieid ia phi", u ong u Jisu. Kane ka long kaei kaei kaba sngewtynnat na ka bynta jong ngi ki Khristan bad ka dei ban pynshlur ia ngi ban ialap ia ka khubor Babha. Haba ki briew ki kylla kaba mut ka long thik kumba u Jisu u ong, "Shabas, phi la leh bha! Phi la pyndep ia ka deiti ban ialap ia ka khubor Babha jong Nga. Nga da hun hi jrut bad Nga

la pynkylla kaba mut ia kine ki brieve ha kiba phi la pynbna hok bad shida ia ka Khubor Babha". Ka jingkylla kaba mut jong ki brieve bad ka baptisma ki long da shisha ka kubur bad ka shon-mohor ia ki kam jong ki nongialap ia ka khubor Babha Te haba ki brieve ki kylla kaba mut, ngi dei ban kmen da shisha namarba ka dei ka kam ba u Blei hi u leh. Hynrei lada ym don mano mano ba kylla kaba mut, ngi dei ban peitmat bad ban kyndit bynrieve ioh ngi la kum bakla hangno re hangno. Te kano kano ka Jylla-niam ne ka Shnat-niam, ha kaba ym don ka jingkylla kaba mut ki brieve ka mut ba kato ka Jylla-niam ne ka Shnat-niam ki la kylla long kum ka Balang ha Sardis, ka Balang kaba la iap, namar ka jingbym-shitrbem, ka jingbym husiar, ka jingbym-peitngor bad ka jingjaituh bad thiah sngi ngai ngai. Haba ym don kano kano ka jingkylla kaba mut jong ki brieve ka mut ba u Blei u la pynrem ia kato ka Jylla-niam ne ka Shnat-niam kum ki bym larkam eiei hakhmat jong U.

Nalor kane ka jingbatai ba ngi la ai haneng, ki don ki 'rievepyrkhat kiba ong ba ngi lah ban batai da kumwei pat, da kaba pyniasoh ia ki dkhot 8c bad 9 bad ka sentens 8b. Bad ki ring jingmut kumne, "Hakhmih, Nga la pynkhreh ka jynkhang kaba la plie war hakhmat jong phi, ia kaba ym don ba lah ban khang, namarba phi don ka bor kaba rit, namarba phi la bat skhem triang ia ka Ktien jong Nga bad phim shym la len ia ka kyrteng jong Nga. Hakhmih, Ngan ai ha phi.....ieid ia phi." Hangne ki don ar tylli ki jingjia kiba phylla bad kiba long jingblei. Kane ka paw ha ka jingpyndonkam ia ka kyntien "Hakhmih!" arsien. Kane ka kyntien "Hakhmih" ka kdew barabor ia kaei kaei kaba phylla bad kaba ngim ju khmih lynti. Kane ka long kaba dei. Nangta la ong ba u Jisu u la pynkhreh ka jynkhang kaba la plie war namarba U tip ba ka Balang ka tlot bor bad kam lah ban leh bun kiei kiei ha ka liang ka jingialap lada u Jisu hi um iarp kyrpang ia ka. Kane ruh ka long kaba dei. Ma-ngi ki brieve ngim lah ban leh bun kiei kiei lada u Blei hi um iarp ia ngi, lada u Blei hi um plie lad plie lynti ia ngi.

Shuh-shuh, u Jisu u ong ba U la plie ryngang ia ka jynkhang kum ka bainong na ka bynta ka jing<sup>3</sup>aineh skhem jong ka Balang ha ka jingngeit bad ka la phla ia ka kyrteng u Jisu hakmat ka shnong ka thaw. Nangta u Jisu un ai sa kawei pat ka bainong ne ka jingiaroh, da kaba pynkylia kaba mut ia ki Ju. kiba dang eh dohnud. Kane ka jingbatai ka sngewtynnai da shisha, hynrei kato kaba ngi la ai haneng imat ka kham bha bad ka kham iadei-dur bad ka jinglong jong ka Balang ha ka shnong Philadelphia.

Khatduh eh, ha ka dkhoh kaba 10, u Jisu u pynkyn-maw ia ka jingkohnguh jong ka Balang ha Philadelphia ia ka sneng ka kraw jong U bad ia ka hukum jong U ban iaishah-satar ia ka jingeh baroh, kiba lah ban mih na ka jinkyntait ban mane-blei ia u Kaisar bad ia ka blei Roma. Hangne ka paw ba ki Khristan ha Philadelphia, ha kawei ka por, ki la dei ban iaishah-satar, kata ka mut ba ki la shah pynshitom-bein haduh ban da phlei snam ruh na ka bynta u Jisu bad ka Khubor Babha jong U. Bad ha kane ka jynjar-sat bad ka shemlanot, ki la jop thiaw bad ki ia<sup>3</sup>ineh, bad kumno re kumno ka jingshah banbein ruh ka la kut noh bad ka Balang ka la suk. Namar kane ka hok ba ki la pyni, u Jisu u ong ba un iarap ia ki, Un sa iada ia ki, Un sa pylait-im, Un sa ri-sumar kyndong ia ki ha ki sngi kiban wan, ha kiba kan wan lynshop ka jynjar-sat bad ka shemlanot ha ka pyrtnei baroh kawei. Ka jingkloi jong ki ban kohnguh ia ka jingkyntu u Jisu ban shahshitom na ka bynta jong U kan sa pynioh ha ki ia ka jingda jingker na ki jingma bad jingmysaw baroh (Mt.10:38; 10:17; 16:24; Mk 8:34; 13:19; Lk 9:23). Kane ka dei ka sneng ka kraw ba u Jisu u ju ai katba U dang im ha ka sla pyrtnei ba ki nongbud bad ki synran jong U ki dei ban klo<sup>3</sup>i ban iaishah-satar ia ka jynjar ka lanot na ka bynta jong U. Ka dei ka Hukum na kaba ki Khristan kim lah ban lait na ki khep sha ki khep. Ka sneng bad ka Hukum ban iaishah-satar ia kano kano ka jingeh ki dei kiei kiei ia kiba u Jisu u da ban tynggeh bha. Ki Khristan ha Philadelphia ki la pyndep ia kane ka Hukum bad ka sneng. Te ki dawa kei<sup>3</sup>n ba u Jisu

un ri un da ia ki ha ki jingma baroh. Bad u Jisu un sa bat ia la ka Hok ka Shikyntien. U Jisu u dei Uba bat Nia bat Jutang.

Mynta ka jingkylli ka mih, "Kaei kane ka jingtynjuh bad yn tynjuh iano?" Ia ka kyntien "Jingtynjuh" ngi la ring jingmut na ka Grik "Pirasmos", kaba don bun ki jingmut kum "ka jingpynshoi", "ka jingpyrshang", bad khamtam eh "ka jingtynjuh", ia kaba ha ka Phareng ki ong ka "Test.". Lada uno uno u wan ai ksiar ha ngi bad ngi kum artatien ia ka jinglong nylla jong ka, ngi leit sha u bania, ngi phrang ia ka ha ka ding bad ka ding ka pyni lada ka dei ka ksiar kaba nylla ne em. Ha ki por hyndaj ki khun u Hynniewtrep ki tih ksiar na ki lum ki wah jong ki. Hynrei kane ka ksiar ka ia-khle lang bad ka khyndew ka shyiap. Te ban ioh ia ka ksiar nylla suda, ki phrang ha ka shlem bad ka ksiar ka tuid bad ka paw ha ka jingnylla jong ka. Kare ka dei shisha ka jingtynjuh ban shem lada ka don shisha ka ksiar bad lada ka don ka paw ha ka shlem bad ha ka ding. Te kane ka kyntien "Pirasmos" ka mut ruh ka jynjar-sat, ka shemlanot, ka satsyllang, ka jingpynshitom, ym ban pynjot ne pvnduh, hynrei ban pynkylla kaba mut bad ban tei. Hato kane ka jingtynjuh ka la wan shisha? Hooi, ka la wan, bad kan iaiwan. Ym don ba lah ban lait na kane ka jingtyhjuh ha kiwei na ki rukom bapher bapher ba u Blei u ibit. U khunbynriew bad ki jaitbynriew kum ka kynhun bad kum shimet shimet ki la ngat ha kane ka jingtynjuh, ki dang ngat bad kin sa ngat shuh-shuh. Ka dei ka bhah bad ka riti jong ka jingim-briew kumban ong noh.

Mynta yn tynjuh iano? Yn tynjuh ia ka pyrthei. Ngi shem barabor ha ka Jynthoh Bakhuid ia kane ka kyntien "Ka Pyrthei." Ka ktien u Blei ka ong, "Kiar na ka Pyrthei! Wat pyrthuhbud ia ka Pyrthei!". Hangne ka shai-kdar ba ka "Pyrthei" hangne kam mut kane ka mariang ba u Blei hi u la thaw bad ka long kaba bha suda. Ym don jingsniew eiei ha ka mariang ba u Blei u la thaw. Ma-u hi U ong ba ka long kaba bha suda (Jenl: 10,12,18,19,25,31). Te ka mariang bad ki laiphew jynthaw jong u Blei ki long kiba bha suda,

Bad u Blei um lah ban isih ia kiei kiei kiba Ma-u hi u la thaw (Jst 11:23-25). U ieid pynban ia ki bad U pynneh pynsah ia ki. Hynrei ka Jynthoh Bakhuid ka ong ba u Blei u isih ia ka "Pyrthei" Hangne ka shai kdar ba ka kyntien "Pyrthei" ka mut ka Pap ka Sang, ka mut ki brieve kiba sniew bad kiba pap, ki brieve kibym ngeit ha u Blei bad kiba isih ia U. Ka "Pyrthei" ka mut ka kynhun ki 'riewbymman. Te ka jingtynjuh ka dei na ka bynta kine, ym na ka bynta ki Khristan kiba bha. Bad u Blei bunsien u tynjuh ia ki da ka jynjar sat bad ka shemlanot. Bad ka jingthmu jong u Blei ka long ban pynkylla kaba mut ia ki 'riewbymman. Lada ki kylla kaba mut, ki kylla long kum ka ksiar kaba mih na ka shlem. Hynrei lada ki leh mutlop, kin ngat ha ka jynjar-sat bad ka shemlanot shuh-shuh.

Mynta ha kane ka pyrthei mariang, ki brieve kiba bha bad ki brieve kiba sniew ki ia-im lang. Te haba jia kum kane ka jingtynjuh, i kumba ki langat lang. Hynrei kam long kumta. U Blei u lada ia kiba bha, U ri U sumar ia ki namarba ki dei ki jong U bad kim donkam shuh ia ka jingtynjuh ne ka jingphrang namarba ki la paw shynna kum ka ksiar nylla. Ki Khristan ha Philadelphia, katkum ka kular u Jisu, kin sa long kumta ha kano kano ka jingtynjuh ia kane ka pyrthei-jot, kata ka mut ia ki 'riewbymman. U Jisu un da un ker ia ki na ki jingma baroh.

### (c) KA KYNTU (3:11)

Ha kane ka shithi sha ki Khristan ha Philadelphia, ym don jingbyrngem eiei na ka liang u Jisu. Beit u Jisu u leit sha ka kyntu ka kynpham, ym ban kylla kaba mut, hynrei ban iaineh skhem bad ban laitur shaphrang khlem shongthait bad ban peitngor bha namarba ki nongshun ki bun. Ki dei ban lai-ap-phira, ban laiphikir, ban laihusiar, khnangba kin nym shah knieh ha kiwei ia ka pansngiat ba u Blei u la mang na ka bynta jong ki.

Nyngkong eh, u Jisu u pynbna ha Un wan kloï ban pynngen ban kynpham bad ban iarap ia ki Khrist-



tan ha Philadelphia. Ha kito ki por hyndai, haba ki Khristan ki jynjar-sat bad ki iaishah-satar, ka jingku-lar bad ka jingpynbna ba u Jisu un wan kloi ki ai jingkyrmen. ki pynshlur, ki pyniaineh bad ki pynkmen ia kito kiba shitom na ka daw ka Khubor Babha. Ki Apostol ruh ki la pyndonkam ia kane ban pynshlur bad ban pyntngen ia ki Khristan kiba shahshitom (Heb. 10:37; Jak 5:8). Namarba u Jisu un wan kloi, ki Khristan ki skhem bad ki shlur. Ki iaishah-satar ia kiei kiei namarba ki tip ba kin nym neh junom, hynrei kin duh kin dam ha ka jingwan u Jisu. Hato u Jisu u la pyndep ia kane ka kular? Hoodid, u la pyndep ym ha ka rukom ba ki la khmih lynti, kata da jingwan kum ha ka Sngi Khatduh, ha u lyoh bad ka burom, hynrei u la wan ha ka rukom kaba maian bad kaba shisha. U ia wan ban kynduh ia ki uwei pa uwei ha ka sngi ba ki khlad na kane ka pyrtbei. Hynrei shuwa kane ka sngi ruh, u Jisu u la wan ban kynduh ia ki bad dei da U ba ki la lah ban kiew irat ha kiei kiei baroh. U Jisu u bat barabor ia ka Hok ka Shikyntien ba U khlei. Ha kajuh ka por kane ka jingpynbna ia ka jingwan-kloi u Jisu ka iarap ia ki 'riewbymman ban kylla kaba mut. Da kane ka jingpynbna la sneng la kraw ia ki 'riewbymman ba ka long kaba ma shibun ban myllen ha ka Pap ka Sang, namarba u Jisu u lah ban wan ha kano kano ka por. U Jisu bad ki Apostol ruh ki la ju kren bunsien shaphang kane ka jingwan kloi-lan jong u Jisu (II Thes. 1:7-9; Mt. 24:42-51; 25:13; Lk. 12:37) Ka Balang ha Sardis ka sniew namarba kam shahshkor ia kane ka sneng ka kraw jong u Jisu bad kumta ki ngat ha ka jynriam u ksuid bad ka pap ka sang.

Khatduh eh, u Jisu u kyntu ia ki Khristan ban iaineh bad ban nym bud ia ka nuksa ki bun briew, kiba, haba sdang ki leh bha, hynrei khyndiat por hadien ki tlot noh bad kumta ki duh noh ia la ka bainong, ka burom ka ijot na u Blei. Ki don bun ki nuksa ha ka Jynthoh Bakhuid, kiba pyni kumno ki briew ki duh noh ia la ka hok tang na ka daw ba kim phikir bad kim iaineh, kum u Saul uba la duh ia la ka khet bad kum u Judas, uba la shah knieh noh

ia ka jinglong Apostol (I Sam. 15:1-16:13; Kam 1:15-25; Rom 11:11-12). Te ki Kristan ki dei ban iaineh haduh kaba kut.

#### d) KA KHUSNAM (31:2)

Ha ki Khristan ha Philadelphia, u Jisu u kular ban ai san tylli ki khusnam ne ki bainong, bad kane ka pyni haduh katno u Jisu u sbun bad kito kita ieid ia U bad kiba iaineh ha ka jingngeit.

Nyngkong eh, u kular ban pynlong ia ki ki "Rijied" ha ka Iingsad Iingsunon jong ka Hima u Blei, ha ka Iingkyntang, ha ka Tempyl! U-ei une u rijied ha ka Tempyl? Ha ki niam jentil bapher bapher ki ju don kine ki rijied ne ki rishot, ia kiba ki ju kyntang na ki blei-thaw. Ngi lap ia kine kiei kiei ha ka Jynthoh Bakhuid ruh, kaba pynrem ia ki bad kaba hukum ban pynduh ia ki (Ex. 34:13-16; 1 Sy. 16:31-34). Kine ki paia ne ki rishot ne ki rijied ki dei ki dak ki shin jong ki blei-thaw bapher bapher. Hapdeng jong ngi ki khun u Hynfiewtrep ruh, u don u rijied ne u rishot blei ha man la ki iing ki sem bad khamtam eh ha ki Iingsad Iingsunon. Tang shu rung na Tyngkong sha Shlur, ngi lap ia une u rishot-blei ba ki ong, uba kdew ia ka jingdon jong u Blei Nongbuh Nongthaw ha kato ka Iingsad Iingsunon ne ka iing ka sem. Bad kaba phylla ka long ba u Rishot-blei ki khun u Hynfiewtrep u long barabor ha ka dur ka Diengphna. Um ju ieng tneng, hynrei u da don u bah tympha kumba ki ong, uba ai ia ka dur ka dar ka Diengphna.

U Ioannis, u nongthoh ka Kitab Jingpynpaw, u la iohi khlempep ia kine ki paia blei, ki rijied-blei bad ki rishot-blei jong ki Grik bad jong kiwei pat ki jaitbynriew. U la iohi ruh ba ki don ki kyrteng jong kine ki blei ha kine ki paia, ki rishot, ia kiba la pynfeng ha ki tempyl jong ki. La fiewburom bha ia kine ki paia bad ki rishot da ki paidbah nongmane ha ki tempyl bapher bapher. Mynta u Ioannis bad u Jisu ki mut ban ong ba ki paia-blei, ki rishot-blei bad ki rijied-blei bashisha ki dei ki Khristan, ia kiba ym don mano

mano ba lah ban pynmih na ka iing ka sem jong u Blei, na ka Balang kaba long ka Tempyl jong U. Yn nym don eiei ka jingma ne jingsyer kaba lah ban pyntieng. Ia ki Khristan bad ban pynmih ia ki na ka jaka ba ki don. Ia kane ki Khristan ha Philadelphia ki sngewthuh bha namarba, na ka daw uto u jumai uba iaikbih-shi-iaikbih hadien ka saem 27 HK, ki nongshong shnong ha Philadelphia ki la mih bad herkrad na la ka shnong bad ki la shong ha ki lum ki wah kat shaba lap. Ka long kaba jynjar shisha ban iaimeh-shi iaimeh na la ka shnong. Kin jin da la kwah ban sah junom bhor khlem da donkam ban kynriah shane shatai. Ia kane ka jingthrang jong ki, u Jisu u ong, yn pynurlong ha ki Khristan ha Philadelphia bad kin nym mih shuh na la ka shnong ka thaw, kaba long ka Hima u Blei.

Nalor kane ka jingmut ba ngi la ai haneng, ka don sa kawei pat kaba kongsan bha ha ka jingiadei bad ki Khristan ha Philadelphia. Ngil la lohi ba ki long kiba shitrhem, khamtam eh ha ka jingialap ia ka Khubor Babha. Ka jingneit jong ki, ka jingineh jong ki hapdeng ka jynjar-sat bad ka iaishah-satar bad ka jingshitrhem jong ki ki la pynskhem bad pynshur ia kiwei pat ki Khristan ha Asia Minor. Ki la long kum ki rijied ne ki rishot kiba kyrshan ia ka Balang, kaba long ka Jyntei jong u Blei. Na ki Khristan baroh ki dei kito kiba na Philadelphia kiba la pynleng skhem ia ka Balang namarba ki long kum ki rishot kiba eh bad kiba khlai. Dei katkum kane ka jingmut ba la nam ia u Petrus, ia u Jakob bad ia u Ioannis, u nongthoh ka Kitab ka Khubor Babha, kum ki rijied jong ka Balang (Kal.2:9). Ka dei da shisha ka nam ka burom kaba khraw bad u Jisu u ai ia kane ka nam ka burom ha ki Khristan ha ka shnong Philadelphia.

Ki khusnam, kiba bud, ki dei ki lai tylli ki kyr-teng, ia kiba yn thoh shynna ha uwei pa uwei na kine ki rijied ha ka iingsad iingsunon jong ka Hima u Blei ka Kyrteug u Blei u Kpa, ka Kyrteug ka Nongbah u Blei bad ka Kyrteug u Jisu hi.

Ngil pynkynmaw ia ki nongpule ba, ha ka rukon pyrkat pyrdai jong ki Israel byndai, ka Kyrteug kam, mut tang kato kyntien, kaba sawa ne kaba long

ka dak ka shin ban pyniapher ia uwei u briew na uwei pat, hynrei ka mut u *BRIEW HI*, uba trei uba kam, uba khiih uba ksar, uba lai-imsngi ban leh eiei na ka bynta kito kiba u ieid bad u burom, ym u briew uba shong kli kti. Te ka "Kyrteug u Blei" ka mut u Blei hi da lade, Uba trei-kam khlem sangeh na ka bynta u khunbynriew, u Blei Ubym shongthait, hynrei Uba lai-imsngi ba u khunbynriew un bha un niat bad un kiew irat ha ka longbriew manbriew. Bad ka "Kyrteug jong ka Tempyl" ka mut ka tempyl hi, ha kaba u Blei u don bad U shahshkor ia ki jingduwai jong u khunbynriew. Bad ka "Kyrteug u Jisu" ka mut u Jisu hi, Uba iaidon lem bad ngi kat-kum ka kular jong U (Mt.28:20).

Mynta, baroh ngi sngewthuh ba kaei kaei, kaba lathoh ka sah bad ka snoh ha kato kaei-kaei, ha kaba la thoh ia ka. Shisien ba la thoh, khamtam eh ha ki por hyndai, ka long kata eh ban pyndam ne pynduh. Kato kaba la thoh bad kato kaei kaei, ha kaba la thoh, ki ialong shitylli, ki ialong kawei kumban ong noh. Te ban thoh ia ka kyrteug u Blei ka mut ban pyniasnoh ia u briew bad u Blei, ban pynialong shitylli ia ki ha kata ka rukom ba ka long kaba eh ban pyniakhlad ia ki. Ka dur ne ka jynthoh kaba la shon shap ha ka mohor ka neh bad ka long kaba eh ban pyndam ia ka. Bad ia kane u Jisu hi un leh, u Jisu Uba lah Uba lai. Da lade hi Un pyniasnoh ia ki Khristan bad u Blei, Un pynlong shi-tylli ia ki bad kumta ki Khristan kin syiem ia ki mohor ksiar ha kiba la shon shap ia dur jong u Syiem u Patsha. Te nyngkong eh u Blei u Kpa un iaidon lem bad ki Khristan, Un paw ha ki kum ha ka muhor. Da kaba fohi ia ki Khristan, ki briew kin iohi ia u Blei hi. Ki Khristan kin long ka dak ka shin kaba kynthup bad kaba kdew ia u Blei. Kumjuh ruh u Jisu un iaidon lem bad Un iai-paw ha ki Khristan bad kiba iohi ia ki Khristan ha Philadelphia kin iohi ia u Jisu hi, Uba trei-kam ha ka histori jong u khunbynriew. Khatduh eh, ki Khristan kin long ka Nongbah jong u Blei, ha kaba Un shong Un sah bad Un synshar Un khadar, Un leh bha leh niat ia ki khun ki hajar. Bad kane ka Nongbah

ka long kaba thymmai, kaba wan hiar na bneng hi bad kabym ju don mynno mynno (Jpw 2:17).

Bun ki 'riewstad ki ong ba kane ka rukom pyrkhat ka wan na kawei ka dustur jon<sub>3</sub> ki jentil, haba ki pynieng ia ki paia-blei jong ki bad ki thoh ia ka kyrteng u blei-thaw. Kane ka lah ban long, namarba u Ioannis u la iohi ia kine ki paia ne rishot-blei ki jentil, ia kiba ki ju pynieng ha ki tempyl jong ki Te u Ioannis u mut ban ong ba ki Khristan ki long ki paia ne rishot-blei bashisha bad ha kajuha por, ki long ruh ka tempyl ba-im jong u Blei Bashisha.

Hynrei ka tyllong jong u Ioannis ka lah ruh ban long ka Jutang Barim bad ka rukom kren jong ki Israel hyndai ha ka jingiadei bad u Blei. Ngilap ia kane kaei kaei ha ka Kitab Jingkheih 6:27. Ha kawei ka sngi u Blei u la hukum ia u Moses ban hikai ia ki Lyngdoh-sohblei kumno ban kyrkhu ia ki paid Israel. Bad u Blei, ha ka dkhoh kaba 27, u pynkut da kaba ong, "Kumne kin buh (ne kin thung ne kin pynieng) ia ka kyrteng jong Nga ha ki paid Israel bad Nga Ngan kyrkhu ia ki" Ia ka Hebru "Wesamu" la ju pynkylla sha kiwei pat ki ktien kumne: "Kin kyrpad" ha ka Khasi, ha ka Phareng "So shall they invoke my name" da u Knox, "This is how they must call down my name" ha ka Jerusalem Biblei, "So shall they put my name" ha ka Revised Standard Version, bad "Mettano in tal modo sotto la tutela del mio nome" ha ka "La Sacra Bibbia" ha ka ktien Italy, kaba mut "Ai kin buh hapoh ka jinglada jong ka kyrteng jong nga ia u paid Israel ha kata ka rukom..." Na kine ki jingring jingmut bapher bapher, ka paw shai ba ka jingmut jong ka kyntien Hebru "Wesamu" kam shai bha bad kam pat biang ha ka kyntien "kyrpad" ne "invoke" Kam mut tang ka jingkhoh kyrpad tang da ka sur. Ka mut ba kane ka jingkyrkhu la leh da ka sur, hynrei ka jia-long kaei re kaei pat de ha ki briew: ka jingsnoh ka kyrteng u Blei, ka kyrteng kaba long u Blei hi, ha ki briew ha ka rukom kaba maian, hynrei kaba shisha. Kane ka pyni ba ha ka por ka jingladuwai lang, haba kiwei ki duwai na ka bynta kiwei pat, ka jia-long kaei re kaei kaba

shisha : ka jingfalong shitylli jong ki briew bad u Blei. Te ia kane ka kyntien "Wesamu" lah ban ring jingmut sha ka Khasi kumne, "Kin kyrpad bad shon shap ia ka kyrteng jong Nga", kata ka mut ba, ha ka jingduwai, u Blei bad ki briew ki ialong shitylli. Ha ka jingsngew jong ngi, u Ioannis u la ioh jingmut na kane ka dkhot jong ka Jutang Barim bad kumta u kwah ban ban tyngeh ba u Blei, u Jisu bad ki Khristan ki ialong shitylli hi mlon.

Shuh-shuh, ki'riewstad ki ong ba u Ioannis u la ioh ia kane ka jingmut ban thoh kyrteng ha u rijied, uba dei ka dur pharshi jong u Khristan, na ka dustur ba la ju shon shap ha ka met ki mraw ia ka shap ne ka dak jong u trai jong ki. Bunsien kane ka dak ka dei tang ki ar tylli ki dak-thoh banyngkong jong ka kyrteng u trai jong ki mraw. Da kane la mut ban ong ba ki Khristan ki dei ki jong u Blei, thik kumba ki mraw, kiba don kato ka dak, ki dei ki jong u trai jong ki. Shuh shuh, ki ong ba hapideng ki jentil ka la don ka dustur ban burom ia uno uno u lyngdoh-sobblei uba la pyndep bha ia la ki deiti da kaba pynieng uwei u paia ban ai nam ia u bad ha une u paia ki ju thoh ia ka kyrteng u lyngdoh bad ia kyrteng u kpa jong u. Da kane la mut ban ong ba ki Khristan kiba iaineh kin ioh ka nam bad ka burom kaba kyrpang. Kine ki jingmut baroh ki lah ban long, hynrei kaba nyngkong ka kham iadei-dur bad ki Khristan ha Philadelphia, kiba ju ialong shitylli bad u Blei bad u Jisu bad ka Balang, khlem da lah ban pyniakhlad lano lano ruh.

Khatduh eh, u Jisu u ong ba ka kyrteng jong U kan long ka kyrteng kaba thymmai bad ka dei kane ka kyrteng ia kaba yn thoh ha kito ki rijied kiba long ki Khristan. Te kine ki Khristan kin ioh eiei kaba thymmai, ia kaba kim ju poi pyrkhath mynno mynno. Bad na ka daw kane kaei kaei kaba thymmai, ma-ki ruh kin ioh ka nam bad ka burom bathymmai, thik kumba ka shnong Philadelphia ka la ioh jingiarap na ki Patsha Roman hadien uto u jumai ha ka snem 17 HK bad da kato ka jingiarap ki la lah ban tei biang ia ka shnong ban khot thymmai ia ka da ki kyrteng bathymmai : ka Neccaesarea kum ka

jingkyrmaw ieid ia u Tiberius, uba ia iarap nyngkong ia ki, bad nangta Flavia hadien ba ki ia loh ka jinglarap shuh-shuh na u Patsha Vespasian. Da kane u Ioannis u mut ban ong ba, lada ki Khristan ha Philadelphia ki don eiei kaba kordor ha ki bad lada ki loh ka nam ka burom kaba kyrpang bad ka bathymmai haduh katta katta, ka dei ka jingleh jong u Jisu. Uba ia pynfatylli ia lade bad ia u Kpa jong U bad ki Khristan, Uba ia pynlong ia ki kum ka Nongbah bathymmai ha kaba, Un shong Un sah bad Un synshar khadar junom. Kane ka dei ka nam ka burom kaba khraw bad kaba kordor tam.

### e) KA SNENG KA KRAW IA BAROH (3:13)

Da kane ka sneng ka kraw, u Jisu u kyntu ia ki briew baroh ban pyrthuhbud ia ka nuksa jong ki Khristan ha Philadelphia. U kyntu ia ki ban iajneh skhem ha ka jinggeit, ban kloj ban iajshah-satar ia kano kano ka jingeh, ban shitrhem ban ialap ia ka Khubor Babba, ban iatylli bad ban ialong kawei ha u Blei lyngba jong U bad kumta kin kylla long ka Nongbah bathymmai jong U, ha kaba Un shongneh shongsah, ha kaba Un synshar khadar bad Un iimsngi ia la ki khun ki hajar bad kumta kin loh ka nam ka burom kaba kyrpang.

### vii) KA SHITHI SHA KI KHRISTAN HA LAODISEA (3:14-22).

- 14 Ha u Angel ka Balang ha Laodisea, to thoh: U Amen, u Sakhi ba lah ban shaniah bad uba shisha, u Tynrai-duh bad u Nongsdang ki jyingthaw u Blei, u ong ia kine kiei kiei: 15 Nga tip bha ia ki kam jong phi; Nga tip ba phim long uba khriat lymne uba khluit. A, lada phin jin da long uba khriat ne uba khluit!
- 16 Te, namarba phi shu long blem-blem khlem khluit ne khriat, Ngan pric noh ia phi na ka shyntur jong Nga. 17 Namarba phi lai-ong, "Nga long uba riew-

- spah, nga la ioh ka lak ka putit bad ngam duna eiei", bad phim bna eiei ba phi long uba raitong, uba i-sangsot, uba duk, uba matlah bad uba lyngkhuit, 18 Nga sneng-kyntu ia phi ban thied na Nga ia ka ksjar ba la phrang ha ka ding khnang ba phin riewspah; *thied* ia ki jaiñ balieh-phyrnai khnang ba phin ioh kup ioh sem bad ba, ha ka jinglyngkhuit, ka mynraiñ jong phi kan nym paw-pyrthei; *thied* ka jingsleh ban kyllan ia ki khmat jong phi khnang ba phin dup iohi.
- 19 Nga mai-dumok bad Nga pyni ia kito baroh, kiba Nga ieid, bad Nga sympat ruh. To imsnagi, namarkata, bad duriap *ia kane* bad to kylla kaba mut!
- 20 Hakhmih, Nga ieng ha jynkhang bad Nga tied ! Lada uno uno u iohsngew ia ka sur jong Nga bad un plie ia ka jynkhang, Ngan rung sha u bad Ngan shongbam-ja lem bad u bad ma-u ruh lem bad Nga. 21 Ha uba iaijop Ngan ai jaka ban shong lang bad Nga ha ka khet jong Nga, kumba Nga hi Nga la jop bad Nga la iohshong bad u Kpa jong Nga ha ka khet jong U. 22 Jar uba don shkor, to un sngap ia kaba u Mynsiem u ong ha ki Balang.

Ka Balang ha Laodisea ka iasyriem ia ka Balang ha Sardis, tangba ka kham sniew. Ha Sardis dang don katto katne ngut ki Khristan kiba bha, kibym pat pynbit-tngit ia lade. Hynrei ha Loadisea, ym don eiei kaba bha. U Jisu u pynrem ia ka na khlieh ha kjat. Balei ka la leit jia kumne? Ki don khlempep ki daw bad kumba ka paw kyllum na ka shithi, ka dei ka jingmane-blei ia ka spah. Ka long kaba eh na ka bynta kito, kiba mane-blei ia ka spah, ban don jingiadei eiei bad u Blei (Mt. 19:23; Mk. 10:23; Lk. 18:24). Te khnang ba ngin sngewthuh bha ia kane ka iinglong basniew jong ka Balang ha Laodisea, ngi dei ban tip khyndiat khyensoit shaphang kane ka shnong kumba ka long ha ka por jong u Ioannis, u nongthoh jong ka Kitab Jingpynpaw.

Ka shnong Laodisea ka don ha ka Jylla Phrygia. Ka dei kawei na ki shnong kiba pawnam bha ha ki por hyndai hynthai. La seng ia ka da u Antiochus II, uba la synshar ha Syria naduh ka snem 261 haduh 246.



U la seng ia kane ka shnong ban pynsahnam ia la ka mahadei, ka Laodise, bad kumta la khot ia ka Laodisea. Kane ka shnong ka ieng harud ka Wah Lycus bad kumta ka iapher na kiwei pat ki shnong, ia kiba la khot da kajuha ka kyrteng bad ka khanatang ka ong ba ki la don kumba san tylli nalor kane ka Laodisea harud ka Wah Lycus.

U Syiem Antiochus II u la jied bha ia ka jaka ban seng ia kane ka shnong, thik ha ka jaka ba ka surok bah na Ephesus ka iaaid ban poi sha Syria bad ha ki thaiñ mihngi. Bad kano kano ka shnong, na kaba ka lynti-bah ki hima bapher bapher ka iaaid, ka kiew irat khamtam eh ha ka ioh ka kot bad ka spah ka hajar, namarba ka khali ka pateng ka ieng rasong barabor ha ki shnong kiba don surok. Nalor kane ka surok-bah, ki don sa kiwei pat kiba iaaid lyngba ka Laodisea, kum ka surok kaba sdang na Pergamum lyngba ka Them ka Wah Hermus shaduh Pisidia, Pamphylia bad Perga ; ki shnong kiba pawnam ha kito ki por. Shuh-shuh ka surok na ka Jylla Karja shaduh Phrygia ka iaaid lyngba kane ka shnong. Kine ki lynti ki syngkien ki la iarap bha ia ka Laodisea ban kiew shaphrang ha ka spah ka hajar. Ka la don sa kawei kaei kaei kaba la iarap ia ka Laodisea ban roi. Shisien ka Laodisea ka la long ka kut-thma bad ka len shipai. Ha ki por hyn-dai, bun ki nongbah ki la mih na kine ki kut bad ki len shipai. Da shisha ka Laodisea ka la ioh lad bha ban roi ha ka spah ka hajar. Bad namarba ka la long kaba riewspah, ka la lah ban pynbit pynbiang hi ia lade bad kam shym donkam iano iano. Kane ka la jia ha ka snem 61 HK, mynba u jumai u la pyn-jot ia kane ka shnong. Ki nong Laodisea ki la kyn-tait ban pdiang jingiarap na ki Patsha ha Rom. Ki la bei pisa hi da lade bad ki la tei biang ia la ka shnong. Da shisha kam shym donkam iano iano ruh. Ka la lah ban ieng ha la ki kjat. Nangta la ong ba ka Laodisea ka la long kum ka bank jong kito ki por bad ki lah ban pyniaid ia la ki pisa ki tyngka lyngba jong ka. Kane ruh ka la wallam shibun ka spah ka hajar, kaba la pynlong ia ka Laodisea kaba bit kaba biang ha kiei kiei baroh.

Nalor ka khañi ka pateng, ka Laodisea ka la pawnam ruh ha ka thir ksai, ka thañi jaiñ bad ka suh sopri sopjat. U 'saiwul balam-ïong jong ka u ïaid kam bha bad ki sopri ha la suh ha Laodisea ki la phriang kylleng kylleng, bad ki la wan rah ka nam ka burom ha ka shnong Namar kine ki sopri kiba bun bad kiba tad, ki briew ki la loh lad bha ban riam ban beit.

Shuh-shuh, ka Laodisea ka la pawnam bad riewspah na ka daw ki dawai dashin ba la shna bad pynmih na ka: ka dawai shkor bad ka dawai khmat. Ka la don kawei ka skul ruh ha kaba ki la hikai kumno ban ai dawai ïa kiba pang Kaba kham pawnam na kine ka dei ka dawai khmat, ïa kaba la khot ba ka Grik "Kollurion", kaba mut i ltir-ruti. Ha ka jingshisha ka dei ka kynja pawdar, ïa kaba la pynwandur kum ki kuli kiba ltir. Ki Grik ki ju nam ïa ka ka "Tephra Phrygia, "kata ka mut ka pawdar na Phrygia. La ong ba la shalan ïa kane ka dawai kylleng kylleng namarba ka la long ka dawai kaba lah ban pynkoit ïa ki jingpang khmat. Na ka daw kane ka dawai, imat kim shym don shibun kiba matlah ha Laodisea.

Kum kiwei pat ki shnong, ka Laodisea ruh ka la don ka Stadium, ka Lympung-sum-lympung-sait, ka Gymnasium bad ar tylli ki thiatar. Kine ruh ki la pynpawnam ïa ka shnong.

Namarba ka Laodisea ka la long ka shnong kaba riewspah, ki Ju ki la tuid sha ka ban khañi ban pateng. Na ki khyndiat ngut haba sdang, ki la roi bad ki la palat ïa ki phew phew hajar ngut Ki Ju ki ngeit ha ka jingbun-briew namarba kane ka plie lad plie lynti ïa ki ban kiew irat ha ka longbriew manbriew. La ong ba ki Ju ki la roi haduh katta katta ba ha ka shnong Hierapolis ki la lah ban loh ruh ïa ka bor synshar khadar bad ki la don hok ban oh khajna bad ban daiñ kuna ïa ki briew. Dei ha kane ka shnong ba ki Ju ki la don kawei ka jaka buh-kot, ha kaba ki la ïalum lang ïa ki dulir bapher bapher jong ki bad kiwei pat ki jynthoh. Kine ki Ju ki long kiba

nang bha ban khai bad pateng bad da ka jingdon jong ki, ka shuonng ka la riewspah shuh-shuh.

Na kine kiei kiei ngi lah ban ring jingmut ba ha-ba jyllei eh ka spah, ka Tipbrlew Tipblei ka lip rong noh. Haba kamai ia ka Longspah, ka Bam briew kam ju duh Te la leh klet ia kiba duk, ia ki rangli ki juki, lada ki don La synshar tang ka Khwan-myntoi bad ka jingieid para-briew ka kynrandien noh. Ha-ba la jngi ha ka umbah jong ka spah ka hajar, ki briew kim donkam shuh ia u Blei. Nangne ki mih ki jing-sniew baroh. Na ka jingbym-pyrwa shuh ia u Blei, ki pap ki sang ki kyrsoi, ki shlei bad ki lyngkien.

ia kane ka shithi lah ban phiah ha ki hynriew bynta: Ka pynithuh ia lade, ka Pynrem, ka Mai ka pyni, ka Apil, ka Khusnam bad ka Sneng ka kraw ia baroh.

### a) KA PYNITHUH IA LADE (3:14)

Kum ha kiwei pat ki shithi, hangne ruh u Jisu u pynithuh ia lade da kaba pynbna lai tylli ki Nam jong U: U Amen, u Sakhi, u Tynrai-duh.

Nyngkong eh, u Jisu u khot ia lade u Amen. Ngil la iohi bad ngi la batai ia ki jingmut jong kane ka kyntien "Amen (Jpw 1:7). Ngil la iohi ba ka mut khamtam eh kum ka jingpynskhem ia kano kano ka kyntien kaba shisha bad kaba hok. Hynrei hangne u Jisu u shim ia ka kum ka "Kyrteing". Ha ka Kitab Jingpyn-paw hi, kane ka dei ka sien kaba nyngkong ba ngil lap ia kane ka kyntien kum ka "Kyrteing" jong u briew ne jong u Blei. Khlempep ka don ka nougrim ha ka Jynthoh Bakhuid hi, namarba niar eh ba u Ioannis un thoh ejai kabym don nougrim ha ka Ktien u Blei. Khlempep, kum u Ju, uba tip bha ia ka Baibyl, u Ioannis u kynmaw ba u Blei hi u la nam ia lade da kane ka kyrteing (Is 65:16). Ha ka Hebru, u Blei u ong, "It-barek be'lohe Amen . . . . . Iishshaba' be'lohe Amen", kaba mut "Yn sa kyrkhu da u Blei ka Amen. . . . . Un sa smai da u Blei ka Amen." Kumba ngi la kdom.

kane ka kyntien "Amen" ka dei ka adjektib bad ka mut "baskhem, balajneh, bashisha, babat jutang, ba lah ban shaniah; ka dei ruh ka noun bad ka mut ka jing-iajneh, ka jingbat-skhem ia la ka jutang bad ka ktien, ka Hok ka Shikyntien, ka jingshisha; ka dei ka adberb ruh bad ka mut "hooid keiñ! da shisha khlempep, thik kumta"; la pyndonkam ruh ia ka kum ka jingkuhur ia ka ktien ba la kren ne ka jingduwai. Namarkata, ia kane ka dkhot na u İsaia la ring jingmut ruh kumne, "Yn sa kyrkhu da u Blei ka jingshisha... Un sa smai da u Blei ka jingshisha" Kane ka jingring jingmut ka biang bad ka kit jingmut, hynrei kan kham bha ban ong "U Blei ka Amen", kata, ban shim ia ka kyntien "Amen" kum ka kyr teng. Hynrei kam da sawa sugewtynn timer ha ki ktien bapher bapher bad kumta la pynkylla noh ia ka da ka kyntien "jingshisha." Kumba la ong haneng, hangne u İoannis u pyndonkam ia ka kum ka kyr teng U Jisu u dei u Amen, kata ka mut, u Jisu u dei uba lah ban shaniah, Uba bat Jutang, Uba skhem-triang, Ubym kylla, Uba bat ia ka Hok ka Shikyntien, Ubym thok, Ubym lamler, Uba bat ia la ka kular, kabym ju pulom, hynrei ka trei-kam. Da kane u Jisu u kwah ban pyniapher ia lade na ki Khirtan ha Laodisea, kiba la nguid biang ia la ka jutang ba ki la khlei, kibym biewkor shuh ia ka Hok ka Shikyntien, kiba la shekylia ia la ka Niam bad ia u Blei, kibym iajneh bad kibym bat ia la ka kular. U Jisu u dei u Amen, hynrei ma-ki kim dei.

Khatduh eh, na ki Nongiathuhlypa baroh bad na ki Nongialap baroh, dei u Jisu Uba la pyndonkam bha ia kane ka kyntien "Amen". Bad kane ka paw khamtam eh ba ka Kitab ka Khubor Babha ba la thoh da u Apostol İoannis. Kum ka nuksa: Amen, amen Nga ong ha phi (Io. 1:51). U Apostol İoannis u la nang ia ka ktien Grik, hynrei um da nang bha Te bunsien u pyrkhat kum u Ju bad u thoh ha ka ktien Grik. Lada kylla kyntien pa kyntien kane ka sentens ka lah ban long kumne: Nga u Amen, u Amen, Nga ong ha phi...", kata ka mut Ma-nga, Ubym thok, Uba shisha, Uba lah ban shaniah, Nga khlei ka Hok ka Shikyn-

tien. Ha kane ka khep ruh, u Jisu u kren ha kajuha ka rukom.

Ka nam kaba ar pat ka dei kane: U Sakhi ba jah ban shaniah bad uba shisha. Kine ki kyntien ki mut thik kumba ngi la batai haneng (Jpw 1:5; 3:7). Sa shisien u Jisu u pyniapher ia lade na ki Khristan bad ki nongialam jong ki ha Laodisea. kibym sakhi eiei shuh, kiba shu paw tang habar ba ki long Khristan, hynrei ha ka jingshisha kim long eiei. I kumba ki long ka ksjar, hynrei ki dei pynban ka dewthala. Nangta ym don sakhi kum u Jisu, namarba U la iohi, U la iohsngew bad U la ktah ia kaba U pynbna, namarba U iathuh hok ia ka Khubor Babha nadong shadong bad U nang bha ban pynshai ia ka Khubor ba-U ai. U dei da shisha u Simpah Simsong ba ki Longshuwa jong ngi ki la khmih lynti. Ha U, kiei kiei baroh ki shai-kdar.

Ka nam kaba lai pat ka dei kane: U Tynrai-duh bad u Nongsdang ia ki jynthaw baroh jong u Blei. Ia ki kyntien "U Tynrai-duh bad u Nongsdang" ngi la ring jingmut na ka Grik "Arkhi" Kane ka kyntien Grik "Arkhi" ka long kaba kit jingmut bha. Khlempep u Ioannis, u nongthoh ka Kitab Jingpynpaw, u mut artylli kiei kiei. Nyngkong eh, u mut ban ong ba u Jisu Khrist, kumba U long mynta, u dei u Blei Nongbuh Nongthaw. Ki jynthaw baroh ki mih na U (Io 1:3). U dei da shisha ka Tynrai-bah, ka Tyllong bad ka Thymmei jong kiei kiei baroh kiba don ha ka pyrthei mariang. Namarba u dei u Blei, kiei-kiei baroh ki sdang na U. U dei u Tynrai-duh bad-ym don eiei kabym shym sdang na U, namarba U dei u Nongthaw. Ka ba-ar, da kane ka kyntien "Arkhi", u Ioannis u mut ban pynshai ba u Jisu u dei ruh u briew bad u briew bashisha. Ia ka longbriew manbriew jong u Jisu la thaw da u Blei bad katkum u Apostol Paulus, u Blei u Kpa u la kha ia la u Khun naduh bym-jukut kum "U JISU KHRIST, U NONGPYNIM JONG NGI" kumba u long mynta(Eph.1:4). Ban pyn-donkam ia ka rukom kren jong ngi ki briew, ym shym don wat shi-khyllipmat ruh, ha kaba u Jisu Khrist, u Khun u Blei, u Person ba-ar jong ka Triniti, um

shym long ruh u Briew, Uba shisha, ha ka jingladei bad u Blei. Ngi dei ban kynmaw ba ha u Blei ym don ka Mynnor bad ka Lawei, ka don tang ka Mynta. Te ha ka Mynta jong u Blei, u Jisu Khrist u long u Blei bad u Briew. Hynrei ia ka Longbriew Manbriew u Jisu Khrist la thaw kumba thaw ia ka longbriew manbriew jong ngi. Kum u Briew u Jisu Khrist um Iapher eiei na ngi laitnoh ha ka jingladei bad ka pap ka sang (Heb 4:15) Te ha ka Mynta jong u Blei, ka longbriew manbriew u Jisu Khrist ka dei ka jynthaw kaba nyngkong eh. Ha ka Mynta jong u Blei, ka histori jong u khunbynriew ka sdang na ka longbriew manbriew u Jisu Khrist, kum u Nongpynim jong ngi. Ngim dei ruh ban klet ba u Blei um don histori. Ka histori ka dei tang ka jong ngi ki jynthaw. Te ngi ban tynggeh biang, ba ha ka Mynta jong u Blei, ka longbriew manbriew u Jisu Khrist ka dei kaba nyngkong bad kaba sdang ia ka histori jong u khunbynriew. Ha ka histori jong ngi u khunbynriew, u Jisu Khrist kum u Briew u wan hadien u Abraham, u Isaak bad u Jakob. Te u dei u Jisu Uba sdang ia ka histori u khunbynriew ha ka Mynta jong u Blei bad kumta u dei u Nongsdang ia kiei kiei baroh bad Uba nyngkong eh napdeng jong ki. Dei na kane ka daw ba u Paulus Bakhuid u nam ia u Jisu Khrist "U Khun Phrangsngi jong ki jynthaw baroh (Kol.1:15). Namarkata, ia ka longbriew manbriew jong ngi la saindur katkum ka Longbriew Manbriew u Jisu bad ym da kumwei pat ha ka Mynta u Blei. Da kane ka nam, u Jisu u mut ban ong ba dei Ma u Uba bit Uba biang tam ha kiei kiei baroh, ym ka shnong Laodisea, kaba kobsarong ba ka pura nadong shadong bad ba kam donkam' iano no iano ruh.

## **b) KA PYNREM NA KHLIEH HA KJAT (3:15)**

Beit beit u Jisu u ong ba u tip lut ia ki kam snfaw jong ki Khristan bad ki nongpynlaid jong ki ha Laodisea. Ki don ha ka papbah papsan: ka jingbym donkam' shuh ia u Blei. U Blei um don jingmut eiei

shuh na ka bynta jong ki bad ka Niam ka la long tang ka kamkai suda. Ban pyni shai ia kane, u nongthoh u pyndonkam ia ka rukom pyrkhat bad rukom kren jong ki briew ha Laodisea, kiba ia iohi bad la loh mad ia ka umshit kaba mih ha ki thain Hierapolis, ka shnong kabym da jngai eh na Laodisea. Kane ka umshit, kum kato kaba hajan Jakrem, ka mih napoh khyndew bad kam da khluit haduh katta katta; ka shu long shit blem blem bad kam da bang eh ban dih. Nalor kane, ka khyndew, na kaba ki mih kine ki umpohliew-syaid, ka don ka kynja shun bad kumta ka um, kaba la iakhleh lang bad kane ka shun, ka sma bad kam long ban dih. Ka pynkynroi prie ia kito kiba dih ia ka. Ia kane ki nong Laodisea ki tip bha. Te u Ioannis u pyndonkam ia kane kaei kaei ban pynsngewthuh ia ki Khristan bad ki nongpyniad jong ki ha Laodisea ba ka jingim jong ki ka long kum kato ka umshit kaba blem blem, kaba la iakhleh lang bad ka shun, bad kumta ka pynkynroi prie ia u Blei. Ka pap da shisha ka pynkynroi prie ia u Blei bad ia ki briew ruh. U Blei um lah shah ia ka pap bad ka jingim kaba sniew, thik kumba ka kpoh kam lah shah ia, kum kane ka umshit blem blem kaba la iakhleh lang bad ka shun kaba pynkynroi prie. Ka tynrai jong kane ka jinglong jong ka Balang ha Laodisea ka long ba kim sngewdonkam shuh ia u Blei, na ka daw ka spah bad ka pahuh pahai. Haba ym sngewdonkam shuh ia u Blei, ka pap ka rung bad ka synshar, ka Jingieid ka phet noh bad ka Hok ka rieh noh sba krem, sha kroh. Te ka Balang ha kato ka shnong ka long kum kato ka umshit blem blem kaba sniew ban dih bad kaba pynsngewpang ia ki briew, kaba pynkynroi prie ia ki, ki tang shu sma ne dih ia ka. Kane ka pyni ba ka Pap ka la shong tynrai ha kato ka Balang. Ka long kaei kaei kaba sngewsih haduh katta katta.

Ban pynshai shuh-shuh ia ka jingmut jong u, u Ioannis u kdew ia ka um kaba khluic bha (Zestos ha ka Grik) bad ia ka um kaba khriat bha (psikhros ha ka Grik). Te ka kyntien "Psikhros" ka mut ka um kaba khriat bha bad kumta ka bang, ka shngiam bad ka bha ban dih bad ki briew ki wad ia ka. Te kane ka um kaba

khriat bha ka thew ia ka Hok bad ka jingim kaba, hok bad kaba bha. Kumba ki briew, ha ka por shit lei-lei, ki wad ia kum kane ka um, u Blei ruh u wad ia ki briew kiba dap da ka hok ka sot bad ka jingbha mynsiem, ki briew kiba sngew ba ki donkam ia U ha kiei kiei baroh (Mt. 5.3). Ka kyntien Grik "Zestos" pat de ka mut ka um kaba khluid bha, ka umthnam lah ban ong. Kane ka um ruh ka long kaba bha ban dih bad ka myntoi ia ki briew. Haba dih ia kane ka um, ki briew kim kynroi prie. Te ka umkhluid ne ka umthnam ka thew biang ia ka Hok bad ka jingim. kaba hok, kaba dap da ka jingieid ia u Blei bad ia la ki para-marian bad ki para-briew. Kumba ki briew, khamtam eh, kiba pang kpoh, ki wad bad ki dih ia ka umthnam, kumta ruh u Blei u wad bad u kmen ban ioh ia ki briew kiba hok bad kiba bha ka jinglong. Te ka "Khriat" bad ka "Khluit" ki thew ia ka Hok hakhmat u Blei bad ki briew. Ka Blem-blem pat ka thew ia ka Pap ka sang, ka dakaid ka kusbi, ka lamler ka thok, ka sarong ka hangamei bad kumta ter ter. Bad ngi la ring jingmut ia kane ka kyntien "Blem-blem" na ka Crik "Khljaros", kaba mut kaei kaei kaba shu shit ne syaid, kaba sma bad kaba pynkynroi prie. Ia kum kane kaei kaei ki briew ki bret. Kumjuh ruh u Blei u bret bad U kyntait ia ki 'riewpap 'riewsang kiba kyrniom da la ka mon ha ka ahor ka jingsniew. Kim don bynta eiei bad u Blei, ym namarba u Blei um kwah ia ki, hynrei ha ma-ki hi, da ka jinglong basniew jong ki, ki jngai na u Blei kum ki Khristan bad ki nong-lalam jong ki ha ka shnong Laodisea. Katno ki Khristan ha Philadelphia ki iapher na ki Khristan ha Laodisea! Ka jinglapher kum hapdeng ka sngi bad ka miet! Te u Jisu u ong ba Un prie noh ia ka Balang ha Laodisea. U sngewlehraiñ ban kam ia ka kum ka Balang la jong. Kim long shuh kiba bitdor ia u. Hynrei la katta ruh, u Jisu u dangieid ia ki, U dang kwah, U dang thrang ba kin kylla kaba mut bad kylla jinglong noh. Ki dang lah hi ban leh kumta lada ki kwah. Ka shong ha ki ban phai sha u Jisu bad Ma-u un pdiang biang ia ki.



## c) KA MAI BAD KA PYNI (3:16-19).

Hangne u Jisu u byrngem ban pynshitom ia kito  
 ki Khristan kiba la duh noh ia la ka jinglong tynrai.  
 U byrngem ban prie noh ia ki, kata, ban bret noh ia  
 ki sharud kum ka synrum, lada kim kylla kaba mut.  
 Ki Khristan bad ki nongpyniaid jong ki ha Loadisea  
 ki la liat sha kane ka ahor jong ka pap ka sang, na-  
 marba ki la mane-blei ia ka spah. Ki la kamai ia  
 ka Longspah bad ki la bam ia ka Longbriew. Ki la  
 kobsarong ba ki bit ki biang. Hooide, hakhmat ka pyr-  
 thei ki lah ban long kumta, hynrei hakhmat u Blei ki  
 long kiba kyrduh-tasam tam na baroh. Ym tang kata,  
 ki raitong bad ki isangsot haduh katta katta. Nangta  
 ban sa ka matlah, wat lada ki don ki dawaj khmat  
 kiba pawnam. Hooide, ki koit ki khmat ka met, hyn-  
 rei ki khmat ka mynsiem ki matlah lut baroh khoit.  
 Nangta ki kobsarong ba ki bun ki sopti sopjat bad ki  
 riam ki beit bha, hynrei ha ka liang ka mynsiem ki  
 lyngkhuit bad ki isaitmet, ki ijli, ki i-khning wat tang  
 ban peit ruh. La katta ruh, u Jisu u sngewsynei ia  
 ki. U sneng bad U kyntu ia ki ban leit thied na U  
 ia ka ksiar bashisha khnang ba kin dup riewspah ha-  
 khmat u Blei ruh. U Jisu u dei u mahajon-bah bad  
 u Nongdie-ksiar Uba shisha. Baroh ka spah ka hajar  
 ka don tang ha U bad ha U marwei. Da kane, u Jisu  
 u mut ban ong ba khlem Ma-u kin nym lah ban leh  
 eiei. Da kaba leh bymsuitniew ia U, da kabym pyrwa  
 ia U, da kaba leh klet ia U, ki pynkyrduh-tasam ia  
 lade. Hangne ka paw shai ba ki Khristan bad ki nong-  
 ialam jong ki ha Laodisea kim sngewdonkam shuh ia  
 u Blei bad ia u Jisu. Ki la sngew ba ki la bit la biang  
 ha ka spah ka hajar jong ka pyrthei. Shuh-shuh, u  
 Jisu u ong ba U dei Ma-u u mahajon die-jaiñ, Uba  
 don lut ki sopti sopjat kiba bitdor, kiba itynnat, kiba  
 lieh phyrnai, U dei Ma-u ka dukan die-jaiñ na kaba  
 ki lah ban ioh ia kato ka jaiñphong, ba ki khot ka  
 "Trimita" ha ka Grik bad kaba la ai nam ha ka shnong  
 kum ka Trimitaria, ym kito kiwei pat ki dukan die-  
 jaiñ jong ka pyrthei. Ka kup ka sem kaba bha tam  
 ka dei ka Hok ka sot. Bad dei tang u Jisu. Uba lah

ban ai ia kane ka kup ka sem kaba bitdor. Kumba ki long mynta, ha ka liang ka mynsiem, ki lyngkhuit na khlieh ha kjat. Kim don jaiñ eiei, wat ka sling ruh kim don! Kane ka paw shai ha kine ki kyntien "ba, ha ka jinglyngkhuit, ka mynraiñ jong phi kan nym paw pyrthei." Ngila ring jinemut ia kine ki kyntien na ka Crik" eskhini tis gymnotitos", kaba mut, kyntien pa kyntien "ka mynraiñ jong ka jinglyngkhuit." Ka jingmut ka dei kane: ki lyngkhuit haduh katta katta ba wat ka jaiñsling ruh kim don ban da ia ka mynraiñ la kumno kumno. Kane ka rukom kren ka long kaba sngewshyrkhei bad kaba khlem akor ruh ha kine ki sngi jong ngi. Hynrei ha ki por hyndai kane kaei kaei ka la ju jia bunsien. Kito kiba pule ia ka histori jong ki Syiem ki Patsha bad ki hima jong ki por hyndai ki la ju lap ba haba uwei u Syiem u jop ia uwei pat u Syiem, uba la ialeh pyrshah ia u haduh katta katta, ban pynjah burom ia uba la shah jop, u Syiem nongjop u ju hukum ban sloit lyngkhuit ia u Syiem ba la shah jop, ia ka mahadei jong u bad ia ki Bakhraw Batri jong u, khnang ba ka mynraiñ jong ki, shynrang bad kynthei, kan paw pyrthei bad kumta ki briew, kiba peit ia ki, kin dup rkhje-beiñ bad bynthiew ia ka mynrain jong ki. Kumne ki ju leh ha kito ki por hyndai, ha kiba ka akor ka burom kam pat da ieng rasong bha. Ha ka jingshisha, ka kyntien "Eskhini" ka mut ka mynraiñ kumba ka long ha ka longbriew manbriew. Bad u Ioannis, u nongthoh jong ka Kitab Jingpynpaw. u mut thik ia kane hi bad ka Jynthoh Bakhuid ka dei ka nongrim jong u. Ka dei ka rukom leh ki 'riewhyndai, haba ki da kwah shisha ban pynjah burom iano iano ba ki isih bad ki khñing (II Sam. 10:4-5). Ki Nonglathuhlyra ruh ki la kdew ia kane ka rukom pynjah burom haba ki sneng ia ki paitbah bad ia ki Bakhraw batri ban kylla kaba mut (Hos 2:3,9; Is. 20:4; Ez. 16:37-39; 23:26-29; Mik. 1:11; Nah 3:5). Da kane ka rukom kren, u Ioannis u mut ban iathuh shai-kdar, ba ki Khristan bad ki nonglalam jong ki ha Laodisea ki la liem, ha ka Pap ka Sang, ki la shah jop ha kane ka Nongshun, kaba la sloit lut ia ki jaiñ ki nep jong ki bad ka: la. pynlaid. lyngkhuit ia ki kum ki mrad,

kumban ong noh. Hangne ka paw shai haduh katno ki la ngam ha ka ahor jong ka Pap ka Sang, kaba la pynisaitmet ia ki haduh katta katta hakhmat u Blei.

Da shisha ki Khristan bad ki nongpyhaid jong ki ba Laodisea ki la isaitmet na ka daw ka jinglyngkhuit haduh ba wat i jaiñsling ruh kim don shuh ban da ia la ka mynrañ. Kane ka la pynsngewsih ia u Jisu, bad u la pynrem ia ka, hynrei ym da ka jingkyrkoh ne ka jingsngew ba la ioh ia la ka kput, hynrei da ka jingsngewsynei bad ka jingmyllung mynsiem. Te u pynbna ba dang lah ban leh eiei. Ki dang don lad ban thied ki jaiñlieh phyrnai na u Jisu, Uba kloï ban die ha ka dor kaba tad. Ym tang kata, U kloï ruh ban pynriam pynbeit ia ki da lade hi da kata ka jaiñlieh phyrnai, kaba dei ka khor ka khriam jong ki Syiem ki Patsha bad ki beh ki haiñ. Kine ki jaiñlieh phyrnai (himatia-levka ha ka Grik) kim dei ki jaiñ patbah, hynrei ki dei ki jong ki Lyngdoh, ki Syiem bad ki Bakhraw Batri. Bad ki briew ki ju ai ia ki ha kito kiba ki kwah ban pyndonburom kyrpang ne ha kito kiba ki da ieid thoiñ (Jen. 41:42; Dan. 5:29; Esth 6:6-11; Lk. 15:22-24). Hangne ka paw ba, wat lada ki briew ha Laodisea ki la pap katno katno ruh, u Jisu u dang ñiewkor, U dang burom bad U dang ieid thoiñ thoiñ ia ki bad U kloï ym tang banda ia ka rañ ka rem jong ki, hynrei wat ban pynriam ia ki da ka khor ka khriam jong ki Syiem ki Patsha Kum kane ka jingieid ym lah ban shem hangno hangno ruh.

Ngi la kdew haneng ba ha Laodisea ka don ka Skul-tah ban hikai ban ai dawai dashin, khamtam eh ban pynkoit ia ki khmat da kata kaba ki khot ka "Pawdar Phrygia." Hooïd, na ka liang ka met, ki khmat jong ki ki la bha bad lada jia ba ki pang, ki la ioh ki dawai dashin kiba biang Hynrei hakhmat u Blei, ym tang ba ki pang khmat, hynrei ki da matlah artad. Te u Jisu u kyntu ia ki ban thied na U ka dawai ba tang Ma-u hi U lah ban ai, da kaba kin kyllan ia la ki khmat mynsiem. Kane ka pyni ba ki Khristan bad ki nongtalam jong ki ha Laodisea kim tip shuh kumne ban pynlapher ia kaba bha na kaba sniew. Ia ka Hol

na ka Pap. Ha ka liang ka Akor ka burom Khristan ki la Iaid matlah khlem lah iohi sha kadiang ne kamom. Ka khmat jong ka Sap tiphok-tipsot ka la matlah. Bad ia kane ka jingmatlah tang u Jisu hi u lah ban pynkoit. Hynrei ka shong ha ki mynta ban thied ia ka dawai ba U tyrwa, ka dawai kaba trej kam da shisha bad ka ba tad. Kaba ki donkam ka long tang ka Mon Babha.

Baroh kin kubur ba kane ka pynrem na ka shyntur u Jisu ka long kaba eh bad kaba kthang da shisha. U Jisu hi u kubur ba ka long kumta. Hynrei Um banse, namarba ka jingbym-banse ka thom ia ka sang, kumba ong ki Longshuwa jong ngi. Ia ki kyntien "Nga mai dumok bad Nga pyni" ngi la ring jingmut na ka Grik "Elengkho", ka berb kaba mut ban mai da ka jingdom jingbitar, ban dumok bad ban kynhied khlem tyngkai eiei. Hynrei kam dei ka jingmai da ka jingingkhong khait bad ka jingpynhiarkput, kumban ong noh. Ka dei ka jingdumok bad ka jingkynhied ban pynpeitmat ia ki briew khnang ba kin dup sngewthuh bad peiphang ia la ki jingbakla bad ba kin dup kylla ia la ka jingim. Ka dei ka jingieid bashisha kaba kyntu ia u briew ban mai, ban kynhied, ban dumok ia kito kiba hap ha ka jingbakla. Ban shu iehnoh ia ki kumto bad ban nym sneng nym kraw, ka mut ba ym pyrwa eiei shaphang jong ki, la ki im ne ki iap ha ka pap. Kane ka rukom mai ka pynsngewthuh ia ki briew ba ki la bakla bad kim lah ban leo. Haba u Ioannis Nongpynbaptis u kynhied paitbah ia u Herod, "Mem bit ban iapoikha bad ka kurim u para jong me!", u Herod u la sngewthuh ia la ka jingbakla bad ka pap ka sang ba u la leh, wat la um shym iehnoh ia ka. Ka Herodias ruh ka la sngewthuh ba ka la klim (Mt. 14:3-5; Mk. 6:17-19; Lk. 3:19-20). Ha ka Jutang Barim ruh ngi lap ia kane ka rukom mai rukom kynhied ia ki briew, mynba u Nathan u la mai ia u Dabid ba u la klim bad ka Bethsahea bad ba u la pynlap ia u kurim jong ka, u Uriah (II Sam. 12:1-14). Kane ka rukom mai rukom dumok ka kdew ruh ia ka jingbakla. Ka pyni, ka pynshai, ka pynsngewthuh. Hangne u Jisu u pyni ba U dei da shisha u Hynmen, u Bah-bah, Uba ka jingthmu jong. U ka long ban pyni ban kdew wat haba U mai bad u dumok.

Kane ka pyni ia ka jingimsngi jong U na ka bynta ka Balang bad ki nongpyniaid jong ka ha Laodisea.

Shuh-shuh, u Jisu u ong ba U sympat ia kito kiba U ieid namarba u kwah ba kin kylla kaba mut. Ia ki kyntien "Nga sympat" ngi la ring jingmut na ka Grik "Pedev-o", kaba mut ban hikai, ban peitngor, ban im-sngi ban peit bad ban sumar ba uto uba ngi hikai un pyndep ia kaba u la iohsngew bad ban pynshitom lada um shanshkor ne um leh kumba la hikai. Na kane ka kyntien ka mih ka kyntien Phareng "Pedagogy", kaba mut ka rukom hikai, pynnang-pynstad bad pynbeh pynsan ia ki khynnah ban longbriew manbriew. Da kane, u Jisu u mut ban ong ba U hikai bniah, U im-sngi, U peit U sumar; hynrei lada ki briew ki leh mutlop, Um aili-ailan, U sneng, U mai, U dumok, U kynhied bad U pynshitom ruh haba donkam. Kane ka dei ka jinghikai jong ka Jutang Barim ba ki kpa ki kmie bad ki nonghikai kim dei ban aili, hynrei ki dei ban pyrkhing da ka jingieid ia ki khun ki kti jong ki bad ia kito kiba ki hikai (Pha 13:24; 23:13,14; 27:6; 29:15,17; Sir.30:1; Job5:17; Ps.9:12) Ha ka Jutang Bathymmai ruh ngi shem ia kane kajuh ka jinghikai ba uto, uba ieid shisha, u mai u dumok, u kynhied haba u iohi ia uno uno uba leh bakla (I Kor.11:32; Heb.11:7,8). Haba uno uno um ong eiei shuh haba u iohi ba ki briew ki leh bakla bad u shah ba kin leh katba ki mon, ka mut ba um pyrwa eiei shaphang jong ki, um sngew eiei lada ki jot ne ki bha. Ka dei ka dak jong ka jingisih bad ka jingkyntait(Hos.4:17).

Khatduh eh, u Jisu u kyntu jur ia ki Khristan ha Laodisea ban im-sngi ia ka sneng ka kraw ba u la ai bad ban durlap ia ka. Ia ki kyntien "To im-sngi. . . bad durlap" ngi la ring jingmut na ka Grik "zilo-o", kaba mut ban shitrhem bad ban shongshit ha kaba ia-beh ia ka hok ka sot, ban shim kabu bad ban leh noh hi kumba la kdew. Da kane, u Jisu u hukum ba ki dei ban khie joit mardor bad ban sdang ban leh eiei. Ym dei shuh ban ap namarba ka por kam shah. Ki dei ban kylla kaba mut shisyndon. Kane ka jingkyntu ka pyni ba u Jisu um pat duh jingkyrmen, wat lada

mynta hi ym don eiei kaba bha ha ka Balang ha Laodisea. Ki dang lah ban khie-im da ka jingiarap jong U. Bad u Jisu um pat iehnoh jyndat ia ki. U iaibud-dien ia ki, wat lada ki kyntait bad kim patiw eiei ia U.

#### d) KA APIL MYLLUNG (3:20)

Ngi la ong ba u Jisu um pat dub jingkyrmen, wat lada ka Balang ha Laodisea ka snjew katno katno ruh. Haba peit kyllum, kane ka jingkyrmen u Jisu kam don nongrim eiei ha ki Khristan ha kato ka shnong. Te nangno ka mih? Kaei ka daw ba u Jisu um pat iehnoh jyndat bad bret noh sha liewlep ia kito ki 'riew-bymman, kiba kyntait bad kibym patiw eiei ia U? Haba peit na ka liang ka Balang ha Laodisea ym don daw eiei ruh em!

Ngim banse ban ong ba kane ka jingkyrmen ka mih na u Jisu hi. U dei hi Ma-u ka daw, ym don kawei pat. Bad kane ka dawbah dawsau ka dei ba u Jisu u ieid thep mynsiem thoiñ thoiñ ia ki briew kibym dawa eiei ruh em, ba u ieid-ei ia kibym wad ia ka jingieid jong U, ia kiba kyntait ia U, ia kibym patiw ia U, bad wat ia kiba pyrshah ia U! U ieid namarba u dei u Blei bad ka jinglong batynrai tam jong u Blei ka dei ka Jingieid-ei khlem daw ia ki jynthaw jong U, khamtam eh ia u khunbynriew (I Io 4: 16), U Jisu u long ka Jingieid, ka Jingieid u Blei ha ka durbriew, ha ka doh ka snam jong ngi hi! Ngi loh-sngew ia kine ki kyntien u Jisu ba ka jingiadei bad ka Balang ha Laodisea, "Nga la ieid ia phi da ka jingieid bymjukut; namarkata, Nga la iailehsbun ia phi (Jer.31:3). Da ka mon sngewbha Nga la ieid ia ki (Hos.14:4). Nga la ieid ia phi (Mal 1:2) ... Hynrei phi kylli, Da kumno Phi la ieid ia ngi?". "Kane keim ka dei ka daw tyndai balei u Jisu um ju iehnoh ia u khunbynriew bad ia ka Balang ha Laodisea. Lait na kane ka daw, ym don daw eiei shuh. Te ka jynthoh Bakhuid ka ong, "Hangne ka nongrim ka jingieid: ym ba ngi la ieid ma-ngi ia u Blei, Hynrei Ma-u keim

U la ieid ia ngi (I Io. 4.10). U la ieid ia la ki jong ... hynrei mynta un sa pyni ba u ieid ia ki haduh katta katta (Io. 13:1) "Da shisha uno uno uba ieid thoiñ thoiñ um ju duh jingkyrmen. U Apostol Paulus u thoh, "Ka iingieid ka iaishah-satar; ka jingieid ka long kaba sbun; ka shaniah ia kiei kiei baroh; ka kyrmen ia kiei kiei baroh! (I Kor 13:4-7)" Te namarba u Jisu um pat duh jingkyrmen, U apil, U kyrpad myllung, u khroh.

Nalor ba uba ieid shisha um ju duh jingkyrmen; u kloi ban wad lada ia ba kito kiba u ieid ki jah noh ne ki phet noh na u. Um ju ong, "Ka mat faleit shato!" Hynrei u ieng joit bad u wad. Ka jingieid ka wad bad ka iaiwad khlempud khlem sangeh. U nongap-langbrot, uba ieid ia la ki langbrot u wad (Mt 18:12-14; LK 15:4-7) Uba ieid u wad ia kiba u ieid (Jrw 1:7; 3:1-5) U Jisu ruh u leh kumjuh. U la pyniasyriem ia lade bad u notgap-langbrot uba bha. Ha u Jisu, ngi iohi shai-kdar ia u Blei Uba iaiwad ia ngi, wat lada ma-ngi ngim pyrkhat eiei shaphang jong U, wat lada ma ngi ngi phet na U, wat lada ma-ngi ngim patiw eiei ia U. Da shisha, ym dei u briew uba wad ia u Blei, hynrei u dei u Blei uta wad nyngkong ia u briew. U Blei jong ngi u dei u Blei Uba wad-shi-wad.

Mynta hangne u Jisu u pyni ba u dei Uba ieid bad Uba wad. Te U ong, "Hakhmih, Nga ieng ha jynkhang bad Nga tied!". Ka kyntien "Hakhmih" ka thew barabor ia kaei kaei kaba phylla bad kaba ngim ju kham iohsngew ne iohi. Ka long da shisha kumta hangne. U Jisu Uba wad ia ki briew kibym donkam ia U, kibym kwah ia U, kiba kyntait ia U, kiba ibeiñ ia U bad kibym parwa ne patiw eiei ia U! Kane ka dei kaei kaei kaba phylla da shisha ha ka histori jong u khunbynriew. Nangta da ki kyntien, "Nga ieng ha jynkhang", u Jisu u mut ba ong, "Wat lada phim khot, Nga wan la ka wan! Wat lada ka jynkhang kam pat plie, Ngan iai-ap babar khlem thait bad khlem sngewsakhrat, namarba Nga ieid ia phi bad Nga thrang hir-hir ia phi." Ki kyntien "Nga tied" ki pyni shai kdar ba u Jisu u wad ki lad ki lynti kumno ban

pynurlong ia ka jingkwah bad ka jingthrang jong U. U leh eiei. U tied; Bad ynda u la tied, lada jia ba ym don ka jubab, U kren hi nabar (Jrw 2:8-13 5:2-8). Kum kane ka jingieid ym lah shuh ban lap hangno hangno ruh. U Jisu u ieid thoiñ thoiñ ia kibym dawa.

Ngì la ong ba uba ieid u kren wat lada ym don jubab eiei hadien ba u la tied ia ka jynkhang. Bad tang shu iohsngew eiei, u kyrpad ba yn khot sngewbha ia u. U Jisu ruh u leh kumjuh. U tyrwa ia lade, U kyrpad, U khroh ia kito, kiba U ieid, ban khot sngewbha ia U. "Khot seh ia Nga," U ong, "Shah seh Ngan wan sha phi! Balei, phi mon em ia Nga?". Hynrei hangne ngi lap kawei ka jinglapher hapdeng u Jisu bad ma-ngi ki briew. Bunsien ma-ngi ngi pynbor. Hynrei u Jisu um pynbor iano iano. U kwah ba kin leh da ka mon sngewbha. Kane ka paw ha kine ki kyntien "Bad un plie ia ka jynkhang" U Jisu un nym thombor ia ka jynkhang. Un ap haduh ban da plie hi! U Blei um pynbor. U la ai ha ngi ka jinglaitluid bad u burom ia ka. Lada ngi ong, "Em", ka sah "Em", lada ngi ong, "Hooïd", u Jisu u trei-kam. Hangne ka paw ka jinglaitluid jong u briew bad ka jingkitkbhieh jong u ruh ia la ka jingim. Ka shong ha u briew bad tang ha u hi ban ong "Em" ne "Hooïd." U Blei u ap bad u Jisu ruh u apl

Hynrei lada u briew u plie u Jisu u rung shisyn-don. Um ap wat shikhyllipmat ruh. Un rung beit beit kum sha iing la jong bad Un rung da ka jing-kmen. Bad tang shu rung, u Jisu un sah bad Un sah slem slem! Um kyrkieh! I kumba Um don eiei shuh ban leh laitnoh tang ban iakynduh ia kito kiba U ieid. Bad kane ka paw ha kine ki kyntien "Ngan shongtam-ja lem bad u bad ma-u lem bad Nga." Kine ki kyntien ki pyni ia ka jingkmén u Jisu ba U la jop ha kane ka jinglaleh ban loh ia ka jingieid kyl-liang jong ki briew. U da hun hi jrut. Ba kane kan kham shai shuh-shuh, ngi donkam ban durap khyn-diat ia ka rukom kren bad rukom thoh jong u Ioan-nis, uba tip bha ia ki dustur jong ki Grik ha Asia Minor.



Na ka khanatang, ngi tip ba ki Grik ki bam lais-sien shisngi. Ki bam mynstep u ruti ba la wieh ha ka waiñ. Ia kane ki khot ka "Akratisma" ha ki por hyndai, mynta ki ong ka "Pro-ino." Ha kane ka por step, kim da bam bun eh bad kim ju kham pynlut por namarba ki dei ban sdang noh ban trei. Nangta ki bam biang ha ka por, shiteng sngi ha ling ne hang-no hangno katba lap. Ia kane ki khot ka "Ariston." Khatduh eh, ynda la ðep trei, ynda la sum la sait, ha ka por kylla-miet, ban jahthait jahjrem, ban iakmen iasngewbha, jai ki iashong ban bam. Kane ka dei ka por bam kaba kongsan tam: ki da bam kham bun, ki da iashong bam slem bha ban ioh iakren iakhana ha ka ieid ka sngewbha shi-ling shi-sem ne bad ki paralok ba la khot sngewbha. Ka la long kum ka jingkhawai-rit kaba man la ka kylla-miet. Ia kane ki Roman ki khot "Coena" bad ki Grik "Dipnon." Ia kane ka "Coena" ki Roman bad ka "Dipnon" ki Grik la ju pynlong barabor ha la ling la sem bad ki khun ki kti bad ki paralok baieid thep mynsiem. Ki iabam jai khlem da kyrkieh eiei: ha kane ka por bam, ka paw ka jingieid bad ka jingiadei paralok da shisha. Ka dei thik kane kaba u Jisu u kwah ban leb. U Ioannis u pyndonkam ia ka berb "Dipnin", kaba mut da shisha ban iashongbam-jai ha kane ka por kylla-miet. Da kane u Jisu u mut ban ong ba U dei u paralok baieid thep mynsiem, Uba thrang ban ioh lad ban iakynduh khnang khnang, ban iashongbam slem bad jai-jai bad ban ioh iakren iakhana ha ka jingkmén, ka jingsngewbha bad khamtam eh ha ka jingieid bashida. U Jisu u mut ban pyni ba Um kyrkieh eiei namarba ym don kawei pat ka kam kaba kham khraw bad kham kongsan ban ia kane ka jinglakyn-duh jong U bad kito kiba plie ka dwar bad khot sngewbha ia U. U kwah ban sah slem katba lah, U kwah ban sah khlem da mih shuh. Kane ka dei ka dur-pharshi kaba itynnad tam jong ka jingieidsbun jong u Blei ia ki briew baroh, wat ia ki riwbymman bad ki riwppap ruh. U Blei u lai-ieid, U lai-tyrwa ia iade, U laiwan, U laisah, U thrang ban iakren iakhana ha ka jingjai-jai khlem da kyrkieh eiei.

U Jisu u kloj ban leh ia kane ha Laodisea, ha kaba ki Khristan bad ki nongialam jong ki ki la lehklet ia U, kim sngewdonkam shuh ia U, kim pyrwa shuh bad kim patiw shuh ia kiei kiei kiba ladei bad U bad ki la pynladei ia lade bad ki 'riewpyrthei, kiba imsngei tang ban kamai ia ka Longspah bad ban bam ia ka Longbriew kum u Thlen. Da shisha, palat ia kane u Jisu um lah shuh ban leh eiei. Ka shong mynta tang ha ka Balang ha Laodisea. Kan leh ne em? U Jisu um pat duh jingkyrmen namarba U iei bad U iei shi-junom, wat lada ki Khristan bad ki nongialam jong ki ki la pynladei ia lade da shisha bad ka pyrthei bad ki nongbud jong ka. Ki 'riewstad ki kdew ba dei tang ha Laodisea ba ka Balang kam shym ngat ha ki jingeh bad ki jingynjar-sat. Ha kiwei pat ki shnong, ka Balang ka shahshitom. Tang ka Sardis bad ka Laodisea ki lait na kane ka jingshah banbein. Kane ka long kaei kaei kaba pynsngewlyngngoh, namarba, khlempep ha kine ki shnong ruh, ka don ka mane-blei ia u Kaisar bad ia blei Roma, ki don ki Nikolait bad ki nongbud jong u Balaam, kiba hikai bad kiba leh ia kito ki jingsniew baroh. Ngi tip ba kiba pyrshah ia ka mane-blei ia u Kaisar, ki shah pynshitom barabor. Te ym lah shuh ban artatien ba ki paitbah ka Balang bad ki nongpyniaid jong ki, kum ki Lyngdohsad bad ki Lyngdohsohblei, ki la pynladei-dur ia lade bad kine kiei kiei. Khnang ban loh imsuk imsaia bad ban loh spah loh phew, kim pyrwa shuh ban thang dhup bad ban pyrta "U Kaisar u dei u kynrad." Khnang ban nym shah kynnoh ne shah kynthah kum kiba khim jingmut, ki labud lang ia ka jinghikai bad ki jingleh jong ki Nikolait bad ki nongbud u Balaam bad kumta ki lakyrniom ha ka labam dohkia bad ha ka leh awra laiphew jait. Te ka pyrthei bad ki 'riewbymman ki laroh ia ki bad ki niew ia ki ki briew kiba ia jingmut hana. Ki la bud ia kata ka Ecumenism kaba ia palat liam ia uno uno u pud. Ka pyrthei bad ki 'riewbymman kim ju kynthoh, kim ju pyrshah ia kito kiba pynladei-dur ia lade bad ki. Lada u Ioannis, Nongpynbaptist, u la ong ha u Herod, "To me kam lei-lei kato ka lasong sang bad ka kurim u para jong me. Haba ka bapli kam han

shuh ban lashong bad u te kam lei-lei ban lashong bad me,” un jin da la ioh ka jingiaroh na ka Herodias, un jin da la shah khot sha iingsyiern ban iabam iadih tang lang, un jin da la ioh ka khusnam ruh. Hynrei namarba u la ong, “Ym bit ba men shong sang bad ka kurim u para jong me”, u la shah set phatok bad ka Herodias ka la wad lad ban pyniap noh hi ia u bad u la shah khrai khlieh kumba baroh ngi tip. (1) Imat ka Balang ha Laodisea ka la sdang ban sniew naduh u Lyngdohsad banyngkong jong ka, u Arckhippus, u khun jong u Philemon, u briew uba riewspah ha Kolosse. Ha kawei ka kot, kaba ki ju nam “Ki Riti ki Apostol” la kdew ba u Arkhippus u la long da shisha u Lyngdohsad jong ka Laodisea bad dei ia une ba u Apostol Paulus hi u sneng ban kitkhia ia la ka deiti.

1. Khlempep ki nongpule jong ngi ki dang kynmaw ia u Paulus VI, uba long uwei na ki Kpa Bakhuid bapawnam tam ha ka histori, bad ia ka Shithi Balang jong u “Ka Humanze Vitae”, kaba long ka Shithi Balang kaba khraw tam bad kaban shah iaroh bad pyrto ha ka histori haduh ban da kut kane ka pyrthei. Ha kato ka por ka pyrthei bad ki 'riewbymman ki la iapyrta shla “Shah ia ngi ban leh awria ban leh sang ia la ka met bad ban pyniap briew “U Paulus VI, kum u mawsiang, u la ieng triang bad u la ong shai-kdar, “EM! YM BIT BAN LEH AWRIA BAD YM BIT BAN PYNAP BRIEW! KA JING-IM-BRIEW KA DEI KA MARKYNTI, KA RI-KYNTI U BLEI! NGIM BIT BAN KTAH KTI IA KA NADUH KATO KA KHYLLIPMAT BA LA PUN LA SENG IA KA HA KA KOB-KSIAR KOBRUPA HADUH KA KPEP!” Tang shu sngew ia kine ki kyntien bashynna, ka pyrthei bad ki 'riewbymman ki la pyrta shla, ki la tim la tia, ki la sin kyrteng laiphew jait ia u Paulus VI, namarba um shym kwah ban pynladei dur ia lade bad ka pyrthei. Bun ki Lyngdohsad ruh ki la tasnoh kti lang bad ka pyrthei ban pynrem bad ban tim ia u Paulus VI. Bun kiwei pat ki Lyngdohsad ki la sngap jar ba ki tieng-eit ia ki 'riewbymman. Hynrei u Kpa Bakhuid, u Paulus VI, um khib, u ieng triang wat lada ka pyrthei baroh kawei ka tim ka tia bad ka kynshi ia u. Hynrei ki la don hi uwei ar ki Lyngdohsad kibe la ieng na ka liang u Kpa Bakhuid, kum u Lyngdohsad jong ngi, u Arch. Hubert D'Rosario.SDB..DD. Ma-u ruh u la shah krenbein ha ki bymman, hana ba um sngewthoh eici. Hynrei u ieng triang lem bad u Paulus VI bad ha ka jingduwai Centenari u la bub kine ki kyntien, “Ban pynjogai ia ka jingpynduh khun namarba ka dei ka Pap ka Sang” Ki bymman ki tim, hynrei ma-ngi ngi sngewsarong ia une u Lyngdohsad.

Hangne, ka paw ba la don eiei kaba bakla naduh ba-  
sdang ka Balang (Kol. 4 : 17). Ka long barabor kumta:  
haba sniew ki Lyngdohsad bad ki Lyngdoh - sohblei,  
sniew kiei kiei baroh, pyut kiei kiei baroh. Blem  
blem ki Lyngdohsad bad ki Lyngdoh - sohblei, blem  
blem ki briew baroh. Ha kum kine ki khep, ka  
Balang ka iap.

### e) KA KHUSNAM (3:21)

Ha ka jingkular ia kane ka Khusnam, ka paw ka  
jingphylla bad ka jingkordor ka jingkylla kaba mut.  
Ka dei ka Khusnam kaba khraw tam na ki Khusnam  
baroh ba u Jisu u la kular ha ki Jylla-niam bapher  
bapher ha Asia Minor. U kular ban pynlong ia ki  
Khristan ha Laodisea kum Ma-u hi bad kum u Blei  
u Kpa: Ki nongsynshar ki nongkhadar ia ka pyrthei  
mariang, ki trai bad ki kynrad jong kiei kiei lem bad  
u Blei. U kular ba pynlong ia ki ki Syiem ki Patsha  
bad kin shong halor ka khet ka bishna thik kum Ma-  
u bad u Blei u Kpa, u Nongbuh Nongthaw jong ki-  
ei kiei baroh bad kin iashong halor kajuh ka khet  
ka bishna; kata ka mut, ka kyrdan jong ki kan long  
ka kyrdan jingblei da shisha.

Lehse mynta kan mih ka jingkylli, "Kumno kia  
iashong ha kajuh ka khet? Ki khet, ha ka por hyn-  
dai ha ki Ri Pdeng-mihngi, kim long kumba ki long  
mynta, ki kynja shuki ne Knor, hynrei ki kynja jyn-  
thiah ba la pynitynnat bha. Te ki la lah ban shong  
bun ngut ruh. Barabor u Syiem bad ka Mahadei ki  
iashong lang halor kajuh ka khet namarba ka jrong  
ka lynter bad kam dei ka shuki ne ka knor kaba  
khim. Te u Jisu u shong khet ha kamon u Kpa, ym  
ha ka khet kaba iapher, hynrei halor kajuh hi ka  
khet bad dei ia kane hi kajuh ka khet ba u Jisu u  
kular ban ai ha ki Khristan ha Laodisea lada ki kylla  
kaba mut. Kane ka dei ka burom kaba khraw da  
shisha bad kito kiba kylla kaba mut naduh ka doh-  
nud bad ka mynsiem, kin loh ia ka na u Blei lyngba  
u Jisu Khrist.

Ka don ruh sa kawei ka jingmut ba u Ioannis u kwah ban ai. U kynmaw ia ka khanatang jong ka jingthaw jong u Blei ia u khunbynriew, ba u Blei ia la thaw ia u khunbynriew ha ka dur ka dar jong U hi bad kane ka dur ka paw ha ka bor bad ka iktiar ba u Blei u ai ha u khunbynriew (Jen.1;26-28). Hynrei da kaba leh pap, u khunbynriew u la duhnoh ia kane ka bor bad ka iktiar ban synshar ban khadar bad u la kylla long pynban u mraw bad u la shah pynradgkangpar na ka hima (Jen 3;23-24). Ka jingkylla kaba mut ka ai biang ha u khunbynriew ia kane ka bor bad ka iktiar ban synshar ban khadar kum mynsnuwa, kata, ban poi biang sha ka kyrdan ba u Blei u la buh bad la mang na ka bynta ki briew baroh.

#### f) KA SENG KA KRAW IA BAROH (3:22)

Kane ka seng ka kraw ka dei ia baroh ki briew. Kum ka Balang ha Laodisea, uwei pa uwei na ngi u lah ban ngat ha ka jingpynshoi "Ban kamai ia ka Longspah bad ban bam ia ka longbriew" bad ngi lah ban ngop ha ka ruh. Ki briew baroh ki don ha ka ka jingma ban hap ha ka ahor jong ka jingbym-salia shuh ia u Blei. Kin nym sngewdonkam shuh ia U, kin leh klet ia U bad kin mane-blei ia ka spah bad ka pap ka sang Baroh ki briew ki lah ban shah pah ban shah khring ban pyniadei-dur ia lade bad ka pyrthei-jot bad ban iakyrniom lang bad ka ha ka pap ka sang.

Hynrei, katba ngi dang im ha kane ka pyrthei, ka dang don ka jingkyrmen. U Blei bad u Jisu ki iaiwad ia ngi wat haba ngi la herkrad na ki. U Jisu u wan shaduh jynkhang ka dohnud jong ngi, U tied. Bad lada ngi plie, U rung shisyndon bad Un shongneh shongsah bad ngi bad un kyntiew ia ngi sha ka kyrdan-blei jong U hi.

Ban pynkut ia ka Sienleh I, u Jisu u la seng u la kraw, U la pynkhuid pynsuba, U la pynbit pynbiang ia la ka iing ka sem, kaba long ka Balang ha ka pyrthei,

wat lada kam dei ka jong ka pyrthei. Kane ka rukom  
 leh ka long kaba dei, namarba kam myntoi ban pyn-  
 bha ia kiwei khlem da sar shuwa ia la ka iing ka sem,  
 ha kaba ki don katto katne ki fiut-ki-fier bad ki synrum  
 kiba pynsniew-dur ia ka iing ka sem. Hadien ba u Jisu  
 u la sar, U la pynkhuid pynsuba ia la ka Rympei, Un  
 tuklar pat ia ka pyrthei baroh kawei, ia ka pyrtheijot,  
 ha ka Sienleh II.

